

O LE EKALESIA A IESU KERISO O LE AU PAIA O ASO E GATA AI • NOVEMA 2012

O Le Liahona



Saunoaga o le Konafesi Aoao

Ua Tuu i Lalo le Tulaga
Manaomia o le Matutua
o Faifeautalai Faamisiona

Ua Fofogaina mai
Malumalu Fou e Lua

Ua Folasia Mai
Mataupu Aoaina
Fou a le Autalavou



© WALTER RANE. E LE MAFI'ONA KOPINA

Ua Maoona i Latou Uma, saunia e Walter Rane

“Ua tago [Iesu] i areto e lima ma i’a e lua lau, ona tepa ae lea i le lagi, ua faafetai; ona tofitofi lea i areto, ma avatu i ona soo, latou te laulau atu ai ia te i latou; ma i’a foi e lua lau ua na tufatufa atu ai ia te i latou uma.

“Ona aai uma lea o i latou, ua maoona” (Mareko 6:41–42).

“O i latou foi na aai pe limagaafe o tane, a e lei faitaulia fafine ma tamaiti” (Mataio 14:21).

SAUNIGA O LE TAEAO O LE ASO TOONAI

- 4 Susu Mai Ia ma Maliu Mai
i le Konafesi
Peresitene Thomas S. Monson
- 6 E Mafai Ea Ona Outou
Lagonaina Nei?
Elder Quentin L. Cook
- 10 Ua Ou Iloa. Ua Ou Ola Ai.
Ua Ou Alofa I Ai.
Ann M. Dibb
- 12 O Se Meaalofa Le
Mafaamatalaina mai le Atua
Elder Craig C. Christensen
- 15 "Ou Te Ola A'u, O Le Mea Lea
E Ola Ai Outou"
Elder Shayne M. Bowen
- 18 Fesili i Faifeautalai! E Mafai ona
Latou Fesoasoani Atu ia te Oe!
Elder Russell M. Nelson
- 21 E Uiga i Faanoanoaga ma Filifiliga
Peresitene Dieter F. Uchtdorf

SAUNIGA I LE AFIIFI O LE ASO TOONAI

- 25 O Le Lagolagoina o Taitai
o le Ekalesia
Peresitene Henry B. Eyring
- 26 Avea ma ni Matua Lelei
Elder L. Tom Perry
- 29 Ia Auai ma le Naunautai
Elder M. Russell Ballard
- 32 "O Mai ia te Au, Le Aiga
e o Isaraelu"
Elder Larry Echo Hawk
- 34 Se a Foi Se Mea e Avatu e le
Tagata e Togiola A'i Lona Ola?
Elder Robert C. Gay
- 37 Tulaga Faatonuina o le Malumalu
Elder Scott D. Whiting
- 39 Tofotofoina O Lo Outou Faatuatua
Elder Neil L. Andersen
- 43 Puipui le Fanau
Elder Dallin H. Oaks

SAUNIGA A LE AU PERISITUA

- 47 Uso e, O Loo I Ai Se Tatou
Galuega e Fai
Elder D. Todd Christofferson
- 51 Ia Totoa i le Lototetele,
ma Malolosi foi ma Toaaga
Epikopo Gary E. Stevenson

- 54 Faaeteete mo Outou Lava
Elder Anthony D. Perkins
- 57 O Faamanuiaga o le Perisitua
Peresitene Dieter F. Uchtdorf
- 60 Fesoasoani ia i Latou e Faatutu
ni Sini Mauululuga
Peresitene Henry B. Eyring
- 68 Vaai Atu i Isi i Tagata e Mafai
ona Avea ai i Latou
Peresitene Thomas S. Monson

SAUNIGA O LE TAEAO O LE ASO SA

- 72 O Fea le Faapaologa?
Peresitene Henry B. Eyring
- 75 O Le Togiola
Peresitene Boyd K. Packer
- 78 Muamua Matau, Ona Auauna
Atu ai Lea
Linda K. Burton
- 81 Aoao Faatasi ma o Tatou Loto
Elder Walter F. González
- 83 O Le Poloaga Muamua ma le Sili
Elder Jeffrey R. Holland
- 86 Mafaufau i Faamanuiaga
Peresitene Thomas S. Monson

SAUNIGA O LE AFIIFI O LE ASO SA

- 90 Avea o se Kerisiano Moni e Faapei
o Keriso
Elder Robert D. Hales
- 93 O Le Olioli i le Faaolaina
o E Ua Maliliu
Elder Richard G. Scott
- 96 Tasi le Laa e Faalatalata Atili
atu ai i le Faaola
Russell T. Osguthorpe
- 99 O Le Faatuatua e
Faataunuu ai Mea Uma
Elder Marcus B. Nash
- 101 Avea ma Soo Moni
Elder Daniel L. Johnson
- 104 Faamanuiaga
o le Faamanatuga
Elder Don R. Clarke
- 106 Faaliliuina i le Alii
Elder David A. Bednar
- 110 Ia Mafuta le Atua ma
Outou Seia Tatou Toe
Feiloai
*Peresitene Thomas S.
Monson*

SAUNIGA AOAO A LE AUALOFA

- 111 Pe Ua Tusia ea i o Tatou Loto le
Faatuatua i le Togiola a Iesu Keriso?
Linda K. Burton
- 115 Ala Ma Ia i o Tatou Tiute
Carole M. Stephens
- 118 E Le Faagaloina Lava Oe e le Alii
Linda S. Reeves
- 121 O Lē Tuuina Atu le Tausiga
Peresitene Henry B. Eyring
- 64 Au Pulega Aoao o Le Ekalesia a Iesu
Keriso o le Au Paia o Aso e Gata Ai
- 125 Faasino Upu o Tala o le Konafesi
- 126 Tala Fou o le Ekalesia
- 128 Au Peresitene Aoao o Ausilali



Aotelega mo le Konafesi Aoao Lona 182 Faaleafatausaga

TAEAO O LE ASO TOONAI, 6 OKETOPA, 2012, SAUNIGA AOAO

Pulefaamalumalu: Peresitene Thomas S. Monson. Taitai: Peresitene Henry B. Eyring. Tatalo Amata: Elder Kevin R. Duncan. Tatalo Faaii: Elder Juan A. Uceda. Musika na saunia e le Aufaipese a le Tapeneko; Mack Wilberg ma Ryan Murphy, faatonu; Clay Christiansen ma Richard Elliott, taokeni: "Mamalu i le Atua," *Viiga*, nu. 40; "Le Faavae Malosi," *Viiga*, nu. 45, arr. Wilberg, pub. Oxford; "Faaola e ia ou Alofa," *Viiga*, nu. 150; "Ia Viia Oe le Atua," *Viiga*, nu. 10; "I Will Follow God's Plan," *Children's Songbook*, 164, arr. Hofheins, e lei lolomia; "Ia Fiafia Tatou," *Viiga*, nu. 3, arr. Wilberg, e lei lolomia.

AFIAFI O LE ASO TOONAI, 6 OKETOPA, 2012, SAUNIGA AOAO

Pulefaamalumalu: Peresitene Thomas S. Monson. Taitai: Peresitene Dieter F. Uchtdorf. Tatalo Amata: Elder Gerrit W. Gong. Tatalo Faaii: Elder Jose L. Alonso. Musika na saunia e se aufaipese tuufaatasi a autalavou mai Bennion ma Taylorsville, Utah; Leah Tarrant, faatonu; Linda Margetts ma Bonnie Goodliffe, taokeni: "Arise, O Glorious Zion," *Hymn*, no. 407; "O le Atua lo'u Tama," *Viiga*, nu. 184, arr. Perry, e lei lolomia; "Faamalosia i le Galuega Nei," *Viiga*, nu. 152; "On This Day of Joy and Gladness," *Hymns*, no. 64, arr. Huff, e lei lolomia.

AFIAFI O LE ASO TOONAI, 6 OKETOPA, 2012, SAUNIGA A LE AU PERISITUA

Pulefaamalumalu: Peresitene Thomas S. Monson. Taitai: Peresitene Dieter F. Uchtdorf. Tatalo Amata: Elder Jay E. Jensen. Tatalo Faaii: Elder Patrick Kearon. Musika na saunia e se aufaipese a le Au Perisitua Mekisateko mai Ogden, Utah; Stephen P. Schank ma Derek Furch, faatonu; Andrew Unsworth, taokeni: "Praise to the Lord, the Almighty," *Hymns*, no. 72; "Ia Fealofani," *Viiga*, nu. 195, arr. Furch, e lei lolomia; "Ieova e, Ia Tautai Pea i Matou," *Viiga*, nu. 47; "Faamoemoe o Isaraelu," *Viiga*, nu. 161, arr. Schank, e lei lolomia.

TAEAO O LE ASO SA, 7 OKETOPA, 2012, SAUNIGA AOAO

Pulefaamalumalu: Peresitene Thomas S. Monson. Taitai: Peresitene Dieter F. Uchtdorf.

Tatalo Amata: Elder Marlin K. Jensen. Tatalo Faaii: Elder Keith R. Edwards. Musika na saunia e le Aufaipese a le Tapeneko; Mack Wilberg, faatonu; Richard Elliott ma Andrew Unsworth, taokeni: "Upu moni o a?" *Viiga*, nu. 170; "Ua Tafa Ata," *Viiga*, nu. 1, arr. Wilberg, e lei lolomia; "Does the Journey Seem Long?" *Hymns*, no. 127, arr. Wilberg, e lei lolomia (Shane Warby, tagata pese toatasi); "Tofia e Auauna i le Atua," *Viiga*, nu. 156; "Pe A Ma Tutu ma le Alii," CSMP by Sally DeFord, arr. Cardon, e lei lolomia; "Pe a Faigata le Ala, Taumafai," *Viiga o Siona* (1912), nu. 126, arr. Wilberg, e lei lolomia.

AFIAFI O LE ASO SA, 7 OKETOPA, 2012, SAUNIGA AOAO

Pulefaamalumalu: Peresitene Thomas S. Monson. Taitai: Peresitene Henry B. Eyring. Tatalo Amata: Elder Octaviano Tenorio. Tatalo Faaii: Elder Larry W. Gibbons. Musika na saunia e le Aufaipese a le Tapeneko; Mack Wilberg ma Ryan Murphy, faatonu; Bonnie Goodliffe ma Linda Margetts, taokeni: "The Day Dawn Is Breaking," *Hymns*, no. 52, arr. Murphy, e lei lolomia; "Pe na Faia Sau Tatalo?" *Viiga*, nu. 75, arr. Wilberg, pub. Jackman; "Fiafia, o le Alii o le Tupu," *Viiga*, nu. 38; "Tu Ieova i Lo Tatou Va," *Viiga*, nu. 89, arr. Wilberg, e lei lolomia.

AFIAFI O LE ASO TOONAI, 29 SETEMA, 2012, SAUNIGA AOAO A LE AUALOFA

Pulefaamalumalu: Peresitene Thomas S. Monson. Taitai: Linda K. Burton. Tatalo Amata: Maria Torres. Tatalo Faaii: Melinda Barrow. Musika na saunia e se aufaipese a tamaitai talavou nofofua matutua mai Siteki a Talavou Nofofua Matutua a Salt Lake Bonneville, Salt Lake Holladay, ma Murray Utah; Emily Wadley, faatonu; Linda Margetts, taokeni: "Faamalosia ia i le Galuega nei," *Viiga*, nu. 152; suifefiloi o le "He Sent His Son," *Children's Songbook*, 34, ma le "I'm Trying to Be like Jesus," *Children's Songbook*, 78, arr. Sally DeFord, e lei lolomia; "Ou te Tu ma Ofo," *Viiga*, nu. 107; "Ua Naunau ia te Oe," *Viiga*, nu. 57, arr. Beebe, pub. Larice.

E MAUA SAUNOAGA O LE KONAFESI

Ina ia maua saunoaga o le konafesi aoao i le tele o gagana, asiasi ane i le **conference**

.lds.org. Ona filifili lea o se gagana. E masani lava ona maua lipine faalogologo i faletusi autu, i totonu o le lua masina e sosoo ma le konafesi.

SAVALI A FAIAOGA O AIGA MA FAIAOGA ASIASI

Mo savali a faiaoga o aiga ma faiaoga asiasi, faamolemole ia filifili se lauga e aupito sili ona fetau lelei ma tulaga o loo manaomia e i latou tou te asia.

I LE FAAVAA

I Luma: Ata na pueina e Derek Israelsen.

I Tua: Ata na pueina e Leslie Nilsson.

PUEGA O ATA O LE KONAFESI

Vaaiga i le konafesi aoao i le Aai o Sate Leki, na pueina e Craig Dimond, Welden C. Andersen, John Luke, Matthew Reier, Cody Bell, Leslie Nilsson, Weston Colton, Sarah Jensen, Derek Israelsen, Scott Davis, Kristy Jordan, Randy Collier, Lloyd Eldredge, ma Cara Call; i Botswana na pueina e John Huntsman; i Pasila na pueina e Francisco Flávio Dias Carneiro; i Esitonia na pueina e Amanda Robinson; i Atenai na pueina e David L. Mower; i Italia na pueina e Christopher Dean; i Mekisiko na pueina e Carlos Israel Gutierrez Robles; i Mozambique na pueina e Daniel Osborn; i Polani na pueina e Lois Jensen; i Sikotilani na pueina e John J. Graham; i Sepania na pueina e Antoni García Corrius; ma i Taiuani na pueina e Danny Chan La.



Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Aposetolo e Toasefululua:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautua: Shayne M. Bowen, Bradley D. Foster, Christoffel Golden Jr., Anthony D. Perkins

Pule Faatonusili: David T. Warner

Faatonusili o le Lagolago mo Aiga ma

Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: R. Val Johnson

Pule Faatonutonu Lagolago: LaRene Porter Gaunt

Lagolago o Lomiga: Melissa Zenteno

Au Tusiutusi ma Faatonutonu: Susan Barrett, Ryan

Carr, David Dickson, David A. Edwards, Matthew D.

Flitton, Mindy Raye Friedman, Hikari Loftus, Lia

McClanahan, Michael R. Morris, Richard M. Romney,

Paul VanDenBerghe, Julia Woodbury

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus,

C. Kimball Bott, Thomas Child, Kerry Lynn C. Herrin,

Colleen Hinckley, Eric P. Johnsen, Scott M. Mooy,

Brad Teare

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Connie Bowthorpe Bridge, Howard G. Brown,

Julie Burdett, Bryan W. Gygi, Kathleen Howard, Denise

Kirby, Ginny J. Nilson, Ty Pilcher, Gayle Tate Rafferty

Tailoloni: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Evan Larsen

Mo le okaina o mekasini, alu i le store.lds.org po o le

Faletusi Tutotonu i Pesega. Telefoni 64127. Totogi o le

Mekasini: \$0.55 (Samoa) i le kopi. Totogi mo le Tausaga

Atoa \$6.60 (Samoa).

Auina atu tusitusiga ma faafesili i luga o le initoneti

i le liahona.lds.org: pe meli mai i le Liahona, Rm.

2420, 50 E. North Temple, Salt Lake City, UT 84150-

0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa" po o se "faatonuala") e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalatua, Siesololovakia, Tenimaka, Take, Iglisi, Esitonika, Fiti, Finelani, Farani, Siamani, Eleni, Hanikeri, Initu, Iselani, Initonesia, Italia, Iapani, Kiripati, Korea, Lativia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafaigofieina), Silovenia, Sipaniolo, Suetena, Tagaloka, Tahiti, Tai, Toga, Iukureini, ma Urutu, ma Viatename. (E eseese lava gagana.)

© 2012 Puletaofia e le Intellectual Reserve, Inc. Ua taofia aia tatau uma. Lomia i le lumaite Setete o Amerika.

E mafai ona kopi tala ma ata o le Liahona mo le toe faaagaina i lotu po o le aiga ae ia le faia ai ni pisinisi. E le tatau ona kopi ni tala po o ni ata pe afai o faasa mai i le laina o loo ta'ua ai le e ona lea faatufugaga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

November 2012 Vol. 36 No. 11. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150, USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address *must* be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.



FAILAUGA I LE FAASOLOGA FAAALAFAPETA

Andersen, Neil L., 39
Ballard, M. Russell, 29
Bednar, David A., 110
Bowen Shayne M., 15
Burton, Linda K., 78, 119
Christensen, Craig C., 12
Christofferson, D. Todd, 47
Clarke, Don R., 108
Cook, Quentin L., 6
Dibb, Ann M., 10
Echo Hawk, Larry, 32
Eyring, Henry B., 60, 72, 121
Gay, Robert C., 34
González, Walter F., 81
Hales, Robert D., 97
Holland, Jeffrey R., 98
Johnson, Daniel L., 109
Monson, Thomas S., 4, 68, 86, 110
Nash, Marcus B., 101
Nelson, Russell M., 18
Oaks, Dallin H., 43
Osguthorpe, Russell T., 104
Packer, Boyd K., 75
Perkins, Anthony D., 54
Perry, L. Tom, 26
Reeves, Linda S., 126
Scott, Richard G., 97
Stephens, Carole M., 123
Stevenson, Gary E., 51
Uchtdorf, Dieter F., 21, 57
Whiting, Scott D., 38

FAASINO AUTU

Agaga Paia, 12, 81, 101
Aiga, 26, 43, 54
Aiga o Isaraelu, 32
Alofa, 10, 78, 98, 126
Alofa Mama, 125
Aoa atu, 18, 104
Aoaoina, 10, 104
Aualofa, 119, 123, 125
Auauna atu, 12, 29, 57, 83, 78, 109, 119, 123, 125
Aulavou, 60
Avea ma Soo, 21, 29, 78, 98, 97, 109
Faaaliga, 60
Faaiipoipoga, 26, 43, 47
Faamalologa, 81
Faamanatuga, 108
Faamoemoe, 15
Faapaiga, 51
Faatoagaina, 68
Faatuatua, 39, 83, 101, 119
Faigata, 39, 119, 123
Faitalia, 51
Feagaiga, 54
Galuega, 47
Galuega, 29
Galuega faafaifeautalai, 4, 18
Iesu Keriso, 15, 18, 75, 101, 119, 126

Kerisiano, 97
Legavia, 6, 39
Liua, 6, 54, 81, 104, 110
Loto faafetai, 119
Lotomaulalo, 34, 83
Lotonuu, 98
Maliu, 15
Malumalu, 4, 12, 38, 97
Mea e faamuamua, 21
Molimau, 68, 110
Musumusuga, 91
Olioli, 21, 57
Perisitua, 47, 51, 54, 57
Ponokalafi, 6
Salamo, 34, 75
Talafoasolopito o aiga, 97
Talei, 60
Tamaiti, 15, 43
Tatalo, 91
Taulaga, 34
Tiute, 123
Toa, 51, 68
Toefuataiga, 18
Toetu, 15
Togiola, 6, 75, 108, 119
Tulaga faatonuina, 38
Tusi a Mamona, 32
Usiutai, 109



Saunia e Peresitene Thomas S. Monson

Susū Mai Ia ma Maliu Mai i le Konafesi

Ia tatou faalogologo atu ma le toto'a i savali . . . , ina ia tatou maua le Agaga o le Alii ma maua ai le malamalama o loo finagalo o Ia tatou te maua.

Ia'u lava vaavaai atu, ua faatumulia nofoa uma—vagana ai ni nai nofoa laiti i o'u tua atu. O loo i ai le avanoa mo le faaleleia atili. O se faaaloalo lea mo i latou atonu ua fai si tuai mai, ona o le pisi o le alatele, e sue ai se nofoa pe a taunuu mai.

O se aso sili lenei—le aso o le konafesi. Ua tatou faalogologo atu i se aupaipese matagofie o lagiina se musika maoae. O taimi uma lava ou te faalogo ai i le aupaipese pe faalogo ai i le okeni po o le piano, ou te mafaufau ai lava i lo'u tina, o lē sa fai mai, “Ou te fialia i mea uma ua tuuina atu ia te oe, o faailoga uma ua e patipatia, ma galuega uma ua e faia. Na pau lava lo'u faanoanoaga ona e te le'i

faaaauuina le piano.” Faafetai, Tina. Maimau e pe ana ou faia.

Se mea ina a lelei, o'u uso e ma tuafafine, o le faafeiloai atu ia te outou i le Konafesi Aoao Lona 182 Faalefa-tausaga o Le Ekalesia a Iesu Keriso o le Au Paia o Aso e Gata Ai.

Talu mai la tatou feiloaiga i le ono masina talu ai, ua tolu malumalu fou ua faapaiaina, ma le malumalu e tasi ua toe faapaiaina. I le masina o Me, sa ou maua ai le avanoa e faapaiaina ai le Malumalu matagofie o Kansas City Misuri, ma sa ou matamata i le faafiafiaga faaleaganuu na faia ai. O le a ou auiliilia lena faafiafiaga i la'u tautalaga i le taeao a taeao.

I le masina o Iuni, sa faapaiaina ai e Peresitene Dieter F. Uchtdorf le malumalu ua loa ona faatalitali i ai o Manaus, Pasila, ae o le amataga o Setema na toe faapaiaina ai e Peresitene Henry B. Eyring le malumalu faatoa toe faafou i Benos Aires, Atenitina, o se malumalu sa ou maua le avanoa e faapaiaina ai i le toeitiiti atoa le 27 tausaga talu ai. Ua faatoa lua vaiaso talu ai, na faapaiaina

ai e Peresitene Boyd K. Packer le Malumalu matagofie o Brigham City Temple i lona nuu moni na soifua ma ola a'e ai.

E pei ona ou ta'ua muamua, e leai lava se fale e fausia e le Ekalesia e sili atu ona taua nai lo se malumalu, ma ua tatou fialia ua 139 malumalu ua faaaogaina i le lalolagi atoa, ma le isi 27 ua faasilasila atu pe o loo fausiaina nei. Tatou te faafetai lava mo nei maota paia ma faamanuiaga ua latou aumaia i o tatou olaga.

O le taeao nei ou te fialia e faasilasila atu isi malumalu e lua, o le a fausia i masina ma tausaga a sau, i nofoaga nei: Tucson, Arizona; ma Arequipa, Peru. O auiliiliga e faatatau i nei malumalu o le a tuuina atu i le lumanai pe a maua mai faamaoniga o pemitā e tatau ai.

Uso e ma tuafafine, o le a ou liliu atu nei i se isi mataupu—ua ta'ua, o le auaunaga faamisiona.

Ua umi se taimi o faatagaina e le Au Peresitene Sili ma le Korama a Aposetolo e Toasefululua ia alii talavou mai ni atunuu patino e auauna atu pe a atoa le ta'i 18 o tausaga pe a agavaa, gafatia, faauu mai aoga maua luga ma faaalua lo latou naunau faamaoni e faamisiona. Sa avea o se aiaiga faavae patino a se atunuu ma sa faatagaina ai le fia afe o alii talavou e faatinoina ni misiona faamamaluina ma faataunuuina ai foi a latou matafaioi faamiliteli e manaomia faapea foi avanoa faaleaoaoga.

Sa lelei lo tatou aafiaga ma nei faifeautalai ta'i 18 tausaga le matutua. E lipotia mai foi e o latou peresitene o misiona lo latou usiusitai, faamaoni, faatagata matutua, ma lo latou auauna atu ma le mataalia e faapei foi faifeau faamisiona matutua e galulue i na lava misiona. O lo latou faamaoni, usiusitai ma le faatagata matutua, ua mafua ai ona matou mananao i lena lava faiga ia vave faatino le auaunaga faafaifeautalai mo alii talavou *uma* tusa lava po o fea le atunuu e o mai ai.

Ou te fialia e faasilasila atu ua amata nei loa lava, o alii talavou uma e agavaa ma gafatia, o e ua faauu mai aoga maua luga pe o isi aoga e tutusa ma le maua luga lena, tusa lava po o





fea e nonofo ai, o le a maua le avanoa lena e fautuaina atu ai mo le galuega faafaifeautalai e amata i le 18 tausaga, ae le o le 19. Ou te le o faapea atu o alii talavou uma o le a—pe ua tatau—ona auauna atu i le vave lena. Ae, e faalagolago lava i tulaga o tagata taitoatasi, faapea foi ona faalagolago i le naunautaiga o taitai perisitua, ae ua i ai nei le avanoa lena.

A o matou manatunatu loloto ma le agaga tatalo i le matutua o alii talavou e mafai ai ona amata le galuega faafaifeautalai, sa matou mafaufau foi i le matutua e mafai ai ona auauna atu se tamaitai talavou. O le asō, ua ou fiafia e faasilasila atu, o tamaitai talavou e gafatia, ma agavaa ma ua

i ai le manao e faamisiona, e mafai ona fautuaina atu mo le galuega faafaifeautalai e amata i le 19 tausaga, nai lo le 21.

Matou te faamautu atu o le galuega faafaifeautalai o se tiute faaleperisitua—ma e matou te uunaia alii talavou uma o e ua agavaa ma gafatia i le tino ma le mafaufau, ina ia tali atu i le valaau e auauna atu. E toatele tamaitai talavou o loo auauna atu foi, ae e le o noatia i latou i lalo o le poloaiga lea e tasi e auauna atu e pei o alii talavou. Peitai, matou te faamautinoa atu o tuafafine talavou o le Ekalesia, ua latou faia se saofaga taua i le aveai o ni faifeautalai, ma e matou te taliaina foi la latou auaunaga.

O le a tatou manaomiaina pea lava pea nisi ulugalii matutua se toatele. A mafai i o outou tulaga o i ai, afai ua tatau ona e litaea, ma mafai i lou soifua maloloina, ou te fautuaina outou ia faaavanoaina outou lava mo le galuega faafaifeautalai faamisiona. O le a tautai maua e le tane ma le ava le olioli tele a'o la auauna atu faatasi i fanau a lo tatou Tama.

O lenei o'u uso e ma tuafafine, ia tatou faalogologo atu ma le toto'a i savali o le a tuuina mai i nei aso e lua, ina ia tatou maua le Agaga o le Alii ma maua ai le malamalama o loo finagalo o Ia tatou te maua. Ia aveai lena ma o tatou aafiaga, ou te tatalo ai, i le suafa o Iesu Keriso, amene. ■



Saunia e Elder Quentin L. Cook

○ Le Korama a Aposetolo e Toasefululua

E Mafai Ea Ona Outou Lagonaina Nei?

O nisi i le Ekalesia e talitonu e le mafai ona latou taliina le fesili a Alema i se ioe mautinoa. Latou te le o “lagonaina i le taimi nei.”

Peresitene Monson, matou te alofa, faamamalu, ma lagolagoina oe! O lenei faasilasilaga maoae faaletalafaasolopito e faatatau i le galuega faafaifeautalai, e musuia. Ou te manatuaina le sagisagi fiafia i le 1960 ina ua tuu mai i lalo le matutua e faamisiona ai alii talavou mai le 20 tausaga i le 19. Sa ou taunuu atu i le Misiona i Peretania, o se faifeau faatoa valaauina i le 20 tausaga le matua. O le uluai faifeautalai e 19 tausaga le matua i la matou misiona o Elder Jeffrey R. Holland, o se faaopoopoga maoae. Sa na o ni nai masina lona matamuli i lona 20. Ona mavae lea o se tausaga, ua tele atu le ta'i 19 ua taunuu mai. O i latou o ni faifeautalai usiusitai ma faamaoni ma sa agai i luma le galuega. Ua ou mautinoa o le a tele atu se seleselega o le a maua a o tautino atu nei faifeautalai amiotonu e faataunuu le poloaiga a le Faaola e folafola atu Lana talalelei.

I la'u vaai ia te outou o le tupulaga faia'e, ua sili atu lo outou saunia nai lo soo se tupulaga ua mavae. Ua sili atu lo outou silafia o tusitusiga paia. Peitai, o luitau o loo feagai ma la outou tupulaga a o outou sauniuni mo le galuega,

e tutusa lava foi ma luitau o loo feagai ma tagata uma o le Ekalesia. Ua tatou iloa uma lava le aganuu i le tele o le lalolagi e le ogatasi ma le amiotonu po o le tautinoga faaleagaga. I le talafaasolopito atoa, o loo lapataia ai lava e taitai ia tagata ma aoao mai ai le salamo. I le Tusi a Mamona, sa matua

popole lava Alema le Itiiti e uiga i le amioletonu ma le leai o ni tautinoga, o lea na ia faamavae ai mai le avea ma faamasino sili, o le taitai o le nuu o Nifae, ae taulai atoa atu ana taumafaiga i lona valaauga faaperofeta.¹

I se tasi o fuaiupu sili ona loloto i tusitusiga paia uma, o loo folafola mai ai e Alema e faapea, “Afai ua oo ia te outou se liuga o le loto, ma afai ua outou lagona le fia pepese i le pese o le alofa togiola, ou te fia fesili atu, e mafai ea ona outou lagonaina nei?”²

Ua lipotia mai e taitai o le Ekalesia i le lotoifale i le salafa o le lalolagi e faapea pe a tagai i ai o se itutino atoa, o tagata o le Ekalesia, aemaise lava o o tatou talavou, e le i i ai lava se taimi ua sili atu ai le malolosi nai lo le taimi nei. Ae toetoe lava i taimi uma latou te ta'ua ai ni popolega se lua: muamua, o le luitau o le faateleina o le amioletonu i le lalolagi ma le, lona lua, o le le popole ma le leai o se tuuto o nisi o tagata o le ekalesia. Latou te sailia le fautuaga e uiga i auala e fesoasoani ai i tagata ia mulimuli i le Faaola ma ausia se liua loloto ma le tumau.

O lenei fesili “E mafai ea ona outou lagonaina nei?” o loo tagitagi mai pea i le gasologa o seneturi. Faatasi ai ma mea uma ua tatou mauaina i lenei tisipenisione—e aofia ai le Toefuataiga mai o le atoaga o le talalelei a Iesu



Keriso, le sasaa tele mai o meaalofo faaleagaga, ma faamanuiaga le mafaafitia a le lagi—e lei i ai lava se isi taimi ua sili atu ai le taua o le lu'i a Alema nai lo le taimi nei.

I le taimi lava na faatoa maea ai ona valaauina Ezra Taft Benson o se Aposetolo i le 1943, sa fautua mai ai Peresitene Siaosi Alapati Samita³ e faapea, “O lau misiona . . . o le . . . lapatai atu i tagata . . . i se ala sili ona agalelei e te mafaia ai ina ia avea ai le salamo ma vaifofo e tasi mo gasegase o lenei lalolagi.”⁴ O le taimi na faia ai lea saunoaga, sa matou i ai i le lotolotoi o fetauaiga o le Taua Lona Lua a le Lalolagi.

O aso nei ua matua faateleina le agasala. Sa fai mai talu ai nei se tusitala lauiloa, “Ua iloa uma e tagata e matautia le aganuu, ma e leai ma se tasi o faamoemoe e suia lena mea.”⁵ O le faaalua faifai pea o uiga malolosi ma le ola le mama i musika, faafiafiaga, ata, ma isi ala o faasalalauga i a tatou aganuu faaonapo nei, ua matua uiga ese. Sa faamatalaina manino lenei mea e se failotu e matua faaaloalogia o le Lotu Papatiso ina ua ia faapea mai, “O le tulaga faaleagaga o le aiga o tagata e tetee atu i le leaga ua afaina.”⁶

E le o se mea e faateia ai e faapea o nisi i le Ekalesia e talitonu e le mafai ona latou taliina le fesili a Alema i se ioe mautinoa. Latou te le o “lagonaina i le taimi nei.” Latou te lagonaina ua latou matelaina faaleagaga. O isi ua faitai, tigi, pe le fiafia. Afai e faatatau nei faamatalaga ia te oe,⁷ e taua la le iloilo pe aisea e te le o “lagonaina ai i le taimi nei.”

O le toatele o loo i ai i se matalaina faaleagaga ma ua leai se tuuto, e le faapea ua aafia i ni agasala po o ni soligatulafono matuia, ae ua latou faia ni filifiliga e lē atamai. O nisi e le o manatu mamafa i le tausiga o a latou feagaiga paia. O isi ua tele atu o latou taimi e faaalu i mea e itiiti le taua. O nisi ua faatagaina ia manatu faaleaganuu ma faaupufai e faavaivaia ai lo latou faamaoni i le talalelei a Iesu Keriso. O nisi ua faaaafia i latou lava i mea faainitoneti ua soona fai, pe faamamafa ai, ma, i nisi tulaga, ua faatupu ai ni tala o ni mea sese a uluai

taitai o le Ekalesia. Ona latou faia lea o ni faaiuga le sa'o lea e mafai ona aafia ai le molimau. O soo se tasi sa faia nei filifiliga e mafai ona salamo ma toe faafouina faaleagaga.


O le faatofuina i tusitusiga paia e taua lea mo le faafaiileleina faaleagaga.⁸ O le afioga a le Atua e musuiaina le tuuto atu ma galue o se pulu pāsama mo lagona ua faamannualia, ita, po o le le fiafia.⁹ Pe a faaitiitia lo tatou tuuto atu mo soo se mafuaaga, o se vaega o le vaifofo o le salamo.¹⁰ O le tuuto atu ma le salamo e fesootai faatasi.

O C. S. Lewis, o se tusitala Kerisiano e galue malosi, sa ia tusia e uiga i lenei mataupu i se ala malosi. Sa ia ta'ua e faapea e ta'u atu e le Faa-Kerisiano i tagata ina ia salamo ma folafola atu ia i latou le faamagaloga; ae seiloga e iloa e tagata ma lagona ua latou manaomiaina le faamagaloga, e le uunaia lava i latou e le Faa-Kerisiano. Sa ia taua, “Pe a e gasegase, e te faalogo i le fomai.”¹¹

Sa faailoa mai e le Perofeta o Iosefa Samita e faapea a o lei faia lou papatisoga, e mafai ona e i ai i se tulaga le mautonu i le va o le lelei ma le leaga. Ae “ina ua e auai i lenei Ekalesia ua e ioe atu e te auauna i le Atua. Ina ua e faia lena mea sa e tuua le vaega o tagata sa le mautonu, ma e le mafai lava ona e toe [foi] i tua.” O lana fautuaga sa faapea mai e le tataua lava ona tatou fulitua i le Matai.¹²

O loo faamamafa mai e Alema e faapea e ala mai i le Togiola a Iesu Keriso “o loo faaloaloa mai pea aao o le alofa mutimutivale” ia i latou e salamo.¹³ Ona ia fesili mai lea i ni fesili auiliili ma le taua e pei o le: Pe ua tatou saunia ea e fetaiiai ma le Atua? Pe o tatou tausua ea i tatou lava ina ia le pona? E tataua ona tatou mafaufau uma i nei fesili. O le aafia o Alema lava ia i lona le mulimuli i lona tama faamaoni ma sosoo ai ma lona malamalama manino i le tele o lona manaomiaina o le faamagaloga ma le uiga o le pepese i le pese o le alofa togiola lea e mamana ma lē mafaafitia.

E ui ina tataua ona mafaufau i tauuuga o soo se mea e faaitiitia ai le tuuto atu, ae e lua ni luitau fitoitonu



e taatele ma iloga. O le mea muamua o le agaleaga, o le mātetele, ma sauaga i aiga. O le lona lua o feusu-aiga le mama ma mafaufauga eleelea. O mea nei e masani lava ona muamua mai ma o le faapogai lea o filifiliga ia faaitiitia le tuuto atu.

O le auala tatou te taulimaina ai i latou e sili ona tatou vavalalata e matuai taua lava. O le mātetele, faasaua, le migao, ma le le faaaloalo i totonu o le aiga e le taliaina—e le taliaina mo tagata matutua ma e le taliaina foi mo le tupulaga faiae. Sa lei toaga lo'u tama i le Lotu ae o se faataitaga maoae lelei, aemaise i lona taulimaina o lo'u tina. E masani lava ona ia fai mai, “O le a faamasinoina e le Atua ia tane mo loimata uma e maligi o a latou ava.” O loo faamamafaina mai foi lenei manatu faavae i le “O Le Aiga: O Se Folafolaga i le Lalolagi.” E faitauina, “[O i latou] e faasaunono i taitoalua po o fanau . . . o le a i ai se aso tou te tutu atu ai e tali atu i luma o le Atua.”¹⁴ E tusa lava po o le a le aganuu o loo tatou ola ae ai, pe sa faasaua pe leai foi o tatou matua ia i tatou, e le tataua lava ona tatou faasaua atu i soo se tasi i le faaletino, faalelagona, po o faaupuga.¹⁵

O le manaoga mo le faaaloalo i malo e lei i ai lava se taimi ua sili atu ai le taua nai lo le taimi nei. O le faavae o le agalelei ma le faaaloalo e amata i o tatou aiga. E le o se mea e faateia ai le faaitiitia o uiga faaalua o tagata lautele i le taimi lava e tasi e



le a le tali? Ua autausagā o aoao mai pea perofeta ma aposetolo i le taua o faatinoga faalelotu i le aiga.¹⁹

Matua, e taua lou toaga e auai i sauniga ma polokalama a le Ekalesia faatasi ma lou aiga. Peitai, e le o toe lava lea e faataunuu ai lou tiute paia o le aoao o lau fanau ia ola i ni olaga mama ma amiotonu, ma savavali ma le sao i luma o le Alii. O le faasila-silaga a Peresitene Monson i lenei taeao, e taua le faataunuuina o lenei mea ma le faamaoni i totonu o le aiga aua o nofoaga ia o le sulufaiga lea o loo i ai le agalelei, faamagaloga, upumoni, ma le amiotonu. E tatau ona i ai i matua le lototele e faamama pe mata'ituina le faaogaina o le Initoneti, televise, ata tifaga, ma musika. E tatau ona i ai i matua le lototele e fai atu ai leai, puipui le upumoni, ma tuu atu se molimau mamana. E manaomia ona iloa e lau fanau e i ai lou faatua-tua i le Faaola, e te alofa i lou Tama Faalelagi, ma lagolagoina taitai o le Ekalesia. O le faatagata matua faaleagaga e tatau ona uluola i totonu o o tatou aiga. Ou te faamoemoe e leai se tasi o le a tuua lenei konafesi e aunoa ma se malamalama o faafitauli o le amio mama o o tatou aso e tatau ona talanoaina i totonu o le aiga. Epikopo, taitai perisitua ma ausilali e manaomia ona outou lagolagoina aiga ma ia mautinoa o loo aoaoina ia mataupu faavae faaleagaga. E mafai foi ona lagolagosua i ai ma faiaoga o aiga ma faiaoga asiati, aemaise lava i fanau a matua nofotoatasi.

Sa fesiligia ma le naunautai e le alii talavou lea sa ou ta'ua pe silafia e Aposetolo po o le a le vave i le olaga e tatau ona amata puipua ma aoao ai e tetee atu i ponokalafi ma mafaufauga elealea. Faatasi ai ma le faamamafa na ia ta'ua e faapea, i nisi nofoaga e le faapea ua vave tele ona fai a o lei faauu le autalavou mai aoga tulagalua.

O talavou na aafia i ata le mama a o itiiti lava ua matatau faapea ua latou le faagavaaina i latou lava mo au-aunaga faamisiona ma feagaiga paia. O se taunuuga, e mafai ona matua faaitiitia lava lo latou faatuatua. Ou te manao e faamautinoa atu ia te outou

faamalepeina ai le aiga. O le aiga o le faavae lea o le alofa ma le faatu-mauina o le faaleagaga. O le aiga e siitiaina se siosiomaga lea e mafai ai ona faatupulaia ia faatinoga faalelotu. E moni lava e “matagofie mea uma pe a i ai le alofa i le aiga.”¹⁶

O feusuaiga le mama ma mafaufau-uga elealea e solia ai tulaga faatonuina na faavaeina e le Faaola.¹⁷ Sa lapataia i tatou i le amataga o lenei tisipenisione e faapea o feusuaiga le mama atonu o le a avea ma luitau aupito sili lea.¹⁸ O ia amioga, a aunoa ma le salamo, o le a mafua ai se matelaina faaleagaga ma le leai o se tautinoga. O ata tifaga, TV, ma le Initoneti e tele lava ina faasalalaui mai ai savali ma ata leaga. Sa ma i ai ma Peresitene Dieter F. Uchtdorf talu ai nei i se nuu i le vaomatua o Amasone ma matauina ai ni satelite i fale e oo lava i nisi o tamai fale faatauva. Sa ma fiafia i le maua ai o faamatalaga matagofie i lenei nofoaga maotua. Sa ma iloaia foi e toetoe lava a leai se nofoaga i lenei lalolagi e le

o mafai ona aafia i ata faatuinanau, le mama, ma faaosofia ai feusuaiga. O le tasi lea o mafuaaga ua avea ai ponokalafi ma se mala i o tatou aso.

Talu ai nei sa fai ai se ma talanoaga 'anoa ma se alii 15 tausaga e umiaina le Perisitua Arona. Sa ia fesoasoani mai ia te au ia malamalama i le faigofie i lenei vaitau o Initoneti mo tagata talavou e toetoe lava a le mafaufauina le matamata i ata mataga ma ponokalafi. Sa ia faailoa mai e mo le tele o mataupu faavae o loo aoaoina e le Ekalesia, o loo i ai lava se faailoaga i malo i se tulaga aoao e faapea o le solia o nei mataupu faavae e mafai ona i ai ni aafiaga faataumaoui i le soifua maloloina ma le ola manuia. Sa ia ta'ua le ulaina o sikareti, faaogaina o fualaa oona, ma le inuina o le ava malosi e tupulaga talavou. Ae sa ia matauina e le o i ai se faitioga leotele faapea po o se lapa-taiga iloga faalauaitale mai le malo e uiga i ponokalafi po o le ola le mama.

Ou uso e ma tuafafine pele, e sao lelei le auiliiliga a lenei alii talavou. O

le autalavou, e pei ona aoao mai e Alema, e ala i le salamo e mafai ai ona e agavaa mo faamanuiaga uma o le lagi.²⁰ O le uiga atoa lena o le Togiola a le Faaola. Faamolemole talanoa i ou matua po o se faufautua faatuatuaia, ma fefautuagai foi ma lou epikopo.

Pe a oo mai i le ola mama, e talitonu nisi tagata matutua e faapea o le usitai i se galuega taua ma agaalofo po o se mataupu faavae e aveesea ai le manaomia ona mulimuli i aoaoga a le Faaola. Latou te faapea ifo ia i latou lava o amioga sese faalefeusuaiga o sina agasala itiiti . . . [pe afai o au] o se tagata agalelei ma agaalofo.”²¹ O ia mafaufauga o se pepelo matuia lea e te ta'uina ia te oe lava. Sa faailoa mai ia te au e nisi talavou e faapea, o la tatou filosofia i le taimi nei, e le “moomia” le soona taumafai malosi i le tele o itu, e aofia ai le ola tonu e tusa ma mataupu faavae amiotonu.²² Faamolemole aua nei outou pauu atu i lenei mailei.

I le papatisoga tatou te folafola atu ai e tauave i o tatou luga “le suafa o [Iesu] Keriso, ma maua [le] *naunautai* e auauna atu ia te ia e oo i le iuga.”²³ O sea feagaiga e manaomia ai se taumafaiga lototele, tuuto, ma le amiosao pe afai e ao ona tatou faaauau e pepese i pese o le alofa togiola ma tumau i le liua moni.

O se faataitaiga lauiloa o le tuuto ina ia malosi ma le le mafaagaetia mo soo se tagata lava sa faaalua e se Tagata Taalo Olimipeka mai Peretania sa tauva i le Olimipeka i le 1924 i Pale, i Farani.

O Eric Liddell o se atalii o se faifeautalaitai Sikotilani na talai i Saina ma o se alii lotu e tuuto. Sa ia faaitaina le taitaiga a Peretania o le Olimipeka i lona musu lea e tamoe i se tuuga faataitai 100 mita sa faia i le Aso Sa, e ui sa matua faamalosi o ia. Mulimuli ane sa manumalo o ia i le tuuga 400 mita. O le faataitaiga a Liddell o le musu e tamoe i le Aso Sa na patino lava le musuia.

O ata ma maafaamanatu e faamaluina ai o ia ua faasino atu i upu musuia mai le Isaia, “A o ē faatalitali ia Ieova, e toe faafouina lo latou malosi; latou te sii ae apaau e pei o aeto; latou

te [taufetuli], a e le vaivai; latou te savavali, a e le [matapogia].”²⁴

O le amio lelei a Liddell sa matua aafia ai lava le faaiuga a lo ma atalii aupito litiiti ia le auai i taaloga i le Aso Sa ma o le mea na sili atu ona taua o le tuueseina lea o ia lava mai le amioletonu ma amioga faalelalolagi. Sa ia faaaogaina le upusii mai ia Isaia e fai ma ona sao i le tusi o le tausaga a le aoga. Sa tuua e Eric Liddell se faataitaga mamana o le naunautai ma le tuuto i le mataupu faavae.

A o mulimuli a tatou talavou i le fautuaga a Peresitene Monson e ala i le saunia e faamisiona, ma pe a tatou ola uma i mataupu faavae na aoao mai e le Faaola ma saunia e fetaiai ma le Atua,²⁵ o le a tatou manumalo i se tuuga e sili atu ona taua.²⁶ O le a tatou maua le Agaga Paia e fai ma o tatou taiala mo le taitaiga faaleagaga. Mo soo se tasi lava e le o faatulagaina tatau lona olaga, ia manatua, e le o tuai lava le faia o le Togiola a le Faaola e avea ma faavae o lo tatou faatuatua ma olaga.²⁷

I upu a Isaia, “e ui lava ina pei o ofu mumu a outou agasala, e sisina ia e pei o le kiona; e ui lava ina mumu ia e pei o le ie ulaula, e avea e pei o fulufulu mamoe.”²⁸

O lau tatalo faamaoni ia faia e i tatou uma taitoatasi se faatinoga talafeagai ia lagona ai le Agaga i le taimi nei ina ia *mafi* ai ona tatou pepese i le pese o le alofa togiola ma o tatou loto atoa. Ou te molimau atu ai i le mana o le Togiola a le Faaola i le suafa o Iesu Keriso, amene. ■

FAAMATALAGA

1. Tagai Alema 4:15–19.
2. Alema 5:26.
3. O Siaosi Alapati Samita sa avea i le taimi lena ma Peresitene o le Korama a Aposetolo e Toasefululua, a o lei avea ma Peresitene o le Ekalesia i le aso 21 Me, 1945. (Tagai *Deseret News 2012 Church Almanac* [2012], 98.)
4. George Albert Smith, i le Sheri L. Dew, *Ezra Taft Benson: A Biography* (1987), 184.
5. Peggy Noonan, “The Dark Night Rises,” *Wall Street Journal*, July 28–29, 2012, A17.
6. Dr. R. Albert Mohler Jr., president, The Southern Baptist Theological Seminary, presentation to religious leaders, New York City, Sept. 5, 2012.
7. Tagai 2 Nifae 2:27.
8. Tagai Ioane 5:39; Amosa 8:11; tagai foi James E. Faust, “A Personal Relationship with the Savior,” *Ensign*, Nov. 1976, 58–59.
9. Tagai Alema 31:5.

10. Tagai Alema 36:23–26.
11. C. S. Lewis, *Mere Christianity* (1952), 31–32. O Lewis o se Tagata Faauu mai le gagana Faa-Peretania i le Iunivesite o Oxford ma sa mulimuli ane avea ma taitaifono o le Medieval and Renaissance English i le Iunivesite o Cambridge.
12. Tagai *Aoaoga a Peresitene o le Ekalesia: Josefa Samita* (2007), 324; tagai foi Faaaliga 3:15–16.
13. Alema 5:33.
14. “O Le Aiga: O Se Folafolaga i le Lalolagi,” *Liahona*, Nov. 2010, 129.
15. Tagai Richard G. Scott, “Removing Barriers to Happiness,” *Ensign*, May 1998, 85–87. O nisi mea taua faaleaganuu o loo feteenai ma aoaoga a le Faaola ma e mafai ona taitaiese ai i tatou. A o ou i ai i le Pasefika i Saute, sa ma feiloai ai ma se alii sa sailiili i le Ekalesia mo le tele o tausaga. Sa ia lipoti mai e faapea na tuia lava lona loto ina ua aoao mai se taitai o le Ekalesia i se konafesi faaleperisitua e faapea, “O lima na sa e fasia muamua ai lau fanau e ao ona faaaogaina e faamanuia ai lau fanau.” Sa ia mauaina ni lesona a faifeautalaitai, sa papatisoina, ma ua avea ma se taitai maoae.
16. “A i ai i le Aiga le Alofa,” *Viiga*, nu. 181.
17. Tagai Alema 39.
18. Tagai Ezra Taft Benson, “Cleansing the Inner Vessel,” *Ensign*, May 1986, 4.
19. Sa faalauiloa mai e Peresitene Gordon B. Hinckley le “O Le aiga: O se Folafolaga i le Lalolagi” i le sauniga aoao a le Aualofa ia Setema 1995. Sa pulefaamalumu ia Peresitene Thomas S. Monson i le suia o le mataupu muamua o le *Tusitaulima 2: Taitaia o le Ekalesia* (2010), “O Aiga i le Ekalesia i le Fuafuaga a le Atua.”
20. Tagai Alema 13:27–30; 41:11–15.
21. Ross Douthat, *Bad Religion: How We Became a Nation of Heretics* (2012), 238; see also Alma 39:5.
22. Aua nei faatagaina se aganuu ua faatamulia i fetauaiga ma le ola le mama ma ua lamatia ai i latou o loo ola i mataupu faavae na aoaoina e le Faaola e faaleagaina lou faatuatua.” E pei ona tusia ma le agamalu e le tusisolo o Wordsworth, “Fafaga [lou mafaufau] i manatu lelei, lea o le a le malo ai lava gutu tautatala leaga, faamasinoga le lelei, e oo i ‘ata lemigao a tagata manatu faapito . . . pe faaleagaina [lou] faatuatua fiafia” (“Lines Composed a Few Miles above Tintern Abbey,” i le *The Oxford Book of english Verse*, ed. Christopher Ricks [1999], 346).
23. Moronea 6:3; faapoopo le faamamafa; tagai foi Mosaea 18:13.
24. Isaia 40:31; tagai Robert L. Backman, “Day of Delight,” *New Era*, June 1993, 48–49.
25. Tagai Alema 34:32.
26. Tagai 1 Korinito 9:24–27.
27. Tagai Helamana 5:12. Sa fautua mai Oliver Wendell Holmes, “Ou te maua le mea sili i lenei lalolagi, e le o le mea tatou te tutu ai, ae o le itu tatou te agai i ai. Ina ia taunuu i le uafu i le lagi, e tatau ona tatou folau atu i nisi taimi faatasi ma matagi ma o nisi taimi e faasaga i ai,—ae e tatau ona tatou folau atu, ae aua nei see ese, pe mau ai lava i le taula” (*The Autocrat of the Breakfast-Table* [1858], 105).
28. Isaia 1:18.



Saunia e Ann M. Dibb

Fesoasoani Lua i le Au Peresitene Aoao o Tamaitai Talavou

Ua Ou Iloa. Ua Ou Ola Ai. Ua Ou Alofa I Ai.

O i tatou o soo o lo tatou Faaola. O lena liua ma le mautinoa, o le taunuuga lena o taumafaiga maelega ma le fuafuaina lelei. O le tagata lava ia. O le faagasologa i le olaga atoa.

Ua musuia lava au i faaitaiga e faia e tagata amiotonu o le Ekalesia, e aafia ai le autalavou tamalii. Ua outou vaavaai atu ma le lototoa i le Faaola. Ua outou faamaoni, usiusitai, ma mama. O faamanuiaga ua outou mauaina ona o lo outou lelei, e aafia ai e le gata i o outou olaga ae faapea foi lo'u olaga ma olaga o le anoanoai o isi i ni ala maoae ae tele lava ina le iloa.

I ni nai tausaga ua mavae, sa ou tu ai i se laina o faatauga i le faleoloa i lo matou pitonuu. I o'u luma atu sa tu ai se tamaitai talavou, pe tusa ma le 15 tausaga le matua. Sa foliga mautinoa ma fiafia. Sa ou vaaia lona mitiafu ma sa le mafai ona taofiofi le talanoa atu i ai. Sa ou amata, "E te sau mai se setete i fao atu, a ea?"

Sa te'i o ia i la'u fesili ma tali mai, "Ioe. Ou te sau mai Kolorato. Na faapefea ona e iloa?"

Sa ou faamatala atu, "Ona o lou mitiafu." Sa sa'o la'u mate ina ua uma ona ou faitauina upu sa tusia i lona mitiafu "O a'u o se Mamona. Ae a oe?"

Sa ou toe fai atu, "Ou te fia ta'u atu ia te oe ua matua faagaetia lava au i lou mautinoa ua e tu matilatila ai

ma ofu se mitiafu ua i ai se tautinoga lototoa. Ua ou vaaia se eseese ia te oe, ma maimau e pe a na mafai e tamaitai talavou uma ma tagata uma o le Ekalesia ona maua lena lava talitonguga maumaututu ma le mautinoa." Sa mae'a a ma faatau, ona ma faatofa ai lea ma alu le tagata ia.

Peitai na tele aso ma vaiaso ina ua mavae lena taimi, sa ou matuai mafaufau ai ma toe manatunatu i lea feiloaiga. Sa ou tuufesilisili pe na faapefea e lena teineitiiti talavou mai Kolorato ona ia maua lea mautinoa i lona faasinomaga o se tagata o Le Ekalesia a Iesu Keriso o le Au Paia o Aso e Gata Ai. Sa le mafai ona uma lo'u mafaufau i le 'anoa o lea fasifua'itau, ou te fia filifilia e lolomi i luga o lo'u mitiafu e atagia mai ai lo'u talitonguga ma la'u molimau. I lo'u mafaufau, sa ou manatunatu ai i le mau faaupuga. Na i'u ina ou maua se faaupuga o le a ou mitamita lava e tusia i lo'u mitiafu: "O a'u o se Mamona. Ua ou iloa. Ua ou ola ai. Ua ou alofa i ai."

O le aso, ou te fia taulai atu la'u tautalaga i lena faaupuga lototoa, e tumu i le faamoemoe.

O le vaega muamua o le faaupuga

o se tautinoga faamautinoa i le tagata lava ia, e le tau afea: "O au o se Mamona." Pei lava o le tamaitai talavou sa ou feiloai i ai i le faleoloa, sa lei fefe o ia e ta'u atu i le lalolagi o ia o se tagata o Le Ekalesia a Iesu Keriso o le Au Paia o Aso e Gata Ai, ou te faamoemoe foi o le a tatou le fefefe lava pe mumusu e faailoa atu "O au o se Mamona." E tatau ina tatou mautinoa, faapei o le Aposetolo o Paulo ina ua ia folafola mai, "Aua ou te le ma i le talalelei a Keriso aua o le mana lava lea o le Atua e ola ai i latou uma o e faatuatua."¹ I le avea ai o i tatou ma au paia, o i tatou o soo o lo tatou Faaola. O lena liua ma le mautinoa, o le taunuuga lena o taumafaiga maelega ma le fuafuaina lelei. O le tagata lava ia. O le faagasologa i le olaga atoa.

O le isi vaega o le faaupuga e faamautinoa ai. "Ua ou iloa." I le lalolagi i nei ona po, e anoanoai gaoioiga, mataupu, ma faatosinaga o loo tauva i minute uma ia tatou gauai atu i ai. I le tele naua o mea faalavefau, pe o tatou maua le malosi, amio pulea ma le nautaitaiga e tumau ai le taulai atu i mea e aupito sili ona taua? Pe ua lava ea lo tatou atamai i upumoni o le talalelei a o tatou i ai i a tatou a'oga, matata faalegaluega, o mea faapasitaimi, taaloga, po o a tatou feau feaveai? Pe o tatou sailia moni ia maua tali i a tatou fesili e ala i le taumamafa i tusitusiga paia ma aoga a perofeta? Pe o tatou saili ea i le faamautinoaga a le Agaga?

O le taua o le mauaina o le atamai, o se mataupu faavae o le faavavau. O le Perofeta o Iosefa Samita sa "fiafia i le atamai i lona mana amiotonu."² Na ia saunoa: "O le atamai e manaomia mo le olaga ma le faaleatua. . . . Faaologo, outou uma le au uso e, o lena le ki atoatoa; o le atamai o le mana o le Atua i le faaolataga."³

E taua upumoni uma ma le atamai, peitai i le lotolotoi o mea faalavefau faifai pea o o tatou olaga i aso taitasi, e tatau ai ona tatou matua gauai atu faapitoa i le faateleina o lo tatou atamai i le talalelei ina ia mafai ai ona tatou malamalama i auala e faaoga ai mataupu faavae o le talalelei i o tatou olaga.⁴ A o faateleina lo tatou atamai i le talalelei, o le a amata ona



tatou lagonaina le mautinoa i a tatou molimau ma mafai ona faapea atu, “Ua ou iloa.”

O le isi o le faaupuga, “Ua ou ola ai.” O loo aoao mai i tusitusiga paia e tatau ona “e anaana i le upu ae le na ona faalogologo i ai.”⁵ Tatou te ola i le talalelei ma avea ai i tatou ma “e anaana i le upu” e ala i le faaaogaina o le faatuatua, usiusitai, auauna atu ma le alolofa i isi, ma mulimuli i le faataitaiga a lo tatou Faaola. Tatou te faatinoina ma le amiosa’o, ma faia le mea tatou te iloa e sa’o “i taimi uma ma i mea uma, ma i nofoaga uma”⁶ tusa lava pe i ai pe leai foi nisi o vaavaai mai.

I o tatou tulaga i le ola nei, e leai se tasi e atoatoa. E oo lava i a tatou taumafaiga e sili ona maelega e ola ai i le talalelei, o i tatou uma lava o le a faia ni mea sese, ma o i tatou uma foi o le a agasala. E maeu se faamafanafanaga mautinoa i le iloa ai o le taulaga togiola a lo tatou Faaola, e mafai ai ona faamagaloina i tatou ma toe faamamaina. O lea faagasologa o le salamo moni ma le faamagaloga e faamalolosia ai a tatou molimau, ma la tatou faaiuga e usitai i poloaiga a le Alii ma ola i o tatou olaga e tusa ai ma tulaga faatonuina o le talalelei.

A ou mafaufau i le fasifuaitau “Ua ou ola ai,” ou te manatua ai se tamaitai talavou sa ou feiloai i ai e igoa ia

Karigan. Sa ia tusi mai, “Ua silia teisi ma le tausaga talu ona avea au o se tagata o le Ekalesia. . . . Ia te au, ina o o’u sailiili, o se tasi o faailoga na ta’u mai ai o le Ekalesia moni lenei, na oo mai aua sa ou lagonaina o lea faatoa ou maua se ekalesia e aoao ai le tausafia ma tulaga faatonuina. Ua ou vaai i mea ua tutupu pe a le tausia e tagata ia poloaiga ae filifili le ala sese. Ua leva ona tonu i lo’u mafaufau, ou te ola i tulaga faatonuina maua luga o le amio mama. . . . ua ou lagonaina le matua faamanuiaina ina ua ou mauaina le upumoni ma ou papatiso. Ua ese lo’u fiafia.”⁷

O le fasifuaitau faaiu o la’u faaupuga faatautinoga o le “Ua ou alofa i ai.” O le mauaina o le atamai i le talalelei a Iesu Keriso ma ola ai ma le maelega i mataupu faavae o le talalelei i o tatou olaga i aso faisoo, e taitai atu ai le toatele o tagata o le Ekalesia e tautino atu ma le naunautai, “Ua ou alofa i le talalelei!”

E oo mai lenei lagona a o tatou lagonaina le Agaga Paia o molimau mai o i tatou o fanau a lo tatou Tama Faalelagi, Na te silafia i tatou, ma o loo tatou i ai i le ala sa’o. E faatupulaia lo tatou alolofa i le talalelei a o tatou mauaina le alofa o lo tatou Tama Faalelagi ma le filemu sa folafola mai e le Faaola pe a tatou faaali atu ia te Ia lo

tatou naunau e usiusitai ma mulimuli ia te ia.

I taimi esee se i o tatou olaga, pe o tatou o ni tagata faatoa liliu mai i le Ekalesia pe ua leva ona auai, atonu tatou te iloa ua matafi atu lenei nau-nautaiga malosi sa i ai. O nisi taimi e tupu lenei mea pe a faigata taimi, ma e tatau ai ona tatou faatinoina le onosai. O nisi taimi e tupu i le taimi tonu ua manuia ai ma ‘oa o tatou lima. Soo se taimi lava ou te maua ai lenei lagona, ou te iloa ai ua tatau ona toe taulai a’u taumafaiga i le faateleina o lo’u atamai i le talalelei ma ola atili ai i mataupu o le talalelei i lo’u olaga.

O se tasi o mataupu faavae e aupito aoga ae o nisi taimi e faigata ona faaaoga, o le lotomaulalo ma le gauai atu i le finagalo o le Atua. I le tatalo a Keriso i le Faatoaga o Ketesemane, sa Ia faailoa atu ai i le Tama, “Aua le faia lo’u lotu, a o lou finagalo.”⁸ Ua tatau ona avea lena ma a tatou tatalo. E tele taimi, o taimi paganoa nei, o le lototatalo tatou te lagonaina ai le siosiomia o i tatou i le alofa o le Tama Faalelagi, ma toefuatai mai ai na lagona fiafia, ma le alofa.

I se fonotaga faaleautaitai a Tamaitai Talavou i Eugene, Oregon, sa ou maua ai le avanoa e talanoa ai ma Sister Cammy Wilberger. O le tala na faamatala mai e Sister Wilberger ia te

au, o se molimau lea o le mana ma faamanuiaga o se tamaitai talavou ua iloa, ola ai, ma alofa i le talalelei.

O le tama teine a Sister Wilberger e 19 tausaga le matua, o Brooke, sa malui i se faalavelave matuia i ni nai tausaga talu ai a'o i ai i lana tuuaga o le taumafanafana i le mavae ai o lona tausaga muamua i le iunivesite. Na ta'ua e Sister Wilberger, "O se taimi faigata ma le pogisa mo lo matou aiga. Peitai, na tuuina mai e Brooke se meaalofo sili mo i matou. Matou te lei iloina lena mea a o tuputupu ae, ae o tausaga taitasi ma taimi uma o lona olaga, na tuuina mai ai e Brooke se meaalofo sili e mafai e se tamateine ona avatu i ona matua. O Brooke o se afafine amiotonu o le Atua. . . . Ona o lenei meaalofo aemaise lava o le mana e mafai ai o le Togiola, ua ou maua ai le malosi, mafanafana, ma le filemu na folafola mai e le Faaola. Ou te le fesiligia lava le mea o loo i ai nei Brooke ma ua sagisagi fiafia atu mo la matou toe tuufaatasiga matagofie."⁹

E i ai la'u molimau i le fuafuaga sili a lo tatou Tama Faalelagi mo le fiafia e faavavau. Ua ou iloa na Ia silafia i tatou ma e alofa ia i tatou. Ua ou iloa ua Ia saunia se perofeta, o Peresitene Thomas S. Monson, e faamalosiua ma fesoasoani mai e toe taiala atu i tatou ia te Ia. Ou te tatalo ia tofu tuu atu e i tatou se taumafaiga ia mafai ai ona tautino atu ma le mautinoa, "O au o se Mamona. Ua ou iloa. Ua ou ola ai. Ua ou alofa i ai." Ou te tuuina atu ai nei mea ma le lotomaulalo i le suafa o Iesu Keriso, amene. ■

Manatua: *Mo nisi suesuega atili, ou te fautuaina le faitau o le Alema 32 ma le saunoaga a Elder Dallin H. Oaks, "O Le Lui e Avea Ai" (Liahona, Ian. 2001, 40–43).*

FAAMATALAGA

1. Roma 1:16.
2. George Q. Cannon, i le *Aoaoga a Peresitene o le Ekalesia: Iosefa Samita* (2007), 261.
3. *Aoaoga: Iosefa Samita*, 265; tagai foi Martha Jane Knowlton Coray, notebook, Church History Library, Salt Lake City.
4. Tagai i le aafiaga o le tulaga faatauaina o le atamai numera 1, *Alualu i Luma o Tamaitai Talavou Lava Ia* (tamaitusi, 2009), 38.
5. Iakopo 1:22.
6. Mosaea 18:9.
7. Fetusiaga patino.
8. Luka 22:42.
9. Fetusiaga patino.



Saunia e Elder Craig C. Christensen

○ Le Au Peresitene o Fitugafulu

○ Se Meaalofa Le Mafaamatalaina mai le Atua

E galue le Agaga Paia i se lotogatasi atoatoa ma le Tama Faalelagi ma Iesu Keriso, i le faataunuuina o matafaioi taua ma tiutetauave tulaga ese.

I le 1994, sa valaaulia ai e Peresitene Howard W. Hunter tagata uma o le Ekalesia ina ia "faatuina le malumalu . . . e fai ma faatusa sili o lo [tatou] avea ai ma tagata o le ekalesia."¹ Mulimuli ane i lena lava tausaga, sa faamaeaina ai le fausiaina o le Malumalu o Bountiful Iuta. E pei lava o le toatele, sa ma naunau foi e ave lo ma aiga talavou i le taimi o maimoaga a o humanai le faapaiaga. Sa ma galulue ma le filiga e saunia le ma fanau ina ia ulu atu i le malumalu, ma tatalo faatauina ina ia latou maua se aafiaga faaleagaga ina ia mafai ona avea le malumalu ma se vaega taua e taulai i ai o latou olaga.

A o matou savavali ma le migao i totonu o le malumalu, sa ou iloina lo'u faamemelo i mamanu ofoofogia o le fausaga, le matagofie o galuega teuteu faaii, le malamalama o loo susulu mai i faamalama tetele, atoa ai ma le tele o atavali musuia. O vaaiga uma o lenei maota paia sa matua ofoofogia moni lava.

A o matou ulu atu i le potu selestita, sa faafuasei ona ou iloina o loo piipii mai i lo'u vae le ma atalii uii e ono tausaga o Ben. Sa vaaia lona popole—atonu ua fai si ona atuatuva.

"O le a le mea ua tupu, Atalii?" Sa ou musumusu atu ai.

"Tama," sa ia tali mai, "O le a le mea o loo tupu iinei? Ou te lei lagonaina muamua lava se lagona faapenei."

I le iloina ai atonu o le taimi muamua lea ua lagonaina ai e lo'u atalii talavou le uunaiga a le Agaga Paia i se ala mamana, sa ou tootuli ifo ai i le fola i ona talaane. A o feoi solo isi tagata asiasi i o ma talaane, sa ma faaaluina ma Ben ni nai minute, i autafa o le isi, e aoao faatasi ai e uiga i le Agaga Paia. Sa ou maofa i le faigo-fie ona mafai ona ma talanoaina ona lagona paia. A o ma talanoa, sa oo ina manino mai le mea sa aupito sili ona musuia ai Ben, e le o mea sa ia *vaaia* ae o mea sa ia *lagonaina*—e le o le matagofie faaletino na siomia ai matou

A high-angle photograph of a person walking on a paved surface, casting a long shadow. The person is wearing a light blue shirt and dark trousers, and is walking away from the camera. The pavement is made of rectangular tiles. The shadow is cast to the right of the person, indicating the sun is to the left. The shadow is long and dark, stretching across the tiles. The overall scene is brightly lit, suggesting a sunny day.

O le Agaga Paia o le tagata lona tolu o le Aiga Atua, ma, e pei foi o le Atua le Tama ma Iesu Keriso, Na te silafiaina o tatou mafaufauga ma faamoemoega o o tatou loto.³ E alofa le Agaga Paia ia i tatou ma manao ia tatou fiafia. Talu ai Na te silafiaina luitau o le a tatou fetaiai, e mafai ona Ia taialaina i tatou ma aoao i tatou uma i mea e tatau ona tatou faia e toe foi atu ai ma toe mau faatasi ma lo tatou Tama Faalelagi.⁴

mafa'i ona fesootai mai e se fesootaiga faaletagata e oo lava i tagata faalelagi.”⁹

Ua iloa foi le Agaga Paia o Lē Faamafanafana.¹⁰ I taimi o faafitauli po o le faanoanoa pe na ona tau ina manaomia ina ia iloa ai o loo latalata mai le Atua, e mafai e le Agaga Paia ona siitia o tatou agaga, aumai ia i tatou le faamoemoe, ma aoao mai ia i tatou “mea filemu o le malo,”¹¹ ma fesoasoani ia i tatou ia lagonaina “le manuia . . . mai le Atua, o loo silisili lava i mea uma e manatu i ai.”¹²

Mamona e uiga i le faamoemoega o le olaga, sa faamafanafanaina patino i matou taitoatasi e le Agaga Paia. I ni auala e faigata e upu ona faamatalaina, sa oo mai ai ni tali manino na matou sailia i o matou loto. Sa matou lagoina se filemu i lena aso lea sa le mafai ona oo i ai lo *matou* malamalama, ae o le molimau mai le Agaga Paia sa mautinoa, le mafaafitia, ma moni.

O le Agaga Paia o se faiaoga ma se talifaaliga.¹³ Pe a tatou suesue, mafau-fau loloto, ma tatalo e uiga i upumoni o le talalelei, e faamalamalamaina o tatou mafau-fau e le Agaga Paia ma faatelevaveina lo tatou malamalama.¹⁴ Na te faia upumoni ina ia tusia tumau i o tatou agaga ma mafai ai ona faia se suiga tele ia tupu i o tatou loto. Pe a tatou faasoa atu nei upumoni i o tatou aiga, i uso a tagata o le Ekalesia, ma a tatou uo ma tuaoi i o tatou nuu, o le a avea foi le Agaga Paia ma o latou faiaoga, aua Na te moliooina le savali o le talalelei “i loto o le fanauga a tagata.”¹⁵

O Le A Le Misiona a le Agaga Paia?

E galue le Agaga Paia i se lotogatasi atoatoa ma le Tama Faalelagi ma Iesu Keriso, i le faatauunuina o matafaioi taua ma tiutetauave tulagase. O le faamoemoega autu lava o le Agaga Paia o le molimau mai lea i le Atua le Tama ma Lona Alo, o Iesu Keriso,⁷ ma aoao mai ia i tatou le moni o mea uma.⁸ O se molimau mautinoa mai le Agaga Paia e moliooina se talitonuga sili atu nai lo se molimau mai soo se isi lava puna. Sa aoao mai Peresitene Iosefa Filitia Samita e faapea “o le fetalai atu o le Agaga o le Atua i le agaga o le tagata e i ai le mana e fesootai atu ai le upumoni i se aafiaga sili atu ma le malamalama nai lo le upumoni e



uma tatou te iloina ai. Pe a oo mai ia mafauauga musuia i o tatou mafau-fau, tatou te iloina e moni na mea e ala i lagona faaleagaga e ulu mai i o tatou loto. Sa aoao mai Peresitene Boyd K. Packer: “E fetalai mai le Agaga Paia i se leo e te *lagonaina* e sili atu nai lo lou *faalogo*ina. . . . Pe a tatou talanoa e uiga i le “faalogo” i musu-musuga a le Agaga, o le tele o taimi e faamatala ai e se tasi se uunaiga faaleagaga i le faapea mai, ‘sa ou maua se *lagona* . . .’.”¹⁸ E auala mai i nei lagona paia mai le Agaga Paia tatou te iloina ai le mea o loo finagalo le Atua tatou te faia, mo lenei mea, e pei ona ta’ua i tusitusiga paia, “o le agaga o faaaliga.”¹⁹

O Le A Le Uiga o le Mauaina o le Meaalofa o le Agaga Paia?

I le aoaoina ai o lo ma atalii e ono tausaga o Ben, sa ou manatu e taua le iloa o le eseese i le va o le mea sa ia lagonaina, o le uunaiga a le Agaga Paia lea, ma le meaalofa o le Agaga Paia, lea o le a ia mauaina pe a uma le papatisoga. A o lei faia le papatisoga, e mafai e tagata faamaoni uma o loo sailia le upumoni ona lagonaina le uunaiga a le Agaga Paia mai lea taimi i lea taimi. Peitai, o le avanoa e maua ai le mafutaga faifai pea a le Agaga Paia ma le *atoaga* o faamanuiaga uma e faatatau i ai ua na o tagata agavaa, ua papatisoina e mauaina o e e taliaina le meaalofa o le Agaga Paia e ala i le faaee atu o lima e auala atu ia i latou o loo umiaina le pule o le perisitua a le Atua.

E auala mai i le meaalofa o le Agaga Paia, tatou te maua ai se malosi faaopoopoina ma ni meaalofa faaleagaga, faateleina ai faaaliga ma le puipuiga, taiala ma le taitaiga tumau, ma faamanuiaga folafolaina o le faapaiaina ma le faaeaga i le malo selesitila. O nei faamanuiaga uma ua tuuina mai o se taunuuga o lo tatou manao faaletagata ia mauaina ia meaalofa ma o mai a o tatou faalaugatasia o tatou olaga ma le finagalo o le Atua ma saili atu i Lana taitaiga tumau.

A o ou toe mafauau i tua i lo’u aafiaga ma Ben i le Malumalu o Bountiful, e tele ni ou lagona ma

lava ia, o faataitaiga aupito sili ona manatuaina o le usitaia o uunaiga a le Agaga Paia i auunaga i isi e sau mai le soifuaga ma galuega a Peresitene Thomas S. Monson, lea na saunoa mai: “I le faatinoina ai o o tatou tiutetauave, ua ou aoao ai e faapea pe a tatou faalogo i se uunaiga filemu ma faatino e aunoa ma le faatuai, o le a taialaina i tatou e lo tatou Tama Faalelagi i o tatou laasaga ma faamanuia o tatou olaga faapea ai ma olaga o isi. Ou te le iloa lava se isi aafiaga e sili atu ona suamalie po o se lagona e sili atu ona taua nai lo le faalogo i se uunaiga ma iloa ai ua taliina e le Alii se tatalo a se isi tagata e auala atu ia te oe.”¹⁶

Ou te faasoa atu se aafiaga faagauloto se tasi. A o avea Peresitene Monson ma se epikopo, na ia iloina o loo i ai se tagata o lana uarota, o Mary Watson, i le falemai. A o ia malaga atu e asiasi ia te ia, sa ia iloa ai o loo taofia o ia i se potu tele faatasi ma isi gasegase. Ina ua ia latalata atu ia Sister Watson, sa ia matauina le gasegase i se moega tuaoi, na vave ufiufiina lona ulu.

Ina ua maea le asiasiga a Peresitene Monson ia Sister Watson ma tuu atu ia te ia se faamanuiaga faaleperisitua, sa ia faatalofa atu ia te ia, faatofa, ma saunia e tuua le falemai. Ona tupu lea o se mea faigofie ae ofoofogia. Ou te sii maia le manatuaina e Peresitene Monson lava ia o lenei aafiaga:

“Sa le mafai ona ou tuua lona itu. Sa peiseai [na] tuu se aao le mavaaia i luga o lo’u tauau, ma sa ou lagonaina i totonu o lo’u agaga o loo o’u faalogo i upu nei: ‘Alu atu i le moega o sosoo ai lea na ufiufi ai e le tamaitai talavou ona foliga ina ua e savali mai i totonu.’ Sa faapena ona ou faia. . . .

“Sa ou faalatalata atu i le pito o le moega o le gasegase lea, ma pa’i lemu atu i lona tauau ma toso ese ma le faaeteete le ieafu lea sa ufiufi ai ona foliga. Sa ou te’i! O ia foi o se tagata o la’u uarota. Ou te lei iloina o loo faataotolia foi o ia i le falemai. O lona igoa o Kathleen McKee. Ina ua ma fevaaia, sa ia fai mai a o tagi o ia, ‘Oi, Epikopo, ina ua e ulufale mai i lena faitotoa, sa ou lagonaina ua e sau e vaai au ma faamanuia au o se tali lea i a’u tatalo. Sa ou fiafia lava i lo’u loto e mafauau o le a e iloina o loo ou iinei, ae ina ua e alu i le isi moega, sa ou faanoanoa, ma ou iloa ai e te lei sau e vaai au.’

“Sa ou fai atu ia [Sister] McKee: ‘E le afaina lo’u le iloina o loo e i ai iinei. Peitai, e taua le silafiaina e lo tatou Tama Faalelagi ma sa e tatalo leleoa mo se faamanuiaga faaleperisitua. O Ia sa uunaia au ou te faalavelave mai i ou taimi paganoa na o oe.’”¹⁷

E Faapefea ona Fetalai mai le Agaga Paia ia i Tatou?

E tofu uma i tatou ma ni aafiaga ma le Agaga Paia, e ui atonu e le o taimi

ni uunaiga mālū. O se tasi manatu-aga manino e faapea a o ou taulai atu i le mamalu o mea sa mafai ona ou vaia, sa iloina foi e se tamaitiiti i ou tafataga le mamana o lagona i lona loto. Faatasi ai ma se faamanatu mālū, sa valaaulia ai au e le gata ou te tu ma tootuli ifo i lalo ae ia faalogo foi i le valaau a le Faaola ia o mai e pei o se tamaitiiti i lotomaulalalo, agamalu, ma saunia e faalogo i le leo filemu ma le itiiti o Lona Agaga.

Ou te molimau atu i le moni ma le ola o le misiona paia a le Agaga Paia ma e ala mai i le mana o le Agaga Paia tatou te iloa ai le moni o mea uma. Ou te molimau atu o le meaalofo o le Agaga Paia o se meaalofo taua ma le mafaamatalaina a le Tama Faalelagi i tagata uma o le a o mai i Lona Alo, ma papatisoina i Lona suafa, ma maua le Agaga Paia e ala i le faamauga i Lana Ekalesia. O nei upumoni ou te molimau patino atu ai i le suafa o Iesu Keriso, amene. ■

FAAMATALAGA

1. Howard W. Hunter, i le Jay M. Todd, "President Howard W. Hunter: Fourteenth President of the Church," *Ensign*, July 1994, 5; tagai foi Howard W. Hunter, "The Great Symbol of Our Membership," *Tambuli*, Nov. 1994, 3.
2. Tagai Mataupu Faavae ma Feagaiga 121:26.
3. Tagai Alema 12:7; 18:16–18; Mataupu Faavae ma Feagaiga 6:15–16.
4. Tagai 2 Nifae 32:5.
5. Tagai Mataupu Faavae ma Feagaiga 130:22.
6. Tagai Luka 4:1, 18; 11:13; Ioane 1:33; Efeso 1:13; Mataupu Faavae ma Feagaiga 88:3.
7. Tagai 2 Nefae 31:18; 3 Nifae 28:11; Mataupu Faavae ma Feagaiga 20:27.
8. Tagai Moronae 10:5.
9. Joseph Fielding Smith, *Doctrines of Salvation*, comp. Bruce R. McConkie, 3 vols. (1954–56), 1:47–48.
10. Tagai Ioane 14:26; Mataupu Faavae ma Feagaiga 35:19.
11. Mataupu Faavae ma Feagaiga 36:2.
12. Filipi 4:7.
13. Tagai Luka 12:12; 1 Korinito 2:13; Mataupu Faavae ma Feagaiga 50:13–22; *Aoaoga a Peresitene o le Ekalesia: Iosefa Samita* (2007), 132–33.
14. Tagai Mataupu Faavae ma Feagaiga 11:13.
15. 2 Nifae 33:1.
16. Thomas S. Monson, "Faalologo Ia, Ina Malu Ia," *Liahona*, Nov. 2002, 55.
17. Tagai Thomas S. Monson, "Christ at Bethesda's Pool," *Ensign*, Nov. 1996, 18–19.
18. Boyd K. Packer, "O Faaaliga mo le Tagata Lava Ia, o le Meaalofa, o le Tofotofoga ma le Folaolaga," *Liahona*, Iuni 1997, 10.
19. Mataupu Faavae ma Feagaiga 8:3; tagai foi fuaiupu 2.



Saunia e Elder Shayne M. Bowen

○ Le Fitugafulu

"Ou Te Ola A'u, O Le Mea Lea E Ola Ai Outou"

Ona o Ia, lo tatou Faaola o Iesu Keriso, o le a mafai ai i se aso ona tofatumoanaina i se atoatoaga o le olioli na lagona o le faavauvau, tuuatoatasi, ma le faanoanoa.

A o auauna atu o ni faifeautalai talavou i Chile, sa ma feiloai atu ma lau soa i se aiga e toafitu i le paranesi. O le tina e auai i vaiaso uma ma lana fanau toalima. Sa ma manatu ua leva ona avea i latou ma ni tagata o le Ekalesia. Ina ua mavae ni vaiaso, sa ma iloa ai e lei papatiso i latou.

Sa ma faafesootaia vave le aiga ma talosagaina pe mafai ona ma o atu i lo latou fale e aoao i latou. E lei fia manao le tama e aoao e uiga i le talalelei peitai na te lei taofia lo ma aoaoina o lona aiga.

Na televave le aoaoina o lesonea a Tuafafine Ramirez. Sa ia naunau lava e aoao uma ia aoaoga faavae lea sa ma aoaoina atu. I se tasi po a o matou talanoa i le papatisoina o pepe, sa ma aoao atu o tamaiti laiti e le agasala ma e le manaomia ona papatisoina. Sa ma valaauliaina o ia e faitau i le tusi a Moronae:

"Faauta ou te fai atu ia te outou o le mea lenei ia outou aoao atu—o le salamo ma le papatisoga ia i latou o e

ua tali atu ma mafai ona faia le agasala; ioe, aoao atu i matua e tataua ona latou salamo ma papatisoina, ma faaloto-maulalalo i latou lava e pei o a latou fanau laiti, ma o le a faaolaina ai i latou uma faatasi ma a latou fanau laiti.

"Ma e le manaomia e a latou fanau laiti se salamo, po o le papatisoga. Faauta, o le papatisoga ua mo le salamo i le faataunuuina o poloaiga mo le faamagaloina o agasala.

"Ae o fanau laiti ua ola ia Keriso, mai lava i le faavaega o le lalolagi; afai ua le faapea, o le Atua o se Atua faaaauau, ma o se Atua feliuliua foi, ma o se ua faailoga tagata; ona o le ā le toatele o fanau laiti ua feoti e aunoa ma le papatisoga!"¹

Ina ua uma ona faitauina lenei mau, sa amata ona masusu ia Tuafafine Ramirez. Sa ma lē mautonu ma la'u soa. Sa ou fesili atu, "Tuafafine Ramirez, na i ai se mea na ma fai atu ai pe na ma faia ua faatiga ai ia te oe?"

Na ia fai mai, "Oi, leai, Elder, e leai se mea ua lua sese ai. I le ono tausaga

ua mavae sa i ai sa'u pepe tama. Sa oti o ia ae lei papatisoina. Sa ta'u mai e le matou faifeau talu ai e lei papatisoina o ia o lea o le a alu ai o ia i le nofoaga mo tagata e lei papatisoina mo le faavavau atoa. Mo le ono tausaga o loo ou tauaveina pea lena tiga ma le tausala. Ina ua uma ona faitauina lenei mau, ua ou iloa ai e ala mai i le mana o le Agaga Paia e moni lenei mea. Ua lagona le aveesea o se avega mamafa mai ia te au, ma o loimata ia o le olioli."

Sa faamanatu mai ai ia te au ia aoaoga a le Perofeta o Iosefa Samita, lea na aoaoina ai lenei aoaoga faavae faamafanafana: "E aveeseina e le Alii le toatele e oo lava i le fanau laiti, ina ia latou o ese ai mai le losilosivale o tagata, ma faanoanoaga ma leaga o lenei lalolagi; e mama tele i latou, matagofie tele, e soifua ae i le lalolagi; o le mea lea, afai e manatunatu i ai ma le sa'o, o le a leai se faavavau ae o le a i ai le mafuaaga e fafia ai ona o le a aveeseina mai i latou mai le leaga, ma o le a le toe umi ona tatou toe faatasi lea ma i latou."²

Ina ua mavae le ono tausaga o mafatia ai i le faanoanoa ma le tiga ua tau le gafatiaina, ua toe faaalai mai le aoaoga faavae moni, e ala mai i se Tama o i le Lagi alofa e ala mai i se perofeta soifua, ma ua aumai ai se filemu matagofie i lenei fafine mafatia. E le tau ta'u atua, ae o Tuafafine Ramirez ma lana fanau e valu tausaga ma matutua atu na papatisoina.

Ou te manatua lou tusi atu i lou aiga ma faailoa atu le agaga faafetai sa ou lagonaina i lou loto mo le iloina o lenei mea ma le tele o isi upumoni



ia ua manino ma sili ona pele o le talalelei toefuataina a Iesu Keriso. Ou te lei mafaufauina lava o le a aafia au i lenei mataupu faavae moni matagofie i tausaga i le lumanai ma ua avea ma a'u pulu pāsama i Kiliata.

Ou te fia talanoa atu ia i latou o e ua toesea se tamaitiiti ma sa fesili faapea, "Aisea ua tupu ai ia te au?" pe atonu foi ua fesiligia lou lava faatua-tua e se Tama o i le Lagi alofa. O la'u tatalo e ala i le mana o le Agaga Paia, atonu o le a ou aumaia sina vaega o le faamoemoe, o le filemu, ma le malamalama. O lou naunautaiga ina ia avea ma se meafaigaluega i le aumaia o se toefuataiga o lou faatua-tua i lo tatou Tama o i le Lagi alofa o lē silafia mea uma ma faatagaina i tatou e tofo i luitau ina ia mafai ai ona tatou iloa ma alolofa atu ia te Ia ma malamalama ai, a aunoa ma Ia o i tatou o ni mea noa.

I le aso 4 o Fepuari o le 1990, sa fanau ai le ma tama tama lona tolu ma o le lona ono lea o le ma fanau. Sa ma faaigoaina o ia ia Tyson. O ia o se tamaitiiti aulelei, ma sa faafeiloaia o ia i totonu o le aiga i le alofa ma lima mafola. Sa femitai ona uso ma tuafafine ia te ia. Sa matou mafaufau uma lava o ia o se tamaitiiti matua atoatoa lava ua fanau mai.

Ina ua valu masina le matua o Tyson, sa ia foloina se fasi penisina sa na mauaina i luga o le kapeta. Na mau le penisina i le faai o Tyson, ma sa le manava. Sa aumai Tyson e lona uso matua i le fogafale aluga, ma ee ma le le mautonu, "Ua le manava le pepe, ua le manava le pepe." Sa matou faia le CPR ma valaau i le 911.

Na taunuu ia fomaini fesoasoani ma ave faatopetope ia Tyson i le falemai. I totonu o le potu faatalitali, sa faaauau ai le ma tatalo faatauina ma aoi atu i le Atua mo se vavega. Ina ua mavae se taimi umi lava, sa sau le fomaini i totonu o le potu ma fai mai, "Ou te faamalie atu. Ua leai se isi mea e mafai ona matou faia. Faaaoga uma lava le taimi lua te manaomiaia." Ona ia aluese atu lea.

Ina ua ma ulu atu i le potu sa taoto ai Tyson, sa ma vaaia le ma tamai afifi o le olioli ua aveesea le ola. Sa foliga mai sa i ai se susulu faaselesitila o

siomia ai si ona tino laitiiti. Sa matuai susulu ma mamā a'ia'i o ia.

Ma i lena lava taimi sa foliga mai ai ua leai se faamoemoega o o maua olaga. E faapefea ona ma toe foi ma faamatala atu i isi tamaiti e le toe foi atu Tyson i le fale?

O le a ou talanoa atu ia te au lava ia ao ou faamatalaina le vaega o totoe o lenei aafiaga. Sa ma aafia uma faatasi ma si o'u toalua pele i lenei luitau, peitai e le mafai ona ou faamatalaina ni lagona o se tina ma ou te le taumafai lava e fai.

E le mafai ona faamatalaina ni lagona eseese sa ou lagonaina i lena taimi o lou olaga. O le tele o le taimi sa ou faapea ai o loo fai sau miti leaga ma e toetiiti lava ou ala i luga ma o le a aluese atu lenei miti leaga. Ou te le moe i le tele o po. E tele ina ou fealuai i le po mai lea potu i le isi, ma faamautinoa o loo saogalemu uma isi a ma fanau.

O lagona o le tausala sa puapugatia ai lou agaga. Sa ou lagona le tausala. Sa ou lagona le tuuaia. O au o lona tama; sa tataua ona ou faia nisi mea e puipuia ai o ia. Pe ana faapea sa ou faia lenei ma lena. O nisi taimi e oo mai lava i lenei taimi, ua 22 tausaga ua mavae, a amata ona oo mai na lagona i lou loto, e manaomia lava lou aveesea faavave atu aua e faaloto-vaivai tagata.

Pe a ma se masina talu ona oti Tyson, sa faia ai sau faatalanoaga ma Elder Dean L. Larsen. Na ia faaaluina se taimi e faalogologo ai ia te au, ma ou te faafetai ai pea ia te ia mo ana fautuaga ma lona alofa. Na ia fai mai, "Ou te manatu e le finagalo le Alii e te tuuaia oe lava i le oti o lou atalii laitiiti." Sa ou lagonaina le alofa o lou Tama Faalelagi e ala mai i se tasi o ana ipu ua filifilia.

Ae peitai, e faaauau pea ona oo mai manatu faatiga i lou mafaufau, ma amata ona ou lagonaina le ita. E le fetau leni mea! E faapefea ona faia e le Atua leni mea ia te au? Aisea ua tupu ai ia te au? O le a se mea na ou faia ua oo ai leni mea ia te au? Sa ou lagonaina foi lou ita i tagata o loo taumafai e faamafanafaina i matou. Ou te manatua le fai

mai o au uo, “Ou te malamalama i ou lagona.” Ona ou mafaufau faapea lea ia te au lava ia, “E te le iloa pe faapei ou lagona. Na o le tuu pea ia o au.” Na vave ona ou iloina o le alofa faapitoa mo oe lava ia e mafai foi ona faavaivai tagata. Sa ou lagona le matamuli i le i ai o ni ou mafaufauga le lelei e uiga i uo pele o e na taumafai e fesoasoani mai.

Ao lagonaina le lofituina o au i le tausalaina, ita, ma le alofa faapitoa ia te au lava ia, sa ou tatalo ai ina ia i ai se suiga i lou loto. Na aumai e le Alii se loto fou mo au, e ala mai i ni aafiaga patino ma le paia, ma e tusa lava pe o tuuatoatasi ma tiga pea lava, ae ua suia lau vaaiga atoa. Sa tuuina mai ina ia ou iloa e lei toesea mai ia te au, ae o loo i ai se faamanuiaga sili o loo faatalitali mai mo au pe afai e faamaonia lou agavaa.

Na amata ona suia lou olaga, ma sa mafai ona ou tulimatai atu ma le faamoemoe, nai lo le toe tilotilo i tua ma le faanoanoa. Ou te molimau atu o lenei olaga e le o le iuga lea. E moni le lalolagi o agaga. E moni ia aoaoga a perofeta e uiga i le olaga pe a mavae le oti. O lenei olaga ua na o se laasaga le tumau i le agai i luma i la tatou malaga toe foi atu i lo tatou Tama Faalelagi.

O loo avea pea ia Tyson o se vaega matuai taua lava o lo matou aiga. I le aluga o tausaga o se mea matagofie le vaaia o le alofa mutimutivale ma le agalelei o se Tama oi le Lagi alofa, o le ua faatagaina lo matou aiga ina ia lagonaina i se auala manino ia aafiaga o Tyson. Ou te molimau atu ua manifinifi lava le veli. O na lagona o le tuuto, alofa, ma le iunite faaleaiga e le gata pe a tuua e e pele ia i tatou lenei olaga; peitai, ua faamalolosia ai na lagona.

O nisi taimi o le a fesili mai ai tagata, “O le a le umi na e le toe lagona ai le tiga?” O le mea moni lava, e le aluese atoa lava le tiga seiloga ua tatou toe faatasia ma e pele ia i tatou ua maliliu. O le a ou le mauaina lava se atoatoaga o le olioli seiloga ua tatou toe faatasi i le taeao o le Uluai Toetu.

“Aua o le tagata o le agaga. O elemene ua faavavau, ma o le agaga ma



le elemene, ua soofaatasi e le matuueseeseina, e mauaina se atoatoaga o le olioli;

“Ma a tuu eseese, e le mafai e le tagata ona maua se atoatoaga o le olioli.”³

Ae peitai i lenei vaitaimi, e pei ona aoao mai le Faaola, e mafai ona tatou agai i luma ma le loto tetele.⁴

Ua ou iloina o le tiga matuitui e tau le gafatiaina ae e mafai ona avea ma se mea suamalie pe a tatou liliu atu i lo tatou Tama oi le Lagi ma aioi atu mo Lana faamafanafanaga lea e oo mai e ala mai i Lana fuafuaga; o Lona Alo o, Iesu Keriso; ma Lana Faamafanafanaga, o le Agaga Paia lea.

Oka, o se faamanuiaga matagofie lenei mea i o tatou olaga. Faamata e avea ma se mea faigata pe ana faapea tatou te le lagonaina se faanoanoaga tele pe a oti sa tatou tamaitiiti? Ou te faafetai i lou Tama oi le Lagi ua Ia faatagaina i tatou ina ia loloto ma faavavau lo tatou alofa. Ou te faafetai mo le faavavau o aiga. Ou te faafetai ua Ia toe faaalai mai e ala mai i Ana perofeta soifua le fuafuaga matagofie o le togiolaina.

Ia manatua pe a outou auai atu i se maliu o se e pele ia te outou, le lagona i totonu o lou loto ao outou o ese mai le fanua maliu ma le toe vaai atu i lena pusamaliu tuulafoaia—ma mafaufauina pe o le a nutimomoia lou loto.

Ou te molimau atu ona o Ia, lo tatou Faaola o Iesu Keriso, o le a mafai ai i se aso ona tofatumoanaina i se

atoatoaga o le olioli na lagona o le faavavavau, tuuatoatasi, ma le faanoanoa. Ou te molimau atu e mafai ona tatou faalagolago atu ia te Ia faapei o Lana fetalaiga:

“Ou te le tuua outou o matuaoti: ou te sau ia te outou.

“E toe itiiti ona le vaai mai lea o le lalolagi ia te au; a e vaai mai pea outou ia te au: ou te ola a’u o le mea lea e ola ai outou.”⁵

Ou te molimau atu faapea, e pei ona faamatalaina i le *Talai La’u Talalelei*, “a o tatou faalagolago atu i le Togiola a Iesu Keriso, e mafai ona Ia fesoasoani ia i tatou ina ia tatou onosaia o tatou faigata, ma’i, ma tiga. E mafai ona faatumulia i tatou i le olioli, filemu, ma le mafanafana. O mea uma e le talafeagai e uiga i le olaga e mafai ona faasa’oina e ala i le Togiola a Iesu Keriso.”⁶

Ou te molimau atu i lena taeao matagofie o le Uluai Toetu, o le a o mai e pele ia te outou faapea ma au mai o latou tuugamau e pei ona folafola mai e le Alii Lava Ia ma o le a tatou maua le atoatoaga o le olioli. Ona o loo soifua o Ia, o le a tatou ola uma foi faatasi ma i latou. I le suafa o Iesu Keriso, amene. ■

FAAMATALAGA

1. Moronae 8:10–12.
2. *Aoaoga a Peresitene o le Ekalesia: Iosefa Samita* (2007), 176.
3. Mataupu Faavae ma Feagaiga 93:33–34.
4. Tagai Ioane 16:33.
5. Ioane 14:18–19.
6. *Talai La’u Talalelei: O Se Taitala mo le Galuega Faafaijeautalai* (2004), 52.



Saunia e Elder Russell M. Nelson

○ Le Korama a Aposetolo e Toasefululua

Fesili i Faifeautalai! E Mafai ona Latou Fesoasoani Atu ia te Oe!

O faifeautalai uma, talavou ma matutua atu, e auauna atu ma le faamoemoe e tasi ia faaleleia olaga o isi tagata.

Ou uso e ma tuafafine pele, ma uo, e faatalofa atu ma momoli atu o matou alofaaga ia te outou uma taitoatasi. Ua faagaetia lava i tatou i le faasilasilaga a Peresitene Monson i lenei taeao, lea ua fetuunai ai tausaga amata o le galuega faafaifeautalai i le 18 mo alii talavou ma le 19 mo tamaitai talavou. O lenei avanoa, o le a tele atu ai talavou e olioli i faamanuiaga o se misiona.

E lua tausaga talu ai ma ua toe faamautu malosi mai i lenei taeao, ua tautino mai ai e Peresitene Monson “o alii talavou agavaa ma gafatia uma, e tataua ona sauniuni e ave se misiona. O le galuega faafaifeautalai o se tiute faaleperisitua—o se matafaioi ua faamoemoeina e le Alii mai ia i tatou, o ē ua tele naua mea ua tuu mai i ai.”¹ O lea foi ua ia toe faamalalamalama mai mo tuafafine talavou, o le misiona o se avanoa ua taliaina, ae e le o se tiutetauave. Ma ua toe valaaulia ai foi

nisi ulugalii matutua se toatele e faamisiona.

O tapenapenaga mo se misiona e taua. O le misiona o se faatinoga ofofua o le auaunaga i le Atua ma tagata. E lagolagoina e faifeautalai lenei avanoa i a latou lava tupe. E mafai foi ona lagolago i ai matua, aiga, o uo, ma le au faisaofaga i le Tupe Lautele mo Faifeautalai. O faifeautalai uma, talavou ma matutua atu, e auauna atu ma le faamoemoe e tasi ia faaleleia olaga o isi tagata.

O le faaiuga e auauna atu i se misi-ona o le a faafuaitino ai le taunuuga faaleagaga o le faifeautalai, o lona toalua, ma a la’ua fanau mo tupulaga a sau. O se manao e auauna atu o se fua faalenatura lea o le liua, agavaa, ma le sauniuniga a se tagata.

I lenei aofia tele i le salafa o le lalolagi, e toatele outou e le o ni tagata o le Ekalesia a Iesu Keriso o le Au Paia o Aso e Gata Ai, ma e itiiti foi sina

mea tou te silafia e uiga ia i matou ma a matou faifeautalai. O loo outou faafofoga ma maimoa mai ona o lo outou fia iloa atili e uiga i Mamona, ma mea e aoao atu e faifeautalai. A o outou aoao atili e uiga ia te i matou, o le a outou iloa ai e tutusa lava le tele o o tulaga faatauaina. Matou te fautua atu tou te teu pea mea uma e lelei ma moni, ona tagai ane lea pe mafai ona matou faaopoopo atu nisi mea. I lenei lalolagi ua tumu i luitau, tatou te manaomia ai le fesoasoani mai lea taimi i lea taimi. O le tapuaiga, upumoni e faavavau, ma a matou faifeautalai, o ni vaega taua ia o lenei fesoasoani.

Ua tolopo e a matou faifeautalai a latou a’oga, galuega, tafaoga faama-sani mo faaipoipoga, ma isi mea uma e masani ona faia e talavou matutua i lenei vaitau o le olaga. Mo le 18 i le 24 masina, latou te tuu ese ai mo se taimi, ona o lo latou naunautaiga loloto e auauna atu i le Alii.² O nisi o a matou faifeautalai e auauna atu i le matutua o o latou soifua. Ou te iloa ua faamanuiaina ai o latou aiga. I lo matou lava aiga, e toavalu o loo faamisiona tala’i i le taimi nei—e toatolu afafine, o o latou taitoalua, tasi le afafine o lo’u afafine, ma le atalii o lo’u afafine.

Atonu e tuufesilisili nisi o outou e uiga i le igoa *Mormon*. O se igoa ua faaigoa ai i matou e nisi. E le o lo matou igoa tonu lenei, e ui ina ua lauiloa i matou o Mamona. O le upu e sau mai se tusi e paia ua ta’ua o le Tusi a Mamona.

O le igoa moni o le Ekalesia o le, O Le Ekalesia a Iesu Keriso o le Au Paia o Aso e Gata Ai. O le uluai Ekalesia a Iesu Keriso ua toefaatuina. A o soifua ai o Ia i le lalolagi, sa Ia faatulagaina Lana Ekalesia. Sa Ia tofia Aposetolo, o Fitugafulu, ma isi taitai ia sa Ia tuu atu i ai le pule o le perisitua e galulue ai i Lona suafa.³ Ina ua mavae atu Keriso ma Ana Aposetolo, sa suia e tagata sauniga ma aoaoga faavae. Sa leilolua le uluai Ekalesia ma le perisitua. Ina ua mavae Tausaga o le Pogisa, ma i lalo o le taitaiga a le Tama Faalelagi, sa toe aumaia ai e Iesu Keriso Lana Ekalesia. O lea la ua toe ola nei, ua toefuatai mai, ma o loo



Milani, Italia

faagaoioia i lalo o Lana taitaiga paia.⁴

Matou te mulimuli i le Alii o Iesu Keriso ma aoao atu e uiga ia te Ia. Ua matou iloa, ina ua mavae Lona manu-malo mamalu i le oti, sa faaali atu le Alii toetu i Ona soo i le tele o taimi. Sa latou talisua faatasi ma i latou. Sa latou savavali faatasi. A o lei oo i Lona Afio A'e faaii, sa Ia poloiaina i latou e “O atu . . . ma aoao atu i nuu uma, ma papatiso atu ia te i latou i le suafa o le Tama, ma le Alo, ma le Agaga Paia.”⁵ Sa usitaia e Aposetolo lena faatonuga. Sa latou valaauina foi isi e fesoasoani ia te i latou e faataunuu le poloaiga a le Alii.

O le taimi nei, i lalo o le taitaiga a aposetolo ma perofeta i ona po nei, ua tuuina atu foi lena lava poloaiga i faifeautalai a Le Ekalesia a Iesu Keriso o le Au Paia o Aso e Gata Ai. O loo auauna atu na faifeautalai i atunuu e sili atu ma le 150. I le avea ai o ni sui o le Alii o Iesu Keriso, latou te taumafai e faataunuu lena poloaiga paia—na faafouina i o tatou taimi e le Alii lava Ia—e avatu le atoaga o le talalelei i atunuu uma ma faamanuiaina ai olaga o tagata i soo se mea o i ai.⁶

O faifeautalai i le faaiiuga o le ta'i sefulu ma ona tupu o o latou

tausaga po o le amataga o le ta'i 20, e faalē tele so latou aafiaga i ala o le lalolagi. Ae ua faamanuiaina i latou i meaalofo—e pei o le mana o le Agaga Paia, le alofa o le Atua, ma molimau i le upumoni—ua faamamanaina ai i latou o ni avefau a le Alii. Latou te faasoa atu le tala fou o le talalelei e aumaia ai le olioli moni ma le fiafia e faavavau ia i latou uma e usiusitai i le savali. Ma o le tele o taimi, latou te faia i se atunuu ma se gagana e fou ia i latou.

E taumafai faifeautalai e mulimuli ia Iesu Keriso i mea latou te fai ma upu latou te tautala ai. Latou te talai atu Iesu Keriso ma Lana Togiola.⁷ Latou te aoao atu le Toefuataiga moni o le Ekalesia anamua a Keriso e ala mai i le uluai perofeta a le Alii i aso e gata ai, o Iosefa Samita.

Atonu na oulua fetai ai muamua, pe le amanaiaina foi, a matou faifeautalai. Ou te faamoemoe o le a e le fefe ia i latou ae aoao mai ai. E mafai ona avea i latou ma se punaoa na auina mai le lagi mo oe.

O le mea lena na tupu ia Jerry, o se alii Porotesano ua 60 ma ona tupu ona tausaga, e nofo i Mesa, Arisona.

O le tamā o Jerry o se faifeau o le Lotu Papatiso; o lona tina o se faifeau Metotisi. I se tasi aso, na faasoa atu ai ia te ia e lana uo lelei o Pisila lona tiga ona o le malui o lana tama i le taimi na fanau mai ai, ma le oona o le tatalaga o le la faaiipoipoga i se taimi e lei mamao mulimuli ane ai. Sa tauivi Pisila o se tina ua nofo na o ia, e toafa lana fanau, tolu teine ma se tama e toatasi. Sa ia faamatala atu ona lagona loloto ia Jerry, ma sa ia ta'u atu ua mafaufau e pule i lona ola [tulou]. Faatasi ai ma le malosi uma ma le alofa na mafai e Jerry ona maua, sa ia taumafai e fesoasoani ia malamalama o ia [Pisila] e taua lona ola. Sa ia valaauliaina Pisila la te o i lana lotu, ae fai mai ua fiu o ia i le Atua.

Sa le iloa e Jerry le mea e fai. Mulimuli ane, a o fui ana laau i lona lotoa, sa tatalo lena ali faatuatua i le Atua mo se taitaiga. A o tatalo o ia, sa ia faalogoina se leo i lona mafau-fau o faapea mai, “Taofi tama la e o mai i uila.” Sa fai si faaletonu o Jerry, ma tau mafaufau po o le a le uiga. A o manatunatu o ia i lena unaiga faaleagaga, sa autilo atu i le auala ma vaaia ai ni alii talavou se tolu

e ofutino papae ma fusiua o tietie agai mai i lona fale. Sa maofa o ia i le “talafeauga” foi o lenei mea; sa ia vaavaai atu i lo la’ua pasi ane. Ona, ia iloa lea o le tulaga lea e i ai e manao-mia ona ia gaoioi, ona ia fono atu lea, “E, sole, taofi faamolemole! Ou te fia talanoa ia te oulual!”

Faatasi ai ma se vaai e le o mau-tinoa ae ua fiafia, sa taofi uila a nei taulelea. A o latalata atu i la’ua, sa matauina ai e Jerry e i ai a la’ua pine o igoa e ta’u atu ai i la’ua o ni faifeautalai i le Ekalesia a Iesu Keriso o le Au Paia o Aso e Gata Ai. Sa tilotilo atu Jerry ia i la’ua ma faapea atu, “Atonu e fai si ese o lenei mea, ae sa ou tatalo ma sa ta’u mai ia te au e ‘taofi tama la e o mai i uila.’ Sa ou tilotilo atu i le alatele, a o lea ua oulua i i. Pe mafai ona oulua fesoasoani mai ia te au?”

Sa soiso faifeautalai ma sa fai atu le tasi, “Ioe, ou te talitonu e mafai.”

Sa faamatala e Jerry lona popolega mo Pisila. E lei leva ae feiloai faifeautalai ma Pisila, o lana fanau, ma Jerry. Sa latou talanoa e uiga i le faamoemoega o le olaga ma le fuafuaga e faavavau a le Atua mo i latou. Sa tuputupu ae Jerry, Pisila, ma lana fanau i le faatua-tua e ala i le tatalo ma le faamaoni, o lo latou suesue i le Tusi a Mamona, ma le faaumea agaalofa a tagata o le Ekalesia. Ua atili ai ona malosi le faatuatua o Jerry ia Iesu Keriso. Sa liua masalosologa ma mafaufauga o Pisila e uiga i le pule i le ola, i le faamoemoe ma le fiafia. Sa papatisoina i latou ma avea ma tagata o le Ekalesia

toefuataiina a Keriso.⁸

Ioe, e tele auala e mafai ona fesoasoani ai faifeautalai. Mo se faataitaiga, atonu e i ai nisi e fia iloa atili e uiga i o outou augatuaa. Atonu tou te iloa igoa o o outou matua ma matua matutua o o outou matua, ae faapefea matua o matua o o outou matua matutua e toavalu? Tou te iloa o latou igoa? Pe tou te fia iloa nisi mea e uiga ia i latou? Fesili i faifeautalai! E mafai ona latou fesoasoani ia te outou!⁹ Ua faigofie ona latou maua le tele o faamau-mauga o talafaasolopito o aiga a le Ekalesia a Iesu Keriso o le Au Paia o Aso e Gata Ai.

O nisi o outou o tagata o le ekalesia ae e le o auai i le taimi nei i le faatinoina. Tou te alolofa i le Alii ma e tele taimi e mafaufau ai e toe foi mai i Lana lafu. Ae ua outou le iloa pe faapefea ona amata. Ou te fautua atu, fesili i faifeautalai!¹⁰ E mafai ona latou fesoasoani atu ia te outou! E mafai foi ona latou fesoasoani e ala i le aoaoina o e pele ia te outou. Matou te alolofa ma faifeautalai ia te outou ma mananao e toe avatu le olioli ma le malamalama o le talalelei i o outou olaga.

O nisi o outou atonu e mananao ia iloa pe faapefea ona faatoilalo se mea ua fai ma vaisu, pe faaumiumi le ola ma olioli i le soifua maloloina e sili atu. Fesili i faifeautalai! E mafai ona latou fesoasoani atu ia te outou! Ua faaaliga i suesuega tumaoti e faapea, i le tuufaatasiga, o tagata o le Ekalesia a Iesu Keriso o le Au Paia o Aso e Gata Ai, o se tuufaatasiga o

tagata maloloina. O e maliliu o nisi ia e aupito mauualalo le faitauga, a e o le umi o le soifua e sili atu nai lo se isi faalapopototoga ua lipotia mai i soo se vaega iloga na suesueina i se vaitau umi.¹¹

Atonu e manatu nisi o outou faapea e pisi ma vevesi tele le olaga, ae o le ta’ele o o outou lagona, o loo i ai pea se lagona tiga toagaogao, e leai se taitaiga po o se faamoemoega. Fesili i faifeautalai! E mafai ona latou fesoasoani ia te outou! E mafai ona latou fesoasoani e te aoao atili ai i le faamoemoega moni o le olaga—aisea ua e i ai i lenei lalolagi ma pe o fea foi e te alu i ai pe a mavae le oti. E mafai ona e aoao i le ala e faamanuiaina ai oe e le talalelei toefuataiina a Iesu Keriso, e sili atu i lo se isi lava mea e mafai ona e mafaufau i ai i le taimi nei.

Afai e i ai sou popolega i lou aiga, fesili i faifeautalai! E mafai ona latou fesoasoani ia te oe! O le faamalolosia o faaipoipoga ma aiga e aupito sili ona taua i le Au Paia o Aso e Gata Ai. E mafai ona faatasi e faavavau aiga. Fesili i faifeautalai e aoao oe pe mafai faapefea lena mea mo lou aiga.

E mafai foi ona fesoasoani faifeautalai i lou manao mo se atamai e sili atu. E matua manaomia e le agaga o le tagata le faamalalamalama. Pe aumai le mea moni i se falesuesue faasaientisi po o faaaliga mai le Atua, tatou te sailia lava! E moni lava o le mamalu o le Atua o le atamai lea.¹²

O le faateleina o le aoao e aofia ai le atamai faaleagaga faapea foi le faaletino. Matou te faamamafaina le taua o le malamalama i tusitusiga paia. Na maua e se suesuega tumaoti talu ai nei e faapea, o le Au Paia o Aso e Gata Ai e aupito sili ona atamamai e uiga i le faa-Kerisiano ma le Tusi Paia.¹³ Afai e te fia malamalama atili i le Tusi Paia, malamalama atili i le Tusi a Mamona, ma maua se malamalamaaga tele atu i le usoga a tagata ma le tulaga faatamā o le Atua, fesili i faifeautalai! E mafai ona latou fesoasoani ia te oe!

E toatele outou e i ai se manao loloto e fesoasoani i tagata o loo manaomia le fesoasoani. Ona matou te mulimuli ia Iesu Keriso, o lea e faamalolosia ai lava le Au Paia o Aso e



Gata Ai i lena uunaiga e le uma.¹⁴ Soo se tasi lava e mafai ona aufaatasi ma i matou e fesoasoani i e matitiva ma tuuina atu le fesoasoani i e mafatia i faalavelave i soo se mea i le lalolagi. Afai e te fia auai i le faatinoga, fesili i faifeautalai! E mafai ona latou fesoasoani ia te oe!

Afai foi e te fia iloa atili e uiga i le olaga pe a mavae le oti, e uiga i le lagi, e uiga i le fuafuaga a le Atua mo oe; afai e te fia iloa atili e uiga ia Iesu Keriso, o Lana Togiola, ma le Toefuataiga mai o Lana Ekalesia e pei ona sa faavaeina ai i le amataga, fesili i faifeautalai! E mafai ona latou fesoasoani ia te oe!

Ou te iloa o loo soifua le Atua. O Iesu o le Keriso. Ua toefuatai mai Lana Ekalesia. Ma le naunautai, ou te tatolo ia faamanuia e le Atua outou taitoatasi ma o tatou faifeautalai pele taitoatasi. I le suafa o Iesu Keriso, amene. ■

FAAMATALAGA

1. Thomas S. Monson, "A o Tatou Toe Potopoto Faatasi Ai," *Liahona*, Nov. 2010, 5–6.
2. Tagai Mataupu Faavae ma Feagaiga 4:3.
3. See Mataio 10:1; Luka 6:13; 10:1; Efeso 4:11–12.
4. Tagai Mataupu Faavae ma Feagaiga 1:30.
5. Mataio 28:19.
6. Tagai Mataupu Faavae ma Feagaiga 68:8; 84:62; 112:28.
7. Tagai 1 Korinito 2:2; 2 Nifae 25:26.
8. Fetusiaga parino mai ia W. Tracy Watson, se tasi sa avea ma peresitene o le Misiona a Arizona Mesa.
9. O mea na ou te faaupuina ai le valaaulia e "fesili i faifeautalai," e mafai foi ona e fesili ai i se uo e auai i le Ekalesia, mo se fesoasoani.
10. O le a fiafia foi aiga, uo, ma taitai o le Ekalesia e fesoasoani atu.
11. Tagai James E. Enstrom and Lester Breslow, "Lifestyle and Reduced Mortality among Active California Mormons, 1980–2004," *Preventive Medicine*, vol. 46 (2008), 135.
12. Tagai Mataupu Faavae ma Feagaiga 93:36.
13. Tagai *U.S. Religious Knowledge Survey* (Pew Forum on Religion and Public Life, Sept. 28, 2010), 7.
14. Tagai Ram Cnaan, Van Evans, and Daniel W. Curtis, *Called to Serve: The Prosocial Behavior of Active Latter-day Saints* (University of Pennsylvania School of Social Policy and Practice, 2012); "Mormon Volunteerism Highlighted in New Study" (Mar. 16, 2012), <http://www.mormonnewsroom.org/article/mormon-volunteerism-report; Mormons in America: Certain in Their Beliefs, Uncertain of Their Place in Society> (Pew Forum on Religion and Public Life, Jan. 12, 2012), 43; Robert D. Putnam and David E. Campbell, *American Grace: How Religion Divides and Unites Us* (2010), 444–54.



Saunia e Peresitene Dieter F. Uchtdorf

Fesoasoani Lua i le Au Peresitene Sili

E Uiga i Faanoanoaga ma Filifiliga

O le tele lava o lo tatou tuuto atu o i tatou lava i le sailiga ia maua le paia ma le fiafia, o le faaititiia foi lena o lo tatou i ai i luga o se ala o faanoanoaga.

E Uiga i Faanoanoaga

Peresitene Monson, matou te alolofa ia te oe. Faafetai atu mo le faasilasilaga musuia ma logologoa o le fausiaina o malumalu fou ma le galuega faafaifeautalai. Ona o ia galuega, ou te mautinoa lava o le a oo mai ai faamanuiaga silisili ia i tatou ma le tele o tupulaga i le lumanai.

Uso e ma tuafafine, au uo pele! O i tatou uma o tagata. Ou te faamoemoe e le o se mea lenei e faateia ai se tasi.

E leai se tasi o i tatou o le a umi ona i ai i le lalolagi. E i ai ni o tatou tausaga patino lea, i le vaaiga e faavavau, e le faatusalia i le emo o se mata.

Ona tatou o ese atu lea. O o tatou agaga "e ave atu i fanua i lena Atua o le na ia tuuina ia te i [tatou] le ola."¹ E taatitia o tatou tino i tuugamau ma tuua ai mea o lenei lalolagi pe a tatou laa atu i le isi nofoaga o lo tatou olaga.

A o tatou laititi, e foliga mai o le a tatou ola pea e faavavau. Tatou te manatu o le a le faatapulaaina aso o o tatou olaga, ma e vaai mai le lumanai ia i tatou e pei o se auala e le motusia lea e faaauau atu pea i o tatou luma.

Peitai, o le faasolo lava ina tatou matutua, o le tele foi lena o lo tatou

tepa i tua ma maofa i le puupuu moni o lena auala. Tatou te tuufesili pe mafai faapefea ona vave mou atu ia tausaga. Ma amata ai ona tatou mafaufau e uiga i filifiliga sa tatou faia ma mea na tatou faia. I le faagasologa, tatou te manatua ai le tele o taimi fiafia e maua ai e o tatou agaga le mafanafana ma le olioli i o tatou loto. Ae tatou te manatuaina foi ia faanoanoaga—o mea tatou te momoo maimau pe ana mafai ona tatou toe foi i tua ma sui.

Sa saunoa se tamaitai fomaini e tausia gasegase ua i ai i o latou toe taimi, e faapea e tele lava ona ia faia se fesili faigofie i ana gasegase a o latou sauni e tuua lenei olaga.

"O i ai ni ou faanoanoaga?" na te fesili atu ai.²

O le matua latalata atu i lena aso mulimuli o le olaga faaletino e tele lava ina maua ai se manino i manatu ma maua ai se malamalamaaga ma se vaaiga. O lea a fesiligia nei tagata e uiga i o latou faanoanoaga, e tatala mai o latou lagona. Latou te manatua i mea semanu latou te suia pe ana mafai ona latou toe faafoi i tua le taimi.



tasi o i latou. O tekinolosi e mafai ona avea ma se mea matagofie tele, ma e aoga tele pe a le mafai ona tatou latalata atu i e pele ia i tatou. Ma te nonofo mamao ese ma lo'u toalua mai i o ma aiga pele; ma te iloina le uiga o lena mea. Peitai, ou te talitonu tatou te le o agai atu i le itu sao, faaletagata lava ia ma se sosaiete, pe a tatou fesootai ai ma aiga po o uo e tele lava i le toe faasalalau lea o ata malie, auina atu o mea taua ae malie, po o le faafesootai atu foi o e pele ia i tatou i saite i le Initoneti. Ou te manatu o loo i ai se avanoa mo lea ituaiga o gaoioiga, ae o le a se tele o le taimi ua tatou naunau e faaalu ai? Afai tatou te toilalo e tuu atu o tatou lava tagata silisili ma ni taimi le faatua-oia ia i latou e taua moni ia i tatou, o le a i ai se aso tatou te faanoanoa ai [i lena mea].

Tatou filifili e faatau ia i latou tatou te alolofa i ai e ala i le faaaluina o taimi anoa ma i latou, faifaimea faatasi, ma atiae ni mea taua e manatua ai.

Maimau Pe Ana Ou Ola e Tusa ma Ou Gafatia

O le isi mea faanoanoa ua faailoaina e tagata e faapea sa latou toilalo e avea ma tagata na latou lagona na mafai ma na tataua ona avea ai i latou. Ina ua latou toe tepa i tua i o latou olaga, sa latou iloa ai latou te lei ola lava e tusa ma o latou gafatia, sa matuai tele ni mea na tuua e lei faia.

Ou te le o talanoa atu i i e uiga i le a'ea o le faasitepu o le manuia i a tatou matata faalegaluega eseese. O lena faasitepu, e tusa lava po o le a sona taua tele i lenei lalolagi, o le a itiiti lava se mea e maua ai i le malaga sili e faavavau o loo faatalitali mai ia i tatou.

Ae, o loo ou tautala atu e uiga i le avea ai ma tagata lea o loo faamoe-moe le Atua e avea ai i tatou.

Tatou te taunuu mai i lenei lalolagi, e pei ona fai mai ai le tusi solo, "faatasi ai ma ao o le mamalu i o tatou luga"⁴ mai le muai olaga.

O loo silasila mai lo tatou Tama Faalelagi i o tatou gafatia moni. O loo Ia silafia mea e uiga ia i tatou ia tatou te le iloa e i tatou lava. Na te uunaia

A o ou mafaufau i mea na latou fai mai ai, na ou ofo i le auala e mafai ona faaaafia ai e mataupu faavae autu o le talalelei a Iesu Keriso le taitaiga o o tatou olaga mo le lelei, pe afai o le a tatou faaaogaina.

E leai se mea faalilolilo e uiga i mataupu faavae o le talalelei. Ua tatou suesue i ai i tusitusiga paia, ua tatou talanoaina i le Aoga Sa, ma ua tatou faalogo i ai mai le pulelaa i le tele o taimi. O nei mataupu faavae faalelagi ma mea faatauaina e tuusao mai ma manino; e matagofie, loloto, ma mamana; ma e mautinoa lava e mafai ona fesoasoani ia i tatou e aloese ai mai faanoanoaga o le lumanai.

Maimau Pe Ana Tele Atu se Taimi sa Ou Faaaluina ma Tagata Ou te Alofa i ai

Masalo o le faanoanoaga aupito sili ona taatele o gasegase ua lata i o latou taimi, ua faailoa mai e faapea, maimau pe ana tele atu se taimi sa latou faaaluina ma tagata latou te alolofa i ai.

E patino lava i alii latou te faailoa mai lava lenei faanoanoaga taatele: latou te "matua faanoanoa lava i le tele o lo latou olaga sa faaalu i a latou . . . galuega i [aso taitasi]."³ E toatele ua misia le tele o avanoa o mea faapitoa e manatuaina ia e sau mai le faaaluina o taimi faatasi ma aiga ma uo. Ua latou misia le atiina ae o se sootaga loloto

ma i latou e sili ona taua ia i latou.

Pe le moni ea e faapea o le tele o taimi tatou te pisi ai? Ma, e faanoanoa e fai atu, o loo tatou manatu i lena pisi o se mea faamamaluina, e pei ua avea le pisi lava ia, o se mea taua ua ausia po o se faailoga o se olaga silisili.

A ea?

Ou te mafaufau i lo tatou Alii ma le Faataitaiga Atoa, o Iesu Keriso, ma Lona soifuaga puupuu faatasi ma tagata o Kalilaia ma Ierusalem. Sa ou taumafai e vaai faalemafaufau ia te Ia a o pisi tele i va o fonotaga po o galuega e fai i le taimi e tasi ina ia faataunuu uma ni mea faavavave o loo i Lana lisi o mea e fai.

E le mafai ona ou vaai i ai.

Ae, ou te vaaia le agaaloa ma le popole o le Alo o le Atua i Lona soifua ai ma se faamoemoe i aso taitasi. A o Ia fegalegaleai ai ma i latou e vagaia o Ia, sa latou lagonaina lo latou taua ma le alofaina. Sa Ia silafiaina le taua le mafuatia o tagata na Ia feiloai i ai. Sa Ia faamanuia ia i latou, ma au-auna atu i ai. Sa Ia siitiaina i latou ma faamaloloina. Sa Ia tuu atu ia i latou le meaaloa taua o Lona taimi.

I o tatou aso, ua faigofie lava le tauina na ona faafoliga e faaalu se taimi ma isi. I se kiliki o se mausa e mafai ai ona tatou "fesootai" ma le fia afe o "uo" e aunoa ma le faafesagai ma se

i tatou i o tatou olaga e faataunuu le fuafuaga faamoemoeina o lo tatou foafoaga, ina ia ola i se olaga amiotonu, ma ia toe foi atu ai i Lona afioaga.

Aisea la, tatou te tuuto atu ai le tele o lo tatou taimi ma le malosi i mea le tumau, e matua le taua, ma e papa'u? Pe ua tatou mumusu ea e vaai atu i le faavalevalea o le tulitulimatagauina o mea le taua ma lē tumau?

Pe le atamai atu ea mo i tatou le “tolo’a’i [mo i tatou lava] o oa i le lagi, e le o i ai se mogamoga po o se ele e faaumatia ai, e le o i ai foi tagata gaoi e eli atu, ma gaoi ai?”⁵

E faapefea ona tatou faia lea mea? E ala i le mulimuli i le faataitaiga a le Faaola, e ala i le faaafia ai o Ana aoaoga i o tatou olaga, e ala i le alofa moni i le Atua ma o tatou uso a tagata.

E mautinoa lava e le mafai ona tatou faia lenei mea i le tatoso o o tatou vae, faitio i le umi o sauniga [po o fonotaga], ma faitio po o a mea e ao ona tatou faia e avea ai ma soo.

Pe a oo mai i le ola ai i le talalelei, e le tatau ona pei i tatou o le tamaitiiti lea na ona faasusu o lona tamaivae ona fai mai lea sa tofi i le vai. I le avea ai ma atalii ma afafine o lo tatou Tama Faalelagi, e tele naua mea e mafai ona tatou faia. I lenei tulaga, ua le lava le na ona i ai o ni faamoemoeaga lelei. E tatau ona tatou *faia*. E sili atu foi ona taua, le tatau ona tatou *avea* ma tagata ua finagalo le Tama Faalelagi e avea ai i tatou.

O le folafola atu o a tatou molimau o le talalelei e lelei lea, ae o le avea ai ma se faataitaiga ola o le talalelei toefuataiina, e sili atu ona lelei. O le moomoo ia faamaoni atili atu i a tatou feagaiga, e lelei; o le mea moni o le faamaoni i feagaiga paia—e afafia ai le ola i se olaga mama, totogiina o a tatou sefuluai ma taulaga, tausia o le Upu o le Poto, ma le auaua atu ia i latou o mafatia—e matua sili atu ona lelei. O le faasilasila atu o le a tatou tuuto atili atu se taimi mo tatalo faaleaiga, sutesueina o tusitusiga paia, ma gaoioiga anoa faaleaiga, e lelei; ae o le faia moni o nei mea uma o le a tumau ai le aumaia o faamanuiaga faalelagi i o tatou olaga.

O le avea ai ma soo o le taumafai

lea ia maua le paia ma le fiafia. O le ala lea i le avea ai ma se tagata silisili ma sili ona fiafia.

Ia tatou filifili ai e mulimuli i le Faaola ma galulue ma le filiga ia avea ma tagata na mamanuina ai i tatou e avea ai. Ia tatou faalogo atu ma usiusitai i uunaiga a le Agaga Paia. Pe a tatou faia ia mea, o le a faaali mai e le Tama Faalelagi ia i tatou mea tatou te lei iloina e uiga ia i tatou lava. O le a la faaali mai ia i tatou le ala i o tatou luma ma tatala o tatou mata ia iloa ai a tatou taleni natia ma atonu e lei mafauaia lava.

O le tele lava o lo tatou tuuto atu o i tatou lava i le sailiga ia maua le paia ma le fiafia, o le faaitiitia foi lenei o lo tatou i ai i luga o se ala o faanoanoaga. O le tele lava o lo tatou faalagolago i le alofa tunoa o le Faaola, o le faateleina foi lenei o le a tatou lagonaina o loo tatou i ai i luga o le ala sa fuafuaina e lo tatou Tama i le Lagi mo i tatou.

Maimau Pe Ana Ou Tuu Au Lava Ia Fiafia Atili

O le isi mea faanoanoa mo i latou na iloina ua lata ina oti atonu e fai si faateia. Sa latou momoo maimau pe ana latou tuu i latou lava ia fiafia atili.

E tele lava taimi tatou te maua ai ni lagona sese e faapea o loo i ai se mea e i tala atu o lo tatou gafatia lea o le a aumai ai ia i tatou le fiafia: o se tulaga faaleaiga lelei atu, se tulaga tau tupe lelei atu, po o le iuga o se tofotofoga faigata.

O le faasolo lava ina tatou matutua, o le tele foi lenei o lo tatou tepa i tua ma iloina ai o tulaga i fafo atu e le



afaina tele lea, pe iloa ai lo tatou fiafia.

E *taua* i tatou. *Otatou* e fuafuaina lo tatou fiafia.

O oe ma au i le taimi mulimuli o le a tuuaia mo lo tatou lava fiafia.

O ma'ua ma lo'u toalu, o Harriet, e fiafia lava e tietie i a ma uila vilivae. O se mea maoae le o ese atu ma olioli i le matagofie o le natura. E i ai ni a ma auala patino ma te fiafia e tietie i ai, ae ma te le gauai tele atu i le mamao ma te o ai po o le saoasaoa ma te o ai e faatusatusa i isi tagata tietie.

Peitai, mai lea taimi i lea taimi ou te manatu e tatau ona fai si a ma tauvaga laitiiti. Ou te manatu sa mafai ona maua se ma taimi sili atu po o le tietie foi i se saoasaoa tele atu pe afai lenei ma te uunaia atili i ma'ua lava. O nisi taimi ou te faia ai se mea sese tele o le ta'u atu o lea manatu i lou toalu lelei.

O lana tali masani lava i au fautuaga o sea ituaiga, e agalelei tele, manino, ma tuusao i taimi uma. E ataata o ia ma faapea mai, “Dieter, e le o se tuuga; o se malaga. Olioli i le taimi.”

E sa'o lava o ia!

O nisi taimi i le olaga tatou te soona taulai atu ai i le tini ae ua tatou le maua ai le olioli i le malaga. Ou te le o alu e tietie uila ma lou toalu ona ou te fiafia e uiga i le tini taunuu. Ou te alu ona o le aafiaga o le i ai faatasi ma ia, e suamalie ma faafiafiaina.

Pe le foliga mai ea e faavalevalea le faaleagaina o aafiaga suamalie ma faafiafiaina ona o lo tatou mafauaia pea i le taimi o le a maea ai?

Pe tatou te faalogologo ea i musika matagofie a o faatalitali mo le nota mulimuli e mou atu ae tatou te lei faatagaina i tatou lava ia olioli moni ai? Leai. Tatou te faalogologo ma fesootai atu i fesuisuiaiga o le fati, pā'ō, ma faigaleo i le musika atoa.

Pe tatou te faia ea a tatou tatalo i le na o le fai atu “amene” po o le faaiuga i le mafauaia? E leai. Tatou te tatalo ina ia tatou latalata atu i lo tatou Tama Faalelagi, ina ia maua Lona Agaga ma lagonaina Lona alofa.

E le tatau ona tatou faatalitali ina ia fiafia seia tatou oo atu i se vaega i le lumanai, ae tei ua iloa sa avanoa lava le fiafia—i taimi uma! E le talisapaiaina le olaga i le tau ina na ona mafauaia i



mea ua tuanai. O le aso lenei na faia e Ieova . . . ,” sa tusia ai e le Fai-Salamo, “E olioli ma fiafia i ai.”⁶

Uso e ma tuafafine, e tusa lava po o a o tatou tulaga, po o a o tatou luitau po o tofotofoga, o loo i ai pea se mea i aso taitasi e olioli atoa ai ma faamemelo ai. O loo i ai se mea i aso taitasi lea e mafai ona aumaia le lotofaafetai ma le olioli pe afai o le a tatou vaaia ma talisapaia.

Masalo e tatau ona faaitiiti lo tatou vaai i o tatou mata ae ia faateleina i o tatou loto. Ou te fiafia i le upusii: E na o le loto e mafai ona vaai manino ai se tasi. Soo se mea taua lava o le a le vaaia e mata.”⁷

Ua poloaiina i tatou “e tuu atu le faafetai i mea uma.”⁸ Pe le lelei atu ea la ona tatou vaai i o tatou mata ma loto e oo lava i mea iti ia e *mafaia* lava ona tatou faafetai ai, nai lo le taulai atu i tulaga le lelei i o tatou tulaga o i ai nei?

Ua folafola mai e le Alii, “O ia o le e taliaina mea uma ma le faafetai o le a faamamaluina; ma o mea o le lalolagi lenei o le a faapoopoina ia te ia, i le sautuaselau lava.”⁹

Uso e ma tuafafine, faatasi ai ma le anoanoai o faamanuiaga a lo tatou Tama Faalelagi, Lana ata o le faaolagataga agalelei, o upumoni faalelagi o le talalelei tofufuataiina, atoa ai ma le tele o mea matagofie o lenei malaga

faaletino, “pe le ua i ai ea ia te i tatou se pogai tatou te olioli ai?”¹⁰

Ia tatou filifili e fiafia, e tusa lava po o a o tatou tulaga.

E Uiga i Filifiliga

E i ai se aso o le a tatou laa atu ai i lena laasaga le maalofia ma laasia ai mai lenei lalolagi faitino i le isi olaga. E i ai se aso o le a tatou toe tepa ai i tua i o tatou olaga ma tuufesili pe na mafai ea ona tatou lelei atu, faia ni faaiuga lelei atu, pe sa faaogaina ma le atamai sili atu o tatou taimi.

Ina ia aloese mai nisi o faanoanoaga aupito tiga o le olaga, o se mea atamai le faia o nisi o filifiliga i le taimi nei. O le mea lea, ia tatou:

- Filifili e faaalu se taimi sili atu ma i latou tatou te alolofa i ai.
- Filifili ia tauivi sili atu ma le nautai ia avea ma tagata ua finagalo le Atua e avea ai i tatou.
- Filifili e saili le fiafia, e tusa lava po o a o tatou tulaga o i ai.

O lau molimau e mafai ona taofia le tele o faanoanoaga aupito sili ona tiga o a taeao e ala i le mulimuli i le Faaola i le asō. Afai ua tatou agasala pe fai ni mea sese—afai ua tatou faia ni filifiliga ua tatou salamo ai nei—o loo i ai le meaalofo taua o le Togiola a Keriso, lea e mafai ai ona faamagaloina i tatou.

E le mafai ona tatou toe foi i tua i le taimi ma suia le tuanai, ae e mafai ona tatou salamo. E mafai e le Faaola ona soloiesea o tatou loimata o le faanoanoa¹¹ ma aveesea le avega o a tatou agasala.¹² O Lana Togiola ua faatagaina ai i tatou ia tuua ma faagalalo mea o le tuanai ma agai i luma ma lima mama, ma se loto mama,¹³ atoa ai ma se nautaitaiga e fai ia lelei atili ma avea o ni tagata sili atu.

Ioe, e vave lava ona mou atu lenei olaga; ua foliga mai e vave ona mou atu o tatou aso; ma foliga mai ai ua taufaafefe le oti i nisi taimi. E ui i lea, o le a faaauau pea ona ola o tatou agaga ma o le a i ai se aso e toe faatasia ai ma lo tatou tino toetu ina ia maua ai le mamalu tino ola pea. Ou te molimau atu ma le paia ona o le alofa mutimutivale o Keriso, o le a tatou toe ola uma ai ma faavavau. Ona o lo tatou Faaola ma Togiola, e i ai se aso o le a tatou malamalama moni ai ma olioli i le uiga o upu “ua tofatumoanaina ia Keriso, le tui o le oti.”¹⁴

O le ala e agai atu i le faataunuaina o lo tatou taunuuga faalelagi o ni atalii ma ni afafine o le Atua, o se ala e faavavau. Uso e ma tuafafine, uo pele, e tatau ona tatou amata e savavali i lena ala e faavavau i le *taimi nei*; e le mafai ona tatou faamaimauina se aso se tasi. Ou te tatalo ina ia tatou le faatalitali lava seia tatou sauni e oti ae tatou te lei aoao moni lava e ola. I le suafa paia o Iesu Keriso, amene. ■

FAAMATALAGA

1. Alema 40:11.
2. Tagai Susie Steiner, “Top Five Regrets of the Dying,” *Guardian*, Feb. 1, 2012, www.guardian.co.uk/lifeandstyle/2012/feb/01/top-five-regrets-of-the-dying.
3. Bronnie Ware, in Steiner, “Top Five Regrets of the Dying.”
4. “Ode: Intimations of Immortality from Recollections of Early Childhood,” *The Complete Poetical Works of William Wordsworth* (1924), 359.
5. Mataio 6:20.
6. Salamo 118:24.
7. Antoine de Saint-Exupéry, *The Little Prince*, trans. Richard Howard (2000), 63.
8. Mosaea 26:39; tagai foi Mataupu Faavae ma Feagaiga 59:7.
9. Mataupu Faavae ma Feagaiga 78:19.
10. Alema 26:35.
11. Tagai Faaaliga 7:17.
12. Tagai Mataio 11:28–30.
13. Tagai Salamo 24:4.
14. Mosaea 16:8; tagai foi 1 Korinito 15:54.



Tuina atu e Peresitene Henry B. Eyring
Fesoasoani Muamua i le Au Peresitene Sili

O Le Lagolagoina o Taitai o le Ekalesia

Etuuina atu ina ia tatou lagolagoina Thomas Spencer Monson o se perofeta, tagatavaai, ma talifaaaliga ma Peresitene o Le Ekalesia a Iesu Keriso o le Au Paia o Aso e Gata Ai; Henry Bennion Eyring o le Fesoasoani Muamua i le Au Peresitene Sili; ma Dieter Friedrich Uchtdorf o le Fesoasoani Lua i le Au Peresitene Sili.

O i latou e finagalo ai ia faailoa mai.
O e faatuiese ai, ia faailoa mai.

E tuuina atu ina ia tatou lagolagoina Boyd Kenneth Packer o le Peresitene o le Korama a Aposetolo e Toasefululua, ma uso nei o lena korama: Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, ma Neil L. Andersen.

O i latou e finagalo ai, ia faailoa mai.
A i ai se faatuiese ia faailoa mai.

E tuuina atu ia tatou lagolagoina fesoasoani i le Au Peresitene Sili ma Aposetolo e Toasefululua o ni perofeta, tagatavaai, ma talifaaaliga.

O i latou uma e finagalo ai, faailoa mai.

Ai se faatuiese ai, pe afai e i ai, faailoa mai i lea lava faailoga.

Ua faamalolo mai Elder Jay E.

Jensen o se tasi o le au peresitene o Korama a Fitugafulu.

O i latou e mafai ona auai faatasi ma i matou i se palota o le agaga faafetai, faamolemole faailoa mai.

E tuuina atu ina ia tatou lagolagoina Elder Craig C. Christensen e avea ma uso o le au Peresitene o Korama a Fitugafulu.

O i latou uma e finagalo ai, ia faailoa mai.

I latou e faatuiese, pe afai e i ai.

E tuuina atu ina ia tatou faamalolo maia ma se palota o le agaga faafetai

mo lana auaunaga maoae, Elder Marlin K. Jensen o se Tusitalafaamaumau ma Tusitalafaasolopito o le Ekalesia.

O i latou uma e finagalo ai, ia faailoa mai.

E tuuina atu ina ia tatou lagolagoina Elder Steven E. Snow e avea ma Tusitalafaamaumau ma Tusitalafaasolopito o le Ekalesia.

O i latou uma e finagalo ai, ia faailoa mai.

A i ai se faatuiese.

E tuuina atu ina ia tatou faamalolo maia Elders Keith K. Hilbig, Jay E. Jensen, Marlin K. Jensen, ma Octaviano Tenorio o ni uso o le Korama Muamua a Fitugafulu ma ua avea nei i latou ma Pulega Aoao ua faamalolo faamamaluina.

E tuuina atu ina ia faamalolo mai Elders Keith R. Edwards ma Larry W. Gibbons o ni uso o le Korama Lona Lua a Fitugafulu.

O i latou e fia auai faatasi i le momoliina atu o le agaga faafetai i nei Uso mo la latou tautua maoae, faamolemole ia faailoa mai.

E tuuina atu ina ia tatou lagolagoina isi Pulega Aoao, Fitugafulu Eria, ma au peresitene aoao o ausilali e pei ona i ai nei.

O i latou e finagalo ai, ia faailoa mai.

A i ai se faatuiese ai, ia faailoa mai.

Faafetai, uso e ma tuafafine, mo la outou palota lagolago, lo outou faatuatua, tuuto, ma tatalo. ■





Saunia e Elder L. Tom Perry

○ Le Korama a Aposetolo e Toasefululua

Avea ma ni Matua Lelei

E tele ni auala e mafai e matua lelei ona maua ai le fesoasoani ma le lagolago latou te manaomia e aoao atu ai le talalelei a Iesu Keriso i a latou fanau.

Sa ou tini taunuu i se itu faapitoa i le taumafanafana lenei—sa aulia ai lo'u aso fanau lona 90. A e aulia taimi iloga o lou olaga, e aoga ma taua ai le tomanatu i mea na tutupu ma aafiaga o aso ua tuanai. O outou talavou o loo faalogologo mai po o faitauina lenei lauga atonu tou te le maofa tele i le 90 tausaga o le olaga, ae o le vaitaimi na ou fanau ai, o le ola i se taimi umi faapenei sa manatulia o se ausiga maoae tele. O aso uma lava ou te faafetai ai i le Tama Faalelagi mo le faamanuiaina o a'u i se olaga tulu'i.

Ua tele naua mea ua suia talu mai ona ou ola. Ua ou vaaia le atinaega o le vaitau o pisinisi ma le vaitau o faamatalaga. O le gaosiga o taavale, ma telefoni ma vaalele o fatufatuga maoae na o le talutalufou o lo'u olaga. O aso nei, o le auala tatou te maua, faasoa, ma faaaoaga ai faamatalaga ua toeitiiti lava o aso uma e sui ai. I lo'u matua lea ua i ai, ou te maofa lava i le televave o suiga o le lalolagi lea tatou te nonofo uma ai. O le tele lava o fatufatuga o aso nei e faaosofia ai le mafau fau i o latou faamoemoega e faalelei atili ai o tatou olaga.

I suiga televavave uma o loo tutupu

i o tatou autafa, matou te tatalo faa-tauanau ma galulue ina ia mautinoa ia tumau tulaga faatonuina o le talalelei a Iesu Keriso. O nisi lava o ia mea ua i ai i se tulaga faaletonu o le galoma atu. O le tumutumu o le lisi o nei tulaga faatauaina ma, faapea ai ona avea ma sini taulamua a le fili, o le paia o le faaipoipoga ma le totonugalemu o le taua o aiga. Latou te tuuina mai se taula ma le uafu saogalemu o se aiga lea e mafai ai e fanau taitoatasi a se Tama Faalelagi agalelei ona uunaia mo le lelei ma maua tulaga faatonuina e faavavau.

O lo'u lava aiga, sa tulimatai atu i le faamanatuina o lenei vaega iloga o le 90 tausaga o lo'u olaga, sa amata ona latou fesoasoani mai ia ou manatua ma talisapaia ia aafiaga o lo'u olaga umi. Mo se faataitaiga, sa aumai ma faasoa mai e le tama teine a la'u fanau nisi o tusi sa ou tusilimaina i o'u matua lea ua toeitiiti 70 tausaga ua mavae mai le nofoaga sa ou galue ai o se malini i le motu o Saipani i le Pasefika i le taimi o le Taua Lona II a le Lalolagi.

Sa faapitoa le tosina o la'u vaai i se tasi o tusi. O se tusi sa ou tusia i lo'u

tina ina ia ona tatalaina ma faitauina i le Aso o Tina o le 1945. Ou te fia faasoa atu ni isi o vaega ma le faa-moemoe o le a outou silafia ai o le a ou faafetai ai pea i lo'u tama ma lo'u tina agalelei mo lesona sa ou aoaoina mai i a laua aoaoga i le aiga. O o'u matua o le faataitaiga sili lea ou te manatua o ni matua lelei o e sa la faia ma faamuamua aupito maua luga le la faaipoipoga ma le tausia lelei o le la fanau.

Sa amataina la'u tusi mo le Aso o Tina i le 1945 e faapea:

“Tina Pele,

“O le fa tausaga ua mavae sa ou i ai i se tulaga le manuia o le faaaluina o le Aso o Tina i se mea mamao lava mai ia te oe. O tausaga taitasi sa ou manao ai e faatasi ma oe ma ta'u atu ia te oe lo'u alofa tele ma lo'u manatu tele atu ia te oe, ae talu ai o lenei foi ua le toe mafai, o le a ou faia ai le isi mea e tau latalata atu i ai le lelei ma auina atu o'u mafaufauga e ala i le meli.

“O le tausaga lenei e sili atu nai lo o isi lava, ua ou iloa ai le tulaga ua faia e le i ai o se tina sili ona lelei ia te a'u. Muamua lava, ua ou misia nai mea laiti sa masani ona e faia mo a'u. Soo se taimi lava ou te ala ae ai i le taeao, ou te le popole lava pe maua so'u ofutino mama ma ni totini mama. Na pau lava le mea sa ou faia o le toso o le pusatoso ma ou maua i ai. I taimi o taumafataga, sa ou iloa i taimi uma o le a ou maua se mea ou te fiafia i ai na saunia i le ala sili na mafai ai. I le po sa ou iloina lava o le a ou maua ni ieafu mama i luga o lo'u moega ma se aofaiga talafeagai o ie ina ia ou maua ai le mafanafana. O le nofo ai i le fale o le mea moni sa o se fiafiaga sili lea.”

Ina ua ou faitau i parakalafa muamua nei e lua o le tusi, sa ou te'i ona o le ootia o lona faaupuga. E masalo o le nofo ai i se faleie ma le moe i totonu o se ta'inamu i luga o se moega o tolau-apiga ua toe oo atu ai ou mafaufauga i lo'u aiga sili ona faapitoa.

Sa faaauau la'u tusi i lo'u tina:

“Ae e sili atu le loloto o le mafau-fau atu ia te oe ona o le faataitaiga sa e faia mo a'u. O le olaga sa matuai fiafia lava mo i tatou o se aiga o lea sa matou mananao ai e mulimuli i ou



tulagavae, ia faaauau pea ona oo i lea lava fiafia e tasi sa fai mo tatou i aso a o matou laiti. Sa e faaavanoaina i taimi uma se taimi e ave ai le aiga i le auala o vaipapa, ma sa matou talitonu ia te oe e te faia soo se mea mai le a'e i mauga i le taaalo faatasi ma i matou i se polo. Lua te le'i o lava na o oulua ma Tama i ni tafaoga. O taimi uma lava sa oulua o ma ave le aiga. O lenei la ua ou le i ai i le aiga, ou te fiafia lava e talanoa i taimi uma e uiga i lo'u olaga faaleaiga aua sa matuai fiafia lava. E le mafai ona ou liliuese mai au aoaoga i le taimi nei aua o a'u amioga o le a atagia ai lou tagata. O le olaga o se luitau tele lea ia te a'u ia ou agavaa e ta'u o se atalii o Nora Sonne Perry. E ese lo'u mitamita i lenei igoa, ma ou te faamoemoe o le a ou agavaa ai pea mo lea igoa.

“Ou te faamoemoe e aulia atu le tausaga a sau ua ta toe faatasi e faali atu ia te oe ia taimi lelei ua ou fuafua ina e faali atu ia te oe i le Aso o Tina mo le fa tausaga ua te'a.

“Ia faamanuia le Alii ia te oe mo mea lelei uma sa e faia mo lenei lalolagi faigata.

“Alofaaga tele, Tom”¹

A o ou toe faitauina la'u tusi, sa ou toe tomanatu foi i le agaifanua a le aiga, le uarota, le siteki, ma le nuu lea sa ou ola a'e ai.

O le agaifanua ua faauigaina o le ituaiga olaga e ola ai ni tagata. O loo i ai se agaifanua tulaga ese o le talalelei, o se ta'ui o tulaga faatauaina ma faamoemoega ma faiga ua masani ai tagata uma o Le Ekalesia a Iesu Keriso o le Au Paia o Aso e Gata Ai. O lenei agaifanua o le talalelei, po o se ituaiga olaga, e sau mai le ata o le faaolataga, o poloaiga a le Atua, ma aoaoga a perofeta soifua. E faaalua i le ala tatou te tausia ai o tatou aiga ma ola ai o tatou olaga taitoatasi.

O le aoaoga muamua lava ia Atamu mo lona tiutetauave i le olaga nei o loo maua i le Kenese 2:24: “O le mea lea e tuua ai e le tane lona tama ma lona tina, a e faatasi ma lana avā: ona avea ai lea o i laua ma tino e tasi.”

O le tuufaatasia o se alii ma se tamaitai ina ia faaipoipoina faalemalo ma faaletulafono ua le gata o le tapenaga mo tupulaga o le lumanai e mautofi i le fogaeleele, ae e faapea

foi ona aumaia ai le olioliga sili ma le faamalieleina lea e mafai ona maua i lenei aafiaga i le olaga nei. E faapitoa le moni o lenei mea pe a folafola atu e le mana o le perisitua se faaipoipoga ia le gata i le olaga nei ae mo le faavavau atoa foi. O fanau e fananau mai i faaipoipoga faapena ua i ai le puipuiga lea e leai se isi lava nofoaga e maua ai.

O lesona e aoaoina i totonu o le aiga e matua lelei ua faateteleina le taua i le lalolagi i aso nei, lea ua matuai taatele ai faatosinaga a le fili. E pei ona tatou iloa, o loo taumafai o ia e 'ati ma faatamaia le faavae tonu o lo tatou lalolagi—o le aiga. I auala taufaasese poto ma fuafuaina lelei, ua ia osofaia ai le tuuto atu i le olaga faaleaiga i le lalolagi atoa ma ta'ufaa-tauvaaina ai le agaifanua ma feagaiga a tagata faamaoni o le Au Paia o Aso e Gata Ai. E ao i matua ona faamausali aoaoga i totonu o aiga o se tiutetauave aupito sili lea ona paia ma taua. E ui o isi faalapopotoga e pei o le lotu ma aiga e mafai ona fesoasoani i matua e “aoao ia le tama [po o le teine] e tusa ma lona ala” (Faataoto 22:6), o le iuga

o lenei tiutetauave e taoto tonu lava i matua. E tusa ai ma le fuafuaga sili o le fiafia, o matua lelei ua tuu atu i ai le tausiga ma le atinaega o fanau a le Tama Faalelagi.

I la tatou tausiga mataina faamataua, e tele ni auala e mafai e matua lelei ona maua ai le fesoasoani ma le lagolago latou te manaomia e aoao atu ai le talalelei a Iesu Keriso i a latou fanau. Sei ou fautuaina atu ni mea se lima e mafai ona fai e matua e fatu ai ni agaifanua malolosi atu faaleaiga:

Muamua, e mafai e matua ona tatalo faatauanau, ole atu i lo tatou Tama Faalelagi e fesoasoani ia latou alolofa, malamalama, ma taiala le fanau ua la auina mai ia i laua.

Lua, e mafai ona fai a latou tatalo faaleaiga, suesueina o tusitusiga paia, ma afiafi faaleaiga, ma talisua faatasi ma faifaisoo pe a mafai, ia avea ai le talisua i le afiafi o se taimi o talanoaga ma le aoaoina o tulaga faatauaaina.

Tolu, e mafai ona faamanuiaina tele matua mai upegafesootai lagolago a le Ekalesia, talanoa ma faiaoga o a latou fanau i le Peraimeri, taitai o le autalavou, ma au peresitene o vasega ma korama. O le talanoa ma i latou o e ua valaauina ma vaetofia e galulue ma a latou fanau, e mafai ai e matua ona tuuina atu ni faamalamalama e talafeagai ai e uiga i manaoga faapitoa ma patino o se tamaitiiti.

Fa, e mafai ona faasoa atu e le aunoa e matua a latou molimau ia latou fanau, faatautino i latou e tausi poloaiga a le Atua, ma folafola atu faamanuiaga ua folafola mai e lo tatou Tama Faalelagi i Ana fanau faamaoni.

Lima, e mafai ona tatou faatula-gaina o tatou aiga e faavae i luga o ni tulafono faaleaiga ma ni faamoe-moega e manino, ma faigofie, tu ma masani lelei faaleaiga, ma “alama-nuia o le aiga,” lea e i ai i tamaiti ni tiutetauave ma mafai ona maua ai ni alauni ina ia latou aoao ai ona paketi, sefe, ma totogi sefuluai i tupe latou te mauaina.

O nei fautuaga mo le fatuina o ni *agaifanua faaleaiga* malolosi atu e galulue soosootauau ma le agaifanua a le Ekalesia. O a tatou agaifanua malolosi faaleaiga o le a avea ma se



puipuiga mo a tatou fanau mai “u fanafanamu a le fili” (1 Nifae 15:24) ua tamau i o latou agaifanua faaletupulaga, i agaifanua o faafiafiaga ma tagata lauiloa, i agaifanua a viiga ma faaeaea, ma le agaifanua a le Initoneti ma ala o faasalalaua lea o taimi uma latou te faitaia’i i ai. O le a fesoasoani ia agaifanua malolosi faaleaiga i a tatou fanau ia “ola i le lalolagi” ae aua le avea “ma ni o le lalolagi” (Ioane 15:19).

Na aoao mai Peresitene Iosefa Filitia Samita: “O le tiute o matua o le aoao o a latou fanau i nei mataupu faavae faaola o le talalelei a Iesu Keriso, ina ia latou iloa le pogai e tatau ai ona latou papatiso ma ia mafai ona latou musuia i o latou loto se manao e faaaauu pea ona tausi poloaiga a le Atua pe a uma ona papatisoina i latou, ina ia mafai ona latou toe foi atu i lona afioaga. Outou o o’u uso ma tuafafine lelei, tou te mananao i o outou aiga, o a outou fanau; tou te mananao ia faamauiina i o outou tama ma tina na muamua atu ia te outou . . . ? Afai o lea, ia ua tatau ona e amata aoao atu i talaane o le moega pepe. E tatau ona e aoao atu e ala i faaitaitaiga faapea ma le faatonuga.”²

Fai mai le folafolaga i le aiga: “O le tane ma le ava ua i ai se tiutetauave paia e alofa ma tausi e le

tasi le isi ma a la fanau. ‘O fanau o le tofi lea mai le Alii’ (Salamo 127:3). Ua i ai i matua se tiute paia e tausia a latou fanau i le alofa ma le amiotonu, ia tuuina atu i ai mea e manaomia faaletino ma le faaleagaga, ma ia aoao i latou e alolofa ma feaunaana’i, ia tausia poloaiga a le Atua ma avea ma tagatanuu usiusitai i tulafono i soo se mea latou te nonofo ai. . . .

“ . . . I le fuafuaga paia, e tatau ona pulefaamalumu tama i o latou aiga i le alofa ma le amiotonu ma o i latou e tuuina atu mea e manaomia o le olaga ma le puipuiga mo o latou aiga. O le uluai matafaioi a tina o le faafaileleina lea o a latou fanau. O nei matafaioi paia e ao i tama ma tina ona fesoasoani le tasi i le isi o se paaga tutusa.”³

Ou te talitonu e ala mai i le fuafuaga paia ua faamamafaina mai ai le tiute faaletino o le faafaileleina ma le aoaoina o le augatupulaga o loo sosoo mai. Ae e matagofie tele le vaaia o tane ma ava o e ua galulue faatasi i se faiga faapaaga moni lea latou te miloa faatasi ai o latou faatosinaga ma fesootaiga lelei e uiga i a latou fanau ma i a latou fanau.

O le osofaiga a le amioleaga e faasagatau mai ia tatou fanau ua sili atu le poto ma lē ma nai lo se isi lava taimi. O le fausia o se agaifanua malolosi faaleaiga e faaopoopo ai se isi faavae o le puipuiga mo a tatou fanau, e talitali ai i latou mai faatosinaga a le lalolagi.

Ia faamanuia le Atua ia te outou tina ma tama lelei o Siona. Ua Ia tuuina atu i la outou tausiga ia Ana fanau e faavavau. I le avea ai ma ni matua tatou te faipaaga, ma aufaatasi foi ma le Atua, i le faataunuaina o Lana galuega ma [Lona] mamalu i Lana fanau. O lo tatou tiute paia o le fai o le mea silisili tatou te mafaia. Ou te molimau atu ai i nei mea i le suafa o Iesu Keriso, amene. ■

FAAMATALAGA

1. Tusi o le Aso o Tina mai ia L. Tom Perry i lona tina, na auina mai Saipani, na tusia i le aso 3 Me, 1945.
2. Joseph Fielding Smith, i le Conference Report, Oke. 1948, 153.
3. “O Le Aiga: O Se Folafolaga i le Lalolagi,” *Liahona*, Nov. 2010, 129.



Saunia e Elder M. Russell Ballard

○ Le Korama a Aposetolo e Toasefululua

Ia Auai ma le Naunautai

O mea tetele ua faataunuuina ma avega ua faamāmāina ona o taumafaiga a lima e toatele o loo “auai ma le naunautai i se faamoemoega lelei.”

Elder Perry, ou te manatu o oe le tagata 90 tausaga le matua aupito i laitiiti ai lava i le Ekalesia atoa. Sa outou matauina le auala na ia oso ese ai mai lona nofoa.

Uso e ma tuafafine, o taimi uma ou te ai ai ma le fiafia i se tamato fou ua pula mai lona laau pe ai foi se pea suamalie ua pula e tau sa’o mai le laau, ou te mafaufau ai lava i se taimi pe tusa o le 60 tausaga talu ai a o i ai se togāpea laitiiti a lo’u tama i Holladay, Iuta. Sa ia tausai ai se ofagapi iina ina ia feaveaia fatu o fuga o pea lea o le a mulimuli ane tutupu ae i ni pea lapopoa ma suamalie.

E fiafia tele tamā i ana lagomeli ma maofa i le auala e galulue faatasi ai le faitau afe o i latou e liliu le sua lea e ao mai i fuga o ana pea e avea ma meli suamalie—o se tasi o meaai aupito sili ona maloloina o le natura. O le mea moni, ua ta’u mai e tagata tomai faapitoa o meaai maloloina ia i tatou o se tasi lea o meaai o loo i ai uma ia elemene—enesaime, vitamini, minerale, ma le vai—e manaomia e tausi ai le ola.

Sa taumafai i taimi uma lo’u tama e faaaofia au i lana galuega i ofagapi, ae

sa ou fiafia tele e tuu atu ia te ia e tausi i ana lagomeli. Peitai, talu mai na aso, ua ou aoao atili ai e uiga i le maualuga o le faatulagaga o ofagapi—o se nuu pe tusa e 60,000 lagomeli.

E faaosofia lagomeli ina ia feaveaia fatu o fugalaau, ao mai le sua, ma liliu le sua i le meli. O lo latou naunautaiga ofoofogia lena na mamauina i o latou tulaga faanatura na foafoa ai e lo tatou Mataisau. Ua faatusatusaina e faapea ina ia maua tau lava o le tasi pauna

(0.45 kg) o le meli, e tataua ona asia faatasi e lagomeli pe a ma le 20,000 i le 60,000 o i totonu o ofaga le silia ma le faitau miliona o fugalaau ma malaga e faatusa i le faalua ona taamilo i le lalolagi. I sina taimi puupuu o lona olaga pe na o ni nai vaiaso i le fa masina, o le sao a se lagomeli se tasi i le meli i lona ofaga e na o le tasi vaeseifululua o le sipuniti e tasi.

E ui e foliga mai e faalētaua pe a faatusatusa i le aofaiga, ae o le tasi vaeseifululua o se sipuniti a lagomeli taitasi o le meli, e taua tele i le ola o le ofaga. E faalagolago lagomeli i le tasi ma le isi. O le galuega semanu e fai si lofituina mo ni nai lagomeli o le a faamāmāina, ona e faia ma le faamaoni e lagomeli uma a latou vaega.

O le ofagapi o loo avea pea ma se faatusa taua i le talafaasolopito o la tatou Ekalesia. Ua tatou aoao mai i le Tusi a Mamona e faapea sa feaveai e sa Iaretō ni lagomeli ma i latou (tagai Eteru 2:3) a o latou malaga i le Atu Amerika i le fia afe tausaga talu ai. Sa filifilia e Polika Iaga le ofagapi e fai ma faatusa e uunaia ma musuia ai le malosi e galulue faatasi ai lea e taua i le au paionia e liliu ai le toafa lafulafua o loo siomia ai le Sate Leki Tele e avea ma vanu lafulemu ua tatou mauaina nei. Ua faamanuiaina i tatou i la latou vaai mamao ma le galulue filiga faatasi.

O le faatusa o le ofagapi o loo maua i totonu ma fafo o le tele o o tatou malumalu. O lenei pulelāa o loo





ou tu atu ai sa gaosi mai le laupapa o se laau uolanati sa ola i le fanua o Peresitene Gordon B. Hinckley ma o loo vaneina ai ni ata o ofagapi.

O nei faatusa uma o loo molimau mai i se mea moni se tasi: o mea tetele ua faataunuuina ma avega ua faamāmāina ona o taumafaiga a lima e toatele o loo “auai ma le naunautai i se faamoemoega lelei” (MF&F 58:27). Mafaufau i mea e mafai ona faatau-nuuina e le faitau miliona o le Au Paia o Aso e Gata Ai i le lalolagi pe a tatou galulue e pei o se ofagapi i lo tatou tuuto atu, taulai atu ma gauai atu i aoaoga a le Alii o Iesu Keriso.

Sa aoao mai le Faaola e faapea o le poloaiga muamua lava ma le sili o le:

“E te alofa atu i le Alii lou Atua ma lou loto atoa, ma lou agaga atoa, ma lou manatu atoa. . .

“E faapena foi lona lua, E te alofa atu i le lua te tuaoi ia pei o oe lava ia te oe.

“O na poloaiga e lua ua autu ai le tulafono uma ma le au perofeta” (Mataio 22:37, 39–40).

O le faigofie ia o upu a le Faaola, ae o lo latou uiga e matua loloto lava ma taua. E ao ona tatou alolofa i le Atua ma alolofa atu ma tausi i o tatou tuaoi e pei o i tatou lava. Mafaufau i le lelei e mafai ona tatou faia i le lalolagi pe afai tatou te auai faatasi, lotogatasi o ni soo o Keriso, ma tali atu ma le naunautai i taimi uma i manaoga o isi ma auauna atu ia i latou o vagaia i tatou—o o tatou aiga, o tatou tuaoi, ma o tatou uso a tagatanuu.

E pei ona tusia i le Tusi a Iakopo, o

le auauna atu o le uiga tonu lena o le tapuaiga moni (tagai Iakopo 1:27).

Ua tatou faitau i auaunaga e tuu atu e tagata o le Ekalesia i le lalolagi atoa aemaise lava i auaunaga agaalofo e tuu atu i taimi o faalavelave—mu, lologa, afa, asiosio. O nei auaunaga i taimi o faalavelave faafua-sei ia e sili ona manaomia ma sili ona talisapaia e tatau lava ona faa-auau pea i se ala o le tausoina o avega a le tasi ma le isi. Ae faapefea o tatou olaga i aso uma? O a ni aafiaga tuufaatasii o le faitau miliona o ni tamai, galuega agaalofo tatou te faatinoa i aso taitasi ona o lo tatou alolofa loloto Faa-Kerisiano mo isi? I le gasologa o taimi o le a i ai se aafiaga liua o lenei mea i luga o fanau uma a lo tatou Tama Faalelagi e ala i le faaloaloa atu o Lona alofa ia i latou e ala atu ia i tatou. O loo manaomia e lo tatou lalolagi faigata lenei alofa o Keriso i le taimi nei e sili atu nai lo se isi lava taimi, ma o le a sili atu ona manaomia i tausaga o i luma atu.

O nei galuega faigofie i aso taitasi e ono foliga mai e le o se mea tele pe a faia taitasi, ae pe a mafaufau i ai i se tuufaatasiga o le a avea e pei lava o le tasi vaesefululua o le sipuniti o le meli lea e saofaga atu ai se lagomeli se tasi i le ofaga. O loo i ai se mana i lo tatou alofa mo le Atua ma Ana fanau, ma pe a faaalua i se ala moni lena alofa i le faitau miliona o galuega o le agalelei Faa-Kerisiano, o le a faasumalieina ma faafaileleina ai le lalolagi i le sua lea e tausia ai le ola o le faatuatua, faamoemoe, ma le alofa mama.

O le a se mea e manaomia ona tatou faia e avea ai e faapei o ni lagomeli tuuto ma avea ai lena tuuto o se vaega o lo tatou natura? O le toatele o i tatou e faamaoni lava i le auai atu i sauniga a la tatou Ekalesia, ma tatou te galulue malolosi i o tatou valaauga, aemaise lava i Aso Sa. E mautinoa lava e tatau ona faamālo atu i lena mea. Ae pe o punouai ma le naunaitai ea o tatou mafaufau ma o tatou loto i mea lelei i le vaiaso atoa? Pe ua tau ina faatino, pe o tatou liua moni ea i le talalelei a Iesu Keriso? O faapefea ona tatou avea le fatu o le faatuatua lea o loo faafaileleina i o tatou mafaufau ma totō loloto i le eleele lelei o o tatou agaga? E faapefea ona tatou faia se suiga tele o le loto lea o loo fai mai ai Alema e taua mo lo tatou fiafia e faavavau ma le filemu? (tagai Alema 5:12–21).

Manatua, o loo i ai i le meli ia elemene taua uma mo le tausia o le ola faaletino. Ma o le aoaoga faavae ma le talalelei a Keriso ua na o le pau lea o le ala e maua ai le ola faavavau. Ua na o a tatou molimau lava o le a matua iloa sili ai mea o loo i o tatou mafaufau ma faalolotoina ai i o tatou loto, o le a avea ai lo tatou naunautai e alolofa atu ma auauna atu e faapei o le alofa o le Faaola. Ua na o le pau lava la lena o le ala, e mafai ai ona avea i tatou ma ni soo liua atoatoa o Keriso ua faamanaina e le Agaga e aapa atu i loto o o tatou uso a tagata.

Pe a oo ina le toe pupu tele o tatou loto i mea o le lalolagi, o le a tatou le toe saili atu i viiga a tagata pe tau lava ina saili atu e viia lo tatou faamaua-luga (tagai MF&F 121:35–37). Ae, tatou te tauavea uiga Faa-Keriso ia na aoao mai e Iesu:

- Tatou te agamalu, agamaualalo ma tali-tiga (tagai MF&F 121:41).
- Tatou te agalelei, e aunoa ma le pepelo po o le faa’ole’ole (tagai MF&F 121:42).
- Tatou te lagonaina le alofa mama i tagata uma (tagai MF&F 121:45).
- E amiomama o tatou mafaufauga e le aunoa (tagai MF&F 121:45).
- Tatou te le toe mananao e fai se leaga (tagai Mosaea 5:2).

- O le Agaga Paia o lo tatou soa tumau, ma o aoaoga faavae o le perisitua o le a to ifo i luga o o tatou agaga e pei o le sau mai le lagi (tagai MF&F 121:45–46).

Ia, ou te le o uunaia outou ina ia matuai i ai se naunautaiga faalelotu. E leai! Ua na ona ou fautuaina atu ina ia tatou laa atu i se isi laasaga i lo tatou liua atoatoa i le talalelei a Keriso e ala i le moliooina o ana aoaoga faavae i totonu o o tatou loto ma o tatou agaga ina ia mafai ai ona tatou galulue ma ola ai—faatasi ai ma le amiosao—i mea ua tatou folafola atu ua tatou talitonu i ai.

O lenei amiosao e faafaigofieina ai o tatou olaga ma faateleina ai lo tatou gauai atu i le Agaga ma i manaoga o isi. E aumaia ai le olioli i o tatou olaga ma le filemu i o tatou loto—o le ituaiga o olioli ma filemu lea e oo mai ia i tatou pe a tatou salamo i a tatou agasala ma mulimuli atu i le Faaola e ala i le tausia o Ana poloaiga.

E faapefea ona tatou faia lea suiga? E faapefea ona tatou faia lenei alofa o Keriso e avea o se vaega autu o o tatou loto? O loo i ai se faatinoga

faigofie se tasi o aso uma lea e mafai ona faia ai se eseese mo tagata uma o le Ekalesia, e aofia ai outou tama ma teine, outou alii ma tamaitai talavou, outou talavou nofofua matutua, ma outou tama ma tina.

O lenei faatinoga faigofie o le: I a outou tatalo o le taeao i aso fou taitasi, ole atu i le Tama Faalelagi e taiala oe ia iloa se avanoa e auauna atu ai i se tasi o Ana fanau faapelepele. Ona e faagasolo lea i aso faatasi ma lou loto ua faatumulia i le faatuatua ma le alofa, e saili mo se tasi e fesoasoani i ai. Ia e taulai pea i lea mea, e pei lava o lagomeli ona taulai atu i fugalaau ia latou te ao mai ai le sua ma le fuga. A e faia lea mea, o le a faateleina lou gauai faaleagaga ma o le a e mauaina ni avanoa e auauna atu ai, ia e te lei iloina muamua e mafai.

Ua faatele ona aoa mai Peresitene Thomas S. Monson i ni faataitaiga e taliina ai e le Tama Faalelagi se tatalo a se isi tagata e auala atu ia i tatou—e auala atu ia te oe ma au—e auala atu i a tatou upu agalelei ma galuega—e auala atu i a tatou faatinoga faigofie o le auauna atu ma le alofa.

Sa saunoa mai Peresitene Spencer W. Kimball: “E silafia i tatou e le Atua, ma na te leoleoina i tatou. Ae e masani lava e auala mai i se isi tagata na te faafetaiaia ai o tatou manaoga. O le mea lea e taua ai lo tatou auauna atu o le tasi i le isi” (*Aoaoga a Peresitene o le Ekalesia: Spencer W. Kimball* [2006], 82).

Ou te iloa a e faia lenei mea—i le fale, i le aoga, i le galuega, ma i le lotu—o le a taialaina oe e le Agaga, ma o le a mafai ai ona e iloitino i latou o loo manaomiaina se fesoasoani patino lea e na o oe e ono mafai ona tuuina atu. O le a uunaia oe e le Agaga ma faaosofiaina oe ma le ofoofogia e fesoasoani e feaveaia le alofa mama o Keriso ma Lana talalelei i le lalolagi.

Ma ia manatua, e pei foi o tasi vaesefululua o sipuniti meli a lagomeli laiti e avatu i le ofaga, afai tatou te faateleina a tatou taumafaiga i le faasefuluafaina ma faamilionaina o taumafaiga i le agaga tatalo e faasoa atu le alofa o le Atua i Ana fanau e ala i auaunaga Faa-Kerisiano, o le a faapena foi ona avea ma se aafiaga faatupulaia vave o le lelei lea o le a aumai ai le Malamalama o Keriso i lenei lalolagi ua matua faapogisaina. O le lotogatasi, o le a tatou aumaia ai le alofa ma le agaalofo i o tatou lava aiga ma i e ua tuuatoatasi, o e matitiva, o e ua lofituina, ma i latou o fanau a lo tatou Tama Faalelagi o loo saili mo le upumoni ma le filemu.

O lau tatalo faamaualalo, uso e ma tuafafine, ina ia tatou ole atu i a tatou tatalo o aso taitasi mo le musumusuga ia maua se tasi e mafai ona tatou tuu atu i ai sina auaunaga anoa, e aofia ai le auaunaga o le faasoaia atu o upumoni o le talalelei ma le molimau. I le faaiuga o aso taitasi, tau ina ia mafai ona tatou fai atu “ioe” i se tali i le fesili, “Ua ou faia ea se lelei i le aso? Ua ou fesoasoani ea [i se ua mafatia]?” (*Viiga*, nu. 136).

O le galuega lenei a le Atua. Ia tatou galulue ai ma le faamaoni e pei o lagomeli laiti tuuto e o atu i a latou lava galuega, ou te tatalo ai ma le lotomaualalo i le suafa o Iesu Keriso, amene. ■



Aai o Mekisiko, Mekisiko



Saunia e Elder Larry Echo Hawk

○ Le Fitugafulu

"O Mai ia te Au, Le Aiga e o Isaraelu"

Pe a tatou o mai i lo tatou Faaola, o Iesu Keriso, ma faapaiaina o tatou loto, o le a avea i tatou uma o ni meafaigaluega i le faataunuuna o folafolaga silisili o le Tusi a Mamona.

Sa ou ofo fua atu e auauna i le Marini a le Iunaite Setete i le taimi o le Taua a Viatename. E lei leva ona ou taunuu i Quantico, Virginia, mo aoaoga muamua, ae ou iloa ua ou tu faasasa'o i luma o lo'u moega i lo matou faleie tele faatasi ma le isi 54 o i latou na faaopopo atu i le Marini. Sa ou feiloai i lo'u faiaoga o toleniga, o se tagata tomali ma malosi ma tiaa mai taua, ina ua ia kikiina le faitotoa i le faleie tele ma ulufale mai a o leoleoā mai i upu e tumu i upu masoa.

Ina ua uma lana faalauiloaga tau-faafefe, sa ia amata mai le tasi itu o le faleie tele ona faafetaia'ia tagata taitoa-tasi i ni fesili. E aunoa ma se 'alofaga, e maua faasolosolo ai lava e le faiaoga o toleniga se mea e faatauemu ai i tagata taitasi, i se gagana leotele ma le masoa. Mai le laina sa ia faasolo mai ai i marini taitasi e faataio mai lana tali sa ia poloaiina: "Ioe" po o le "Leai, Faiaoga Satini." Sa le mafai ona ou iloa lelei po o le a le mea sa ia faia, ona sa faatonuina i matou e tutu faasasa'o ma o matou mata e faasaga sa'o i luma. Ina ua oo mai le faasologa ia te au sa

mafaia ona ou iloaia sa ia toso maia la'u ato tolauapi ma sasaa ese mea na i ai i totonu i luga o lo'u faamalū i o'u tua. Sa ia sagole a'u meatotino ona savali mai lea ina ia ma faafesagai. Sa ou saunia a'u lava mo lana osofaiga. Sa ia uuina la'u Tusi a Mamona. Sa ou manatu o le a ia faataio mai ia te au; ae sa ia soso mai ma musumusu mai, "O oe o se Mamona?"

E pei ona faatonuina ai, sa ou alaga atu, "Ioe, Faiaoga Satini."

Sa ou toe manatu foi i se mea o le a leaga atu. Ae, sa ia tu ma sii i luga lona lima o loo uu ai la'u Tusi a Mamona ma i se leo matua lemu lava sa faapea mai, "E te talitonu i lenei tusi?"

Sa ou toe alaga atu foi, "Ioe, Faiaoga Satini."

I le taimi lea sa ou mautinoa ai o le a ia faataio mai i ni upu faatiga e uiga i Mamona ma le Tusi a Mamona, ae sa na o lona tu iina ma le filemu. Ina ua mavae sina taimi sa ia savali atu i tua i lou moega ma tuu ma le faateete i lalo la'u Tusi a Mamona. Ona ia toe savali atu lea ma pasia au e le'i toe tu, ma faaaaua ona faatauemu ma faatiga

i se gagana masoa i isi vaega uma o totoe o le au marini.

Sa ou tuufesili pea pe aisea lava na faasaoia ai au e lenei Fitafta Marini malosi i lenei aso. Ae ou te faafetai sa mafai ona ou fai atu e aunoa ma le masalosalo, "Ioe, o au o se tagata o Le Ekalesia a Iesu Keriso o le Au Paia o Aso e Gata Ai" ma "Ioe, ou te iloa e moni le Tusi a Mamona." O lenei molimau o se meaalofo taua na tuuina mai ia te au e ala mai i le Agaga Paia faatasi ai ma le fesoasoaniga a faifeautalai e toalua ma se faufautua o le korama a ositaulaga.

Ina ua 14 ou tausaga, sa aoa e faifeautalai e toalua o Lee Pearson ma Boyd Camphuysen, lo'u aiga i le talalelei a Iesu Keriso, ma sa papatisoina ai au. Lua tausaga mulimuli ane, sa luita ai au e lo'u faufautua o le korama a ositaulaga, o Richard Boren, e faitau le Tusi a Mamona. Sa ou taliaina lenei lu'i, ma na ou faitauina e le itiiti ifo ma le 10 itulau i po uma seia oo ina maea.

I le itulau autu sa ou faitau ai e faapea sa "tusi atu ia sa Lamana, o se toe vaega o le aiga o Isaraelu; ma Iutaia ma Nuuese foi." I le faatomuaga o le Tusi a Mamona: O Se Tasi Molimau ia Iesu Keriso, o loo faapea mai o sa Lamana "o i latou foi o ni isi o tuua o Initia Amerika." A o ou faitau le Tusi a Mamona, sa foliga mai ia te au o loo faataio i o'u tuua Initia Amerika. O loo faamatala mai ai le tala e uiga i se nuu, o se vaega lea na mulimuli ane faamatalaina o sa Lamana, o e na malaga mai Ierusalem a se "nuu o le folafolaga" (1 Nifae 2:20) pe tusa o le 600 TL.M. O se tala e uiga i fesootaiga a le Atua ma nei tagata anamua na nofoia se vaega o le konetineti o Amerika. E aofia ai se tala i le galuega a Iesu Keriso ia i latou ina ua mavae Lona Toetu. O fuaitau i le Tusi a Mamona ua fautua mai ai i le gasologa o taimi sa faasalalaina ai i latou i le konetineti atoa o Amerika ma motu o vasa lata ane (tagai Alema 63:9-10). Sa muai ta'u atu e o latou perofeta e faapea e tele motu o tagata o Nuuese o le a iu ina o mai i lenei nuu o le folafolaga, ma o le toasa o le Atua o le a i ai i luga o sa Lamana, ma



o le a faataapeapeina, taia, ma toetoe lava a faaumatiaina (tagai 1 Nifae 13:10–14).

O le tamā o lo’u tamā matua o Echo Hawk, o se tagata Initia Pawnee, sa fanau i le ogatotonu o le 1800 i le nofoaga ua ta’ua nei o Nebraska. Ina ua 19 ona tausaga, sa faamalosia ia tagata Pawnee e avatu o latou elelee totino e 23 miliona eka (9.3 miliona ha) mo isi tagata e nofoia. I le 1874 sa savavali atu ai tagata Pawnee i le faitau selau o maila i saute i se nofoaga tuufua laitiiti e tu i totonu o le Teritori o Initia Oklahoma. O le faitau aofai o tagata Pawnee sa faaitiitia mai le silia ma le 12,000 i le itiiti ifo ma le 700 i le taimi na taunuu ai i Oklahoma. O tagata Pawnee, e pei foi o isi ituaiga, sa faasalalauina, taia, ma toetoe lava a faaumatiaina.

O loo i ai i le Tusi a Mamona se savali faapitoa mo sulī o sa Lamana, o se toe vaega o le aiga o Isaraelu. Sa faamalalalama mai e Nifae lenei

savali a o faaliliuina le miti a lona tama e uiga i nei aso e gata ai: “Ma i lena aso o le a iloa ai e le toe vaega o a tatou fanau, o i latou o lo le aiga o Isaraelu, ma o i latou o tagata o le feagaiga a le Alii; ma ona latou iloa ai lea ma o mai i le malamalama e uiga i o latou muātua’a, ma i le malamalama foi o le talalelei a lo latou Togiola, lea sa tauaao atu e ia i o latou tamā; o le mea lea, o le a latou malamalama ai i lo latou Togiola ma matāutu tonu lava o Lana mataupu faavae, ina ia mafai ona latou iloa le ala e o mai ai ia te ia ma faaolaina” (1 Nifae 15:14).

O Le Tusi a Mamona o se tusitusiga paia. O loo i ai le atoaga o le talalelei e faavavau. Sa tusia e le Perofeta o Iosefa Samita e faapea “o le Tusi a Mamona [o le] tusi aupito sili ona sa’o i soo se isi lava tusi i luga o le lalolagi, o le maa ’au’au foi lea o la tatou tapuaiga, e sili foi ona latalata atili atu o le tagata i le Atua i lona ola ai i ona mataupu, nai lo se isi lava tusi”

(Aoaoga a Peresitene o le Ekalesia: Iosefa Samita [2007], 64). O le mea lea, o loo i ai se savali mo tagata uma o le lalolagi.

A o avea ai o se talavou ua 17 tausaga sa faitauina le Tusi a Mamona mo le taimi muamua, sa ou taulai atu i le folafolaga a Moronae: “Ma pe a outou maua nei mea, ou te apoapoai atu ia te outou ia outou ole atu i le Atua, le Tama Faavavau, i le suafa o Iesu Keriso, pe ua le moni ea nei mea; ma afai tou [te] ole atu ma le loto faamaoni, ma le manatu moni i ai, ma le faatuatua ia Keriso, o le a ia faaali mai le moni o ia mea ia te outou, i le mana o le Agaga Paia” (Moronae 10:4).

A o ou tootuli i le tatalo, sa ou maua se molimau malosi faaleagaga e moni le Tusi a Mamona. O lena molimau sa fesoasoani ia te au e fuafua ma faia faaiuga i lo’u olaga atoa.

Ou te apoapoai atu i tagata uma ina ia faitau le Tusi a Mamona: O Se Tasi Molimau ia Iesu Keriso.

Ou te talosaga faapitoa atu lava i le toe vaega o le aiga o Isaraelu, o sulī o le nuu o le Tusi a Mamona, po o fea lava le mea o e i ai, ia faitau ma toe faitau le Tusi a Mamona. Aoa i folafolaga o loo i ai i totonu o le Tusi a Mamona. Mulimuli i aoaoga ma faaitaiga a Iesu Keriso. Osia ma tausia ia feagaiga ma le Alii. Saili atu ma mulimuli i le taitaiga a le Agaga Paia.

Ou te faamaea atu i upu na saunao i ai ia Amaleki, o se isi perofeta o le Tusi a Mamona: “Ma o lenei, o’u uso pele e, ou te manao ia outou o mai ia Keriso, o lē o le Paia e Toatasi o Isaraelu, ma taumamafa i lana olataga, ma le mana o lana togiola. Ioe, o mai ia te ia, ma tuu atu o outou agaga atoa e fai ma taulaga ia te ia, ma anapopogi ma tatalo pea e le aunoa, ma tutumau e oo i le gataaga; ma e pei ona soifua le Alii, o le a faaolaina outou” (Ominae 1:26).

Pe a tatou o mai i lo tatou Faaola, o Iesu Keriso, ma faapaiaina o tatou loto, o le a avea i tatou uma o ni meafaigaluega i le faataunuuna o folafolaga silisili o le Tusi a Mamona. Ou te molimau atu ai i nei mea i le suafa paia o Iesu Keriso, amene. ■



Saunia e Elder Robert C. Gay

○ Le Fitugafulu

Se a Foi Se Mea e Avatu e le Tagata e Togiola A'i Lona Ola?

E tatau ona tatou lafoai uma a tatou agasala, tele pe laiti, mo le tau i a le Tama o le ola faavavau.

Na fesili le Faaola i Ona soo i le fesili lenei: “Se a foi se mea e avatu e le tagata e togiola a'i lona ola?”¹

O se fesili lenei na aoao mai e lo'u tama ou te mafaufau i ai ma le faateete i tausaga ua mavae. A o ou tuputupu a'e, sa tofi mai e o'u matua a'u feau e fai i le fale ma totogi mai se alauni ia te au mo lena galuega. Sa masani ona ou faaaogaina lena tupe, e sili laitiiti atu i le 50 sene i le vaiaso, ou te alu ai i le tifaga. O aso na o le tau o se pepa mo le tifaga sa na o le 25 sene mo se tamaitiiti e 11 tausaga. Ona totoe ai lea o le 25 sene e faaalu i lola laau, lea sa 5 sene i le lola. O se tifaga ma ni lola laau se lima! E leai se mea na sili atu nai lo lena mea.

Sa lelei mea uma seia oo ina atoa lo'u 12 tausaga. O le tutu ai i le laina i se tasi aoauli, sa ou iloa ane o le tau o le pepa tifaga mo se tagata e 12 tausaga le matua ua 35 sene, o lona uiga la, o le a leai isi lola laau e lua. O le le saunia lelei e fai lena ositaulaga, sa ou faapea ifo ai ia te a'u lava, “E tutusa

lava ou foliga e pei o le vaiaso na te'a nei.” Na ou laalaa atu ma fai atu mo se pepa tifaga e 25-sene. Sa le'i emo le tali tupe ma sa ou faatauina au lola laau masani e lima ae le tolu.

O lo'u fiafia ai i lena mea na ausia, sa ou telea'i atu ai i le fale e faamatala i lo'u tama lo'u laki tele. A o o'u talatala atu i ai faamatalaga, sa leai sana tala na fai mai. Ina ua uma la'u faamatalaga, sa na ona tilotilo mai lava ia te a'u ma fai mai, “Atalii, e te faatauina atu lou agaga mo se limasene?” O ana upu sa tuia ai lo'u fatu e sefululua tausaga le matua. O se lesone sa le mafai ona galo ia te a'u.

O tausaga mulimuli ane sa ou fesiligia ai lena fesili e tasi i se Perisitua Mekisateko e le toaga i le Lotu. O ia o se alii lelei sa alofa i lona aiga. Ae peitai, sa le'i toe auai o ia i le lotu mo le tele o tausaga. Sa i ai sona atalii talenia sa taalo i se autaalola iloga e femalagaai ia latou tauvaga sa fai aoga taaloga ma taaalo i Aso Sa. Sa manumalo lena au i nisi o taaloga sue siamupini tetele. A o ma feiloai, sa faamanatu maia ia te

ia e faapea, o le avea ai ma se tagata e umia le perisitua, sa folafola atu ia te ia, afai na te faalateleina lana tautoga ma le feagaiga, o le a ia maua “o mea uma ua i ai i ai i [lo tatou] Tama o le a tuu atu ia te ia.”² Ona ou fesili atu lea ia te ia, “Pe sili atu le taua o le siamupini i le atunuu nai lo mea uma ua i ai i le Tama?” Sa ia fai mai lemu, “Ua ou iloa atu lou manatu” ma faia ai lea o se taimi tuupoina e feiloai ai ma lona epikopo.

O aso nei e ese le faigofie ona aafia i le malomaloa o le lalolagi—e ui i le lelei o tatou faamoemoega. Ua faamaalosia i tatou e le lalolagi ina ia e “[vaai] i talaatu o le faailoga.”³ Sa fesili talu ai nei se tagata ia te a'u, “Pe e afaina lava se inu [ava] se tasi?” O mafai ona e iloa o le fesili lena a le fili? Sa fesili Kaino, “O ai le Alii e tatau ai ona ou iloa o ia?”⁴ ona maua ai lea o lona agaga. O le tauamiotonuina o agasala laiti, e fiafia ai Satani. Mo se fagu susu,⁵ o se igoa na sese lona sipelaga,⁶ o se potoi areto,⁷ na fesuaiai ai talatuu ma tofi.

Pe a tatou mafaufau i le fesuaiga o le limasene po o le suega siamupini a le atunuu i o tatou olaga, e mafai a le o le ta'uamiotonuina o a tatou amioga, e pei o Kaino, po o le saili foi e usitai i le finagalo o le Atua. O le fesili o loo i o tatou luma e le o le, po o tatou faia mea e tatau ona faasa'oina, aua o loo tatou faia i taimi uma lava. Ae, o le fesili o le, pe o le a tatou “faaseeseese” pe “faamaea” le valaau i o tatou loto e fai le finagalo o le Tama?⁸

E fiafia le Alii i lo tatou amiotonu ae ua fetalai mai ia faaauau pea ona tatou salamo ma gauai atu. I le Tusi Paia tatou te faitau ai, o se taulealea sa tausia poloaiga, ma mauoa sa ifo atu i luma o le Faaola ma fesili po o le a le mea e tatau ona ia faia e maua ai le ola faavavau. Na ia savali ese ma le faanoanoa ina ua fetalai atu le Faaola, “E tasi le mea e le o ia te oe: . . . faatau atu au mea uma.”⁹

Ae peitai, o se isi foi alii mauoa ae faalelalolagi, o le tupu aoao o sa Lamana, le tama o Lamona'e, o le sa fesiligia foi lea lava fesili e tasi e uiga i le ola e faavavau, sa faapea mai: “O le a se mea ou te faia ina ia mafai ai ona fanauina o a'u i la le Atua, ina ia seia ese ai i



fafō lenei agaga leaga mai lo'u fatafata, ma ou maua ai lona Agaga[?]. . . . O le a ou lafoai i lo'u malo, ina ia mafai ona ou maua lenei olioli tele.”¹⁰

Tou te manatua le tali na tuuina atu e le Alii i le tupu e ala i Lana auauna o Arona? “Afai e te salamo i au agasala uma, ma ifo i lalo i luma o le Atua, ma valaau atu i lona suafa i le faatuatua, ma le talitonu o le a e maua, ona e maua lea o le faamoemoe ua e nau-nau i ai.”¹¹

Ina ua malamalama le tupu i le ositaulaga na manaomia ai, sa faamaualalo o ia ma fao ona tatalo atu lea, “Le Atua e, . . . o le a ou lafoai ese a'u agasala uma ina ia ou iloa oe.”¹²

O le fesuiaga lenei o loo finagalo ai le Faaola mai ia i tatou: e tatau ona tatou lafoai uma a tatou agasala, tele pe laitī, mo le tau i le Tama o le ola faavavau. E tatau ona tatou faagalo i tala faafiaamiotonu, ‘alofaga, faamatagala, mea e punipuni ai, faatuutuu, foliga, faamaualuga faaletagata, mafau-fauga faamasino atu, ma le faia o mea i a tatou lava auala. E tatau ona vavae-ese i tatou mai mea uma faalelailagi

ae tauave i o tatou luga foliga o le Atua i o tatou mata.”¹³

Uso e ma tuafafine, ia manatua o lenei tiute e sili atu nai lo na o le le faia o mea leaga. Faatasi ai ma se fili e le o malolo, e ao ai foi ona tatou galulue ae le na o le nofonofo i “le sioa le mautonu.”¹⁴ O le tauaveina o foliga o le Atua o lona uiga o le feauaunaa'i. E i ai mea o loo tatou faia e sese ma agasala o le le faia, ma e tatau ona tatou aloese mai ia agasala uma.

A o avea au ma se peresitene o le misiona i Aferika, sa aoaoina ai a'u e faavavau i lenei upumoni maoae. Sa ou agai atu i se fonotaga ae ou vaaia se alii talavou sa na o ia, sa tagi lotu-lotu i autafa o le alatele. Sa faapea mai se leo i totonu ia te a'u, “Tu e fesoasoani i le tamaitiiti le la.” Pei o le vave sa ou faalogoina ai lenei leo, i sina sekone lava sa ou manatu ifo ai: “E le mafai ona e tu. O le a e tuai ai. O oe o le taitai pulefaamalumu ma e le mafai ona e savali aua e te oo atu ua e tuai.”

Ina ua ou taunuu atu i le falelotu, sa ou toe faalogoina foi lea lava leo,

“Alu e fesoasoani i le tamaitiiti lena.”

Sa ou tuuina atu loa le ki o la'u taavale i se tagata o le Ekalesia e suafa ia Afasi ma fai atu i ai e alu e aumai le tamaitiiti ia te a'u. Pe a ma le 20 minute muli-muli ane, ae ou faalogoina le popo mai o lo'u tauau. Sa i fafo le tamaitiiti.

Sa pe a ma le 10 tausaga lona matua. Sa matou iloa ane ua malui lona tama, ae o lona tina sa i le fale-puipui. Sa nofo o ia i se nofoaga e sili ona matitiva o Accra i se tagata na vaaia o ia, o le sa fafagaina o ia ma maua ai se mea e moe ai. Ina ia maua lona tausiga, sa ia faatauina atu ni i'a faala i le alatele. Ae ina ua uma lea aso o faatauga, ina ua ia tago i lana taga sa ia tau ai i se pu. Sa leiloa uma lana tupe na maua. Sa vave ona ma iloa ina ma Afasi afai e foi atu o ia e aunoa ma le tupe, o le a ta'u o ia o se pepelo, atonu foi e sasa ai, ona tuli ese ai lea e alu i le auala tele. O lona lava taimi o le popole lea na ou muai vaai ai ia te ia. Sa ma faatoafilemuina lona fefe, totogi atoa atu lana tupe na leiloa, ma toe ave o ia i le fale o le tagata na tausia o ia.



agaga, ma e i le faamaoni o lo'u loto, ou te tuuina atu ia te outou la'u moli-mau o le ekalesia lenei o le Ekalesia moni a le Atua, o lo tatou Faaola o lona faaao lea ma e taitaia e ala mai i Lana perofeta filifilia. I le suafa o Iesu Keriso, amene. ■

FAAMATALAGA

1. Mataio 16:26.
2. Mataupu Faavae ma Feagaiga 84:38.
3. Iakopo 4:14.
4. Mose 5:16.
5. O se fagu susu ma ona penu (tele ai le kulimi) sa totonugalemu i se feeseeseaiga i le va o le toalua o Thomas B. Marsh ma Mrs. Harris, o le sa malie e tuu faatasi a la punaoa e gaosi ai le sisi. Ina ua faasea Mrs. Harris sa le'i tuua ai e Mrs. Marsh ia penu faatasi ma le susu ae sa nofo ma tuu mo ia lava, sa faapea ona faasea ai foi Mrs. Harris ma tauaimisa ai nei fafine. Sa ave e Thomas Marsh le mataupu i le epikopo, o le sa lagolagoina Mrs. Harris. Sa alu atu mai le epikopo agai i le au fautua maua luga, i le Au Peresitene Sili, ma sa ioe uma sa sese ia Mrs. Marsh. O lenei mea sa faapea ona iu ai ina i ai se tina i le va o Thomas Marsh ma le Usoga. E le'i leva, ae tulai Thomas Marsh e molimau i luga o le faamasinoga a Misuri e faapea, sa tetee Mamona i le setete o Misuri. (Tagai ia George A. Smith, "Discourse," *Deseret News*, Apr. 16, 1856, 44.)
6. Ina ua tuuina atu e le Perofeta o Iosefa Samita se valaauga ia Simonds Ryder e ave ma faifeautalai, sa iloa e Ryder sa sipleaina lona igoa "Rider" i le faaaliga na lomiaina. Sa le fiafia ai o ia, ma iu ai i lona liliuese ma iu ai ina auai i le faataina ma le faafulumanuina o le perofeta. Sa le'i iloa e Ryder sa masani ona faalau atu e Iosefa Samita ia faaaliga i ana tusiupu ma e leai sana vaega sa faia i le sipelaga [o lona igoa]. (Tagai Milton V. Backman Jr., *The Heavens Resound: A History of the Latter-day Saints in Ohio, 1830–1838* [1983], 93–94; Donald Q. Cannon and Lyndon W. Cook, eds., *Far West Record: Minutes of The Church of Jesus Christ of Latter-day Saints, 1830–1844* [1983], 286.)
7. I le Kenese 25, tatou te aoao ai sa faatau atu e Esau lona tofi ia Iakopo mo se potoi areto "falaoa ma le potoi areto" (verse 34).
8. Tagai Mataupu Faavae ma Feagaiga 19:18–19.
9. Tagai Mareko 10:21–22.
10. Alema 22:15.
11. Alema 22:16.
12. Alema 22:18.
13. Tagai Alema 5:14–19.
14. Alema 60:7.
15. Mareko 1:18.
16. Mataio 18:11.
17. Iakopo 1:8.
18. Mataupu Faavae ma Feagaiga 58:27.
19. Tagai Luka 15:11–32.
20. Tagai Iosefa Samita—Talafaasolopito 1:15–16.
21. Neal A. Maxwell, *Deposition of a Disciple* (1976), 88.
22. Tagai Mataupu Faavae ma Feagaiga 19:38.

A o o'u alu i le fale i lenei afiafi, sa ou iloina ai ni upumoni taua se lua. Muamua, e leai se isi taimi na ou iloina ai e silafia e le Atua i tatou taitoatasi ma o le a Ia le tuulafoaia lava i tatou; ma lona lua, sa ou iloa e tatau ona tatou gauai atu i le leo o le Agaga ma "ō loa lava"¹⁵ po o fea lava na te aveina i ai i tatou, e ui i lo tatou fefefe po o le faigata.

I se tasi aso sa fesili atu ai le au soo i le Faaola po o ai ua sili i le malo o le lagi. Sa Ia fetalai atu ia i latou ia liua, lotomauualalo, ma usiusitai e pei o tamaiti laiti. Ona Ia fetalai atu lea, "Ua sau le Atalii o le tagata e faaola i le [ua] leiloa."¹⁶ O lenei fuaiupu e tasi sa Ia faamatalaina ai la tatou misiona. E tatau ona tatou o atu i lē e laveai—i le ua leiloa, i le mulimuli, ma le faatauavaa. E le lava le aloese mai le agasala; e ao ona tatou "mafatiia i lona satauro"¹⁷ ma "ia auai ma le naunau-tai,"¹⁸ fesoasoani i isi ia liua. Faatasi ai ma le agaalofo ma le alofa tatou te opo ai i le atalii faamaumauoa,¹⁹ tali atu i tagi a tamaiti matuaoti ua le maua se mapusaga ma aioiga a i latou o i le pouliuli ma le faanoanoa,²⁰ ma mafatiaga o aiga puapuagatia. Na saunoa Elder Neal A. Maxwell, "E le manaomia e Satani ona fai tagata uma ia pei o Kaino po o Iuta. . . .

Na pau lava le mea na te manaomia o le maua lea o tagata malolosi . . . e manatu ia i latou lava o ni tagata atamamai i mea o le lalolagi ma e le patino ni itu e tutu ai."²¹

Ina ua mavae se konafesi faalesiteki talu ai nei, sa sau se alii talavou ma fesili mai ia te au, "E alofa le Atua ia te au?" Ia faamautinoa e le aunoa e o tatou olaga o le auauna atu, e leai se tasi e tuulafoai e le Atua.

O le fesili, "Se a foi se mea e avatu e le tagata e togiola a'i lona ola?" E manao Satani ia tatou faatau atu o tatou ola mo lola laau ma siamupini o le lalolagi. Ae ui o lea, o loo valaau mai le Faaola ia i tatou, e aunoa ma se tau, e lafoai a tatou agasala, ia tauave i o tatou luga Ona foliga, ma momoli atu i totonu o loto o i latou e mafai ona tatou aapa atu i ai. O lenei mea e mafai ai ona tatou maua mea uma o i ai i le Atua, lea ua ta'u mai ia i tatou e sili atu lava nai lo oa uma o lenei lalolagi.²² E mafai lava ona e vaai faalemafaufau i ai?

I sa'u malaga lata mai nei i Nikarakua, sa ou matauina ai se maa vane i totonu o le fale faatauavaa o se aiga sa matou asia. Sa faitauina, "O la'u molimau o la'u meatotino aupito faapelepele lea." E faapena foi ia te a'u. O la'u molimau o le oa lea o lo'u



Saunia e Elder Scott D. Whiting

○ Le Fitugafulu

Tulaga Faatonuina o le Malumalu

O tulaga faatonuina maua luga o loo faaogaina e lenei Ekalesia e fausia ai malumalu, o se ituaiga ma o se faailoga foi lea o le auala e tatau ona tatou ola ai.

Ao maimoaina talu ai nei le Malumalu matagofie o Brigham City Utah, sa ou toe manatua ai se mea sa tupu ia te au ao avea au ma taitai o le faletatala, toe faapaia, ma faafiafiaga faaleaganuu i le talafaasolopito o le Malumalu o Laie Hawaii.

O ni nai masina ao lei faamaeaina le galuega o le toefaafouga, sa valaauliaina au e asiasi atu i le malumalu faatasi ai ma le Pule Faatonusili o le Matagaluega o Malumalu o, Elder William R. Walker, ma lana auaigaluega o le Matagaluega o Malumalu. Sa faatasi ai foi, ma isi sui o le kamupani konekarate o loo faatinoa le galuega. O le faamoemoega o le asiasiga, i se vaega, o le toe iloiloaina lea o le tulaga alualu i luma ma le lelei o le galuega o loo faatinoina. I le taimi o lenei asiasiga, pe a ma le 85 pasene o le galuega ua maea.

Ao matou feoai i totonu o le malumalu, sa ou matamata ma faalogologo ia Elder Walker ma lana auaigaluega ao latou vailiiliina le galuega ma talatalanoa ma le supavaisa faufale. Sa ou matauina se tasi o alii na faasolosolo lona lima i puipui ao matou feoai

mai lea potu i lea potu. A maea sina taimi o faia lenei mea, na te milimiliina faatasi ona tamatamailima ona agai atu lea i le supavaisa faufale ma fai atu, “Ou te lagonaina le talatala o le puipui lenei. E le o se tulaga faatonuina o malumalu le talatala. E tatau ona toe faalamolemole le puipui.” Sa tusitusia ma le usiusitai e le supavaisa ia matauga taitasi.

Ina ua matou latalata atu i se vaega o le malumalu lea e na o sina vaega tolaiti o tagata o le a vaai i ai, sa taofi i matou e lenei lava alii ma faataulai atu le matou vaai i se faamalama matagofie fou faatoa faapipii. O lenei faamalama pe a ma le lua futu (0.6 m) le lautele ae ono futu (1.8 m) le maua-luga ma e i ai se tamai tioata lanu ua mamanuina faamanaia. Sa ia tusi atu i se tamai sikuea e lua inisi (5 cm) o le tioata lanu lea o loo avea ma se vaega o le mamanu faigofie ma fai atu, “E pi’o le sikuea le la.” Sa ou tilotilo atu i le sikuea, ma i la’u lava vaai sa foliga mai o loo tutusa. Ae peitai, pe a vaai latalata atu i ai ma faaoga se fuatoso, o le a iloa ai e i ai se faaletonu ma e sa’o e tasi vae valu inisi (3 mm) le pi’o. Sa tuuina atu se faatonuga i le

supavaisa e tatau ona toe sui le faamalama ona o le a le maua ai le tulaga faatonuina o le malumalu.

Ou te ta’u atu sa ou ofo i le suia atoa o le faamalama ona o se tamai faaletonu e tau leiloa. Ioe, ailoga lava e i ai se tasi e iloaina pe matauina ona o le nofoaga lea i le malumalu e le toatele nisi o le a vaai i ai.

Ao ou agai atu i le fale mai le malumalu i lenei aso, sa ou toe mafaufau i mea sa ou aoaina mai lenei aafiaga pe, i se isi itu, o mea sa ou mafaufau sa ou aoaina. Ae pe ana le mavae lava le fitu vaiaso mulimuli ane ina ua valaaulia au e asiasi i le malumalu ua maea nei, semanu ou te le malamalama atili i aafiaga o lenei uluai asiasiga.

Ao ou ulu atu i le Malumalu o Laie Hawaii lea ua maea ona toefaafouina, sa faagaetiaina au i lona matagofie ma le lelei o le fausiaina. Atonu e te malamalama i lo’u toe fia vaai i puipui “talatala” ma le faamalama lea sa “faaletonu”. Pe na toe faalamolemoleina e le au faufale ia puipui? Pe na toe suia moni lava le faamalama? Ao ou agai atu i puipui talatala, sa ou tei i le vaaia o ni pepa puipui matagofie o faapipii i luga uma o puipui. O le mea muamua lava na oo mai i lou mafaufau, “Ai o le auala lea na foia ai e le au faufale le tulaga talatala—o le ufiufi.” Peitai, e leai, sa ou iloaina o le fuafuaga lava lea sa i ai o le faapipii o pepa puipui i luga o puipui. Sa ou mafaufau pe aisea lava na faatau ai sia tamai talatala e tau leiloa pe a faapea e faapipii i ai se pepa puipui. Ona ou agai atu lea ma le naunautai i le vaega lea sa i ai le faamalama pi’o ma sa ou ofo i le vaaia o se laau teufale matagofie e sau mai le fola e oo i le taua-luga le tele o loo tu tonu mai lava i luma o le faamalama. Sa ou toe mafaufau foi, “Oi o le auala la lea na foia ai e le au faufale le tamai sikuea pi’o—o le nanaina.” Ao ou faalatalata atu i ai, sa ou tuleieseina ia lau o le laau ma ataata ao ou vaai atu e moni lava ua uma ona sui le faamalama. Sa tu lelei mai lava ma sao le tamai sikuea lea sa pi’o. Sa ou iloaina o se vaega lava lea o le mamanuina o totonu [o le malumalu] o le i ai o se laau i luma o lenei faamalama.



Aisea lava na manaomia ai e puipui e i ai ni tulaga talatala laiti ma se faa-malama e pi'o ia se galuega faaopopo ma na oo ai lava i le toe suia pe a faapea e na o ni nai lima po o ni mata faaletagata o le a iloaia? Aisea na manaomia ai se tulaga faatonuina maualuga mai le au faufale?

Ao ou aluese mai le malumalu ma mafaufau loloto i ai, sa ou mauaina lau tali ao ou tilotilo atu i le pito i fafo ma vaaia ai upu nei, "E Paia i le Alii, o le Fale o le Alii."

O malumalu o lenei Ekalesia e faapei lava ona folafola atu. Ua fausia nei fale paia tatou te faaaogaina, ma o totonu o o latou puipui e faatino ai ia sauniga paia ma faaola. Peitai e le tataua ona i ai se masalosalo po o ai tonu lava e ona ia fale. O le manaomiaina o le tulaga tonu o tulaga faatonuina o le fausaga ma e aofia ai vaega uma lava, e le gata ua tatou faaalai ai lo tatou alolofa ma le faaalalo i le Alii o Iesu Keriso, ae ua tatou faaali atu foi i tagata maimoa uma lava tatou te faamamalu ma

tapuai ia te Ia o Le ona le fale.

I le faaaliga na tuuina atu i le Pero-feta o Iosefa Samita e fausia se malumalu i Navu, sa poloai atu ai le Alii:

"O mai ia, ma a outou auro uma, ma a outou ario, ma a outou maa taua, ma a outou mea anamua uma; ma faatasi ma i latou uma o e ua i ai le malamalama e uiga i mea anamua, . . . ma aumai . . . laau pele uma o le lalolagi;

". . . Ma fausia se fale i lo'u igoa, mo le Silisili Ese e afio ai."¹

O loo mulimulitai lenei mea i se mamalu na faia e le Tupu o Solomona i le Feagaiga Tuai i lona fausiaina o se malumalu i le Alii e faaaoga ai na o mea silisili uma mo le fausiaina.² O loo faaauau pea i le aso ona tatou mulimuli i lenei mamalu, ma faatonutonu ai ma le talafeagai, pe a tatou fausia ia malumalu o le Ekalesia.

Ua ou iloaia e tusa lava pe le vaai pe tagotago foi i ai ni mata ma lima faaletino i se faaletonu, ae ua silafia e le Alii le tulaga o a tatou taumafaiga

ma pe o tatou faia le mea sili tatou te mafaia. E faapena foi i a tatou foi taumafaiga patino ina ia ola i se olaga e agavaa ai mo faamanuiaga o le malumalu. Ua fautua mai le Alii:

"Ma o le tulaga e oo i ai e lo'u nuu ona fausia se fale mo a'u i le suafa o le Alii, ma latou le tuua se mea eleelea e sau i ai i totonu, ina ia le faaeleeleaina, o le a to'a ai i ona luga lo'u mamalu;

"Toe, ma o le a i ai lo'u afioaga iina, ona o le a Ou alu atu i ai i totonu, ma o i latou uma e lotu mama e o mai i ai i totonu, o le a vaai i le Atua.

"Ae afai e faaeleeleaina Ou te le alu atu i ai i totonu, ma o le a le i ai foi lo'u mamalu iina; aua Ou te le alu atu i totonu o ni malumalu ua le paia."³

Faapei o le faufale, pe a tatou iloa ni elemene i o tatou lava olaga e le ogatusa ma aoga a le Alii, pe afai o a tatou taumafaiga e le o le mea sili lea tatou te mafaia, e tatou ona tatou galulue vave e faasa'o soo se mea ua le sa'o, ia iloa e le mafai ona tatou nanaina a tatou agasala mai le Alii.

E tatau ona tatou manatua lena mea “a tatou taumafai e ufiufi a tatou agasala, . . . faauta, e aveese e le lagi i latou lava; [ma] e faanoanoa le Agaga o le Alii.”⁴

Sa ou aoaoina foi o tulaga faatonuina mauualuluga o loo faaaogaina e lenei Ekalesia e fausia ai malumalu, o se ituaiga ma o se faailoga foi lea o le auala e tatau ona tatou ola ai. E mafai ona tatou faaaogaina, taitoatasi, ia aoaoga a le Aposetolo o Paulo lea na tuuina atu i le Ekalesia anamua ina ua ia faapea atu:

“Tou te le o iloa ea o le malumalu outou o le Atua, o loo nofo foi le Agaga o le Atua i totonu ia te outou?”

“Afa i faaleaga e se tasi le malumalu o le Atua, e faaleagaina lena tagata e le Atua; aua e paia le malumalu o le Atua, o outou lava ia.”⁵

Ua fausia i tatou taitoatasi i mea silisili, ma o i tatou o ni taunuuga faavavega o se fausaga paia. Ae peitai, ao amata ona tatou faatagata matutua ma tali atu mo i tatou lava o le a amata ona tatou tauivi ma agasala ma tofotofoga, ma e mafai ona avea o tatou lava malumalu ma se manaoga o le galuega tofaafouina ma tofaaleleia. Masalo o loo i ai ni puipui i totonu o i tatou lava e talatala ma e manaomia le toe faalamolemoleina po o se faamalama o o tatou agaga e manaomia le suia ina ia mafai ona tatou tutu i nofoaga paia. O le mea e faafetai ai, o tulaga faatonuina o le malumalu o loo talosagaina ai i tatou ina ia faafetaiaia e le o le atoatoa, e ui o loo tatou taumafai atu i ai, ae ia tatou tausua poloaiga ma faia le mea sili tatou te mafaia i le avea ai ma soo o Iesu Keriso. O lau tatalo ia tatou taumafai uma e ola i se olaga e agavaa ai mo faamanuiaga o le malumalu e ala i le faia o le mea sili tatou te mafaia, e ala i le faia o ni faaleleiga e manaomia ma faaitiitia ni faaletonu ma ni le atoatoa ina ia mafai ona nofo le Agaga o le Atua i totonu o i tatou. I le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 124:26–27.
2. Tagai 1 Tupu 6–7.
3. Mataupu Faavae ma Feagaiga 97:15–17.
4. Mataupu Faavae ma Feagaiga 121:37.
5. 1 Korinito 3:16–17; tagai foi i le fuaiupu 19.



Saunia e Elder Neil L. Andersen

○ Le Korama a Aposetolo e Toasefululua

Tofotofoina ○ Lo Outou Faatuatua

E pei o le afi malosia lea e liua ai le uamea i le sila, e faapena foi i tatou pe a tatou tumau faamaoni i taimi o tofotofoga faigata o lo tatou faatuatua, e faamamaina faaleagaga i tatou ma faamalolosia.

I le sefulu tausaga talu ai a o ma nonofo ai ma lo'u toalua o Kathy i São Paulo, Pasila, sa pulefaamalu-malu ai Peresitene David Marriott i le Misiona a Brazil São Paulo Interlagos. Sa latou nonofo latalata mai ia i ma'ua, o ia ma lona faletua, o Neill, ma o la atalii o Will, Wesley, ma Trace. Sa latou tuua lo latou fale, le latou pisinisi, ma le toatele o le latou aiga ae tali atu i se valaau mai le perofeta e auauna atu i se misiona.

Sa valaau mai Peresitene Marriott ia te au i le tasi aoauli. O lo la afafine faapelepele ma amiotonu e 21 tausaga le matua, o Georgia, o se tamaitai sinia i faatinoga o le taina o le vaiolini i le Iunivesite o Initiana, sa taia i se loli a o tietie o ia i lana uila vilivae e agai i le fale ina ua mae'a se sauniga a le Ekalesia. I le lipoti muamua, sa manuia lava ia Georgia. I ni itula mulimuli ane sa vave ona oo i se tulaga leaga.

Sa amata ona anapopogi ma tatalo ia aiga ma uo mo se vavega mo Georgia. Sa lele atu lona tina i le po atoa mai Pasila. I le taunuu ai i Initiana i le aso na sosoo ai sa faafeiloaia o ia e

lana fanau matutua, o e na faamalalama atu ma loimata sa latou i ai ma Georgia i le taimi na malii ai.

Sa ou matauina le aiga o Marriott i le taimi o lenei aafiaga ma i masina ma tausaga na sosoo ai. Sa latou fetagisi, sa latou tatalo, sa latou talanoa e uiga ia Georgia, sa latou lagonaina le matuitui o le tiga ma le faanoanoa, ae sa lei vaivai lo latou faatuatua. I le sauniga i le taeao nei, sa tatou faalogo ai i se faatuatua talitutusa faapea i olaga o aiga o Bowen ma Wilberger.¹

O le meaalofo o le faatuatua o se faaeega paia faaleagaga e le mafaatauina. “O le ola e faavavau foi lenei,” sa tatalo ai Iesu, “ia latou iloa oe le Atua moni e toatasi, atoa ma le ua e auina mai, o Iesu Keriso lea.”²

O lo tatou faatuatua ua taulai atu i le Atua lo tatou Tama ma Lona Alo, o Iesu Keriso, o lo tatou Faola ma le Togiola. Ua lagolagoina e lo tatou malamalama e faapea ua toefuataina mai le atoatoaga o le talalelei i le lalolagi; o le Tusi a Mamona o le afioga a le Atua, ma o loo umia e perofeta ma aposetolo o aso nei ia ki o le perisitua.



Tatou te faatauaina lo tatou faatuatua, o galuega e faamalolosia ai lo tatou faatuatua, tatalo mo le faatuatua faateleina, ma le faia o mea uma i lo tatou malosi e puipuia ma faasaogalemu ai lo tatou faatuatua.

Sa faailoa mai e le Aposetolo o Peteru se mea na ia ta'ua o se "tofotofoga o lo outou faatuatua."³ Sa ia oo i ai. Manatua le fetalai a Iesu:

"Simona, . . . ua manao tele Satani ia te outou, ia lulu ia te outou pei o le saito:

"A ua ou faatoga mo oe, ina nei mavae lou faatuatua."⁴

Sa mulimuli ane uunaia e Peteru isi: "*Aua* tou te ofo," sa ia fai mai ai, "i le tofotofoga e pei o le afi, ua oo ia te outou e fai ma tofotofoga ia te outou, peiseai o se mea fou ua oo ia te outou."⁵

O nei tofotofoga faigata ua mamauina e faamalolosia atili ai oe, ae ua i ai le gafatia i ia [tofotofoga] e faaitiitia ai pe faatamaia ai foi lou faalagolago i le Alo o le Atua ma faavaivaia ai lou naunautaga e tausia au folafolaga ia te Ia. O nei tofotofoga e tele lava ina le mavaaia, lea e faigata ai ona iloina. E amata i o tatou vaivaiga, o o tatou faaletonu, o mea e maaleale ia i tatou, po o mea na e sili atu ona taua ia i tatou. O se tofotofoga moni e mafai ona puleaina e le tasi e mafai ona avea ma tofotofoga faigata mo le isi.

E faapefea ona e tumau ma le "mausali ma le le mafaagaetia"⁶ i se

taimi o le tofotofoga o le faatuatua? E te faatofu oe lava ia i mea moni o loo fesoasoani e fausia le fatu o lou faatuatua: e te faatinoina le faatuatua ia Keriso, e te tatalo, e te mafaufau loloto i tusitusiga paia, e te salamo, e te tausii i poloaiga, ma e auauna atu i isi.

Pe a tatou fetai ai ma se tofotofoga o le faatuatua—po o le a lava lau mea o fai, e te le laa ese lava mai le Ekalesia! O le faataumamaoina o oe lava ia mai le malo o le Atua i taimi o se tofotofoga o le faatuatua ua tai pei lava o le tuua o le saogalemu o se malutaga malupuipua o afā ae ua oo mai se asiosio.

Sa faapea mai le Aposetolo o Paulo, "E le toe tagata ese outou, po o e ua aumau, a ua nuu faatasi ma le au paia, o le aiga foi o le Atua."⁷ O totonu o le malutaga o le Ekalesia, lea tatou te puipuia ai lo tatou faatuatua. O le feiloai faatasi ma isi e talitonu, tatou te tatalo ai ma saili ai tali i a tatou tatalo; tatou te tapuai e ala i musika, fefaasoaai ai ia molimau e uiga i le Faola, feaunaai ai, ma lagona ai le Agaga o le Alii. Tatou te taumamafa i le faamanatuga, maua faamanuiaga o le perisitua, ma auai i le malumalu. Sa tautino mai e le Alii e faapea, "[I] sauniga . . . , ua faaalai ai le mana o le faaleatua."⁸ Pe a e fetai ai ma se tofotofoga o le faatuatua, ia tumau i totonu o le saogalemu ma le puipuga a le aiga o le Atua. O loo i ai pea se nofoaga mo oe iinei. E leai

se tofotofoga e tele atu e le mafai ona tatou faatoilaloina faatasi.⁹

Sa saunoa mai Peresitene Thomas S. Monson: "Ua faapena foi le [matuai televave] o suiga o amioga mama a tagata. O amioga sa manatu muamua i ai e le talafeagai ma lē mama, i le taimi nei . . . ua manatu . . . le toatele o tagata ua taliaina."¹⁰

E toatele ia tagata matutua nofofua i le Ekalesia ua sili atu ma o latou tausaga talavou matutua. E ui e ese mai lo latou olaga o loo i ai i le taimi nei ma se olaga sa faamoemoe i ai, ae o loo latou tausia le tulafono o le legavia.¹¹ E mafai ona avea ma se tofotofoga o lo latou faatuatua. Ou te faailoa atu lo'u faaaloalo tele ma le faamemelo mo nei soo o Keriso.

"Ua poloai mai le Atua o mana paia o le foafoaina . . . ua na o le va lava o le alii ma le tamaitai ua faaipopoina faaletulafono, o se tane ma le ava e tatau ona faaagaina ai."¹² I le Feagaiga Fou na siitia ai e le Faola le maua o le tulaga faatonuina o le amio mama mo Ona soo ina ua Ia tautino mai, "Ai se vaai atu i le fafine ina ia manao i ai, ua uma ona mulilua ma ia i lona loto."¹³ Na Ia aoaoina i tatou ina ia le faamasino atu i isi, ae sa Ia le fefe foi e fetalai sa'o mai, "Alu ia," na Ia fetalai ai, "aua e te toe agasala."¹⁴

E i ai se uo a le matou aiga. Atonu tou te iloina se tasi e pei o ia, pe atonu foi e te pei o ia. E faamaoni pea, e auauna atu ma le mamalu i le

Ekalesia, e faamamaluina faalegaluega, e faapelepele i ai lona aiga, ma e ui lava sa ia faamoemoe mo se faaipopoga ma se fanau, ae o loo nofotoatasi o ia. “Ua faia la’u faaiuga,” sa ia fai mai ai, “e tuu atu lo’u . . . faalagolago ia Iesu Keriso. Ou te faatuatua . . . e leai lava se . . . faamanuiaga o le a taofia . . . pe a ou . . . tumau ma le faamaoni i au feagaiga, e aofia ai le tulafono o le ola mama.”¹⁵

O se isi uo sa auuina atu ma le maoae i se misiona, sa sosoo ai ma ni aoaoga faaleatamai moni. Sa ia faamoemoe e fai sona aiga. O lona tofotofoga o le faatuatua: o lagona o le tosina atu i le itupa e tasi. Sa ia tusi mai ia te au talu ai nei: “O loo folafola mai ia te au i lo’u faamanuiaga faapeteriaka o le a fai so’u lava aiga i se aso. Po o . . . lenei olaga po o le isi olaga, ou te [le] iloa. . . . [Ae] ou te le manao e faia soo se mea o le a lamatia ai faamanuiaga ua folafola mai e le Atua. . . . O le ola ai [i le tulafono o le ola mama] o se luitau, ae pe sa tatou lei o mai ea i le lalolagi ina ia fetaiai ma luitau ma ia faaali atu i le Atua lo tatou alofa ma le faaaloalo . . . e ala i le tausiiaina o Ana poloaiga? Ua faamanuiaina au i le ola maloloina, le talalelei, se aiga agaalofa, ma ni uo faamaoni. Ou te faafetai mo le tele o ou faamanuiaga.”¹⁶

Ua faitio le lalolagi, e mafai faapefea ona e talosaga mai i ni mea se tele? Ua tali mai le Alii:

“O o outou manatu e le o o’u manatu ia, o o outou ala e le o o’u ala ia. . . .

“E pei ona sili ona maualuga o le lagi i le lalolagi, ua faapea ona sili ona maualuga o o’u ala i o outou ala, ma o’u manatu e sili i o outou manatu.”¹⁷

Sa lagonaina e soo nei e toalua o Keriso ma le faitau sefulu afe o i latou e faapei o i laua le folafolaga a le Faaola: “Ou te tuuina atu ia te outou le manuia; o lo’u manuia ou te avatu ai ia te outou; ou te le avatu ia te outou faapei ona avatu e le lalolagi.”¹⁸

O le isi lenei o tofotofoga. O loo i ai pea nisi e mananao e tauleagaina le Ekalesia ma faaumatia le faatuatua. O aso nei o loo latou faaagaina le Initoneti.

O nisi o faamatalaga e uiga i le Ekalesia, e tusa lava po o le a le talitoina, e le moni lava. I le 1985 ou te manatua se uo na savali atu i totonu o lou ofisa i lau pisinisi i Florida. Sa ia te ia se tusiga a le mekasini o le *Time* sa faaulutalaina “Challenging Mormonism’s Roots (Luitauina o le Faavae Faa-Mamona).” Sa talanoa e uiga i se tusi sa maua i se taimi e lei mamao atu, sa manatu na tusia e Matini Harisi, lea sa feteenai ma le tala a Iosefa Samita i le mauaina o papatusi o le Tusi a Mamona.¹⁹

Sa fesili mai lau uo pe o le a faaumatia ai le Ekalesia Mamona i lenei faamatalaga fou. Sa ta’ua i le tusiga se alii na faapea mai ua ia tuua le Ekalesia ona o lea pepa o faamatalaga. Mulimuli ane, sa lipotia mai na tuua e isi le Ekalesia.²⁰ Ou te mautinoa o se tofotofoga o lo latou faatuatua.

I ni nai masina mulimuli ane, sa mauaina e tagata tomai faapitoa (ma tautino mai le tagata taufaasese) o lea tusi o se mea taufaasese atoa. Ou te manatua sa ou faamoemoe moni lava mo i latou na tuua le Ekalesia ona o lenei mea taufaasese, o le a toe foi mai.




E toalaiti foi nisi sa fesiligia lo latou faatuatua ina ua latou maua se saunouaga sa faia e se taitai o le Ekalesia i ni tausaga ua mavae lea sa foliga mai e lei ogatusa ma la tatou aoaoga faavae. O loo i ai se mataupu faavae taua o loo puleaina ai le aoaoga faavae o le Ekalesia. O le aoaoga faavae e aoaoina e uso e toa 15 o le Au Peresitene Sili ma le Korama a le Toasefululua. E le o natiaina i se parakalafa faigata o se lauga. O mataupu faavae moni e aoaoina soo e le toatele. O la tatou aoaoga faavae e le faigata ona maua.

O taitai o le Ekalesia e faamaoni ae e le o ni tagata atoatoa. Manatua upu a Moronae: “Aua tou te tauleagaina au ona o ou le atoatoa, po o lo’u tama . . . ; ae nai lo lena, ia outou avatu le faafetai i le Atua ina ua ia faaalia atu ia te outou o matou le atoatoa, ina ia outou aoa ia sili atu ona outou popoto nai lo i matou.”²¹

Sa saunoua mai Iosefa Samita, “Ou te lei fai atu lava ia te outou ou te atoatoa—ae e leai se mea sese o i ai i faaaliga.”²² O le vavega o le aao o le Atua i le talafaasolopito ma le taunuuga o le Ekalesia a Iesu Keriso o le Au Paia o Aso e Gata Ai ua na o le ala lava o sailiga faaleagaga o le a malamalama atoatoa i ai. Sa saunoua mai Peresitene Ezra Taft Benson, “E tatau lava i tagata uma ona iu ina faalagolago i puipui o lo latou faatuatua, ma o iina e tatau ona ia tu ma tali atu ai.”²³ Aua ne’i e te’i pe a tupu ia te oe!

I se faauigaga, o le a faigata ia tofotofoga. Atonu o le a i ai le tiga, lē mautonu, ni po e le maua ai se moe, ma ni aluga e susū i loimata. Ae o o tatou tofotofoga e le manaomia ona lamatia ai i tatou faaleagaga. E le manaomia ona tatou o ese ai mai i a tatou feagaiga pe o ese ai mai le aiga o le Atua.

“Ia manatua . . . o luga lava o le papa o lo tatou Togiola, o le Keriso lea, le Alo o le Atua, e ao ina oulua atinae ai lo outou faavae; ina ia pe a auina mai e le tiapolo ana matagi malolosi, . . . pe a pesi mai ia te outou ana uatoa uma ma lana afa malosi, o le a leai sona mana i luga o oulua e toso ifo ai oulua i lalo . . . ona o le papa lea ua oulua atinae ai i luga, . . .



la'u molimau paia e uiga i nei mea i le suafa o Iesu Keriso, amene. ■

FAAMATALAGA

1. Tagai Shayne M. Bowen, "Ou te Ola Au, o le Mea lea e Ola ai Outou," ma Ann M. Dibb, "Ua Ou Iloa. Ua Ou Ola Ai. Ua Ou Alofa I Ai." i le sauniga o le taeao o le Aso Toonai o le konafesi aoao ia Oketopa 2012.
2. Ioane 17:3.
3. 1 Peteru 1:7.
4. Luka 22:31–32.
5. 1 Peteru 4:12; faapoopo le faamamafa.
6. Alema 1:25.
7. Efeso 2:19.
8. Mataupu Faavae ma Feagaiga 84:20.
9. Tagai Mosaea 18:8–10.
10. Thomas S. Monson, "Tutu i Nofoga Paia," *Liahona*, Nov. 2011, 82.
11. Tagai Ezra Taft Benson, "The Law of Chastity," *New Era*, Jan. 1988, 4–7; "The Law of Chastity" in *Brigham Young University 1987–88 Speeches* (1988), 1–5, speeches.byu.edu; tagai foi *Mataupu Faavae o le Talalelei* (2009), 224–32.
12. "O Le Aiga: O Se Folafofaga i le Lalolagi," *Liahona*, Nov. 2010, 129.
13. Mataio 5:28.
14. Ioane 8:11.
15. Personal correspondence, 2012.
16. Personal correspondence, 2012.
17. Isaia 55:8–9.
18. Ioane 14:27.
19. Tagai Richard N. Ostling, "Challenging Mormonism's Roots," *Time*, May 20, 1985, 44.
20. Tagai Gordon B. Hinckley, "Lord, Increase Our Faith," *Ensign*, Nov. 1987, 52.
21. Mamona 9:31.
22. *Aooga a Peresitene o le Ekalesia: Iosefa Samita* (2007), 522.
23. Ezra Taft Benson, "The Book of Mormon Is the Word of God," *Tambuli*, May 1988, 6.
24. Helamana 5:12.
25. D. Todd Christofferson, "Give Us This Day Our Daily Bread" (Church Educational System fireside, Jan. 9, 2011), lds.org/broadcasts.
26. 1 Peteru 1:7; tagai foi 1 Peteru 4:13.
27. Eteru 12:6.
28. Mataupu Faavae ma Feagaiga 122:9; Sa saunoa Peresitene George Q. Cannon: "Po o le a lava le ogaoga o le tofotofoga, po o le a lava le loloto o se tiga, po o le a lava le tetele o mafatiaga, e le faifai lava ona tuulafoaiina i tatou e le [Atua]. Na te lei tuulafoaiina lava i tatou ma o le a Ia le tuulafoaiina lava i tatou. E le mafai ona Ia faia. E le o Sona uiga lena. O Ia o se tagata e le fesuisuia; e tutusa lava o ananafi, o le aso, ma o le a tutusa lava Ia e oo i faavavau o le a oo mai. Ua tatou mauaina lena Atua. Ua avea o Ia ma a tatou uo, e ala i lo tatou usiusitai i Lana talalelei; ma o le a Ia tu e lagolago i tatou. Atonu tatou te oo atu i le ogaumu aasa; atonu tatou te asaina ni vai loloto; ae o le a tatou le vaivai pe lofituina. E tatau ona tatou manuae mai nei tofotofoga uma ma faigata ua avea ma ni tagata lelei atu ma mama atu, pe afai tatou te faalagolago i lo tatou Atua ma tausi i Ana poloaiga" ("Remarks," *Deseret Evening News*, Mar. 7, 1891, 4); tagai foi Jeffrey R. Holland, "Come unto Me," *Ensign*, Apr. 1998, 16–23.

o se faavae lea afai e atiae ai le tagata e le mafai lava ona pauu i latou."²⁴

E pei o le afi malosi lea e liua ai le uamea i le sila, e faapena foi i tatou pe a tatou tumau faamaoni i taimi o tofotofoga faigata o lo *tatou* faatuatua, e faamamaina faaleagaga i tatou ma faamalolosia.

Sa faamalalamalama mai e Elder D. Todd Christofferson le mea sa ia aoaoina mai i se tofotofoga patino: "E ui sa ou mafatia i lena taimi, ae a ou toe tepa i tua i le taimi nei, ou te faafetai e lei i ai se vaifofo vave i lo'u faafitauli. O le mea moni i le faamalolosia o au e liliu atu i le Atua mo se fesoasoani e toetoe lava o aso uma i se vaitau faaumiumi o tausaga, na ou aoao moni ai i le auala e tatalo ma maua ai tali i tatalo ma ou aoao ai i se ala moni lava e maua ai le faatuatua i le Atua. Sa ou iloa ina lou Faola ma lou Tama Faalelagi i se ala ma i se tikeri lea semanu e le mafai ona tupu i se isi ala. . . . Sa ou aoao e faalagolago i le Alii ma lou lototoa. Sa ou aoao e savavali faatasi ma Ia i lea aso ma lea aso."²⁵

Sa faamatalaina e Peteru nei aafiaga e "silisili ona aoga i le auro."²⁶ Sa

faapoopo mai Moronae e faapea e mulimuli mai se molimau pe a mavae ona "tofotofoina o lo outou faatuatua."²⁷

Sa ou amata atu i le tala e uiga i le aiga o Marriott. I le vaiaso ua tuanai sa ma faatasi atu ai ma Kathy ma i latou i le tuugamau o Georgia. Ua mavae le sefulu tausaga. Sa talanoa le aiga ma uo e uiga i le alofa ma mea latou te manatuaina ai ia Georgia. Sa i ai ni paluni papae e feula i le kasa e faamanatu ai lona soifuaga. Faatasi ai ma loimata, sa saunoa ma le agamalu le tina o Georgia i le faateleina o le faatuatua ma le malamalama ua ia mauaina, ma sa musumusu mai le tama o Georgia ia te au e uiga i le molimau folafolaina ua oo atu ia te ia.

Faatasi ai ma le faatuatua, e oo mai ai tofotofoga o le faatuatua, e aumai ai le faatuatua faateleina. O le faamautinoaga mafanafana a le Alii i le Perofeta o Iosefa Samita o le folafolaga foi lava lea e tasi Na te faia ia te outou i le tofotofoina o lo outou faatuatua: "Pipiimau . . . , aua le mata'u . . . , aua o le a faatasi le Atua ma oe e faavavau ma faavavau lava."²⁸ Ou te tuu atu ai



Saunia e Elder Dallin H. Oaks

○ Le Korama a Aposetolo e Toasefululua

Puipui le Fanau

E leai se tasi e tatau ona teenaina le aioiga ia tatou tutufaatasi ia faateleina lo tatou popolega mo le tulaga manuia ma le humanai o a tatou fanau—le tupulaga faiaae.

E mafai ona tatou manatuaina uma o tatou lagona pe a tagi se tamaitiiti laitiiti ma aapa mai ia i tatou mo se fesoasoani. Ua tuu mai ia i tatou e se Tama Faalelagi alofa na lagona e uunaia ai i tatou ia fesoasoani atu i Ana fanau. Faamolemole ia manatunatu i na lagona a o ou lauga atu e uiga i lo tatou tiutetauave e puipui ma galulue mo le tulaga manuia o fanau.

Ou te tautala atu mai se vaaiga o le talalelei a Iesu Keriso, e aofia ai Lana ata o le faaolataga. O lo'u valaauga. Ua i ai i taitai o le Ekalesia i le lotofale se tiutetauave mo se faataatiaga faalelaueleele, e pei o se uarota po o se siteki, ae ua nafa se Aposetolo ma le molimau atu i le lalolagi atoa. I malo uma, o ituaiga uma ma gagana, o fanau uma o fanau a le Atua.

E ui lava ou te le tautala i faaupuga faaupufai po o aioiga mo tagata lautele, ae e pei foi o taitai o isi Ekalesia, e le mafai foi ona ou tautala mo le tulaga manuia o fanau e aunoa ma le talanoaina o filifiliga ua faia e tagatanuu, taitai faalemalo, ma tagata faigaluega i faalapotopotoga tumaoti. Ua tatou i ai uma i lalo o le poloaiga a le Faaola ia fealofani ma fetausia i le tasi ma le isi, aemaise lava mo e ua vaivai ma lē malupuipua.

O fanau e maua i tele le vaivai.

E itiiti pe leai foi se malosi latou te puipua pe tasi ai i latou lava ma itiiti foi se uunaiga i le tele o mea ia e taua i lo latou tulaga manuia. E manaomia e le fanau isi e tautatala mo i latou, ma latou te manaomia ni tagata e faia ni faaiuga o e e faamuamua ina lo latou tulaga manuia i lo mea e fiafia i ai tagata matutua manatu faapito.

I.

I le lalolagi atoa, ua faateia i tatou i le faitau miliona o fanau aafia i solitulafono leaga a tagata matutua ma le manatu faapito.

I nisi o atunuu o loo fevatauai, ua ave faamalosi ai le fanau e fai ma fita-fita i vaegaau faatuiese.

I se lipoti a Malo Afaatasi o loo ta'ua ai e faapea ua silia ma le lua miliona tamaiti e sauaina i tausaga taitasi e ala i amioga faatalitane ma ponokalafi.¹

Mai le vaaiga i le ata o le faaolataga, o se tasi o sauaga aupito sili ona ogaoga o fanau o le taofia lea o lo latou fananau mai. O se faiga lea i le lalolagi atoa. O le fananau mai o tamaiti i le malo o le Iunaite Setete o le tulaga aupito sili lea ona maua i le 25 tausaga,² ma o le fananau mai o tamaiti i le tele o atunuu Europa ma Asia ua maua i lalo o le tulaga

tulua mo le tele o tausaga. E le na o se faafitauli faalelotu lenei. A o faaitiitia le aofai o le tupulaga faiaae, ua faavaivaia foi aganuu ma ua faaitiitia foi malo ma e iu lava ina mou atu.

I se tasi mafuaaga o le faaitiitia o le fananau mai o tamaiti o le faatinoga lea o le taotoga o le faamutaina o se maitaga. I le lalolagi atoa, pe tusa e silia ma le 40 miliona taotoga i le tausaga e tasi.³ E tele tulafono o loo faatagaina ai pe faalauiloa ai foi ia taotoga o le faamutaina o maitaga, ae ia i tatou o se mea leaga tele lenei mea. O isi sauaga o fanau lea o loo tupu i le taimi o maitaga o aafiaga e oo i ai le pepe e lei fanau mai ona o se tau-nuuga o le lelei o meaai a le tina po o le faaogaina o fualau faasaina.

O loo i ai se malapagatia ua ilogofie, ua tele tamaiti e fasiotia pe faamanualiaina a o lei fananau mai a o lea foi e naunau ni matua e le mafai ona fanauina ni fanau, e saili atu i ni pepe ina ia vaetamaina.

O le sauaina o tamaiti po o le lafoaia o fanau lea e tupu pe a mavae le fanau mai o loo sili atu ona vaaia faalauaitele. I le lalolagi atoa, e toetoe lava a valu miliona fanau e feoti a o lei atoa le tai lima tausaga, o le tele lava e mafua mai i faamai e mafai ona togafitia ma puipua.⁴ Ma ua lipotia mai e le Faalapotopotoga o le Soifua Maloloina o le Lalolagi e faapea e tasi i le fa tamaiti e le mafai ona tutupu ae malolosi e pei ona tatau ai, faalemafaufau ma faaletino, ona o le le lava o meaai.⁵ O le nonofo ai ma faimalaga solo faavaomalo, ua matou vaaia ai o ni taitai o le Ekalesia le tele o nei tulaga. Ua lipotia mai e le au peresitene aoao o le Peraimeri ia fanau o loo ola i tulaga "tatou te le mafaufauina." Sa faapea mai se tina i le Atua Filipaina: "O nisi taimi e le lava ai ni matou tupe mo ni meaai, ae e le afaina lena ona ou te maua ai le avanoa e aoao ai la'u fanau e uiga i le faatuatua. Matou te faapotopotoma tatalo mo se toomaga, ma e vaaia e le fanau le faamanuiaina o i matou e le Alii."⁶ I Aferika i Saute, sa feiloai ai se tagata faigaluega o le Peraimeri ma se teineitiiti laitiiti, ua tuuatoatasi ma le faanoanoa. I ni tali tau le lagona i ni fesili alofa, sa ia fai

mai ai e leai sona tina, leai se tama, ma e leai foi se tina matua—ua na o se tama matua o loo tausia o ia.⁷ O ia faalavelave e taatele i se konetineti lea e toatele ai ē tausia fanau ua maliliu i le AIDS.

E oo lava foi i malo mauoa o loo faamanualia ai lava le fanau laiti ma le autalavou i le tuulafoaiina. O fanau o loo tutupu ae i le mativa e leaga le tausiga o le soifua maloloina ma lē lava ni avanoa faaleaoaoga. Ua aafia foi i latou i siosiomaga lamatia i o latou siosiomaga faaletino ma faaleaganuu ma e oo foi i le tuulafoaiina e o latou matua. Sa faaso mai talu ai nei e Elder Jeffrey R. Holland le aafiaga o se alii leoleo AAG. I se suesuega na ia maua ai ni fanau laiti se toalima o loo faapupuu faatasi ma taumafai e momoe e aunoa ma se faamalu i luga o se fola palapala i se fale o loo inupia ai ma patī lo latou tina ma isi. Sa leai se meaai i le fale e aveesea ai le fiaai. Ina ua uma ona ia faamomoeina le fanau i se moega ua ufiufiina, sa tootuli le leoleo ma tatalo mo lo latou puipuiga. A o ia savali ese atu i le faitotoa, sa oso atu ia te ia se tasi o i latou, pe ono tausaga, uu lona lima, ma augani atu, “E mafai ona e vaetamaina au faamolemole?”⁸

Tatou te manatua le aoaoga a lo tatou Faola a o ia faatuina se tamaitiiti laitiiti i luma o Ona soo ma tautino atu:

“Ai se talia se tamaitiiti faapenei ona o lo’u igoa, ua ia talia au.

“Ai se na te faatausui i se tasi o i latou nei e faatauvaa o e faatuatua ia te au, e lelei i lea tagata pe ana nonoa se maaolo tele i lona ua, ma faagotoina o ia i le moana loloto” (Mataio 18:5–6).

Pe a tatou mafaufau i le matautia o mea e tatau ona puipuia mai ai le fanau, e tatau foi ona tatou faaafia ai ma le sauaina faalelagona. O matua po o isi tagata e tausia tamaiti po o faiaoga po o uo e faatausui, taufaa-matau, pe faamaasiasia le fanau po o le autalavou e mafai ona latou faamanualiaina tumau [i latou] nai lo se manua faaletino. O le faia ia lagona ina e se tamaitiiti po o se talavou e leai sona taua, lē alofaina, po o le lē manaomia e mafai ona faatupuina ai

se manuaga ogaoga ma tumau i lona tulaga manuia faalelagona ma le tupu-tupu ae.⁹ O tagata talavou e tauivi ma soo se tulaga e le masani ai, e aofia ai le tosina atu i le itupa e tasi, e patino lava le leaga ma e manaomia ai le malamalamaaga agaalofa—ae le o le taufaifai i ai po o le faesea.¹⁰

Faatasi ai ma le fesoasoani a le Alii, e mafai ai ona tatou salamo ma suia ma ia sili atu ona alofola ma fesoasoani atu i fanau—i a tatou lava fanau ma i latou o vagaia i tatou.

II.

O loo i ai ni nai faaitaiga o le taufaamatau faaletino pe faalelagona i fanau e taua foi e pei o na taufaamatau e sau mai ia latou sootaga ma o latou matua po o e vaavaaia i latou. Sa saunoa mai Peresitene Thomas S. Monson e uiga i le mea sa ia ta’ua o “galuega leaga” o le sauaina o fanau, lea e nutimomoia ai pe faaleagaina ai e se matua ia foliga o se tamaitiiti, faaletino pe faalelagona.¹¹ Sa ou faanoanoa ona sa tatau ona ou suesue i faamaoniga faateia o ia tulaga i le taimi o la’u tautua i le Faamasinoga Sili i Iuta.

I le taua aupito silisili i le tulaga manuia o le fanau, o le tulaga lea i le faaipoipo pe leai o o latou matua, o le natura ma le umi o le faaipoipoga, ma le mea aupito taatele, o le aganuu ma faamoemoega o le faaipoipoga ma le tausia o le tamaitiiti i le mea o loo latou nonofo ai. Ua faamalamalama mai e ni tagata tomai se toalua o le aiga: “I le talafaasolopito atoa, sa avea lava le faaipoipoga ma se faalapotopotoga muamua ma le sili mo le

foafoaina ma le tausaiina o le fanau. Ua maua ai se fusi faaleaganuu lea e saili atu e faafesootai ai le tama i lana fanau e ala i le fusia o ia i le tina o lana fanau. Ae i le taimi nei, ua faateleina pea le tuleieseina o le fanau mai le taulaiga atoa.”¹²

Ua faamatalaina e se polofesa o tulafono i Harvard le tulafono o loo i ai nei ma le uiga e faatatau i le faaipoipoga ma le tatalaga o faaipoipoga: “O uiga Faa-Amerika [o i ai nei] e uiga i le faaipoipoga, e pei ona ta’ua i le tulafono ma i se aoaoga sili ona lauiloa, e faapenei: o le faaipoipoga o se sootaga lea e i ai muamua lava mo le faamalieina o toalua taitoatasi. Afai e le toe faatinoa lenei matafaioi, e leai se tasi e tuuaia ma o se isi lava o toalua e mafai ona faamutaina i lona loto. . . . E faigata ona mafaufauina le fanau i nei tulaga; i le tele o tulaga e mafaufau i ai e le taua i latou.”¹³

Ua aoao mai taitai o la tatou Ekalesia e faapea o le mafaufau i le faaipoipoga “ua na o se maliliea e mafai ona ulu i ai mo le faamalieina . . . ma toe vavaeeseina ai pe a oo mai se faigata muamua lava . . . o se faatinoga faatiapolo ua agavaa mo se faasalaga matuia,” aemaise lava le “mafatia ai fua o le fanau.”¹⁴ Ma e aafia ai ma fanau i le tatalaga o faaipoipoga. E silia ma le afa o faaipoipoga na tatalaina i se tausaga talu ai nei na aafia ai ni ulugalii sa i ai ni fanau laiti.¹⁵

E toatele tamaiti semanu e maua faamanuiaga o le tausaiina e o latou matua uma pe ana faapea e mulimuli o latou matua i lenei aoaoga musuia i le folafolaga i aiga: “O le tane ma le ava ua i ai le tiutetauave paia e





alofa ma tausi e le tasi le isi ma a la fanau. . . . Ua i ai i matua se tiute paia e tausia a latou fanau i le alofa ma le amiotonu, ia tuuina atu i ai mea e manaomia i le faaleagaga ma le faaletino, ma ia aoao i latou ia alolofa ma feauaunaai.”¹⁶ O aoaga aupito sili ona mamana mo fanau e auala lea i faataitaiga a o latou matua. O matua e tatala faaipoipoga e mautinoa lava ua la aoao atu se lesona le lelei.

O loo i ai ni tulaga mautinoa ia e talafeagai ai ona tatala se faaipoipoga mo le lelei o le fanau, ae o na tulaga e le masani ai.¹⁷ I le tele o faigata o faaipoipoga e tatau ai i matua femisaai ona mafaufau mamafa i manaoga o le fanau. Faatasi ai ma le fesoasoani a le Alii, e mafai ai ona la faia lena mea.

O fanau o tagata ia e muamua lava mafatia i tulafono o loo i ai nei ia o loo faatagaina ai le mea ua ta’ua o le “tete’a ae leai se sese.” Mai se manatu o le fanau, o le tatalaga o faaipoipoga ua faigofie tele. I le aoteleina o sailiiliga o le malamalama faaagafesootai, sa faaiuina ai e se tagata tomai faaeteete e faapea “o le faatulagaga o le aiga lea e maua ai taunuuga aupito sili ona lelei mo fanau, i se averesi, e toalua matua

moni o loo tumau pea le la faaipoipoga.”¹⁸ Sa matauina e se tusitala o le *New York Times* “le mea moni faateia e oo lava i se faaipoipoga e masani ai ua faaitiitia i le Iunaite Setete . . . ua faateleina faamaoniga mo le taua o le faaipoipoga i le tulaga manuia o fanau.”¹⁹ O lena mea moni e tatau ona tuu atu ai se taiala taua i matua ma ē o le a avea ma matua, atoa ai ma taitai ina ia faateleina lo latou gauai atu i mea e silisili ona lelei mo fanau e ese mai le manatu faapito o tagata palota ma tagata e lagolagoina tele ia mea e fiafia i ai tagata matutua.

E faamanualiaina foi le fanau i faaipoipoga ia e le o faia. O ni nai mea moni e uiga i le tulaga manuia o la tatou tupulaga faiae ua sili atu ona faapopoleina nai lo le lipoti talu ai nei e faapea e 41 pasene o pepe fananau mai i le Iunaite Setete e fananau mai i tamaitai e le o faaipoipo.²⁰ O tina e le o faaipoipo e matua anoanoai luitau o i ai, ma ua manino le faamaoniga o loo i ai a latou fanau i se tulaga le lelei tele pe a faatusatusa i fanau e tausia e matua faaipoipo.²¹

O le toatele o fanau e fananau mai i tina lē faaipoipo—58 pasene—sa

fananau i ulugalii e nonofo faatasi ae le faaipoipo.²² Po o le a lava sa tatou tala e uiga i nei ulugalii le faaipoipo, o loo faaalua i suesuega e faapea o a latou fanau e mafatia i tulaga le lelei iloga pe a faatusatusa atu i isi tamaiti.²³ Mo le fanau, o le fesootaiga tumau o le faaipoipoga e taua.

E tatau foi ona tatou manatu o tulaga le lelei foi ia e tasi mo fanau e tausia e ni ulugalii o le itupa e tasi. O le aoaga o le malamalama faaagafesootai e finauina leaga ma faaupufai i aafiaga faaumiumi o lenei mea i fanau, ona o le mafuaaga autu, e pei ona matauina ai e se tusitala o le *New York Times*, o le faaipoipoga o le itupa e tasi o se suesuega faaagafesootai, ma e pei lava o le tele o suesuega o le a tele se taimi e faaaluina ia malamalama ai i ona taunuuga.”²⁴

III.

Ua ou talanoa atu mo le fanau—o fanau i soo se mea. E ono teenaina e nisi tagata nisi o nei faataitaiga, ae e leai se tasi e tatau ona teenaina le aioiga ia tatou tutufaatasi ia faateleina lo tatou popolega mo le tulaga manuia



ma le lumanai o a tatou fanau—le tupulaga faiae.

O loo matou talanoa atu e uiga i fanau a le Atua, ma e faatasi ai ma Lana fesoasoaniga mamana, e mafai ai ona tatou faia ni mea sili atu e fesoasoani ai ia i latou. I lenei augani, e le gata ai ou te lauga atu i le Au Paia o Aso e Gata Ai ae faapena foi tagata uma o faatuatuaga faalelotu ma isi o loo i ai se faatula-gaga taua lea e mafua ai ona latou mafaufau e sili atu le taua o manaoga patino o isi nai lo o latou lava manaoga patino aemaise lava i le tulaga manuia o fanau.²⁵

Ua nofouta foi tagata faalelotu e uiga i le aoaoga a le Faaola i le Fea-gaiga Fou e faapea o fanau iti mama o o tatou faataitaiga ia o le lotomaulalo ma le aoaoina gofie.

“E moni, ou te fai atu ia te outou, a le liua outou, ma avea ia pei o tama iti, tou te le sao lava i le malo o le lagi.

“O lenei o se faamaulalo o ia ia te ia e pei o le tamaitiiti nei, e sili lea i le malo o le lagi” (Mataio 18:3–4).

I le Tusi a Mamona tatou te faitau ai i le aoaoga a le Alii toetu i sa Nifae e faapea e tatou ona salamo ma papatisoina i latou “ma avea e pei o se tamaitiiti” a leai e le mafai ona latou maua le malo o le Atua (3 Nifae 11:38; tagai foi Moronae 8:10).

Ou te tatalo ina ia faamaulalo-ina i tatou lava e pei o tamaiti laiti ma aapa atu e puipui a tatou fanau laiti, aua o i latou o le lumanai, mo i tatou, mo la tatou Ekalesia, ma lo tatou malo. I le suafa o Iesu Keriso, amene. ■

FAAMATALAGA

1. Tagai UNICEF, *The State of the World's Children 2005: Childhood under Threat* (2004), 26.
2. Tagai Haya El Nasser, “National Birthrate Lowest in 25 Years,” *USA Today*, July 26, 2012, A1.
3. Tagai Gilda Sedgh ma isi, “Induced Abortion: Incidence and Trends Worldwide from 1995 to 2008,” *The Lancet*, vol. 379, no. 9816 (Feb. 18, 2012), 625–32.
4. Tagai UNICEF, “Young Child Survival and Development,” <http://www.unicef.org/childsurvival/index.html>.
5. Tagai World Health Organization, *World Health Statistics 2012* (2012), 109, 118.

6. Lipoti a le au peresitene aoao o le Peraimeri, Sete. 13, 2012.
7. Lipoti a le au peresitene aoao o le Peraimeri.
8. Tagai Jeffrey R. Holland, “Israel, Israel, God Is Calling” (Church Educational System devotional for young adults, Sept. 9, 2012), lds.org/broadcasts; see also R. Scott Lloyd, “Zion Not Only Where, but How We Live, Says Elder Holland,” *Deseret News*, Sept. 10, 2012, B2.
9. Tagai Kim Painter, “Parents Can Inflict Deep Emotional Harm,” *USA Today*, July 30, 2012, B8; Rachel Lowry, “Mental Abuse as Injurious as Other Forms of Child Abuse, Study Shows,” *Deseret News*, Aug. 5, 2012, A3.
10. Tagai “End the Abuses,” *Deseret News*, June 12, 2012, A10.
11. Thomas S. Monson, “O Le a Taitaia i Latou e se Tamaitiiti,” *Liahona*, Iuni 2002, 2.
12. W. Bradford Wilcox and Elizabeth Marquardt, eds., *The State of Our Unions: Marriage in America* (2011), 82.
13. Mary Ann Glendon, *Abortion and Divorce in Western Law: American Failures, European Challenges* (1987), 108.
14. David O. McKay, “Structure of the Home Threatened by Irresponsibility and Divorce,” *Improvement Era*, June 1969, 5.
15. Tagai Diana B. Elliott and Tavia Simmons, “Marital Events of Americans: 2009,” *American Community Survey Reports*, Aug. 2011.
16. “O Le Aiga: O Se Folafolaga i le Lalolagi,” *Liahona*, Nov. 2010, 129.
17. Tagai Dallin H. Oaks, “Teteaga,” *Liahona*, May 2007, 71.
18. Charles Murray, *Coming Apart: The State of White America, 1960–2010* (2012), 158.
19. Ross Douthat, “Gay Parents and the Marriage Debate,” *New York Times*, June 11, 2012, <http://douthat.blogs.nytimes.com/2012/06/11/gay-parents-and-the-marriage-debate>.
20. Tagai Joyce A. Martin ma isi, “Births: Final Data for 2010,” *National Vital Statistics Reports*, vol. 61, no. 1 (Aug. 2012), 10.
21. Tagai William J. Doherty and others, *Why Marriage Matters: Twenty-One Conclusions from the Social Sciences* (2002); W. Bradford Wilcox and others, *Why Marriage Matters: Thirty Conclusions from the Social Sciences*, 3rd ed. (2011).
22. Tagai Martin, “Births: Final Data for 2010,” 10–11.
23. Tagai Wilcox, *Why Marriage Matters*.
24. Douthat, “Gay Parents and the Marriage Debate.” Ua faaalai i se suesuega talu ai nei ma le mae’ae’a, ni faaletonu matuia na lipotia mai e ni talavou matutua ma se matua na faia ni sootaga o le itupa e tasi a o lei atoa le 18 o le tamaitiiti (tagai Mark Regnerus, “How Different Are the Adult Children of Parents Who Have Same-Sex Relationships? Findings from the New Family Structures Study,” *Social Science Research*, vol. 41 [2012], 752–70).
25. Ua matua tautino atu le Au Paia o Aso e Gata Ai i tulaga faamātua o se tasi o sini e aupito sili ona taua i le olaga (tagai Pew Research Center’s Forum on Religion and Public Life, *Mormons in America: Certain in Their Beliefs, Uncertain of Their Place in Society*, Jan. 12, 2012, 10, 16, 51).



Saunia e Elder D. Todd Christofferson
 O Le Korama a Aposetolo e Toasefululua

Uso e, O Loo I Ai Se Tatou Galuega e Fai

I le avea ai ma alii o le perisitua, ua ia i tatou se matafaioi taua e faia i le malo, i le aiga, ma i le Ekalesia.

Uso e, ua tele mea ua ta'u mai ma sa tusia i tausaga e lei leva atu e uiga i luitau o alii ma tama. O ni nai faataitaiga o ulutala o tusi, mo se faataitaiga, e aofia ai le *Why There Are No Good Men Left (Aisea E Le o Toe I Ai ai ni Alii Lelei o Totoe)*, *The Demise of Guys (O Le Tafiesea o Alii)*, *The End of Men (O Le Mutaaga o Alii)*, *Why Boys Fail (Aisea e Toilalo ai Tama)*, ma le *Manning Up (Ia Faatamatane)*. O le mea e mataina ai, o le tele o nei tusi e foliga mai sa tusiaina e tamaitai. I soo se tulaga lava, o se autu taatele i nei iloiloga e faapea i le tele o atunuu i aso nei o loo maua ai e alii ni savali fenumiai ma feteenai e uiga i a latou matafaioi ma le taua i malo.

Sa faauigaina e le tusitala o le *Manning Up* i le ala lenei: “Ua toetoe lava o se tulafono o tagata i le lalolagi atoa e faapea a o avea teineiti ma ni tamaitai e ala i le ausiaina faigofie o le matua faaletagata i le tulaga faaletino, e ao foi ona pasia e tama se suega. E manaomia ona latou faaalua le lototele, le malosia ma le gafatia faaletino, po o le poto masani i tomai talafeagai. O le sini ina ia faamaonia lo latou gafatia

o ni leoleo o tamaitai ma fanau; o la latou matafaioi faagafesootai autu lava lea o loo i ai i taimi uma. Peitai, o aso nei i le alulau i luma o tamaitai i se tamaoiga lelei, o tane ma tamā e tasi i aiga ua avea nei ma se filifiliga, ma o uiga lelei o alii ia e manaomia e faatino ai la latou matafaioi—lototele, taliaina o luitau e aunoa ma le faitio, lototoa, faamaoni a'ia'i i le va faaleulugalii—ua pasiā ma ua fai si maasiasi.”¹

I lo latou naunautai e siitia ia avanoa mo tamaitai, o se mea tatou te viia, o loo i ai i latou e faamaasiasia alii ma o latou sao. E foliga mai latou te mafaufau i le olaga o se tauvaga i le va o alii ma tamaitai—lea e tatau ai i se tasi ona puleaina le isi, ma o le taimi nei o le taimi o tamaitai. O nisi e finau mai o se galuega o se mea aupito taua lea ma o le faaipoipoga ma fanau e tatau ona fai i ai se filifiliga pe leai. O le mea lea, aisea tatou te manaomia ai alii?² I le tele o ata tifaga a Hollywood, ata o le TV ma keipo, e oo lava i faasalalau faapisinisi, ua faaalua ai lava alii o ni tagata e leai ni tomai, e moto le tofā, po o ni tagata manatu faapito. O lenei aganuu o

alii toilalopopo o loo i ai se aafiaga faataumaoi.

Mo se faataitaiga, i le Iunite Setete ua lipotia mai e faapea: “Ua sili atu lava faatinoga a teine nai lo tama i le taimi nei i tulaga uma, mai lava i aoga amata e oo atu i aoga faauu. E oo atu i le vasega valu, mo se faataitaiga, e na o le 20 pasene ia tama e atamamai e tusitusi ma le 24 pasene e atamamai e faitau tusi. O togi o suega ulufale i kolisi i Amerika (SAT) a alii talavou, i le taimi nei, i le 2011 o togi aupito sili ia ona leaga ua latou oo i ai i totonu o le 40 tausaga. O tama e foliga mai e 30 pasene e le uma le aoga maua-luga ma le kolisi nai lo teine. . . . Ua valoia e faapea e oo atu i le 2016, o le a mauaina e tamaitai le 60 pasene o faailoga tagata malaga, 63 pasene o matuaofaiva, ma le 54 pasene o faailoga faafomai. E lua vaetolu o tamaiti aoga o loo i ai i aoga mo manaoga faapitoa, o alii.”³

Ua taliaina e nisi alii ma tamaitai ni savali le lelei e fai ma se 'alofaga e aloese ai mai tiutetauave ma lē tupu-tupu ae ai lava. I se matauga lea e tele ina avea ma se faamatalaga talafeagai, sa saunoa i ai se polofesa o se tasi o iunivesite, “E o mai i totonu o le vasega alii ma o latou pulou pesipolo e faaū i tua ma [la latou] 'alofaga [pasiā] 'ua 'ai e le komepiuta la'u galuega na fai i le fale.' I le taimi lena, o loo siaki ai e tamaitai a latou fuafuaga o le aso ma fesili mai mo ni fautuaga mo ni aoga faaloia.”⁴ Sa faailoa mai e se tasi o tamaitai e iloiloa ata tifaga lea manatu taufaifai e faapea “o le a le mea tatou te faalagolago ai fua i alii, pe afai tatou te manuia ma filifili e maua se paaga, ia tau lava o lena—se paaga. O se tasi e tu i lona lava tulaga faataumamamā e pei ona ia faamamaluina ai o tatou lava ia tulaga.”⁵

Uso e, e le mafai ona tatou oo i lenei tulaga. I le avea ai ma alii o le perisitua, ua ia i tatou se matafaioi taua e faia i le malo, i le aiga, ma i le Ekalesia. Ae e tatau ona avea i tatou ma alii e mafai ona faatuatuaaina e tamaitai, e mafai ona faatuatuaaina e fanau, ma e mafai ona faatuatuaaina e le Atua. I le Ekalesia ma le malo o le Atua i nei aso e gata ai, e le mafai



ona i ai ia i tatou ni tama ma ni alii e tautevateva. E le mafai ona ia i tatou ni alii talavou e leai se amio pulea ma ola e tau lava ina ia faafiafiaina. E le mafai ona ia i tatou ni alii talavou matutua e le iloa po o le a le mea e fai i lona olaga, o ē e le manatu mamafa i le faia o ni aiga ma faia se saofaga moni lava i lenei lalolagi. E le mafai ona ia i tatou ni tane ma ni tamā e toilalo e tuuina atu le taitaiga faaleagaga i le aiga. E le mafai ona ia i tatou ni ē o umiaina ma faaaogaina le Perisitua Paia, e tusa ma le Faatulagaga a le Alo o le Atua, e faamaumau lo latou malosi i ponokalafi pe faaalu o latou olaga i luga o Initoneti (o le mea moni lava, ua avea ma o o le lalolagi, ae ua le o i ai i *totonu* o le lalolagi).

Uso e, o loo i ai se tatou galuega e fai.

Alii talavou, e manaomia ona outou lelei i le a'oga ona faaauau ai lea o a outou a'oga pe a uma aoga maua-luga. O nisi o outou o le a mananao e faaauau suesuega i iunivesite ma ni galuega i pisinisi, faatoaga, malo, po o isi matata. O nisi o le a lelei atu i le tusiata, musika, po o le faiaoga. O isi o le a filifilia se galuega faamiliteli

pe aoao foi se tomai faalematata. I le aluga o tausaga, sa i ai ni alii vane mamanu sa galulue i ni galuega faatino toe faafou ma faaleleia i lo'u fale, ma sa ou faamemelo i le tomai o nei alii ma lo latou gafatiaina o galuega mamafa. Po o le a lava le matata e te filifilia, e taua le lava o lou tomai i na matata ina ia mafai ai ona e tausia se aiga ma faia se saofaga mo le lelei i lou nuu ma lou atunuu.

E le i leva atu na ou matamata ai i se ata sa faaali ai se aso i le olaga o se alii talavou e 14 tausaga le matua i Initia. E alapo o ia ma galue i le tele o itula i ni galuega se lua, a o lei alu i le aoga ma le tuua o le aoga, i le ono ma le afa aso i le vaiaso. O lana tupe maua e saofaga i se vaega tele o tupe maua a lona aiga. E telea'i atu o ia i le fale i lana uila tuai mai lana galuega lona lua i le po ma taumafai e faaofi-ni nai itula e fai ai ana meaaoga a o lei palasi atu i lona moega i le fola ma moe ai i le va o nai ona tei ua momoe pe tusa o le sefulutasi i le po. E ui ou te lei feiloai lava ia te ia, ae ou te lagona le mitamita ia te ia mo lona filiga ma le lototele. O loo ia faia le mea sili na te mafaia i ana punaoa ma

avanoa faatapulaa, ma o ia o se faamanuiaga i lona aiga.

Ia te outou alii matutua—tama, tagata nofofua matutua, taitai, faiaoga o aiga—ia avea outou ma ni faataitaiga agavaa ma fesoasoani atu i le tupulaga faiae o tama ia avea ma ni alii. Aoao ia i latou ni tomai faaagafesootai atoa ai ma nisi tomai: o auala e auai ai i se talanoaga, o auala e faamasani ai ma fegalegaleai ai ma isi, o auala e fesootai atu ai i tamaitai ma teineiti, o auala e auauna atu ai, o auala e toaaga ai ma olioli i gaoioga faafiafia, o auala e tulitulumatagau ai mea e fiafia i ai e aunoa ma le avea o na mea ma vaisu, o auala e faasa'o ai ni mea sese ma faia ai ni filifiliga lelei atu.

Ma ia te outou uma o loo faafofoga mai, po o fea lava e oo atu ai lenei savali ia te outou, ou te faapea atu e pei ona fetalai atu ai Ieova ia Iosua, "Ia e faamalosi ma lototele" (Iosua 1:6). Ia lototele ma saunia i le mea sili e te mafaia, po o a lava ou tulaga. Ia saunia e avea ma se tane ma se tama lelei; saunia e avea ma se tagatanuu lelei ma galue malosi; saunia e auauna atu i le Alii, le ana le perisitua o loo e umiaina. Po o fea lava le mea o e i ai,

o loo silafia lava oe e le Tama Faalelagi. E le o tuua na o oe, ma o loo ia te oe le perisitua ma le meaalofo o le Agaga Paia.

I le tele o nofoaga o loo manao-mia ai outou, o se tasi o na nofoaga e aupito sili ona taua, o lau korama o le perisitua. Tatou te manaomiaina ni korama e tuu atu le faafailelega faaleagaga i uso i le Aso Sa ma o loo auauna atu foi. Tatou te manaomiaina ni taitai o korama o e o loo taulai atu i le faia o le galuega a le Alii ma le lagolagoina o uso o le korama ma o latou aiga.

Mafaufau i le galuega faafaifeautalai. Alii talavou, e leai se taimi e tatau ona outou faamaimaua. E le mafai ona e faatali seia e 17 pe 18 ona faatoa e manatu mamafa lea i ai. E mafai ona fesoasoani korama o le Perisitua Arona i o latou uso ia malamalama i le tautoga ma le feagaiga o le perisitua ma ia saunia mo le faauuga e avea o ni toeaina, e mafai ona latou fesoasoani ia i latou ia malamalama ma saunia mo sauniga o le malumalu, e mafai ona latou fesoasoani ia i latou ia saunia mo ni misiona faamanuiaina. E mafai ona fesoasoani korama o le Perisitua Mekisateko ma le Aualofa i matua ia saunia ni faifeautalai o ē e talitonu i le Tusi a Mamona, o e o le a o atu i le galuega ua tuuto atoa atu i ai. Ma i uarota taitasi ma paranesi, e mafai e korama lava ia e tasi ona taitaia se faamaopoopoga anoa faatasi ma faifeautalai faamisiona o loo auauna ai iina.

O se galuega autu fesoatai lea e taoto i luga o tauau o le au perisitua, o le valaau lea a le Faaola, sa toe ta'ua e Peresitene Thomas S. Monson, ia laveai mai i latou ua se ese mai le talalelei po o ē ua o ese ona o soo se mafuaaga. Ua tele se faamanuiaga ofoofogia ua tatou maua i lenei taumafaiga, e aofia ai galuega silisili a alii talavou. O se korama o le Perisitua Arona i le Uarota Sipaniolo a Rio Grande i Albuquerque, i Niu Mekisiko, sa fefautuaai faatasi po o ai e mafai ona latou toe faafoi maia ma i le avea ai ma se vaega sa latou o ai ma asiasi ia i latou taitoatasi. Sa fai mai se tasi, “Ina ua latou tutu mai i lo’u faitotoa, sa

ou lagonaina lo’u taua,” ma sa fai mai foi le isi, “Sa lagona le fiafia i lo’u loto ona ua manao moni lava se tasi ia te au e sau i le lotu; ua faaosofia ai lava au e sau loa i le lotu.” Ina ua valaaulia e uso o le korama se alii talavou se tasi e toe foi mai, sa latou talosagaina o ia e o mai ma i latou i le isi asiasiga e sosoo ai, ma sa ia sau. Sa le gata ina latou valaaulia o ia e auai i le lotu; ae sa latou vave faia o ia e avea ma se vaega o le korama.

O se isi galuega faaleperisitua faigata ae e faaosofia, o talafaasolopito o aiga ma galuega faalemalumalu. Faatalitali mo se tusi a le Au Peresitene Sili, e le o toe mamao ae taunuu atu, o loo toe avatu ai le valaau faafouina ma le vaai mamao maua luga i lenei vaega taua o le galuega e tatau ona tatou faia.

E fatuina foi e le matou korama se lagolagosua lotogatasi faaleusoga. Sa saunoa mai Peresitene Gordon B. Hinckley i se tasi taimi: “O le a avea ma se aso ofoofogia, ou uso e—o le a avea ma se aso o le faataunuuga o faamoemoega o le Alii—pe a oo ina avea o tatou korama a perisitua ma taula o le malosiaga i alii uma e i ai iina, pe a mafai e ia alii taitoatasi ona fai atu ma le talafeagai, ‘O au o se uso o se korama o le perisitua o le Ekalesia a Iesu Keriso o le Au Paia o Aso e Gata Ai. Ou te tu atu ua saunia e fesoasoani i ou uso i o latou manaoga uma, ona ou te talitonu foi ua latou tutu e sauni e fesoasoani mai ia te au i ou foi manaoga. . . . O le galulue faatasi, e mafai ona tatou tutu ai, e aunoa ma le maasiasi ma e aunoa ma le fefe, e tetea atu i matagi uma o faigata e ono pesi mai, e tusa lava pe faaletamao-aiga, faaagafesootai, pe faaleagaga.’”⁶

Po o a lava a tatou taumafaiga silisili, e le sologa lelei lava mea i taimi uma e pei ona tatou fuafuaina, ma o se “matagi o faigata” patino lea e mafai ona oo mai i le olaga o se alii, o le le faigaluega. Sa taua i se tamaitusi tuai o le uelefea a le Ekalesia e faapea, “O se tagata e le faigaluega e faapitoa le popole i ai o le Ekalesia ona, ua ave-esea mai lona tofi, ua tofotofoina o ia e pei o Iopu sa tofotofoina—mo lona faamaoni. A o faasolo atu mai aso i

vaiaso ma masina e oo lava i tausaga o faigata, e faatupulaia foi le loloto o le tiga. . . . E le mafai ona faamoemoe le Ekalesia e laveai se tagata i le Aso Sa pe afai o le vaiaso atoa sa oo ai i tofotofoga tuga ae leai sana lava galuega na faia i ai.”⁷

Ia Aperila 2009, sa faamatala ai e Richard C. Edgley lē sa avea mua-mua ma fesoasoani i le Au Epikopo Pulefaamalumalu le tala o se korama lelei tele sa faia se faatinoga e fesoasoani ai i se uso o le korama sa le toe faigaluega:

“O Phil’s Auto o Centerville, Iuta, o se molimau o mea e mafai ona ausia e taitai peirisitua ma se korama. O Phil o se uso o se korama a toeaina ma sa galue o se enisinia i se fale enisinia taavale i le lotoifale. Ae paga lea, o le fale enisinia sa faigaluega ai Phil sa oo i ni faafitauli tautupe ma sa ao ai ona latou faamaloloina ia Phil mai lana galuega. Sa matua lofituina o ia i lea mea na tupu.

“I le faalogo ai i le leai o se galuega a Phil, sa iloilo ai ma le agaga tatalo e lana epikopo, o Leon Olson, ma lana au peresitene o le korama a toeaina ni auala e mafai ona latou fesoasoani ai ia Phil ia toe faatulai ai mai i ona tofotofoga. I mea uma, o ia o se uso o le korama, o se uso, ma ua ia manao-mia se fesoasoani. Sa latou faaiugāfōnoina e manaomia e Phil ni tomai e fai ai sana lava pisinisi. Sa ofo mai se tasi o uso o le korama o loo i ai sona fale tuai lea atonu e mafai ona faaoga e fai ma fale enisinia. Sa mafai ona fesoasoani isi uso o le korama e ao mai meafaigaluega moomia ma sapalai e faatotoga ai le fale enisinia fou. Sa toetoe lava o tagata uma o le korama na mafai ona fesoasoani e faamama lea fale tuai.

“Sa latou fefaasoai o latou manatu ma Phil; ona latou faasoa atu lea o la latou fuafuaga i uso o le latou korama. Sa faamamaina ma faaleleia le fale tuai, sa aoina mai meafaigaluega, ma faatulaga lelei uma mea. O se faamanuiaga le Phil’s Auto ma mulimuli ane ai siitia i se fale lelei atu ma tumau—o nei mea uma sa ausia ona sa ofo atu e ona uso o le korama le fesoasoani i se taimi o faigata.”⁸

Ioe, e pei lava ona ta'ua soo e perofeta i le gasologa o tausaga, “O le galuega aupito sili ona taua o galuega a le Alii e te faia, o galuega ia e te faia i totonu o puipui o lou lava fale.”⁹ E tele se galuega tatou te faia e faamalolosia ai faaiipoipoga i malo ua faateleina ai le faatauaina o faaiipoipoga ma teena ai ona faamoemoega. E tele se galuega tatou te faia i le aoaoina o a tatou fanau “ia tatalo ma savavali tonu i luma o le Alii” (MF&F 68:28). O la tatou galuega e le itiiti ifo lava nai lo le fesoasoani atu i a tatou fanau ia lagonaina se suiga o le loto po o le liua i le Alii e pei ona ta'ua manino ai i le Tusi a Mamona (tagai Mosaea 5:1–12; Alema 26). Faatasi ai ma le Aualofa, e mafai ai e korama o le perisitua ona atiae matua ma ulugalii, ma e mafai e korama ona tuuina atu faamanuiaga o le perisitua i aiga o matua nofotoatasi.

Ioe, uso e, e i ai se tatou galuega e fai. Faafetai atu mo osigataulaga o loo outou faia ma galuega lelei o loo outou faia. Faauau pea, ma o le a faamanuiaina outou e le Alii. E i ai taimi atonu e te leiloa tonu ai le mea e fai pe ta'u atu—ae tau ina agai pea i luma. Ia amata i le faatino, ma ua faamautinoa mai e le Alii e faapea “o le a tatalaina se faitotoa aoga mo [oe]” (MF&F 118:3). Amata i le tautala atu, ma ua Ia folafola mai, “O le a le faafememeaiina [oe] i luma o tagata; aua o le a tuu atu ia te [oe] i le itula tonu

lava, ioe, i le minute tonu lava, mea e te . . . fai atu ai” (MF&F 100:5–6). E moni lava e tele auala tatou te faatau-vaa ai ma le atoatoa, ae o loo i ai so tatou Matai ua atoatoa o Ia lea na faia se Togiola atoatoa, ma ua valaau mai i Lona alofa tunoa ma Lana perisitua. Pe a tatou salamo ma faamamaina o tatou agaga, ua folafola mai ia i tatou o le a aoaoina i tatou ma faaeeina i le mana mai luga (tagai MF&F 43:16).

O loo alalaga mai le Ekalesia ma le lalolagi ma tamaitai mo ni alii, ni alii o e o loo atiina ae lo latou gafatia ma taleni, o ē e naunau e galulue, o ē o le a fesoasoani i isi ia mauaina le fiafia ma le faaolataga. O loo latou alalaga mai, “Tulai maia, Outou o alii o le Atua!”¹⁰ Ia fesoasoani mai le Atua ia i tatou ia faia. I le suafa o Iesu Keriso, amene. ■

FAAMATALAGA

1. Kay S. Hymowitz, *Manning Up: How the Rise of Women Has Turned Men into Boys* (2011), 16.
2. “Pe a e fesiligia le autalavou i aso nei po o le a se mea e avea ai i latou ma tagata matutua, toetoe lava a leai se tasi e ta'ua le faaiipoipoga. E sili atu lo latou mafaufau i mataupu tau i galuega—faamaeaina o aoaoga, ola faalagolago o le tagata lava ia i ana mea tautupe, se galuega tumau—e fai ma faailoga ua taunuu. O galuega, matata, ola tutoatasi: o punavai autu nei o le faasinomaga i aso nei” (Hymowitz, *Manning Up*, 45). O le faamalolosia o tamaitai e faaoga lenei faiga o le tetee atu i faaiipoipoga ua matua faateleina lava. Sa tusia e se tusitala o le *Times* of London: “E leai se tasi, po o lo'u aiga, po o ou faiaoga,

sa faapea mai, 'Oi ioe, ma le isi mea atonu e te fia manao e avea ma se ava ma se tina foi.' Sa latou naunau tele o le a matou mulimuli i se ala fou faaonapo nei lea e taulai atu mo tulaga tutusa faaletamoaiga o tagata uma e faapea o faamoemoega lauiloa o tupulaga o tamaitai—o le faaiipoipo ma tauti se aiga—sa aveesea ma le faamoemoena mai lo latou vaai mamao i o tatou lumanai” (Eleanor Mills, “Learning to Be Left on the Shelf,” *The Sunday Times*, Apr. 18, 2010, www.thetimes.co.uk; i le Hymowitz, *Manning Up*, 72). O se isi tusitala i lona vaiata 40 tausaga sa sii maia ni tali i se tusiga sa ia tusia e uiga i faanoanoaga o le faaiipoipo: “Ua matua faateia lava au i lou manaomia o se alii,” “Ia e naunautai oe lava ia!” “Ua matua mauualalo lava le tulaga faalemafaufau ma lagona ua oo i ai lou le fiafia i mea tau mafutaga,” ma “Afai e ola ae lo'u afafine e manao i se alii i se tulaga e tai latalata i le tele o lou manao, o le a ou iloina sa ou faia se mea sese i le tausaiina o ia” (Lori Gottlieb, *Marry Him: The Case for Settling for Mr. Good Enough* [2010], 55).

O le tala fiafia e faapea o le tele o tagata, e aofia ai talavou matutua, e le o talitonu i savali o le le fia faaiipoipo ma le le fia faia o ni aiga. “E tusa ai ma se suesuega a se tagata tomali faapitoa o mea tau le tamaoaiga i le Iunivesite o Penisilevania, i le Iunaite Setete i le 2008, o le 86 pasene o tamaitai papae e aoga i kolisi sa faaiipoipo i le 40 tausaga, e faatusatusa i le 88 pasene o i latou e itiiti ifo ma le fa tausaga e sue ai se tikeri. E tali tutusa lava foi ma le aofai o alii papae e aoga i kolisi: 84 pasene o i latou sa faaiipoipo i le 40 tausaga i le 2008. O le atamai taatele lava, e le lagolagoina e suesuega, i se isi ala, atonu e faapea mai o le faaiipoipoga o se mea leaga lea mo tamaitai. Ae e foliga mai e le talitonu i ai ia tamaitai papae e aoga i kolisi. O i latou ia e sili atu ona manatu nai lo se isi lava vaega e faapea 'o tagata faaiipoipo i se tulaga aoao e sili atu ona fiafia nai lo tagata e le faaiipoipo.' . . . O le vaega aupito toatele—e 70 pasene—o tamaiti aoga o le tausaga muamua i kolisi e mafaufau o le tauti o se aiga e 'talafeagai' pe 'taua tele' i o latou lumanai” (Hymowitz, *Manning Up*, 173–74).

3. Philip G. Zimbardo and Nikita Duncan, *The Demise of Guys: Why Boys Are Struggling and What We Can Do about It* (2012), e-book; see the chapter “Behind the Headlines.”
4. Barbara Dafoe Whitehead, *Why There Are No Good Men Left: The Romantic Plight of the New Single Woman* (2003), 67.
5. Amanda Dickson, “‘Hunger Games’ Main Character a Heroine for Our Day,” *Deseret News*, Apr. 2, 2012, www.deseretnews.com.
6. Gordon B. Hinckley, “Welfare Responsibilities of the Priesthood Quorums,” *Ensign*, Nov. 1977, 86.
7. *Helping Others to Help Themselves: The Story of the Mormon Church Welfare Program* (1945), 4.
8. Richard C. Edgley, “O Le Valaau Lenei mo Oe,” *Liahona*, Me 2009, 54.
9. *Aoaoga a Peresitene o le Ekalesia*: Harold B. Lee (2000), 134.
10. “Rise Up, O Men of God,” *Hymns*, no. 323.





Saunia e Bishop Gary E. Stevenson
Epikopo Pulefaamalumu

Ia Totoa i le Lototetele, ma Malolosi foi ma Toaaga

Ia faagavaaina oe lava e pei o fitafita talavou e 2,000 e ala i le totoaga i le lototetele i le avea ai ma e umia le perisitua ma le agavaa.

O le po nei, ua ou lagona le faamanuaina faapitoa e talanoa atu o se epikopo i alii talavou, o e umia le Perisitua Arona, o loo mafuta mai i le salafa o le lalolagi mo lenei sauniga aoao faaleperisitua. Ou te fia faasoa atu ia te outou se tala mai le Tusi a Mamona na faamatala ai Helamana ma ana fitafita talavou e 2,000. O le a aumaia e lenei mau se malamalamaaga i le ituaiga tagata na i ai na alii talavou anamua—o se uunaiga mo outou, alii talavou o aso e gata ai. Ou te fia sii maia se mau ou te fiafia lava i ai: “Ma o i latou uma lava o ni tama talavou, ma sa latou matua totoaga i le lototetele, ma malolosi foi ma toaaga; ae faauta, sa le ona pau lea—o i latou o ni alii sa faamaoni i taimi uma.”¹ O le lototetele, malolosi, toaaga, ma le faamaoni—oka o ni uiga matagofie!

Ou te fia taulai atu i le uiga mua-mua lea e faamatalaina ai i latou: “totoaga mo le lototetele.” Ia te au lava ia, ua faamatalaina mai ii le tuuto o nei

alii talavou ina ia faia ma le lototetele le mea sa’o, faapei ona faamatalaina e Alema, “tutu o ni molimau a le Atua i taimi uma . . . ma i nofoaga uma.”² Na tele ni taimi na faaalai ai e fitafita talavou e 2,000 lo latou lototetele. Ua tofua foi outou ma ni taimi taua i o outou olaga e manaomia ai le lototetele. Sa faasoa mai e sau uo o, Ioane, se tasi o na taimi i lona olaga.

I le tele o tausaga ua mavae sa taliaina ai Ioane i totonu o se iunivesite iloga i Iapani. Na lavea o ia i se vaega o le polokalama o tamaiti aoga faavaomalo faatasi ai ma isi tamaiti aoga popoto e toatele mai le salafa o le lalolagi. O nisi na lesitala ma se faamoemoe e faalauaitele lo latou malamalama i le aganuu ma le gagana, o isi na vaaia o se laasaga e aoao ai i se matata ma faigaluega ai i Iapani, peitai sa latou tuua uma le aiga ina ia suesue ai i se atunuu ese.

E lei leva ona taunuu Ioane, ae faasalalau loa i totonu o tamaiti aoga mai isi atunuu se faamatalaga o le a faia se

pati i le tumutumu o se fale o se aiga. O lena po, sa agai atu Ioane ma ni uo se toalua i le tuatusi na faailoa ifo.

Ina ua mavae le tietiega i le lifi e oo atu i le fogafale pito i luga o le fale, na mulimuli Ioane ma ana uo i le faasitepu vaiti e oo atu i le tumutumu o le fale ma amata ai loa ona talatalanoa ma isi. I le tuneva o le po, na amata ai ona suia le siosiomaga. O le pisapisao, le leo o le musika, ma ua faateleina le inupia, ma faapena ai foi ma le mau-tonu o Ioane. Ona faafuasei lea, ona amata faatasitasi e se tagata ni tamaiti aoga ia fai se lio tele ma le faamoemoe e faasolo ai le ulaina o ni sikareti maruana. Na mimigi Ioane ma vave ona ia faailoa atu i ana uo e toalua ua tataua ona latou o ese mai. Sa tali mai le toatasi o i laua e pei o taufaalili mai, “Ioane, e faigofie lava—na ona tatou tutu lava i le lio, a oo i le tatou taimi, na o le pasi lava o le sikareti ae aua le ulaina. O le auala lena tatou te le faamaasiasia ai i tatou i luma o tagata pe a tatou o ese.” Sa foliga faigofie ia Ioane, ae sa lei foliga mai e sa’o. Sa iloa e ia e tataua ona ia faailoa atu lona faamoemoe ma faia loa. I lena lava taimi sa ia mauaina ai lona lototele ma fai atu ia i laua e mafai ona la nonofo ma pule laua i le mea la te mananao e fai, a o ia o le a alu. Na filifili le toatasi o ana uo e nofo ma auai i le lio; o le isi na mulimuli faamalosi lava ia Ioane i lalo o le faasitepu e o ai i le lifi. Na faateia i laua, ina ua matala faitotoa o le lifi, ae tulioso mai i fafo leoleo Iapani, ma faatopetope atu i le faasitepu ma agai atu i luga o le tumutumu o le fale. Sa tulioso Ioane ma lana uo i totonu o le lifi ma o ese atu.

Ina ua taunuu atu leoleo i luga o le faasitepu, na faatotope ona tia’i e tamaiti aoga ia sikareti maruana mai le tumutumu ina ia aua nei mauaina i latou. Ina ua uma ona lokaina le faasitepu, sa faalaina e leoleo tamaiti aoga uma i luga o le taualuga ma fai atu i tamaiti taitasi e faalolua uma o latou lima. Ona savavali lea o leoleo, ma sogisogi lima matua ma lima tusi o tamaiti taitasi. O i latou uma lava na uuina le maruana, pe na e ulaina pe leai, na mautinoa lava ua solitulafono, ma na tele le aafiaga. E toeitiiti

lava o tamaiti aoga uma na nonofo ai lava i luga o le tumutumu o le fale na tutuli mai o latou lava iunivesite, ma o i latou na molia i se solitulafono ma na aveesea faamalosi mai Iapani. O aoaoga na moemiti i ai, tausaga o sauniuniga, ma le faamoemoega o le faigaluega ai i le lumanai i Iapani ua faataumaioia i sina taimi itiiti lava.

Ou te fia tau atua le mea na tupu i nei uo e toatolu. O le uo lea na nofo ai lava i luga o le tumutumu o le fale na tuliese mai le iunivesite i Iapani lea na ia galue malosi ina ia talia i ai ma na faamalositia lona toe foi mai i le fale. O le uo lea na o ese faatasi ma Ioane mai le pati na faamaea lana aoga i Iapani ma agai atu ai e saili ni ona faailoga mai ni iunivesite se lua e sili ona maua i luga o le Iunaite Setete. O lana galuega na toe ave ai o ia i Asia, ma ua faamanuiaina ai o ia i lana galuega. E tumau pea lona agaga faafetai ia Ioane e oo mai i lenei aso mo lana faataitaiga lototele. Ae mo Ioane, e le mafaitaulia ni taunuuga o lona olaga. O lona i ai i Iapani na taitaiina atu ai o ia i se faaipoipoga fiafia ma sosoo ane ai ma le fanauina o ni atalii se toalu. Ua matua faamanuiaina lava o ia o se faipisinisi ma talu ai nei na avea ai o ia

ma se polofesa i se iunivesite i Iapani. Sei vaai faalemafaufau i le auala semanu e ese ai lona olaga pe ana ia le mauaina le lototele e aluese ai mai le pati i lona po taua i Iapani.³

Alii talavou e, o le a i ai ni taimi o le a outou faapei ai o Ioane, ma e manaomia ai le faaaliga o lo outou lototele amiotonu ao vaavaai atu a outou uo, atonu o le taunuuga e ulagia ai pe faamaasiasia ai foi. Ma le isi, i lo outou lalolagi, o fetuaiga ma le tiapolo o le a faia i luga o le malae o le taua e filemu ma na o oe lava i luma o le lau. O tekinolosi faatasi ai ma le tele o ona faamanuiaga ua aumai ai foi ma ni luitau e lei feagai ai augatupulaga anamua. O se suesuega lata mai faaitumalo na iloa ai o talavou i nei vaitaimi ua faaosoosoina i ni tulaga sili ona faapopoleina i aso taitasi e le gata i aoga ae faapena foi i le faaaogaina o le initoneti. Ua faaaliga mai o talavou ia e matamata i ata o inuga ma le faaaogaina o fualaau oona i luga o saite faaagafesootai ua faatoluina pe faafaina le tulaga o le aafia ai i le faaaogaina o ava malolosi ma fualaau oona. O se manatu faaaliga e uiga i le suesuega, sa taua ai e se tasi sa avea muamua ma failautusi a

le kapeneta a le IS: “Ua faaaliga mai e suesuega i lenei tausaga se ituaiga fou o taaiga a tupulaga—taaiga a tupulaga faatekinolosi. O taaiga a tupulaga faatekinolosi e faafesootaia tamaiti, uo ma i latou uma latou te fesootai. E osofaia le aiga ma le potumoe o se tamaitiiti e ui atu i le Initoneti.”⁴ O le faaaliga o le lototele amiotonu o le faia lea o se filifiliga pe kiliki pe le kilikia. Ua aoaoina faifeautalai mai le *Talai La'u Talalelei*, “O le mea e te filifili e te mafaufau i ai ma fai pe a tuua na o oe ma e talitonu e leai se tasi o vaai atu, o se fua faatatau malosi lea o lau amioatua.”⁵ Ia lototele! Ia malolosi! Tutu i nofoaga paia ma ia mausali.”⁶

Alii talavou e, ou te folafola atu o le a faamalolosi outou e le Alii. “Aua ua le foaiina mai e le Atua ia te i tatou le Agaga e matau ai, a o le Agaga e faamalosi ai.”⁷ Na te tauia outou mo lo outou lototele ma le amio amiotonu—i le fiafia ma le olioli. O lona lototele o se taunuuga o lo outou faatuatua ia Iesu Keriso ma Lana Togiola, o a outou tatalo, ma la outou usitaia o poloaiga.

Na ta'ua e Peresitene N. Eldon Tanner: “E mafai e se ali i talavou se toatasi i le lotoa o le aoga ona faia se faatosinaga malosi mo le lelei. E mafai e se ali i talavou se toatasi e i le au lakapi, a lē o le lotoa, pe faatasi ma ana uo, e ala i le ola ai i le talalelei, faamamalu lona perisitua, ma tu atu mo le mea sao, ona faia ni mea lelei e lei fai atu e fai. O le a outou aafia i le tele o taimi i le anoanoai o faitioga ma faamaasiasiga e oo lava ia i latou e tutusa o outou talitonuga, e tusa lava pe latou te faaaloalo ia te oe i le faia o le mea sao. Ae ia manatua sa puapua-gatia foi le Faaola lava ia, na faitioina, feanu i ai, ma iu ai ina faasatauroina ona e lei malulue i lona talitonuga. Faamata o le a so outou mafaufau i le mea semanu e tupu pe ana faavaivai o ia ma fai atu, ‘Oi, o le a le aoga?’ ma lafoai lana misiona? Tatou te fia avea ea ma ni tagata e mumusu gofie, pe tatou te fia mananao e avea ma ni auauna totoa e ui i le tetele o le tetele ma le amioleaga i le lalolagi? Ia tatou maua le lototele e tutu atu ai ma ia





faitaulia faatasi ma e mulimuli faamaoni ma tuuto ia Keriso.”⁸

Ou te valaau atu ia te outou ina ia faagavaaina oe lava e pei o fitafita talavou e 2,000 e ala i le totoa i le lototetele i le avea ai ma e umia le perisitua ma le agavaa. Manatua, o mea tou te faia, o mea tou te o i ai, ma mea tou te vaai i ai o le a fuafuaina ituaiga o tagata o le a avea ai outou. O ai tou te fia avea ai? Avea o se tiakono agavaa, se aoao agavaa, se ositaulaga agavaa. Faatu nei se sini ina ia agavaa e ulu atu i le malumalu, ma ia agavaa e maua le isi ou sauniga i le tausaga talafeagai ma oo atu ai i le mauaina o le Perisitua Mekisateko. O le ala lenei o le amiotonu lea e valaaulia ai le fesoasoaniga faalelagi. Sa fetalai mai le Alii, “O lea, o ona sauniga, ua faaalai ai le mana o le faale-atua.”⁹

Matua, taitai perisitua, ma mea faamuamua faaperofeta o loo maua i au

tamaitusi o le *Tiute i le Atua* ma le *Mo le Malosi o le Autalavou* o le a taitaia oe i le ala.

Na fautua mai talu ai nei ia Peresitene Thomas S. Monson:

“O le faia o ni [filifiliga] atamamai, e manaomia ai le lototetele—le lototetele e fai atu ai leai, le lototetele e fai atu ai ioe. . . .

“Ou te aioi atu ia te outou ina ia faia se faamoemoega tumau i le taimi lava [lenei] e aua nei se ese mai le ala lea e taitaiina atu ai i la tatou sini: o le ola e faavavau ma lo tatou Tama oi le Lagi.”¹⁰

Faapei o le tali atu a fitafita e 2,000 i le valaau a lo latou taitai o, Helamana, lea na taitaiina lo latou lototetele totoa, e mafai foi ona outou faia lea lava mea e ala i le mulimuli i lo outou taitai perofeta o, Peresitene Thomas S. Monson.

Au Perisitua Arona talavou e, i le faaiuga ou te fia tuuina atu lau

molimau i le Atua le Tama ma Iesu Keriso faatasi ai ma upu a Iosefa Samita: “Uso e, tatou te le o atu pea ea i lenei savali sili? O atu i luma ae le o le solomuli. Lototetele, uso e; o atu pea, o atu pea i le manumalo!”¹¹ I le suafoa o Iesu Keriso, amene. ■

FAAMATALAGA

1. Alema 53:20.
2. Mosaea 18:9.
3. O se tala patino na faamatalaina e le tusitala.
4. Joseph A. Califano Jr., founder and chairman emeritus of the National Center on Addiction and Substance Abuse at Columbia University, in a press release regarding the research, casacolumbia.org.
5. *Talai La'u Talalalelei: O Se Taiala mo le Galuega Faafaifeautalai* (2004), 118.
6. Mataupu Faavae ma Feagaiga 87:8.
7. 2 Timoteo 1:7.
8. N. Eldon Tanner, “For They Loved the Praise of Men More Than the Praise of God,” *Ensign*, Nov. 1975, 74–75.
9. Mataupu Faavae ma Feagaiga 84:20.
10. Thomas S. Monson, “O R e Tolu o Filifiliga,” *Liahona*, Nov. 2010, 68.
11. Mataupu Faavae ma Feagaiga 128:22.



Saunia e Elder Anthony D. Perkins

○ Le Fitugafulu

Faaeteete mo Outou Lava

Ia tumau i le ala o le perisitua e ala i le faalauteleina o lo outou liua ma faamalosia lou aiga. . . . Aloese mai i mala e ala i le uai atu i faailoilo faaleagaga “Faaeteete” lea ua tuuina mai i lo tatou ala e le Atua ma perofeta.

Ao avea au ma se alii talavou, matou te tietie ma le matou aiga e asaina ia Mauga Papa o Amerika e asia ou matua matutua. E amata le auala i ni togavao laugatasi, ma aea ni aega ua ufitia e ni paina mauululuga, ma oo atu ai i laau tetele i le tumutumu o le mauga, ma mafai ai ona matou iloa atu ni nofoaga mamao.

Peitai e le atoatoa le saogalemu o lenei auala matagofie. O le vaega tele o le auala televave na fausia e ui tonu i autafa o le mauga tifato. O le puipufiga o tagata femalagaai, ua fausia ai e tagata fauauaala ni papuipui ma tuu ai ni faailoilo o loo faitauina, “Faaeteete: Maa Pauu.” Na matou matauina le tele o mafuaaga mo ia faailoilo. Na salalau solo ia maa ma ogamaa i autafa o le vaitafe o loo i lalo ifo o le auala. O nisi taimi, matou te vaaia ai i lalo o le vanu ni taavale ua malepelepe, o se faamaumauga faanoanoa o ni avetaavale le faaeteete.

Tautoga ma le Feagaiga o le Perisitua

Uso e, o outou taitoatasi ua uma ona ulu atu pe o le a vave ona outou

ulu atu, i se tautoga ma le feagaiga o le Perisitua Mekisateko.¹ O loo faaaofia i lenei feagaiga se malaga faalelagi lea e amata i le mauaina uma o le perisitua mauualalo ma le perisitua mauuluga, agaigai i luma e ala i le faalauteleina o o tatou valaauga, ma feaei ai pea ma agai atu i faamanuiaga silisili a le Atua, seia tatou mauaina “mea uma ua i ai [i le] Tama.”²

O le tagata atamai na fauina lenei auala faaselesitila na mamauina ni faailoilo o le lapataiga mo la tatou faigamalaga. O loo i ai i le tautoga ma le feagaiga o le perisitua se lapataiga e mafaufau faaeteete i ai: “Ou te tuu atu nei ia te outou se poloaiga ia outou faaeteete e faataua ia te outou lava.”³

Aisea e poloaia ai i tatou e le Atua ia faaeteete? Aua Na te silafia o Satani o se tagata moni⁴ o le saili ia toso ifo outou i lalo i le to o le pagatia ma le malaia.⁵ Ua silafia foi e le Atua o le “tagata natura”⁶ o loo lafi i totonu o e umia le perisitua, ma ua “saunia e osofai.”⁷ O le mea lea, ua valaauina ai i tatou e perofeta ina ia “tuuese le tagata tuai”⁸ ma “oofu ia Keriso”⁹ e ala

i le faatuatua, salamo, sauniga faaola, ma ola ai i le talalelei i aso uma.

Aloese mai Mala

Ao aea le ala o le perisitua, e mafai ona taofia soo se tama po o se alii pe afai e galo ia te ia ona faaeteete. Pe na faateia oe ma e maua i le loto nutimo-moia i le pau e lei faamoemoeina o se alii talavou lelei, se faifeautalai faatoa foi mai, taitai perisitua faaaloologia, po o se tagata e pele o le aiga?

O le tala i le Feagaiga Tuai ia Tavita o se faataitaiga faanoanoa lea o le maua o le mana o le perisitua. E ui sa ia faatoilaloina ia Koliata ao talavou ma ola amiotonu mo le tele o tausaga,¹⁰ ae na vaivai faaleagaga lava lenei tupu-perofeta. I lenei lava taimi faapitoa na ia vaai atu ai mai le tumutumu o lona fale o taele mai ia Patisepa, e lei i ai se tagata leoleo lelei na tu faalatalata atu ma alaga atu, “Faaeteete, Tavita, o oe o le vale!” O lona toilalo ina ia faaeteete e faata-tau ia te ia lava¹¹ ma galue e tusa ma musumusuga o le Agaga¹² na oo ai i le aveesea o lona aiga e faavavau.¹³

Uso e, afai na oo lava ia Tavita le taofia mai i le ala o le faaeaga, e mafai la faapefea ona tatou aloese mai lea lava taunuuga e tasi?

E mafai ona fesoasoani ia i tatou ni mataupu faavae malupuipua se lua o le liua loloto patino ma sootaga malolosi faaleaiga e faatonutonu ai i tatou i le auala televave faalelagi.

O le iloina o nei mea, o le a tuua ai e Satani ni ala i o tatou ala o le atinaega o le perisitua e faaleaga ai a tatou fesootaiga ma faataumaioia ai o tatou aiga. O le mea e faafetai ai, na tuuina e Iesu Keriso ma Ana perofeta ni faailoilo “Faaeteete”, i le aluga o le ala. Ma o loo latou lapataia pea lava pea i tatou e uiga i le faamaualuga e faaleaga ai fesootaiga¹⁴ ma agasala e faataumaioia ai aiga e pei o le ita, manaolasi, ma le tuinanau.

I aso anamua, na fautua mai ai Mose, “Ia oe, nei galo ia te oe le Alii.”¹⁵ Ua faatelevaveina ma ua faatumulia i faafiafiaga lo tatou lalolagi, ua vave ona “galo i le fanauga a tagata le Alii, . . . e fai le amioletonu, ma taitaieseina e le ua leaga.”¹⁶



Liua Loloto ma le Faamalosia o le Aiga

O le tumau saogalemu i le ala o le perisitua e ui i tulaga lamatia faaleagaga e pei o le faaososoga, ou te toe taua ai ni aoaoga faavae autu se ono e maua ai le liua loloto ma faamalosia le aiga.

Muamua, o le tatalo e le aunoa e tatalaina le faitotoa mo le fesoa-soani faalelagi ina ia “manumalo ia Satani.”¹⁷ O taimi uma lava e lapatai mai ai Iesu i e umia le perisitua ina ia “faaeteete, ona e manao Satani e lulu ia te [oe],” Na te faamatalaina le tatalo o se faatinoga e tetea atu ai i le faaososoga.¹⁸ Sa aoao mai Peresitene Thomas S. Monson: “Afai o loo i ai se tagata o i tatou na faatuai ona faalogo i le fautuaga ia tatalo e le aunoa, e leai se isi taimi e tatau ona fai ai nai lo nei lava. . . . E leai se tagata e mafai ona tu maua atu nai lo le taimi e i ai o ia i ona tulivae.”¹⁹

Lua, o le suesue i tusitusiga paia anamua ma nei ona po tatou te fesootai atu ai i le Atua. Na lapataia e le Alii tagata o le Ekalesia ina ia “faaeteete i le ala latou te umia ai [ia perofeta] nei o latou manatu i ai e pei o se mea mama, ma faapea ona aumai ai i latou i lalo o le tausalaga, ma tautevateva

ma pauu ai.”²⁰ O le aloese mai lenei tausalaga faamaoni, e tatau ona tatou filiga i le faitauina o tusitusiga paia, faapea foi ma mekasini a le Ekalesia ma uepisaite lea e mafai ai ona tatou “maua ni fautuaga i se auala mafanafana ma patino e ala mai i perofeta filifilia [a le Alii].”²¹

Tolu, o le auai ma le faamaoni i sauniga o le a saunia i tatou ina ia avea “le Agaga Paia ma o [tatou] taiala.”²² Pe a lapatai mai le Faaola, “Ia faaeteete nei faaseseina outou” ua ia folafola mai o le a le [faaseseina] i tatou pe afai tatou te “saili . . . faamaoni meaalofo silisili ona lelei” a le Agaga.²³ O le ‘aai ma feinu ma le tatau i le faamanatuga i vaiaso taitasi e faagavaa ai se tagata ina ia “latou maua pea lona Agaga e faatasi ma i latou.”²⁴ I tapuaiga faalemalumalu e mafai ona tatou “maua le atoatoaga o le Agaga Paia.”²⁵

Fa, o le faaalua o le alofa faamaoni o le fatu lea o le liua patino ma sootaga faaleaiga. Na aoao atu e le Tupu o Peniamina, “Ia faaeteete nei tutupu ae ni finauga i totonu o outou.”²⁶ Aua nei galo o Satani o le “tama o le finauga”²⁷ ma e saili ina ia “femisaai ma fefinau.”²⁸ Uso e, afai

tatou te faasaua faalelagona, i upu, pe faaletino foi i soo se tagata o lo tatou aiga, pe soonafai soo se tagata, o le a aveesea mai ia i tatou le mana.²⁹ Filifili e pulea lou ita. E tatau ona faalogo logo tagata o le aiga i upu vivii [mai o tatou gutu] ae le o le fetuu. E tatau ona tatou uunaia isi i le na o le faatauana, tali-tiga, agamaualalo, agamalu, alofa faamaoni, agalelei, ma le alofa.³⁰

Lima, o le usitaia o le tulafono o le sefuluai o se elemene taua lea o le faatuatua ma le tuufaatasia o le aiga. Talu ai e faaaoaga e Satani le manaolasi ma le sailiga o oa e tafieseai ai aiga mai le auala televave i le selesitila, ua fautua mai ai Iesu, “Ia faaeteete i le faamaualuga.”³¹ O le manaolasi o le a puleaina pe a tatou fuafua lelei a tatou tupe maua, tofogi ma le faamaoni le sefuluai ma le taulaga anapogi, paketi tupe faaalu mo mea e manaomia, aloese mai aitalafu le talafeagai, sefe mo mea e manaomia i le lumanai, ma ia ola tutoatasi faaletino. O le folafolaga a le Atua ia i tatou, “A ia outou muai saili le malo o le Atua ma lana amiotonu; ona faapoopoina atu lea o ia mea uma ia te outou.”³²

Ono, o le ola ai atoatoa i le tulafono o le le gaoia o le a maua ai le lototele e tu “i luma o le Atua” ma avea le Agaga Paia ma o tatou “soa e le aunoa.”³³ O loo ua osofaia e Satani le ola mama ma faaipoipoga i le faateleina o le amioleaga. Ina ua lapatai atu le Alii i tagata mulilulua ina “ia faaeteete ma salamo vave,” O Lana faauigaga na faalauaiteleina i talaatu o le faatinoga faaletino o le mulilua i le mafaufau manaonao i ai lea e muai oo mai.³⁴ Ua saunoa soo mai ma le manino ia perofeta ma aposetolo o nei ona po e uiga i se mala matautia o ponokalafi. Na aoao mai Peresitene Gordon B. Hinckley: “O [ponokalafi] ua pei o se afa fulifao, ua faatafunaina ai tagata taitoatasi ma aiga, ua matua faaleagaina ai le mea sa lelei ma matagofie . . . Ua oo mai le taimi mo soo se tasi o i tatou o loo aafia ai ina ia tosoeseina mai o ia lava mai lenei faiga mataga.”³⁵ Afai o faaososoina oe e solia le tulafono o le ola mama i soo se tulaga lava—mulimuli i le faaitaiga a Iosefa mai Aikupito,

o le na “sola, ua alu i fafo.”³⁶


O mataupu faavae autu nei e ono na fesoasoani i e umia le perisitua e faaauau saogalemu ai pea i luga o le auala televave faalelagi i le va o papui-pui faaleagaga o le liua patino ma sootaga faaleaiga. Alii talavou, o le usitaia o nei mataupu faavae o le a saunia ai oe mo feagaiga o le malumalu, auaua atu faafaifeautalai faamisiona, ma le faaipoipoga e faavavau. Tane ma tamā, o le ola ai i nei mataupu faavae o le a faagavaaina ai oe e pulefaamalumu ma le amiotonu i totonu o le aiga, auaua atu o se taitai faaleagaga i lou aiga, ma ave lau ava o se paaga tutusa.³⁷ O le ala o le perisitua o se malaga e tumu i le olioli.

Tumau Ai i le Ala o le Perisitua

Ou te foi i ou aafiaga ao avea ma alii talavou, ou te manatuaina se laasiaga se tasi o Mauga Papa. Ina ua maea ona pasia se faailoilo “Faaeteete: Maa Pauu”, sa iloina e lou tama ni tamai maamaa na pauu i le auala i o matou luma. Sa vave ona ia faalemuina le taavale ma iu ai lava ina tu ae ua tei i le maalo ifo i o matou autafa o se alā e tutusa le tele ma le polo pasike-tipolo. Sa faatali Tama seia maea le solo o maa ona faaauau lea. O le mataalia ma faatinoga faavavave a lou tama na faamautinoa ai le taunuu saogalemu o lo matou aiga i lo matou nofoaga faamoemoeina.

Uso e, o loo saili Satani “e faaumatia agaga o tagata.”³⁸ Afai o loo ua agaigai malie atu lou agaga i se tulimanu tifato o se aega faaleagaga, taofi nei loa ae e te lei pau atu, ma toe foi i tua i le ala.³⁹ Afai e te lagona o loo taoto mai lou agaga i lalo o le vanu ma ua faaleagaina nai lo le i ai i le mea maua o le ala o le perisitua ona ua e le amanaiaina ia faailoilo “Faaeteete” ma ua agasala, ou te molimau atu o le salamo faamaoni ma le mana o le taulaga togiola a Iesu Keriso, o le a mafai ai ona e toe tulai mai i luga ma toe foi atu i le auala televave faalelagi a le Atua.⁴⁰

Na aoao mai Iesu, “Ia faaeteete ai . . . i le le amiotonu.”⁴¹ Afai ua e le agavaa e faaoga le perisitua, faamolemole vaai lou epikopo, lea e mafai



ona fesoasoani ia te oe ia salamo. Ia lototetele e ui o le a faamaonia e le Faaola, “Ia faaeteete, . . . ma taofi mai le agasala,”⁴² Na Ia folafola mai foi, “Ua faapea lava ona faamagaloina o outou e A’u, o le Alii. . . . O i o outou ala ma ia le toe agasala.”⁴³

Ou te valaau atu i tama ma alii uma ina ia tumau i le ala o le perisitua e ala i le faalateleina o lo outou liua ma faamalosia lou aiga. O tatalo, tusitusiga paia, ma sauniga e faamalosia le liua. O le alofa, sefuluai, ma le le gaoia e faamalosia le aiga. Aloese mai i mala e ala i le uai atu i faailoilo faaleagaga “Faaeteete” lea ua tuuina mai i lo tatou ala e le Atua ma perofeta. Taumafai ia mulimuli i le faataitaga atoatoa a Iesu Keriso, o le sa “mafatia . . . i faaosoosoga ae sa le gauai atu i ai.”⁴⁴

Ou te folafola atu afai e tausi e alii le feagaiga o le perisitua ina ia “faaeteete e faataitau ia te outou lava,”⁴⁵ o le a faamautinoaina le taunuu saogalemu atu ma le fiafia o o tatou aiga i lo tatou taunuuga faaeaina i le malo selesitila. Ou te molimau atu ai i le suafa paia o Iesu Keriso, amene. ■

FAAMATALAGA

1. Tagai Mataupu Faavae ma Feagaiga 84:33–44.
2. Mataupu Faavae ma Feagaiga 84:38.
3. Mataupu Faavae ma Feagaiga 84:43.
4. Tagai Iosefa Samita—Talafaasolopito 1:16; Tagai foi Mose 1:12–22.
5. Tagai Helamana 5:12; Tagai foi 2 Nifae 1:13; Helamana 7:16.
6. Mosaea 3:19; Tagai foi 1 Korinito 2:14.
7. “Come, Thou Fount of Every Blessing,” Viiga (1948), nu. 70.
8. Tagai Kolose 3:8–10; Tagai foi Efeso 4:22–24.
9. Kalatia 3:27; Tagai foi Roma 13:14.
10. Tagai 1 Samuelu 13:14; 17:45–47.
11. Tagai 2 Samuelu 11:1–17.

12. “O le a e le faia se mea sese matuia e aunoa ma le lapataia muamua o oe e uunaiga a le Agaga Paia” (Boyd K. Packer, “Fautuaga i le Autalavou,” *Liahona*, Nov. 2011, 18).
13. Tagai Mataupu Faavae ma Feagaiga 132:39; Tagai foi Talala i Tusitusiga Paia, “Tavita.”
14. Tagai Mataupu Faavae ma Feagaiga 23:1; 25:14; 38:39; Tagai foi Ezra Taft Benson, “Faaeteete i le Faamauaiga,” *Liahona*, Iulai 1989, 4–7.
15. Teuteronome 6:12; Tagai foi Teuteronome 8:11–19.
16. Alema 46:8.
17. Mataupu Faavae ma Feagaiga 10:5.
18. Tagai Mataupu Faavae ma Feagaiga 52:12–15; Tagai foi Luka 22:31–32; Alema 37:15–17; 3 Nifae 18:18–19.
19. Thomas S. Monson, “O Mai ia te Au i le Tatalo ma le Faatuatua,” *Liahona*, Mat. 2009, 4.
20. Mataupu Faavae ma Feagaiga 90:5; Tagai foi Mataupu Faavae ma Feagaiga 41:1, 12.
21. Gordon B. Hinckley, “O Le Faatuatua: Le Aano Lea O Le Tapuaiga Moni,” *Liahona*, Nov. 1981, 5.
22. Mataupu Faavae ma Feagaiga 45:57.
23. Mataupu Faavae ma Feagaiga 46:8; Tagai foi Efeso 4:14; Mataupu Faavae ma Feagaiga 52:14–16; Kolose 2:8.
24. Moronae 4:3; Mataupu Faavae ma Feagaiga 20:77; Tagai foi 3 Nifae 18:1–11.
25. Mataupu Faavae ma Feagaiga 109:15.
26. Mosaea 2:32.
27. Tagai 3 Nifae 11:29–30.
28. Mosaea 4:14.
29. Tagai Mataupu Faavae ma Feagaiga 121:36–37; Tagai foi Mataupu Faavae ma Feagaiga 63:61–63.
30. Tagai Mataupu Faavae ma Feagaiga 121:41–45.
31. Luka 12:15; Tagai foi Mataupu Faavae ma Feagaiga 38:39.
32. Mataio 6:33; Tagai foi 3 Nifae 13:33.
33. Mataupu Faavae ma Feagaiga 121:45–46; Tagai foi Mataupu Faavae ma Feagaiga 67:11; Mose 1:11.
34. Tagai Mataupu Faavae ma Feagaiga 63:14–16; Tagai foi Mataio 5:27–28; 3 Nifae 12:27–30.
35. Gordon B. Hinckley, “Ua Feagai i Tatou ma se Mala Matautia,” *Liahona*, Nov. 2004, 59, 62; Tagai foi Dallin H. Oaks, “O Ponokarafi [tusi ma ata matagal],” *Liahona*, Me 2005, 87–90; Jeffrey R. Holland, “Ia Le Toe Ulu Mai i Lo’u Agaga Le Ita Mai ia te Au,” *Liahona*, Me 2010, 44–46.
36. Kenese 39:12.
37. Tagai *Tusitaulima 2: Taitaiina o le Ekalesia* (2010), 2.3.
38. Mataupu Faavae ma Feagaiga 10:27; Tagai foi 1 Peteru 5:8.
39. Tagai Mataupu Faavae ma Feagaiga 3:9–10; 1 Korinito 10:12–13; 2 Peteru 3:17.
40. Tagai Alema 13:27–29; Mataupu Faavae ma Feagaiga 109:21.
41. Luka 12:1; Tagai foi Mataupu Faavae ma Feagaiga 50:6–9.
42. Mataupu Faavae ma Feagaiga 82:2.
43. Mataupu Faavae ma Feagaiga 82:1, 7.
44. Mataupu Faavae ma Feagaiga 20:22; Tagai foi Eperu 2:17–18; 4:14–16.
45. Mataupu Faavae ma Feagaiga 84:43; Tagai foi Teuteronome 4:9; Mosaea 4:29–30.



Saunia e Peresitene Dieter F. Uchtdorf

Fesoasoani Lua i le Au Peresitene Sili

O Le Olioli i le Perisitua

Ia tatou opomauina ma malamalama i le ofoofogia ma le faamanuiaga o le perisitua. Ia tatou talia ma fialia i tiutetauave ua talosagina i tatou e faataunuu.

O Le Olioli i le Lele

E tele tausaga talu ai sa matou filifili ai ma nisi uso a kapeteni vaalele e faataunuu se miti faatamaiti o le toe faafouina lea o se vaalele tuai. Sa matou faatauina faatasi se vaalele tuai o le Piper Cub 1938 ma amata loa galuega o le toe faafoiina i ona uluai foliga sa i ai. O le galuega faatino o se galuega sa matou fialia e fai. Sa i ai se uiga faapitoa mo au ona sa ou aoao e lele i se vaalele faapea a o o'u talavou.

O lenei vaalele na muamua fauina i le mavae ai o le 35 tausaga talu ona faia e le auuso Wright la'ua malaga lauiloa muamua lava. O le mafaufau ai i lena mea ou te lagona ai lo'u matua tele.

E lei i ai i le afi se masini eletise e ola ai; a o e faaolaina le afi mai le nofoa e nofo ai le ave vaalele, e ao ona i ai se isi tagata i le eleele e taofimauina le peapea ma faataavili i lona malosi atoa seia oo ina ola le afi lava ia. O taimi taitasi e faaola ai le afi o se taimi lea o le fialia ma le lototoa.

I le taimi lava na lele ai i luga i le ea, sa manino mai ai o le Piper Cub e le o se vaalele saosaoa. O le mea moni, a malosi le agi mai o se savili, sa foliga mai e pei matou te le o ō. Ou te manatua lo ma felelei faatasi ai ma lo'u atalii talavou i luga ae o autobahn

i Siamani ma sa mautinoa lava, o taa-vale na i lalo ifo sa saosaoa atu ia i maua!

Ae, oka sou fialia i lenei vaalele laitiiti! O le ala atoatoa lea sa lagonaina ai le ofoofogia ma le matagofie o le lele. E mafai ona e faalogoina, lagonaina, sosogiina, tofoina, ma vaaia le uiga atoa o le lele. Sa faailoa mai e le auuso Wright i le ala lenei: "E [leai se mea] e tutusa ma lena mea lea e fialia i ai pailate a o felelei atu i le ea i apaau lapopoa papae."¹

I se faatusatusaga, i le amataga o lenei tausaga sa ou maua ai se avanoa e lele ai i se vaalele tau matautia o le F-18 faatasi ai ma le Blue Angels ua lauiloa i le lalolagi, le vaega felelei faatitai a le Neivi a le Iunaite Setete. Sa pei na lele atu i luga a'e ma ō faatasi ma le manatuaina o mea o le tuanai ona ua atoa lelei le 50 tausaga talu ai, toeitiiti lava o le aso tonu lea, sa faamaea ai au aoaoga o se pailate o vaalele tau.

Ioe, o le aafiaga i le malaga F-18, sa matua ese lava mai le aafiaga i le Piper Cub. Sa faaali mai ai ia te au se matagofie malosi atu o le lele. Sa pei o le faaogaina o tulafono faasaientisi o loo i ai o le felelei o vaalele i se ala e sili atu ona atoatoa. Peitai, a o felelei faatasi ai ma le Blue Angels

sa faamanatu vave mai ai foi ia te au e faapea o le avea ma se pailate o se vaalele tau e na o alii talavou e faia. E toe sii mai le saunoaga a le auuso Wright, "E sili atu nai lo se isi lava mea, o le lagona [o le felelei] o se tasi o filemu atoatoa, e milo faatasi ma se fialia lea e matuai fālōina uaua uma."² Ma le isi, o le felelei faatasi ma le Blue Angels na fautua mai ai se isi ala e matua ese lava o le i ai o "agelu" e siomia oe ma sapasapai oe i luga.

Afai e ao ona e fesili mai ia te au pe o fea o nei aafiaga e lua o le felelei e sili ona ou fialia i ai, ou te le mautinoa pe mafai ona ou tau atu ia te oe. E tau ina ou faapea atu, i nisi ala manino, sa matua faigata uma. Ae i isi ala, sa tali tutusa lava.

I le Piper Cub faapea ma le F-18, sa ou lagona ai le fialia, matagofie, ma le olioli i le lele. I vaalele uma e lua sa mafai ona ou malamalama ai i le uiga o le tala a le tusi solo e faapea "[alu ese mai] i sootaga matamataita o le Lalolagi ma [siva] i lagi i luga o apaau e lanu siliva pe a ata."³

E Tutusa le Perisitua i Soo Se Mea

Ia, atonu tou te fesili, o le a le sootaga a nei aafiaga e lua matua eseese lava o le felelei ma le tatou sauniga i le asō po o le perisitua ua faamanuiaina i tatou e umia po o auunaga faaleperisitua tatou te matua fialia uma i ai?

Uso e, pe le moni ea o o tatou aafiaga taitoatasi o auunaga i le perisitua atonu e fai sina eseese uma? E mafai ona tatou faapea, o nisi o outou o loo felelei i ni vaalele F-18, a o isi o loo felelei i ni Piper Cubs. O nisi o outou o loo nonofo i uarota ma siteki lea o loo i ai tofiga uma, mai lava i le fesoasoani o le taitai vaega o faitaulaga sili i le failautusi a le korama o tiakono, ua faatumuina e se uso toaga o loo umiaina le perisitua. Ua ia te outou le avanoa e auai ai i se faalapotopotoga a se uarota o loo lava ai tagata o loo galulue i tofiga.

O isi o outou o loo nonofo i ni eria o le lalolagi o loo i ai na o ni nai tagata o le Ekalesia ma ē o umiaina le perisitua. Atonu e te lagonaina le tuuatoatasi ma le mamafatu i avega o mea uma e manaomia ona fai. Mo oe



atonu e tele lou aofia ai o oe lava ia ina ia mafai ona faaola le afi o auau-naga faaleperisitua. O nisi taimi atonu e foliga mai e le o agai lava i luma lau paranesi po o lau uarota.

Peitai, po o a lava ou tiutetauave po o ni tulaga e ono i ai, ua tatou iloa uma lava o loo i ai pea se olioli faapitoa e sau mai auunaga tuuto faaleperisitua.

Ou te fiafia lava e lele, pe sa ou lele i se Piper Cub, se F-18, po o se isi lava vaalele. A o ou i ai i totonu o le Piper Cub, ou te lei faitio e uiga i le le sa-asaoa; a o ou i ai i totonu o le F-18 ou te lei faitio foi i le taavilivili o faatinoga a le vaalele ma le leai o se faamoemoe lea sa ou lagona ai le le toafimalie ona ua ou matua.

Ioe, o loo i ai pea se mea le atoatoa i soo se tulaga lava. Ioe, e faigofie lava ona maua ni mea e faitio ai.

Ae uso e, o i tatou o e umiaina le Perisitua Paia, e tusa ma le faatula-gaga a le Alo o le Atua! Sa tofi i tatou uma ma ni lima na faaee i o tatou ulu, ma tatou maua ai le perisitua a le Atua. Ua tuuina mai ia i tatou le pule ma le tiutetauave e galue ai i Lona

suafa o ni Ana auauna i le lalolagi. Pe o se uarota tele po o se paranesi laitiiti, ua valaauina i tatou ia auauna atu, faamanuia, ma galulue i mea uma mo le lelei o tagata uma atoa ai ma mea uma ua tuuina mai i la tatou tausiga. Pe o i ai se isi mea e sili atu ona faafiafiaina?

Ia tatou malamalama, talisapaia, ma lagonaina le olioli i auunaga i le perisitua.

O Le Olioli i le Perisitua

O lou fiafia e lele o loo uunaia ai le taitaiga o lou olaga atoa. Ae e pei o le faafouina ma le faafiafiaina o ou aafiaga o se pailate, e faapena foi ou aafiaga o se tagata o lenei Ekalesia ua matua faalolotoina, sili atu ona faafiafiaina, ma sili atu ona taua. A o faatofuina au lava ia i auunaga faale-Ekalesia, ua ou lagonaina le mana silisili ese o le Atua faapea ai foi ma Lona alofa mutimutivale agamalu.

I le avea ai ma se pailate, ua ou oo atu ai i lagi. I le avea ai ma se tagata o le Ekalesia, ua ou lagona ai le alofa ma le tausiga a le lagi.

Mai lea taimi i lea taimi, ou te misia

lava le nofo ai i le nofoa ave vaalele. Ae o le auauna ai faatasi ma uso ma tuafafine i le Ekalesia ua faigofie ai ona faatumuina lea vaega. O le mafai ona lagonaina le filemu ma le olioli musuia lea e tupu mai i se vaega itiiti i lenei pogai ma le galuega, lea ou te le manao lava e misia mo soo se mea lava i le lalolagi.

O le asō ua tatou potopoto ai o se tino tele o le perisitua. O lo tatou olioli ma le avanoa paia lea e auauna atu ai i le Alii ma o tatou uso a tagata, ia tuuto atu le mea sili tatou te mafaia i le galuega tautupu o le siitiaina o isi ma le fausiaina o le malo o le Atua.

Ua tatou iloa ma malamalama o le perisitua o le mana ma le pule e faavavau a le Atua. E mafai ona tatou taulotoina faigofie lona faauigaga. Peitai, pe o tatou malamalama moni lava i le taua o le mea o loo tatou tautatala ai? Sei ou toe fai atu: *o le perisitua o le mana ma le pule e faavavau a le Atua.*

Maufaufau i ai. E auala mai i le perisitua, na foafoaina ai e le Atua ma puleaina ai lagi ma le lalolagi.

E auala mai i lenei mana, Na te togiola ai ma faaeaina Ana fanau, ina

ia aumaia le “tino ola pea ma le ola faavavau o le tagata.”⁴

O le perisitua e pei ona faamalamalamaina ai e le Perofeta o Iosefa Samita, o le “auala lea na amata ai ona faaali mai e le Silisili ese Lona mamalu i le . . . foafoaga o lenei lalolagi, ma o le auala lava lea o loo faaauau ai pea ona Ia faaali mai o Ia lava i le fanauga a tagata i le taimi nei, ma o le auala foi lava lea o le a Ia faailoa mai ai Ona faamoemoega i le iuga o aso.”⁵

Ua tuuina mai e lo tatou Tama i le Lagi e ona le mana uma le pule o le perisitua ia i tatou—o tagata faaletino o e, i se faauigaga, e sese ma lē atoatoa. Ua Ia tuuina mai ia i tatou le pule e galulue ai i Lona suafa mo le faaolataga o Ana fanau. E ala mai i lenei mana ua faatagaina ai i tatou e talai atu le talalelei, tuuina atu sauniga o le faaolataga, fesoasoani e fausia le malo o le Atua i le lalolagi, ma faamanuia ma auauna atu i o tatou aiga ma uso a tagata.

Ua Avanoa mo Tagata Uma

O le mana paia lenei o loo tatou umiaina.

O le perisitua, po o soo se tiute-tauave o i ai, e le mafai ona faatauina pe faatonuina. O le faaaogaina o le mana o le perisitua e le mafai ona faatosinaina, faatauanauiina, pe fai faamalosi i se tofiga, tamaoiga, po o se aafiaga. O se mana faaleagaga lea e faagaoioi i tulafono faalelagi. E pogai mai i le Tama Faalelagi sili o i tatou uma. O lona mana e le mafai ona pulea ma faatonutonuina tau lava o mataupu faavae o le

amiotonu,⁶ ae le o le faafiaamiotonu.

O Keriso o le puna lea o le pule ma le mana uma o le perisitua moni i le lalolagi.⁷ O Lana galuega lea, lea ua faamanuiaina ai i tatou e fesoasoani i ai. “Ma e leai se tasi e mafai ona fesoasoani i lenei galuega vagana ai ua lotomauualalo o ia ma tumu i le alofa, ua i ai le faatuatua, faamoemoe, ma le alofa mama, ua faautauta i mea uma, i soo se mea e tuu atu i lana tausiga.”⁸

Tatou te le galulue mo so tatou lava tau, ae nai lo lena, tatou te saili atu e auauna ma siitia isi i luga. Tatou te le fai faamalosi le taitaiga ae e auala i le “faatauanaui, . . . tali-tiga, . . . agamaualalo ma le agamalu, ma le alofa faamaoni.”⁹

O loo avanoa le perisitua a le Atua Silisili ese i alii agavaa po o fea lava le mea o i ai—po o ai lava o latou tuua, e tusa lava po o le a le faatauva o o latou tulaga, i vaega lata mai ma mamao foi o le lalolagi. O loo avanoa e aunoa ma se totogi po o soo se tau faalelalolagi. Ina ia toe faaupuina le saunoaga a le perofeta anamua o Isaia, *tagata uma* ua galala e mafai ona o mai i le vai, ma e le manaomia ai se tupe ina ia o mai ma aai ai!¹⁰

Ma ona o le Togiola e faavavau ma le faigata ona malamalama i ai a lo tatou Faaola, o Iesu Keriso, ua mafai ai e le perisitua a le Atua ona avanoa atu e tusa lava pe o faia ni mea sese pe sa e le agavaa i se taimi ua tea. E auala mai i le faaleleia faaleagaga ma le faagasologa o le faamamaina o le salamo, e mafai ai ona e “tulai ma susulu atu!”¹¹ Ona o le alofa le faatua-oia ma le faamagalo a lo tatou Faaola

ma Togiola, e mafai ai ona sii i luga ou mata, ma mama ai ma agavaa, ma tuputupu ae ai o ni atalii amiotonu ma malualii o le Atua—o i latou e umiaina ma le agavaa le perisitua aupito sili ona paia a le Atua Silisili ese.

O Le Ofoofogia ma Faamanuiaga o le Perisitua

Ou te lagonaina se faanoanoa patino mo i latou o e le malamalama ma talisapaia le ofoofogia ma faamanuiaga o le perisitua. Ua pei lava i latou o pasese i luga o se vaalele e faaaluina o latou taimi e faitio ai i le laitiiti o se pepa pinati a o latou felelei atu i le ea, e maua atu i ao—o se mea semanu e ono foai ai e tupu anamua mea uma latou te umiaina ina ia faataitai tasi ai lava!

Uso e, ua faamanuiaina lava i tatou ina ia avea o ni tagata e umiaina ma le lotomauualalo lenei pule ma le mana maoae o le perisitua. Ia tau ina ia tatou tepa i luga o tatou mata ma vaai, iloa, ma taliaina lenei avanoa ona o lona uiga moni lava.

E auala mai i auaunaga amiotonu, alofa, ma le tuuto faaleperisitua, o le a mafai ai ona tatou lagonaina le uiga moni o le faaaliga: “O le a Ou mua-mua atu i o outou luma. O le a Ou i ai i lo outou lima taumatau ma lo outou agavale, ma o le a i ai lo’u Agaga i o outou loto, ma si’o faataamilo outou e a’u agelu, e sapaapai outou i luga.”¹²

Ia tatou opomauina ma malamalama i le ofoofogia ma le faamanuiaga o le perisitua. Ia tatou talia ma fiasia i tiutetauave ua talosagaina i tatou e faataunuui—i o tatou aiga ma i o tatou iunite faale-Ekalesia, po o le a lava le tele po o le laitiiti. Ia tatou faateleina pea lo tatou amiotonu, tuuto, faapea ma auaunaga faaleperisitua. Ia tatou maua le olioli i le auauna atu i le perisitua!

E mafai ona tatou faia sili lenei mea e ala i le faaaogaina o mataupu faavae o le malamalama, usiusitai, ma le faatuatua.

O lona uiga, muamua, e manaomia ona tatou iloa ma faaaogaina i o tatou lava olaga ia aoaoga faavae o le perisitua o loo maua i afoga faaaliga a le Atua. E taua le malamalama i feagaiga

Sobral, Pasila



ma poloaiga ia o loo faagaoioia ai le perisitua.¹³

O le isi, ia tatou atamamai ma ola ai ma le mamalu i lenei malamalama ua maua i taimi uma. Pe a tatou ususitai i tulafono a le Atua, puleaina o tatou mafau fau ma tino, ma faaogatasi a tatou faatinoga ma mamanu o le amio-tonu o loo aoaoina e perofeta, o le a tatou lagonaina le olioli o auaunaga faaleperisitua.

Ma le mea mulimuli, ia faalolotoina lo tatou faatuatua i lo tatou Alii, o Iesu Keriso. Ia tatou ave i o tatou luga Lona suafa ma tautino atu i aso taitasi e toe savavali i le ala o le avea ai ma soo. Ia faaatoatoaina e a tatou galuega lo tatou faatuatua.¹⁴ E ala atu i le avea ai ma soo e mafai ai ona faaatoatoaina i tatou i lea laasaga ma lea laasaga e ala i le auauna atu i le aiga, uso a tagata, ma le Atua.

Pe a tatou auauna atu i le perisitua ma o tatou loto atoa, agaga, mafau-fau, ma le malosi atoa, o le a tatou mauaina se folafolaga o le malamalama musuia, filemu, ma meaalofo faaleagaga. Pe a tatou faamamaluina le perisitua paia, o le a faamamaluina foi i tatou e le Atua, ma o le a tatou “tutu ma le le pona i [Ona] luma i le aso gataaga.”¹⁵

Tau ina ia tatou maua pea ni mata e vaai ai ma ni loto e lagona ai le ofo-fogia ma le olioli o le perisitua a lo tatou Atua silisili ese, o lau tatalo lea, i le suafa o Iesu Keriso, amene. ■

FAAMATALAGA

1. Wilbur Wright, i le James Tobin, *To Conquer the Air: The Wright Brothers and the Great Race for Flight* (2003), 238.
2. Wright brothers, i le Tobin, *To Conquer the Air*, 397.
3. John Gillespie Magee Jr., “High Flight,” i le Diane Ravitch, ed., *The American Reader: Words That Moved a Nation* (1990), 486.
4. Mose 1:39.
5. *Aoaoga a Peresitene o le Ekalesia: Iosefa Samita* (2007), 108–9.
6. Tagai Mataupu Faavae ma Feagaiga 121:36.
7. Tagai Eperu 5:4–10; Mataupu Faavae ma Feagaiga 107:3.
8. Mataupu Faavae ma Feagaiga 12:8.
9. Mataupu Faavae ma Feagaiga 121:41.
10. Tagai Isaia 55:1.
11. Mataupu Faavae ma Feagaiga 115:5.
12. Mataupu Faavae ma Feagaiga 84:88.
13. Tagai Mataupu Faavae ma Feagaiga 84:33–44; 121:34–46.
14. Tagai Iakopo 2:22.
15. Mataupu Faavae ma Feagaiga 4:2.



Saunia e Peresitene Henry B. Eyring

Fesoasoani Muamua i le Au Peresitene Sili

Fesoasoani ia i Latou e Faatutu ni Sini Maua-luluga

Faatasi ai ma lau taitaiga, o le a mafai ai e i latou o loo e taitaia ona vaai, mananao, ma talitonu e mafai ona latou ausia o latou gafatia atoatoa mo le auaunaga i le malo o le Atua.

O u te matua faafetai mo lenei avanoa e faatasi mai ai i lenei sauniga perisitua maoae, i le faalogo atu i aoaoga ma molimau matagofie. Ua ou toe manatua ai lau foi aafiaga. Toeitiiti lava o mea uma sa mafai ona ou faataunuaina i le avea ai ma se e umia le perisitua, ona o i latou sa iloina au ma na latou vaaia ni mea ia te au sa le mafai ona ou iloina.

A o avea au ma se tama talavou, sa ou tatalo ia iloa po o a ni saofaga a la'u fanau e ono faia i le malo o le Alii. Mo tama, sa ou iloa o le a mafai ona latou maua ni avanoa faaleperisitua. Mo teine, sa ou iloa o le a latou tuuina atu ni auaunaga e fai ai ma sui o le Alii. O le a latou galulue uma i Lana galuega. Sa ou iloa e taitoatasi i latou, ma o lea o le a tuu atu ai e le Alii ia i latou ni meaalofo patino mo i latou taitoatasi e faaoga i Lana galuega.

Ia, e le mafai ona ou tau atu i tamā uma ma taitai uma o le autalavou ni auiliiliga o ni mea aupito sili mo oe e fai. Ae e mafai ona ou folafola atu ia te

oe o le a e faamanuiaina i latou i lou fesoasoani lea ia latou iloina meaalofo faaleagaga ia na fananau mai ma i latou. E eseese tagata uma ma e ese foi sona sao e fai. E leai se tasi o faamoemoe ia toilalo. A o e sailia faaaliga e iloa ai meaalofo ia e silafia e le Atua ia i latou o loo e taitaia i le perisitua—aeimase lava le autalavou—o le a faamanuiaina oe e siitia la latou vaai i auaunaga e mafai ona latou faatinoina. Faatasi ai ma lau taitaiga, o le a mafai ai e i latou o loo e taitaia ona vaai, mananao, ma talitonu e mafai ona latou ausia o latou gafatia atoatoa mo le auaunaga i le malo o le Atua.

I la'u lava fanau, sa ou tatalo ai mo faaaliga ia iloa pe mafai faapefea ona ou fesoasoani ia i latou taitoatasi ia saunia mo ni avanoa patino e auauna atu ai i le Atua. Ona ou taumafai lea e fesoasoani ia i latou ia vaai faalema-faufau, faamoemoe, ma galulue mo lenei lumanai. Sa ou vaneina ni upusii mai tusitusiga paia i ni laupapa mo o'u atalii taitasi lea sa faamatalaina ai ana



meaalofa faapitoa ma se ata sa fai ma faatusa o lea meaalofa. I lalo o le ata ma upu sa vane ai, na ou vane ai ia aso o le papatisoga ma faauuga i tofi o le perisitua o tama taitasi, faatasi ai ma lona maualuga sa faailoga i le aso na tutupu ai mea taitasi ia.

O le a ou faamatalaina ia laupapa na ou vaneina mo atalii taitasi e fesoasoani ai ia i latou ia iloa ana meaalofa faaleagaga ma mea e mafai ona ia saofagā ai i le galuega a le Alii. E mafai foi ona musuia ai oe ia iloa, e pei ona ou faia, ni meaalofa faapitoa ma ni avanoa tulaga ese mo talavou taitoatasi e te alofa i ai ma taitaia.

Ina ua avea lo'u atalii pito matua ma se tiakono ma se Eagle Scout, sa oo mai se ata o se aeto i lo'u mafaufau a o ou mafaufau ia te ia ma lona lumanai. Sa matou nonofo i Idaho e latalata i le auvae mauga o le mauga o Teton i Saute, lea sa ma savavali faatasi ai ma matamata a o felelei ia aeto. O lona ata i lo'u mafaufau sa ou maua ai se lagona o upu a Isaia:

“Na te avatua le malosi i e ua vaivai; a o e ua leai se malosi, na te faatuputele i ai le malosi.

“E vaivai ma tigaina tama matutua, o taulealea foi, e pau lava i latou:

“A o ē faatalitali ia Ieova, e toe faafouina lo latou malosi, latou te sii ae apaau e pei o aeto, latou te femoei, a e le vaivai, latou te savavali, a e le tigaina.”¹

O le mea moni, faatasi ai ma lona atalii ulumatua, sa taofi le ma savaliga i lalo mai o le tumutumu o le Mauga o Teton i Saute ona sa vaivai lo'u atalii. Sa ia manao e taofi [le savaliga]. Sa ia

fai mai, “Pe o le a ou faanoanoa ea i taimi uma ona ta te lei oo i le tumutumu? Tama alu oe—Ou te le manao e te le fiafia.”

Sa ou tali atu, “O le a ou le lagonaina lava se le fiafia, ma o le a e le faanoanoa lava. O le a ta manatuaina i taimi uma sa ta aea faatasi lenei mauga.” I le pito i luga o lana laupapa o le maualuga, sa ou vaneina ai se aeto ma se faamatalaga “I Luga o Apaau o Aeto.”

I le aluga o tausaga, sa maualuga atu le lelei o lo'u atalii o se faifeautalai nai lo le mea sa ou mafaufauina i ou faamoemoega faamemelo. I luitau o le galuega faamisiona, o nisi mea sa la fetiaiai na foliga mai sa sili atu ma lona malosi. Mo le tama o loo e uunaia, atonu, e pei foi ona oo i ai lo'u atalii, na siitia maualuga e le Alii i le talaiina o le talalelei i se gagana faigata nai lo le mea na ou mafaufau i ai e faigofie. Afai o le a e taumafai faatasi ma soo se alii talavou ia lagonaina ni mea faaleperisitua na te mafaia, ou te folafola atu ia te oe o le a tau mai e le Alii ia te oe le tele o mea e manaomia ona e iloina. Atonu e i ai i le tama le gafatia e sili atu ma mea o le a faaali atu e le Alii ia te oe. Fesoasoani ia te ia e faatutu ni sini maualuluga.

O le tama o loo e faamalosiaina atonu e foliga mai e fai si popolevale e avea ma se auauna mamana faaleperisitua. O se isi toatasi o o'u atalii e matamuli tele ma e le mafai ona savali atu i totonu o se faleoloa ma talanoa i se faatauoloa. Na fefe tele o ia. Sa ou popole a o ou tatalo mo lona lumanai faaleperisitua. Sa ou mafaufau ia te ia

i le galuega talai—sa foliga mai e lei i ai se faamoemoe. Sa taitai atu au i se mau i le Faataoto: “E sosola e amioleaga, a o leai sē tuliloa: a o e amiotonu e pei o le leona taanoa, i latou ona lē mata'u.”²

Sa ou vaneina le “Toa e pei o se Leona” i luga o lana laupapa, i lalo o se ata o se ulu lapoa o se leona o loo tagi mai. I lana misiona ma tausaga na sosoo ai, na ia faataunuu ai le faamoemoega sa i ai [i le laupapa] sa ou vaneina. Sa talai atu e lo'u atalii sa matamuli muamua le talalelei i se talitonuga sili ma sa faafetaiaia mea matautia i le lototoa. Sa faamalositia o ia i ona tiutetauave e fai ma sui o le Alii.

E mafai foi ona tupu lona mea i le alii talavou o loo e taitaia. E manaomia ona e fausia lona faatuatua lea e mafai ai e le Alii ona liua o ia i se auauna lototoa tele atu nai lo se tama matamuli o loo e vaai i ai i le taimi nei.

Matou te iloa e faalototoaina e le Alii ia Ana auauna. O le taulealea o Iosefa na vaai i le Atua le Tama ma Lona Alo, o Iesu Keriso, i se togavao sa liua i se alii na matua malosi faaleagaga. Sa vaaia e Parley P. Pratt lona mea ina ua aoai e le Perofeta o Iosefa Samita ia leoleo leaga [o le falepuipui] ia na taofia i latou. Sa tusia e Elder Pratt e faapea:

“Na faafuasei ona ia tu ae i luga, ma tautala atu i se leo o faititili, sa pei foi o se tagi a se leona, ma fai atu, i le latalata i le mafai ona ou manatuaina, o upu nei:

“*FILEMU, outou tagata amioleaga o seoli. I le suafa o Iesu Keriso ou te aoiaina ai outou, ma poloaiina outou ia fifele; Ou te le toe ola i se isi minute ma faalogo atu i lona ituaiga gagana. Tuu loa na ituaiga o talanoaga, a leai, o outou po o au e oti i le TAIMI NEI LAVA!*”

I lona aafiaga, sa tusia ai e Elder Pratt, “O le malualii ma le mamalu sa na ona faatasi ona ou vaaia, a o ia tu atu i filifili i le vaeluapo, i se falepuipui i se nuu e le mailoa o Misuri.”³

O le a tuu atu e le Alii i Ana auauna amiotonu ni avanoa e lotototoa ai e pei o ni leona, pe a latou tautatala atu i Lona suafa ma o ni molimau i Lana perisitua.



O le isi atalii, a o tamaitiiti foi, sa toatele lava ni ana uo o e sa tele ina mananao latou te faatasitasi. E faigofie lava ona ia faauo atu i tagata. A o ou tatalo ma taumafai e muai iloina sona sao i le malo o le Atua, sa ou lagonaina o le a ia maua le mana e aumai faatasi ai tagata i le alofa ma le lotogatasi.

O lena mea sa taitai atu ai au i le Mataupu Faavae ma Feagaiga lea o loo faamatala mai ai ni taumafaiga a toeaia o le perisitua e fausia ia Siona i Misuri i viiga a agelu na vaaia o latou taumafaiga ma sao. Sa manaomia e lena mea se osigataulaga tele. O loo faapea mai le faaaliga i le Mataupu Faavae ma Feagaiga: “E ui i lea, ua faamanuiaina outou, ona o le molimau na outou tuu atu ua tusi faamaumau i le lagi mo agelu e vaai i ai; ma ua latou olioli i luga ia te outou, ma ua faamagaloina a outou agasala mai ia te outou.”⁴

I luga o le laupapa o le maua luga o lo’u atalii, sa ou vaneina ai le “Ua Olioli Agelu ia te Oe.”

O le tomai sili a le atalii lenei e faapotopoto ma uunaia tagata sa faaaau pea ina ua uma lana aoga. Faatasi ai ma e na umia le perisitua sa latou galulue faatasi, sa ia faatulagaina ai ni gaoioiga faalesiteki na maua ai e le autalavou i lana eria le faatuatua e tumau ai ma na oo lava ina manumalo ai i tulaga faigata. A o ia fausia le faatuatua i nei alii ma tamaitai talavou, na ia fesoasoani e fausia ni vaega laiti o tagata faatuatua o Siona i nofoaga

tutotonu o taulaga o Amerika. I le laupapa vane, sa i ai ni agelu o loo iliina ni pu, atonu e le o le auala tonu lea latou te faia ai, ae sa faigofie atu le vaneina o se pu nai lo se alaga.

E olioli ia agelu a o fausia e taitai perisitua i le salafa o le lalolagi ia Siona i a latou uarota, siteki, ma misiona. Ma o le a latou olioli i alii ma tamaitai talavou o loo outou fesoasoani e fausia Siona i soo se mea o latou i ai ma i soo se tulaga atonu latou te i ai. O Siona o se taunuuga o tagata ua fusia faatasi i feagaiga ma le alofa. Ou te valaaulia outou e fesoasoani i a outou autalavou ina ia auai.

Mo se tasi o ou atalii, sa uunaia au e vane se la—i se faatusatusa, o le la o le vanimonimo—ma ni upu mai le Tatalo o le Olega a le Faaola: “O Le Ola e Faavavau Foi Lenei.” Ina ua latalata i le faaiuga o Lana galuega i le olaga faaletino, sa tatalo ai le Faaola i Lona Tama:

“O le ola e faavavau foi lenei, ia latou iloa oe le Atua moni e toatasi, atoa ma le ua e auina mai, o Iesu Keriso lea.

“Ua ou tuu atu le viiga ia te oe i le lalolagi: ua ou faaumaina le galuega na e tuuina mai ia te au, ou te faia.”⁵

Ua tuuina atu e lo’u atalii ni auau-naga faaleperisitua i le salafa o kone-tineta e tolu ae o le mea e aupito sili ona taua, sa tuuina atu i lona aiga ma tagata o lona auaga. Ua ia fausia lona olaga faataamilo ia i latou. E faigaluega latalata i lona fale, ma e tele lava ona ia foi atu e faatasi ma lona toalua

ma lana fanau laiti i le taimi o le ‘aiga o le aoauli. E nonofo latalata tele lona aiga ia i maua ma Sister Eyring. Latou te faamamaina lo ma fanua e pei o so latou lava fanua. O loo ola lenei atalii e le gata ia agavaa mo le ola e faavavau ae ia ola foi ia siosiomia e faavavau e tagata o lona aiga lotofaafetai o loo ia faapotopotoina e siomia o ia.

O le ola e faavavau o le ola lea i le lotogatasi, i aiga, faatasi ma le Tama, le Alo, ma le Agaga Paia. Ua na o le pau le ala tatou te maua ai le ola e faavavau e auala mai lea i ki o le perisitua a le Atua, ia na toefuatai mai e ala mai i le Perofeta o Iosefa Samita. O le uunaia o le autalavou o loo e taitaia ia avea le ola e faavavau ma a latou sini e faavavau o se meaalofo sili lea e te tuu atu ia i latou. O le a e faia muamua lava e ala i faataitaiga i totonu o lou lava aiga. Atonu e i ai nisi o i latou o loo e taitaia e le auai o latou aiga i le Ekalesia, ae ou te luita oe ia fesoasoani ia i latou ia lagonaina ma manao i le alofa o le aiga i itu uma e lua o le veli.

O laupapa o maua luga ua ou faama-talaina ua na o se ala e tasi e fesoasoani ai i le autalavou ia maua se vaaiga o le mamalu lea e silafia e le Atua ia i latou atoa ai ma o latou lumanai ma auau-naga tupito ua Ia sauniaina i latou e tuu atu. O le a Ia fesoasoani atu ia te oe ia iloa le auala e fai ai mo lau fanau po o isi talavou o loo e taitaia. Ae a o e saili atu ma le agaga tatalo ia maua se vaaiga o lenei lumanai mo oe lava ia ma fesoatai ai i se tagata talavou taitoatasi, o le a e iloina e alofa le Atua i Ana fanau taitoatasi ma silafia le maoae ma le tupito o meaalofo o i totonu o i latou taitoatasi.

I le avea ai ma se tamā, sa faamanuiaina au e vaai i lumanai maoae i le malo o le Atua mo ou afafine e faapei foi o ou atalii. Ina ua ou saili atu ma le agaga tatalo i le taitaiga, sa faaali mai ia te au se ala e fesoasoani ai i ou afafine ia iloa le faatuatua ua tuu atu e le Atua ia i latou o ni auau-naga e mafai ona fausiaina Lona malo.

A o talavou ou afafine, sa ou vaaia e mafai ona matou fesoasoani i isi ia lagonaina le alofa o i latou o i le isi pito o le veli, i augatupulaga. Sa ou iloina o lena alofa e sau mai i



Au Pulega Aoao O Le Ekalesia a Iesu Keriso o le Au Paia o Aso e Gata Ai

Oketopa 2012

O LE AU PERESITENE SILI



Henry B. Eyring
Fesosoani Muamua



Thomas S. Monson
Peresitene



Dieter F. Uchtdorf
Fesosoani Lua

O LE KORAMA A APOSETOLO E TOASEFULULUA



Boyd K. Packer



L. Tom Perry



Russell M. Nelson



Dallin H. Oaks



M. Russell Ballard



Richard G. Scott



Robert D. Hales



Jeffrey R. Holland



David A. Bednar



Quentin L. Cook



D. Todd Christofferson



Neil L. Andersen

O LE AU PERESITENE O FITUGAFULU



Ronald A. Rasband



Walter F. González



L. Whitney Clayton



Donald L. Hallstrom



Tad R. Callister



Richard J. Maynes



Craig C. Christensen

O LE KORAMA MUAMUA A FITUGAFULU

(i le faasologa faadlatapeta)



Marcos A. Adakunlis



Jose L. Alonso



Carlos H. Amado



Ian S. Andern



Mervyn B. Arnold



David S. Boster



Shayne M. Bowen



Craig A. Cardon



Yoon Hwan Choi



Don R. Clarke



Carl B. Cook



Lawrence E. Cadrbridge



Claudio R. M. Costa



Leonard R. Curtis Jr.



Benjamin De Hoyos



John B. Dickson



Kevin R. Duncan



Larry Echo Hawk



Stanley G. Ellis



David F. Evans



Enrique R. Foubella



Eduardo Gavaret



Robert C. Gay



Carlos A. Godoy



Christoffel Golden Jr.



Gernt W. Gong



C. Scott Grow



James J. Hamula



Daniel L. Johnson



Paul V. Johnson



Patrick Keanon



Paul E. Koelliker



Erich W. Kopischke



Marcus B. Nash



Brent H. Nielson



Allen F. Packer



Kevin W. Pearson



Anthony D. Perkins



Paul B. Pieper



Rafael E. Pino



Bruce D. Porter



Dale G. Renlund



Michael T. Ringwood



Lynn G. Robbins



Joseph W. Sitrati



Steven E. Snow



Ulisses Soares



Michael John U. Teh



José A. Teixeira



Juan A. Uceda



Francisco J. Vinas



W. Christopher Waddell



William R. Walker



F. Michael Watson



Scott D. Whiting



Kazuhiko Yamashita



Jorge F. Zaballos



Claudio D. Zivic



W. Craig Zwirk

O LE KORAMA LUA A FITUGAFULU

(i le faasologa faadlatapeta)



Wilfrid W. Andersen



Koichi Aoyagi



Randall K. Bennett



Bruce A. Carlson



J. Devin Cornish



Bradley D. Foster



O. Vincent Hadeck



Larry R. Lawrence



Per G. Mohm



James B. Martino



Jaro Mazzagardi



Kent F. Richards



Gregory A. Schwitzer



Kent D. Watson



Larry Y. Wilson

O LE AU EPIKOPO PULEFAAMALUMALU



Gerald Caussé

Fesasoani Muamua



Gary E. Stevenson

Epikopo Pulefaamalumalu



Dean M. Davies

Fesasoani Lua



Faafetai i le mea sa ta'ua e Peresitene Thomas S. Monson o "faasalalauga sa lei i ai muamua," lea ua sapi ai le Au Paia o Aso e Gata Ai i le lalolagi atoa i faamanuiaga o le konafesi aoao. Ata mai le tauagavale i le pito i luga, o le au paia ma faifeautalai i Quelimane, Mozambique; Tallinn, Esitonia; Warsaw, Polani; Aai o Mekisiko, Mekisiko; Edinburgh, Sikotiani; Taipei, Taiuani; ma Gaborone, Botswana.



auaunaga ma e uunaia le faamoemoe o le ola e faavavau.

O lea na matou vaneina ai ni laupapa falaoa ia sa matou tuu ai i luga se papa falaoa e fai i le fale ma o atu faatasi e ave e fai ma a matou taulaga i tina ua maliliu tane, o tamā ua maliliu ava, ma aiga. O le upu sa vaneina i luga o na laupapa falaoa taitasi e faitauina e faapea, “J’aime et J’espere,” O le FaaFarani mo le “Ou te Alofa ma Ou te Faamoemoe.” O le faamaoniga o a latou meaalofo tupito faaleagaga sa le na o luga o laupapa sa ou vaneina na faaali mai ai ae sa manino atili mai a o matou tufatufa atu na falaoa ia i latou sa manaomiaina, i le lotolotoi o tiga ma le faanoanoa, sa mafai ai e le faamautinoaga o le alofa o le Faaola ma Lana Togiola ona maua ai se susulu atoatoa o le faamoemoe. O le ola e faavavau lea [o auaunaga] mo ou afafine, ma mo i matou taitoatasi.

Ia, atonu tou te mafaufau, “Uso Eyring, o lona uiga o lau saunoaga e manaomia ona ou aoao ia iloa vane mamamu?” O le tali e leai. Sa ou aoao e vane mamamu ona o le fesoasoani a se faiaoga agalelei ma talenia, i le taimi lena o-Elder Boyd K. Packer. O le ā sina tomai ua ou mauaina e mafai ona faamamaluina ai lana meaalofo sili o se tagata vane mamamu atoa ai ma lona onosai o se faiaoga. Ua na o le lagi e mafai ona saunia se faiaoga faapea e pei o Peresitene Packer. Ae e tele auala e mafai ona e mamamuina ai le loto o le fanau e aunoa ma le tau vaneina o ni laupapa po o ni laupapa o le maua luga mo i latou.

Mo se faataitaga, o fesoootaiga faatekinolosi fou ua mafai ai ona fefaasoaa savali o le faatuatua ma le faamoemoe i maila o loo tatou eseese ai, i se taimi vave ma i sina tau ititi pe leai foi. E fesoasoani lo’u toalua ia te au e fai lea mea. Ma te amata i le talanoa i telefoni i fanau a fanau po o fanau e mafai ona ma fesoootaia. Ma te fai atu i ai e faasoa mai ni tala o ni mea patino na latou ausiaina ma ni latou auaunaga na tuuina atu. Ma te valaaulia foi i latou e auina mai ni ata o na gaoioiga. Ma te faaagaina na ata e faamatala ai ni nai parakalafa o tusiga. Ma te faaopoopo i ai se

fuaiupu se tasi pe lua mai le Tusi a Mamona. Masalo o le a fai si le fiafia o Nifae ma Mamona i le tulaga lelei faaleagaga o le ma tusi po o taumafaiga faatapulaa ia e manaomia e fatu ai le mea ua matou ta’ua “O Le Api Talaaga a le Aiga: O Papatusi Laiti.” Ae ua faamanuiaina i maua ma Sister Eyring i lea taumafaiga. Ma na lagonaina le musuia i le filifilia o fuaitau o mau ma savali pupuu o molimau ma te tusia. Ma ua ma vaaia le faamaoniga i o latou olaga i le faaliliu mai o o latou loto ia i maua atoa ai ma le Faaola ma agai atu ai i luga.

O loo i ai foi isi auala e aapa atu ai, o loo outou punouai ai i le tele o na auala. O a outou mausa o tatalo faaleaiga ma le faitauina o tusitusiga paia o le a fatu ai ni mea se tele e manatua ina e faavavau ma ni suiga tele atu o le loto nai lo mea e mafai ona e iloina i le taimi nei. E oo lava i ni gaoioiga faaletino, e pei o le auai i se taaloga afeleti po o le matamata i se tifaga, e mafai lava ona mamamu ai le loto o se tamaitiiti. O le mea taua e le o le gaoioiga ae o lagona e oo mai a o outou faia. Ua ou mauaina se suega lelei mo le faailoaina o gaoioiga faatasi ai ma le gafatia e faia ai se eseese tele i le olaga o se tagata talavou. E faapea latou te fautuaina le gaoioiga mai se mea e fiafia i ai lea latou te lagonaina e oo atu ia i latou o se meaalofo mai le Atua. Mai lo’u lava aafiaga ua ou iloa ai e mafai lena mea.

Ina ua ou tiakono i le 12 o ou tausaga, sa ou nofo ai i New Jersey, e 50 maila (80 km) mai le Aai o Niu Ioka. Sa ou moemiti e avea ma se tagata taalopisipolo maoae. Sa malie lo’u tama e ave au e matamata i se taaloga sa faia i le Malae Taalo tuai ma le logologoa a le Yankee i le Bronx. O loo mafai pea ona ou vaaia le sasau o le pate ina ua ta e Joe DiMaggio se ta mamao na lelea atu i totonu o le falematamata ogatonu o le malae sa nofo ai lo’u tama i ou talaane, na o le pau lea o le taimi na ma o faatasi ai i se liki pisipolo pito i luga [a le Iunaite Setete].

Ae o se isi aso faatasi ma lou tama na mamamu ai lou olaga e faavavau. Sa ia ave au mai New Jersey i le fale o se peteriaka faauuina i le Aai o Sate Leki.

Ou te lei vaai muamua lava i lea alii. Sa tuu au e lou tama i le faitotoa. Sa taitai atu au e le peteriaka i se nofoa, tuu ona lima i luga o lou ulu, ma folafola mai se faamanuiaga o se meaalofo mai le Atua lea sa aofia ai se tautinoga o le manao aupito sili o lou loto.

Sa ia fai mai o au o se tasi o i latou ia sa fai mai ai, “Amuia e faatupuina le filemu.”⁶ Sa ou tei ona o loo mafai ona iloa e se tagata ese lou loto lea na pupula ai ou mata e vaai i le potu i le mea sa tupu ai se vavega. O lena faamanuiaga o mea e mafai ona ou faia na mamamuina lo’u olaga, la’u faaipoipoga, ma la’u auaunaga faaleperisitua.

Mai lena aafiaga atoa ai ma mea na mulimuli mai ai, e mafai ona ou molimau atu ai, “Aua ua le tuuina atu i tagata uma meaalofo uma; ona e tele meaalofo, ma e tuu atu e le Agaga o le Atua i tagata taitoatasi se meaalofo.”⁷

Sa faaali mai ia te au e le Alii se meaalofo, ua mafai ai ona ou iloina ma saunia mo ni avanoa e faaoga ai e faamanuia ai i latou ou te alofa ma auauna i ai.

Ua silafia e le Atua a tatou meaalofo. O lau lui ia te outou faapena foi ma au, o le tatalo lea ia iloa meaalofo ua tuuina mai ia i tatou, ia iloa le auala e atiae ai, ma ia iloa ia avanoa e auauna atu ai i isi ua tuuina mai e le Atua ia i tatou. Ae o le mea sili o mea uma, ou te tatalo ina ia musuia outou e fesoasoani i isi ia mauaina a latou meaalofo faapitoa mai le Atua e auauna atu ai.

Ou te folafola atu afai tou te ole atu, o le a faamanuiaina outou e fesoasoani ma siitia isi i o latou gafatia atoatoa i a latou auaunaga ia i latou o loo latou taitaia ma alolofa i ai. Ou te molimau atu ia te outou o loo soifua le Atua, o Iesu o le Keriso, o le perisitua lenei a le Atua, lea ua tatou umiaina, ma ua saunia e le Atua mo i tatou ni meaalofo faapitoa e auauna atu ai ia te Ia i tua atu o o tatou faamoemoega. I le suafa o Iesu Keriso, amene. ■

FAAMATALAGA

1. Isaia 40:29–31.
2. Faataoto 28:1.
3. *Autobiography of Parley P. Pratt*, ed. Parley P. Pratt Jr. (1938), 211.
4. Mataupu Faavae ma Feagaiga 62:3.
5. Ioane 17:3–4.
6. Mataio 5:9.
7. Mataupu Faavae ma Feagaiga 46:11.



Saunia e Peresitene Thomas S. Monson

Vaai Atu i Isi i Tagata e Mafai ona Avea ai i Latou

E tatau ona tatou atiina ae le malosiaga e vaai atu ai i alii, e le o tagata o loo latou i ai i le taimi nei ae o tagata e mafai ona avea ai i latou.

O uso e, e faalua i tausaga taitasi ona faatumulia atoatoa lenei Maota Autu ofoofogia mo Konafesi i le au perisitua a le Atua pe a tatou potopoto e faalogologo i savali o musumusuga. O loo i ai se agaga ofoofogia lea e faatumulia ai le sauniga aoao a le au perisitua o le Ekalesia. O lenei agaga e sau mai le Maota Autu mo Konafesi ma ulu atu ai i maota uma o loo potopoto ai atalii o le Atua. Ua tatou lagonaina moni lena agaga i le po nei.

I ni nai tausaga ua mavae, a o lei fausiaina lenei Maota Autu matagofie mo Konafesi, sa auai ai se tagata na asiasi atu i le Lotoa o le Malumalu i le Aai o Sate Lek i se sauniga o le konafesi aoao i le Tapeneko. Sa ia faafofoga i savali a le Usoga. Sa ia faalogo ma le totoia i tatalo. Sa ia faalogo i musika matagofie a le Aufaipese a le Tapeneko. Sa maofa o ia i le mamalu o le okeni ofoofogia a le Tapeneko. Ina ua maea le sauniga sa lagona atu e se tasi o ia o faapea mai, “Ou te tuu

atua mea uma ou te maua pe a ou iloa ina e moni mea na tautalagia e na failauga i le asō.” O le uiga o lana saunoaga, “Maimau pe ana i ai sa’u molimau o le talalelei.”

E matuai leai lava se mea i lenei lalolagi o le a aumaia se mafanafana ma se fiafiaga sili atu nai lo se molimau o le upumoni. E ui lava i le eseese o malolosi o molimau, ae ou te talitonu o loo i ai i alii uma po o alii talavou uma o loo i ai iinei i le po nei se molimau. Afai e te lagona e te lei mauaina lava se molimau malos i loo e manao i ai, ou te apoapoai atu ia te oe ia e galue ina ia e maua lena molimau. Afai e malos ma mauaa, galue ia faatumauina i lena ala. Ua matuai faamanuiaina lava i tatou i le i ai o se malamalama o le upumoni.

O la’u savali i le po nei, uso e, e faapea, e matua anoanoai tagata e itiiti pe leai foi se molimau i le taimi nei, peitai, o loo latou naunau ina ia maua lena molimau pe afai tatou te naunau e faia se taumafaiga e faasoa

atu a tatou lava molimau ma fesoasoani ia i latou ia suia. I nisi tulaga e mafai ona tatou tuuina atu se uuniga mo se suiga. O le a ou talanoa muamua atu ia i latou o tagata o le ekalesia ae e le o tuuto atoatoa i le talalelei i le taimi nei.

I le tele o tausaga ua mavae, i se konafesi faale-eria i Helsinki, Finelani, sa ou faalogo ai i se savali mamana, musuia ma e manatua pea sa tuuina mai i se sauniga a tina ma afafine. E le o galo lava ia te au lena savali, e ui ua toeitiiti atoa le 40 tausaga ua tea talu ona ou faalogo i ai. Faatasi ai ma le tele o upumoni sa talanoa i ai le failauga, sa ia faapea mai e manaomia e se tamaitai ona ta’u atu ia te ia e lalelei o ia. E manaomia ona ta’u atu ia te ia e faatauaina o ia. E manaomia ona ta’u atu ia te ia e le faatauvaa o ia.

Uso e, ou te iloa o alii e faapena foi e pei o tamaitai i lenei tulaga. E manaomia ona ta’u mai ia i tatou e i ai so tatou taua, tatou te mafaia se mea ma e le faatauvaa i tatou. E manaomia ona tuu mai ia i tatou se avanoa e auauna atu ai. Mo na tagata o le ekalesia ua le o toe toaaga pe ua faatuutuu ma ua leai se naunautauga, e mafai ona tatou saili atu ma le agaga tatalo i nisi o auala e aapa atu ai ia i latou. O le talosagaina o i latou e auauna atu i ni nai mea e gafatiaina atonu o le a avea ma pogai latou te manaomia e toe malolosi mai ai ma toaaga. Ae o na taitai o e mafai ona fesoasoani atu i lenei tulaga, o nisi taimi e le fia mananao ai e faia lea mea. E manaomia ona tatou manatua pea o tagata e mafai ona sui. E mafai ona latou lafoai ni mausa leaga. E mafai ona latou salamo mai solitulafono. E mafai ona latou umia ma le agavaa le perisitua. Ma e mafai ona latou auauna atu ma le filiga i le Alii. Sei ou tuuina atu ni nai faataitaiga.

Ina ua faatoa avea lava au ma uso o le Korama a Aposetolo e Toasefululua, sa ou maua le avanoa e faatasi ai ma Peresitene N. Eldon Tanner, o se fesoasoani ia Peresitene Tavita O. MaKei, i se konafesi faalesiteki i Alberta, Kanata. I le taimi o le sauniga, sa faitau atu ai e le peresitene o le siteki ia igoa o uso e toafa ua agavaa



mo le faauuina o ni toeaina. O alii nei sa silafia e Peresitene Tanner, aua sa nofo ai o ia i se tasi taimi i lena eria. Ae sa silafia ma manatua e Peresitene Tanner i latou i o latou olaga sa i ai muamua ma na te leiloina ua suia o latou olaga ma ua agavaa atoatoa e avea ma ni toeaina.

Sa faalau e le peresitene o le siteki le igoa o le alii muamua ma fai atu ia te ia e tulai mai. Sa musumusu mai Peresitene Tanner ia te au, “Vaai atu ia te ia. Ou te lei mafaufauina o le a faauu o ia.” Sa faalau e le peresitene o le siteki le igoa o le alii lona lua, ma ia tulai ae. Sa toe eu lemu au e Peresitene Tanner ma faailoa mai lona maofa. Ma sa faapena ai lava i uso uma e toafa.

Ina ua maea le sauniga, sa ma maua ma Peresitene Tanner le avanoa e faamalo ai i nei uso e toafa. Sa latou faaali mai e mafai ona suia tagata.

I le vaitau o le 1940 ma le 1950, sa lauiloa ai se leoleo o se falepuipui i Amerika, o Clinton Duffy, mo ana taumafaiga ia toe faaleleia alii i totonu

o lana falepuipui. Sa fai mai se tasi o faitioga, “E te leiloa o nameri e le mafai ona suia o latou tulaga?”

Sa tali atu Leoleo Duffy, “E tatau ona e iloa ou te le o galue ma ni nameri. O loo ou galue i tagata, ma e suia tagata i aso uma.”¹

I le tele o tausaga talu ai sa ou maua ai se avanoa e galue ai o se peresitene o le Misiona a Kanata. O iina sa i ai se matou paranesi e toalaiti lava le au perisitua. Sa i ai lava se faifeautalai e pulefaamalumu i le paranesi. Sa ou maua se uunaiga malosi e manaomia ona i ai se tagata o le au paia e pulefaamalumu i le paranesi iina.

Sa i ai se tagata matua i le paranesi o se tiakono i le Perisitua Arona ae sa le auai pe lei lava foi lona auai ina ia siitia ai le perisitua. Sa musuia au e valaau o ia e avea ma peresitene o le paranesi. Ou te manatua pea le aso sa faia ai le ma faatalanoaga ma ia. Sa ou tau atu ia te ia ua musuia au e le Alii e valaau o ia e avea ma peresitene o le paranesi. Ina ua maea le tele o

lona faatautee, ma le tele o le faamalo-siauga a lona faletua, sa ia faailoa mai ai loa o le a ia galue. Sa ou faauuina o ia o se ositaulaga.

O le amataga fou lena mo lea alii. Sa vave lava ona faatulagaina lona olaga, ma sa ia faamautinoa mai ia te au o le a ia ola i poloaiga e pei ona faamoemoeina o ia e ola ai. I ni nai masina mulimuli ane sa faauuina o ia o se toeaina. Mulimuli ane sa malaga o ia ma lona faletua ma le aiga i le malumu ma faamauiina ai. Sa faamisiona le la fanau ma faaipoipo i le maota o le Alii.

O nisi taimi o le faailoa atu i o tatou uso o loo manaomiaina ma faataua-ina i latou e mafai ona fesoasoani ia i latou e laa atu ai i le tuuto ma le toaaga atoa. E mafai ona moni lena mea i e umiaina le perisitua e tusa lava po o le a le matua. O lo tatou tiutetauave lea ia tuu atu ia i latou ni avanoa e ola ai e pei ona tatau ai. E mafai ona tatou fesoasoani ia i latou ia faatoilalo o latou vaivaiga. E tatau ona tatou atiina ae le malosiaga e vaai atu ai i alii, e le

o tagata o loo latou i ai i le taimi nei ae o tagata e mafai ona avea ai i latou pe a latou mauaina ni molimau o le talalelei a Keriso.

Sa i ai se taimi sa ou auai ai i se fonotaga i Leadville, Colorado. O Leadville e taatia i le maualuga e silia ma le 10,000 futu (3,000 m). Ou te manatua lena fonotaga patino ona o le maualuga tele o le nofoaga, ae ou te manatua foi le mea sa tupu ai i lena afiafi. Sa na o sina vaega toalaite o le au perisitua sa i ai. Sa pei foi o le paranesi i le Misiona a Kanata, sa pulefaamalumalu ai foi se faifeautalai ma o le tulaga lava lena sa i ai.

O lena po sa matagofie le matou fonotaga, ae a o matou usuina le pese faaii, na oo mai le musumusuga e ao ona i ai se peresitene o le paranesi i le lotoifale e pulefaamalumalu. Sa ou faliu atu i le peresitene o le misiona ma fesili atu, “Pe le o i ai se tasi iinei e mafai ona pulefaamalumalu—se alii i le lotoifale?”

Sa ia tali mai, “Ou te le iloa se tasi.”

I le taimi a o usuina lena pese, sa ou tilotilo ma le totoa i alii sa nonofo i laina e tolu muamua. Sa foliga mai na taulai atu lo’u gauai i se tasi o uso. Sa ou fai atu i le peresitene o le misiona, “Faamata e mafai ona avea o ia ma peresitene o le paranesi?”

Sa ia tali mai, “Ou te le iloa. Masalo e mafai.”

Sa ou fai atu, “Peresitene, o le a ou ave o ia i totonu o le isi potu ma faatalanoa o ia. Ia e saunoa atu pe a uma le pese faaii seia ma toe foi mai.”

Ina ua ma toe savavali atu i le potu, sa faaii e le peresitene o le misiona lana molimau. Sa ou tuu atu le igoa o le uso e avea ma peresitene fou o le paranesi. Talu mai lena lava aso, ua i ai lava se tagata i le lotoifale i Leadville, Colorado, e taitaia le iunite iina.

O le mataupu faavae lava lea e tasi, uso e, e faaoga foi ia i latou e lei avea ma ni tagata o le ekalesia. E tataua ona tatou atiina ae le malosiaga e vaai atu ai i alii, e le o tagata o loo i ai ae o tagata o le a mafai ona avea ai i latou pe a avea i latou ma tagata o le Ekalesia, pe a i ai sa latou molimau o le talalelei, ma pe a ogatusa o latou olaga ma ona aoaoga.

I le tausaga e 1961 sa faia ai se konafesi i le lalolagi atoa mo peresitene o misiona, ma sa aumai uma ai peresitene o misiona o le Ekalesia i le Aai o Sate Lekia mo na fonotaga. Sa ou sau i le Aai o Sate Lekia mai lau misiona i Toronto i Kanata.


I se tasi o fonotaga patino, na faatoa foi mai ai N. Eldon Tanner, o le sa avea ma Fesoasoani i le Korama a le Toasefululua, mai lona uluai aafiaga a o pulefaamalumalu i le misiona i Peretania Tele ma Europa i sisifo. Sa ia faamatalaina se faifeautalai o le sa avea ma se faifeautalai sa matua sili ona faamanuiaina i faifeautalai uma lea sa la feiloai i faatalanoaga sa ia faatautaia. Sa ia fai mai a o ia faatalanoaina lena faifeautalai, na ia fai atu ia te ia, “Ou te manatu o tagata uma sa e papatisoina na o mai i le Ekalesia o ni tagata sa faafesootai mai.”

Sa tali mai le alii talavou, “Leai, sa matou maua i latou uma e ala i le talai tu’itu’i.”

Sa fesili atu Uso Tanner ia te ia po o le a se mea sa ese ai e uiga i lana auala—aisea na matua tulaga ese ai le

manuia ae sa le faapena isi. Sa fai mai le alii talavou sa ia taumafai e papatiso tagata uma sa ia feiloai i ai. Sa ia fai mai afai na te tuitui atu i le faitotoa ma vaaia se alii o ulaula se sikā ma ofu i ni lavalava tuai ma foliga mai e le naunau i soo se mea—aemaise lava i mea tau lotu—o le a vaai faalemafaufau le faifeautalai i le tulaga o le a foliga i ai lea alii i nisi tulaga o le a ese mai ai. I lona mafaufau na te vaai ai ia te ia ua sele mama lana soesa ma o loo ofuina se ofutino paepae ma se ofuvae paepae. Ma sa mafai ona vaaia e le faifeautalai ia lava o taitai atu lena alii i le vai o le papatisoga. Sa ia fai mai, “Pe a ou vaai atu i se tasi i lena ala, ou te maua le malosi e tuu atu ai lau molimau ia te ia i se ala e mafai ai ona pai atu i lona loto.”

Ua ia i tatou le tiutetauave e vaai atu ai i a tatou uo, a tatou paaga, o tatou tuaoi i lenei ala. Ou te toe fai atu, ua ia i tatou le tiutetauave e vaai atu ai i tagata, e le o le tagata o loo latou i ai ae o tagata e mafai ona avea ai i latou. Ou te augani atu ia te outou ia mafaufau ia i latou i lenei ala.



Uso e, sa tau mai e le Alii ia i tatou se mea e uiga i le taua o lenei perisitua o loo tatou umia. Sa Ia tau mai ia i tatou e faapea tatou te mauaina faatasi ma se tautoga ma se feagaiga. Sa Ia tuu mai ia i tatou se faatonuga lea e tatau ona tatou faamaoni ma tumau ai i mea uma tatou te maua, ma ua ia i tatou le tiutetauave e tausua ai lenei feagaiga e oo lava i le iuga. Ona foai mai ai lea e le Tama o mea uma o ia te Ia ia i tatou.²

O le *lototele* o le upu lea e tatau ona tatou faalogo i ai ma taofimau i o tatou loto—le *lototele* tatou te fultua ai i faaososoga, le *lototele* e sii ai o tatou leo e molimau atu ai i tagata uma tatou te feiloai, i le manatuaina e tatau ona maua e tagata uma se avanoa e faalogo ai i le savali. E le o se mea faigofie lea mo le toatele e fai. Ae e mafai ona tatou talitonu i upu a Paulo ia Timoteo:

“Aua ua le foaiina mai e le Atua ia te i tatou le Agaga e mata’u ai, a o le Agaga e faamalosi ai, ma alofa ai, ma mafaufau tonu ai.

“O lenei, aua e te mā i le molimau i lo tatou Alii.”³

Ia Me o le 1974 sa ma i ai ma Uso John H. Groberg i Atumotu o Toga. Sa i ai so ma taimi faatulagaina e asiasi ai i le tupu o Toga, ma sa matou feiloai ma ia i se sauniga aloaia. Sa matou feiloai i tulaga faaalalo masani. Peitai, ae ma te lei tuumuli, sa tau atu e John Groberg se mea sa lei masani ai. Sa ia fai atu, “Lau Afioga, e tatau ona avea moni lava oe ma se Mamona atoa ai ma au auauna, aua o le a matua foia ai ou faafitauli ma o latou faafitauli.”

Sa matua ata fialia le tupu ma tali mai, “John Groberg, masalo e sao oe.”

Sa ou mafaufau i le Aposetolo o Paulo i luma o Akeripa. Sa ou mafaufau i le tali a Akeripa i le molimau a Paulo: “O se mea itiiti ona e faaliliuina lea o au e fai ma Kerisiano.”⁴ Sa i ai ia Uso Groberg le *lototele* e tuu atu ai lana molimau i se tupu.

O le po nei e faitafe i tatou o loo auauna atu i le taimi atoa i le Alii o ni Ana faifeautalai. I se tali i se valaauga, ua latou tuua ai o latou aiga, auaiga, ua aoga ae o atu e auauna. E

fesiligia e i latou e lē malamalama le fesili: “Aisea latou te tali atu ai ma le naunautai ma loto e foai atu le tele o mea?”

E mafai ona tali atu a tatou faifeautalai i upu a Paulo, lena faifeautalai silisili o anamua: “Aua afai ou te folafola le tala lelei, e le se mea lea ou te mitamita ai, aua ua leai sa’u faitalia i lea mea; oi talofa foi ia te au, pe a ou le folafolaina le tala lelei!”⁵

O loo i ai i tusitusiga paia le folafolaga aupito sili ona fitoitonu, le tiutetauave aupito sili ona noatia, le poloaiga aupito sili ona tuusao ua tuuina mai e ala mai i le Alii toetuina ua faaali atu o Ia i Kalilaia i soo e toasefulutasi. Sa Ia fetalai mai:

“Ua tuuina mai ia te au le pule uma lava i le lagi ma le lalolagi.

“O lenei, ia outou o atu e fai nuu uma lava ma soo, ma papatiso atu ia te i latou i le suafa o le Tama, ma le Atalii, ma le Agaga Paia:

“Ia outou aoao atu ia te i latou ia tauti i mea uma ua ou fai atu ai ia te outou; faauta foi, ou te ia te outou i aso uma lava, e oo lava i le gataaga o le lalolagi.”⁶

O le poloaiga paia, ua o mai faatasi ma lana folafolaga mamalu, o la tatou anavatau lea o le asō, e pei lava foi ona i ai i le taulotoaiga o taimi. O le galuega faafaifeautalai o se vaega autu o Le Ekalesia a Iesu Keriso o le Au Paia o Aso e Gata Ai. Sa i ai lava, ma o le a i ai pea. E pei ona tautino mai e le Perofeta o Iosefa Samita: “I mea uma ua talanoaina, o le tiute aupito silisili ma taua o le talai atu lea o le Talalelei.”⁷

I totonu o le lua tausaga puupuu, o faifeautalai faamisiona uma o loo auauna i le taimi nei i lenei autau mamalu a le Atua o le a faamaeaina a latou galuega faamamaluina ma o le a toe foi atu i o latou aiga ma ē pele. O e e suitulaga ia i latou o loo maua i le po nei i e o loo umiaina le Perisitua Arona o le Ekalesia. Alii talavou, ua outou sauni ea e tali mai? Ua outou naunau ea e galulue? Ua outou saunia ea e auauna atu?

Sa aoteleina e Peresitene Teila ia agavaa: “O ituaiga o alii tatou te manao i ai e avea ma ē e tauaveina lenei

savali o le talalelei o ni alii e faatuatua i le Atua; ni alii e faatuatua i la latou tapuaiga; ni alii e faamamaluina o latou perisitua; . . . ni alii e faatumulia i le Agaga Paia ma le mana o le Atua[;] . . . ni alii o le mamalu, amiosao, amio-mama ma le paia.”⁸

Uso e, ua poloaiina i tatou taitoatasi e faasoa atu le talalelei a Keriso. Pe a ogatasi o tatou olaga ma tulaga faatonuina a le Atua lava Ia, o i latou o loo tatou uunaiaina o le a le gagana lava i nei upu faavauvau: “Ua mavae ona po o le seleselegasaito, ua uma le tausaga vevela, a e le faaolaina i tatou.”⁹

O le Leoleo Mamoe atoatoa o agaga, le faifeautalai na togiolaina tagata, na Ia tuu mai ia i tatou Lana faamautinoaga:

“Ma afai e faapea lua te galulue i o oulua aso uma i le alagaina o le salamo i lenei nuu, ma aumai, na o se agaga e toatasi ia te au, e matua tele lava lo oulua olioli faatasi ma ia i le malo o lo’u Tama!

“Ma o lenei, afai o le a tele lo oulua olioli faatasi ma se agaga e toatasi na oulua aumai ia te au i le malo o lo’u Tama, e matua tele atu lo oulua olioli pe afai lua te aumai ni agaga e toatele ia te au!”¹⁰

Ona o Ia o le na fetalai nei upu, ou te tautino atu ai la’u molimau patino. O Ia o le Alo o le Atua, lo tatou Togiola, ma lo tatou Faaola.

Ou te tatalo ina ia tatou maua le *lototele* e faaloaloa atu ai le lima faaaumea, le naunautaga e taumafai ma saga taumafai ai pea, atoa ai ma le lotomaulalo o loo manaomia e saili ai le taitaiga mai lo tatou Tama a o tatou faataunuuna lo tatou tiutetauave e faasoa atu le talalelei. Ua i o tatou luga le tiutetauave, uso e. I le suafa o Iesu Keriso, amene. ■

FAAMATALAGA

1. I le Bill Sands, *The Seventh Step* (1967), 9.
2. Tagai Mataupu Faavae ma Feagaiga 84:33–39.
3. 2 Timoteo 1:7–8.
4. Galuega 26:28.
5. 1 Korinito 9:16.
6. Mataio 28:18–20.
7. *Aoaoga a Peresitene o le Ekalesia: Iosefa Samita* (2007), 330.
8. *Aoaoga a Peresitene o le Ekalesia: Ioane Teila* (2001), 73.
9. Ieremia 8:20.
10. Mataupu Faavae ma Feagaiga 18:15–16.



Saunia e Peresitene Henry B. Eyring
Fesoasoani Muamua i le Au Peresitene Sili

O Fea le Faapaologa?

O le faapaologa lea e foliga mai e punitia ai le fesoasoani faalelagi e le ufitia ai le Atua ae e i ai taimi e ufitia ai i tatou.

I le loloto o lona ita i le Falepuipui i Liperate, sa alaga atu ai le Perofeta o Iosefa Samita: “Le Atua e, o fea o i ai oe? Ma o fea o i ai le faapaologa ua ufi ai lou afioaga lafi?”¹ E toatele i tatou, i taimi o le ita o le tagata lava ia, e manatu ua taumamā le Atua mai ia i tatou. O le faapaologa lea e foliga mai e punitia ai le fesoasoani faalelagi e le ufitia ai le Atua ae e i ai taimi e ufitia ai i tatou. E le mafai lava ona ufitia le Atua, ae o nisi taimi e ufitia ai i tatou, e ufi i se faapaologa o faanaunauga lea e toso ese ai i tatou mai le Atua ma fai ai e pei e mamā ma le mafai ona [tatou] au atu ia te Ia. O o tatou lava manao, ae le o se lagona o le “Ia faia lou finagalo,”² e afua ai le lagona e faapea ua punitia ai le Atua i se faapaologa. E le faapea e le mafai e le Atua ona silasila mai ia i tatou pe talanoa mai ia i tatou, peitai atonu tatou te le mananao e faalogi pe usitai atu i Lona finagalo ma [Lana] taimi.

O le a faaititia o tatou lagona o le vavaeese mai le Atua pe a tatou avea atili e faapei o ni tamaiti i Ona luma. E le faigofie lena mea i se lalolagi e mafai ona aafia o tatou faamoemoega i manatu o isi tagata. Peitai o le a fesoasoani ia i tatou e iloa ai le upu-moni: E latalata mai le Atua ia i tatou

ma silafia i tatou ma e le lafi lava mai Lana fanau.

Sa faaali mai e le tama teine e tolu tausaga a la’u tama le mana o le mama o le mafaufau ma le lotomauualalo ina ia tatou fesootai atu ai i le Atua. Sa latou o ma lona aiga i le fale tatala o le Malumalu o Brigham City i Iuta. I se tasi o potu o le malumalu, sa tilotilo solo ai o ia ona fesili lea, “Tina, a o fea Iesu?” Sa faamalamalama atu e lona tina na te le vaaia Iesu i le malumalu, ae o le a mafai ona ia lagonaina Lona musuia i totonu o lona loto. Sa mafaufau ma le toto’a Elisa i le tali a lona tina, ma oo ina sa foliga mai ua faamalieina. O lana faaiuga, “Ua alu Iesu e fesoasoani” i se tagata.

Sa leai se faapaologa na punitia ai le malamalamaaga o Elisa pe faalavelaveina ai lana vaaiga i le mea moni. E latalata atu le Atua ia te ia, ma na te lagonaina lona latalata atu ia te Ia. Sa ia iloina o le malumalu o le maota o le Alii ae sa malamalama foi o le Iesu Keriso toetu ma faamamaluina e i ai [Lona] tino ma e na o le tasi lava le nofoaga i le taimi e mafai ona i ai.³ Afai sa le i ai o Ia i lona maota, sa ia iloina atonu o loo i ai o Ia i se isi nofoaga. Mai mea ua ia iloa e uiga i le Faaola, sa ia iloina o le a i ai o Ia

i se mea e fai ni galuega lelei mo le fanau a Lona Tama. Sa manino sa faamoemoe o ia e vaaia ia Iesu ae le o se vavega e faamautu ai Lona i ai ae ona sa alofa o ia ia te Ia.

E mafai e le Agaga ona faaali atu i lona mafaufau ma lona loto faapei o se tamaitiiti le faamafanafanaga tatou te manaomia ma moomia uma. O loo soifua Iesu Keriso, [Na te] silafia i tatou, puipui i tatou, ma tasi i tatou. I taimi o le tiga, tuuatoatasi, po o le le mautonu, e le faapea seiloga tatou te vaaia ia Iesu Keriso ona tatou iloa lea o loo Ia silafiaina o tatou tulaga ma o Lana misiona o le faamanuia mai.

Ua ou iloa mai lo’u lava olaga o le aafiaga o Elisa e mafai foi ona avea ma ni o tatou lava aafiaga, e tusa lava pe ua leva ona tuua le tulaga faata-maitiiti. I uluai tausaga o la’u matata faapitoa, sa ou galue malosi ai ia maua se tofiga aloaia i se tulaga faapolo-fesa i le Iunivesite o Stanford. Sa ou manatu ua lelei le olaga mo a’u lava ma lo’u aiga. Sa matou nonofo latalata i matua o lo’u toaluia i se siosiomaga manaia lava. I tulaga faalelagi, sa ou ausia se tulaga manuia tele. Ae sa tuuina mai ia te au le avanoa e tuua ai Kalefonia ae alu i le Kolisi o Ricks i Rexburg, Idaho. O faamoemoega o lo’u olaga faalegaluega atonu na avea ma faapaologa na punitia ai a’u mai se Tama agalelei o le sa sili atu lona silafia nai lo a’u i le mea e mafai ona ausia i lo’u lumanai. Peitai sa faamanuiaina a’u i le iloa e faapea, po o le a lava le faamanuiaina sa ou maua i la’u matata ma le olaga faaleaiga i lena taimi, sa o se meaalofo mai le Atua. Ma o lea, e pei o se tamaitiiti, sa ou tootuli ai i le tatalo e fesili atu po o le a le mea e tatau ona ou faia. Sa mafai ona ou faalogoina se leo itiiti i lo’u mafaufau sa fai mai, “O la’u aoga.” Sa leai se faapaologa sa punitia ai a’u mai le Atua. I le faatuatua ma le lotomauualalo, sa gauai atu ai lo’u loto i Lona finagalo, ma sa ou lagonaina Lona manatu alofa ma Lona latalata mai.

O o’u tausaga i le Kolisi o Rick, i le taimi lea sa ou taumafai ai e saili le finagalo o le Atua ma fai, taofia le faapaologa mai le ufitia o a’u pe punitia le tiute maoae o le Atua i lo’u



olaga. A o ou saili e fai Lana galuega, sa ou lagona le latalata atu ia te Ia ma lagona le faamautinoaga sa Ia silafia-ina a'u gaoioiga ma manatu tele mai mo lo'u fiafia. Ae e pei ona sa i ai i Stanford, sa amata foi ona o'o mai mea faaosofia faalelaloagi. O le tasi o se avanoa faigaluega lelei lava, sa folasia mai a o faamaeaina lo'u tausaga lona lima o le avea ai ma peresitene o le Kolisi o Ricks. Sa ou mafaufau i ai ma tatalo ma faapea foi ona ou talanoa atu ai i le Au Peresitene Sili. Sa latou tali mai ma le alofa ma sina uiga malie laitiiti ae mautinoa lava sa le faia i le faatonuga malosi. Sa faafofoga mai Peresitene Spencer W. Kimball a o ou faamatalaina le ofo sa ou maua-ina mai se faalapopotoga tele ona saunoa mai lea, "Ia, Hal, e foliga mai o se avanoa matagofie lena! Ma afai e i ai se taimi matou te manaomia ai oe, ua matou iloa le mea e maua i ai oe." Latou te iloa le mea e maua i ai a'u, ae peitai o lo'u manao mo le faamanu-iaina faalegaluega e ono fatuina ai se faapaologa lea o le a faafaigata ai ia te a'u ona maua le Atua ma faigata ai ia te a'u ona faalogo atu ma mulimuli i Ana valaaulia.

O lo'u toalua, i lona masalomia o lenei mea, sa i ai sona lagona malosi e le tataua ona matou o ese mai le Kolisi o Rick. Ae sa ia viga ma le poto, ina

ia ou saili mo la'u lava faaaliga. O lea na ou toe tatalo ai. O le taimi lenei sa ou maua ai le faatonuga, i se leo i lo'u mafaufau sa faapea mai, "O le a ou faataga oe e nofo i le Kolisi o Ricks mo se isi taimi laitiiti." Atonu o a'u sini faaletagata na ono punitia ai la'u vaai o le mea moni, ma faigata ai ia te a'u ona maua faaaliga.

E tolusefulu aso mulimuli ane talu ona faamanuiaina a'u i le filifiliga musuia e teena le galuega na ofo mai ma ou nofo ai i le Kolisi o Ricks, ae pa loa le Afulilo i Teton. Sa silafia e le Atua o le a pa lena afulilo ma o le a manaomia e le faitau selau o tagata le fesoasoani. Sa ia faatagaina a'u e saili fautuaga ma maua Lana faatagaga e nofo ai i le Kolisi o Ricks. Sa Ia silafia pogai uma e ono aoga ai pea la'u auaunaga i le kolisi ma i Rexburg. Sa ou i ai la iina ia ole soo atu i le Tama Faalelagi i le tatalo po o le a le mea e finagalo o Ia ou te faia mo i latou na faaleagaina pe faatamaiaina o latou fale ma pisinisi. Sa ou faaaluina itula faigaluega ma isi tagata e faamama ai le palapala ma vai mai fale. O lo'u manao ia iloa ma faia Lona finagalo sa ou maua ai se avanoa e faalatele ai le agaga.

O lena mea na tupu ua faaaliga ai se isi auala e mafai ona tatou fatuina ai se papupuni i le iloina o le finagalo

o le Atua po o le lagonaina o Lona alofa mo i tatou: e le mafai ona tatou tatau i la *tatou* taimi faatulagaina ae o loo i ai lava le taimi faatulagaina a le Alii lava Ia. Sa ou manatu sa lava se taimi sa ou faaaluina i au auaunaga i Rexburg ma sa ou faananati e agai pea. O nisi taimi o lo tatou tatau pea e galulue e tusa ma a tatou lava taimi faatulagaina e mafai ona le manino ai Lona finagalo mo i tatou.

I le Falepuipui i Liperate, sa talo-saga atu ai le Perofeta o Iosefa i le Alii e faasala i latou sa faasaua i le au paia a le Ekalesia i Misuri. O lana tatalo sa mo tauimasui mautinoa ma ia vave. Peitai sa tali mai le Alii e faapea "e le tele ni tausaga mai le taimi nei,"⁴ O le a feagai o Ia ma na fili o le Ekalesia. I le fuaiupu e 24 o le vaega e 121, ua fetalai mai o Ia:

"Faauta, ua vaai o'u mata ma iloa a latou galuega uma, ma ua Ou faaaga-gaina se faamasinoga vave i lona tau, mo i latou uma;

"Aua ua i ai se taimi atofaina mo tagata taitoatsi, e tusa ma ana galuega."⁵

Tatou te aveesea le faapaologa pe a tatou manatu ma tatalo, "Ia faia Lou finagalo" ma "i Lau Lava taimi." O Lana taimi o le a vave mo i tatou, aua ua tatou iloa na pau lava le mea e finagalo i ai o Ia, o le mea e sili lea ona lelei.

O se tasi o o'u afafine faaletula-fono sa faaaluina ni tausaga se tele e manatu ai sa tuu e le Atua se faapa-ologa i ona luga. Sa avea o ia ma se tina talavou o se fanau e toatolu o lē foi sa moomoo ia maua ni isi ana fanau. Ina ua mavae ni ma'itaga se lua na fafano [tulou], sa faasolo ina avea ana tatalo faatauana ma ni tatalo ita. A o mavae atu ni tausaga e tele o le toe fanau, sa ia lagonaina le faaoso-osoina ina ia ita. Ina ua alu lana uii i le aoga, sa le maua ai e ia ni lagona toafimalie i lona taulai atu i lona tulaga faatina—ma na faapena foi i ma'itaga sa le'i fuafuaina e oo lava foi i maitaga sa le manaomiaina a ana uo. Sa ia lagonaina le tuuto ma le faapaiaina e pei o Maria, lea sa tautino atu, "Faauta o a'u nei o le auauna a le Alii."⁶ Ae e ui sa ia tautala i nei upu i lona loto, ae na

te le'i lagonaina se tali mai.

O le faamoemoe ai ia faafiafia o ia, sa valaaulia ai o ia e lona toalua la te o faatasi i se malaga faalegaluega i Kalefonia. A o auai o ia i fonotaga, sa savalivali o ia i luga o matafaga matagofie, tuufua. Sa toetoe a pa lona loto, sa ia tatalo leo tele ai. Mo le taimi muamua, sa le ole atu ai o ia mo se isi tamaitiiti ae mo se feau paia. "Le Tama Faalelagi," sa ia tagi ai, "o le a ou tuuina atu ia te oe lo'u taimi atoa; faamolemole faasino mai pe faapefea ona faatumuina." Sa ia faailoa atu lona naunau e ave lona aiga i soo se mea e ono manaomia ona o atu i ai. O lona tatalo sa oo mai ai se lagona faafuasei o le toafilemu. Sa mautinoa lava sa le'i faamalieleina ai le moomoo o lona mafaufau, ae mo le taimi muamua i le tele o tausaga, sa faatoafilemuina ai lona loto.

O le tatalo sa aveesea ai le faapaologa ma tatalaina ai faamalama o le lagi. I totonu o le lua vaiaso ae iloa ane ai ua toe ma'i o ia. Sa na o le tasi le tausaga o le pepe fou ae taunuu mai se valaauga o le misiona i lo'u atalii ma lo'u afafine faaletulafono. O le folafola atu o le a faia soo se mea ma o atu i soo se mea, o lea sa ia faataatia ese ai le mata'u ma ave loa lana fanau i se atunuu mamao. I totonu o le galuega faamisiona sa toe maua ai se isi ana tamaitiiti—i se aso o le siitaga a faifeautalai.

O le gauai atoa atu i le finagalo o le lagi, e pei ona sa faia e lenei tina talavou, e taua lea i le aveeseina o faapaologa faaleagaga lea o nisi taimi tatou te tuuina ai i luga a'e o o tatou ulu. Peitai e le faapea e mautinoa ai le tali vave mai o a tatou tatalo.

E foliga mai sa sa'o le loto o Aperaamo a'o le'i taitai lava afuafua Sarai ia Isaako ma ae latou te le'i mauaina foi lo latou nuu o le folafolaga. E i ai isi faamoemoega a le lagi e tatou ona faatinoina muamua. O na faamoemoega e aofia ai e le gata i le fausiaina o le faatuatua o Aperaamo ma Sarai, ae faapena foi i le aoaoina o i latou i upumoni faavavau lea sa laua faasoaina atu i isi i la latou malaga umi ma faataamilomilo e agai atu i le laueleele na saunia mo i latou. O le faatuai a le

Alii e foliga mai e umi tele; o nisi o le olaga atoa le umi. Ae o taimi uma lava ua fuafuaina e faamanuia ai. O faatuai e le tatou ona avea ma ni taimi o le tuuatoatasi po o le faavavau po o le le onosai.

E ui o Lana taimi e le o taimi uma e tutusa ai ma o tatou taimi, e mafai ona tatou mautinoa e tausi lava e le Alii ia Ana folafolaga. Mo soo se tasi o outou o loo lagonaina nei e faapea e faigata ona maua o Ia, ou te moli-mau atu o le a oo mai le aso, o le a tatou vaai uma faafesagai ia te Ia. E pei lava ona leai se mea i le taimi nei e punitia ai Lona silafia mai o i tatou, o le a leai foi se mea e faanenefu ai la tatou vaai ia te Ia. O le a tatou tutu i Ona luma, i le tino. E pei o le tama teine a lo'u afafine, tatou te mananao e vaai ia Iesu Keriso i le taimi nei, ae o le faatasiga mautinoa ma Ia i le pa faamasino o le a sili atu le manaia pe a tatou faia muamua mea ia masani lelei ai o Ia ia i tatou, e pei foi o i tatou ia te Ia. A o tatou auuina atu ia te Ia, e avea i tatou e pei o Ia, ma tatou te lagona le latalata atili atu ia te Ia a o tatou latalata atu i le aso lea o le a leai se mea e natia ai la tatou vaaiga.

O lenei agai atu i le Atua e mafai ona faifai pea. "O mai ia, o outou ua faamanuiaina e lo'u Tama, ia fai mo outou tofi le malo ua saunia mo outou a o lei faavaeina le lalolagi,"⁷ ua aoao mai ai le Faaola. Ona Ia ta'u mai lea o le ala e fai ai:

"Aua na ou fia 'ai, ona outou avane ai lea ni mea ou te 'ai ai: na ou fia inu ona outou avane ai lea ni vai ou te inu

ai: sa fai a'u ma tagata ese, ona outou talia lea o a'u:

"Na ou le lavalava, ona outou faaofuina lea o a'u, na ou ma'i ona outou asiasia mai lea o a'u; na ou i le falepuipui ona outou o ane ai lea ia te a'u.

"Ona tali mai ai lea ia te ia o e amiotonu, e faapea mai, Le Alii e, o anafea ua matou iloa ai oe ua fia 'ai ma matou fagaina oe? po o fia inu, ma matou avane e te inu ai?

"O anafea foi na matou iloa ai oe o le tagata ese, ma matou talia oe? po o le le lavalava, ma matou faaofuina oe?

"O ana fea foi na matou iloa ai oe ua ma'i, po o i le fale puipui ma matou o atu ai ia te oe?

"Ona tali atu ai lea o le Tupu, e faapea atu ia te i latou, E moni, ou te fai atu ia te outou, aua na faia e outou i le tasi o e aupito itiiti o o'u uso nei, o a'u lea na outou faia i ai."⁸

A tatou faia mea e finagalo o Ia tatou te faia mo fanau a Lona Tama, o le a manatu i ai le Alii o lo tatou agalelei atu lea ia te Ia, ma o le a tatou lagona ai le latalata atili ia te Ia a o tatou lagonaina Lona alofa ma Lana faamaoniga. E oo mai le taimi o le a avea ai i tatou e faapei o Ia ma o le a tatou mafaufau ai i le Aso Faamasino ma se faamoemoe fialia.

O le faapaologa lea e foliga mai o loo punitia ai oe mai le Atua atonu o le fefe i tagata, nai lo lenei manao e auuina atu ai i isi. O le uunaiga e tasi a le Faaola o le fesoasoani lea i tagata. O le toatele o outou, e pei ona oo ia te a'u, sa lagonaina le fefe i le fetau ma se tagata sa e faatiga i ai po o se



tagata sa faatiga ia te oe. Ae peitai, ua ou vaai i le faamaluluina e le Alii o loto i lea taimi ma lea taimi, e aofia ai ma lo'u lava loto. O lea la ou te luita outou ia fai ma sui o le Alii i se tasi, e ui lava i soo se mea e te ono matau ai, e faailoa atu le alofa ma le faamagalo atu. Ou te folafola atu ao e faia lena mea, o le a e lagona le alofa o le Faaola mo lena tagata e oo mai ia te oe ma Lona alofa ia te oe, ma o le a le pei e sau mai se mea mamao. Mo oe, o lena luita atonu o totonu o se aiga, atonu o totonu o se afioaga, ia atonu foi o se atunuu atoa.

Ae afai e te alu atu i le Alii ina ia faamanuia isi, o le a Ia silasila i ai ma tau ai. Afai e te fai sooa lenei mea i taimi uma ma mo se taimi umi, o le a lagona se suiga i lou lava natura, e ala i le Togiola a Iesu Keriso. E le gata o le a e latalata atili atu ai ia te Ia, o le a faateleina ai lou lagona o le avea o oe e faapei o Ia. Ma, a e vaaia o Ia, e pei ona o le a tatou vaai uma i ai, o le a tupu ia te oe e pei ona tupu ia Moronae, ina ua ia fai mai: "Ma o lenei ou te fai atu ia te outou uma, tofa ia. Ua lata ona ou alu atu e malolo i le parataiso o le Atua, seia toe faatasia lo'u agaga ma lo'u tino, ma aumai au i le ea ma le manumalo, e feiloai ma outou i luma o le pa faamasino logomalie a le Ieova silisili, le Faamasino Faavavau o e o ola ma e ua oti. Amene."⁹

Afai tatou te auauna atu ma le faatuatua, lotomaulalalo, ma se manao e fai le finagalo o le Atua, ou te moli-mau atu o le a logomalie le pa faamasino a le Ieova silisili. O le a tatou vaai i lo tatou Tama agalelei ma Lona Alo a o Laua silasila mai ia i tatou i le taimi nei—ma le manino atoatoa ma le alofa atoatoa. I le suafa paia o Iesu Keriso, amene. ■

FAAMATALAGA

1. Mataupu Faavae ma Feagaiga 121:1.
2. Tagai Mataio 6:10; Luka 11:2; 3 Nifae 13:10; Eteru 12:29; Mataupu Faavae ma Feagaiga 109:44; Mose 4:2.
3. Tagai Mataupu Faavae ma Feagaiga 130:22.
4. Mataupu Faavae ma Feagaiga 121:15.
5. Mataupu Faavae ma Feagaiga 121:24–25.
6. Luka 1:38.
7. Mataio 25:34.
8. Mataio 25:35–40.
9. Moronae 10:34.



Saunia e Peresitene Boyd K. Packer

Peresitene o le Korama a Aposetolo e Toasefululua

O Le Togiola

Po o fea lava le mea e ono o i ai o tatou tagata ma faifeautalai, e tasi lava le tatou savali o le faatuatua ma le faamoemoe i le Faaola o Iesu Keriso.

O la'u savali e tuusao atu i nisi o i tatou o e o mafatia, ua lofituina i le ta'usalaina ma vaivaiga ma le toilalo, faavauvau, ma faanoanoaga.

I le 1971, sa tofia ai au i ni konafesi faalesiteki i Samoa i Sisifo, e aofia ai le faatulagaina o se siteki fou i le motu o Upolu. Ina ua maea ni faatalanoaga sa matou togipau ai se vaalele laitiiti e malaga ai i Savaii e fai ai se konafesi a se siteki iina. Sa tu laueleele le vaalele i se malae vaoa i Faala ma sa tataua ona toe foi mai i le aoauli na sosoo ai e toe ave i matou i le motu o Upolu.

O le aso na faamoemoe matou te tuua ai Savaii, sa timuga ai. I le iloina ai e le mafai ona tu laueleele le vaalele i luga o se malae susu, o lea sa matou o atu ai i le taavale i le faatausiugi i sisifo o le motu lea sa i ai sina ituaiga o malaevaalele i luga ae o se auvai amu. Sa matou faatalitali seia oo ina pogisa, ae leai se vaalele na taunuu atu. Muli-muli ane, sa matou iloa mai le leitio o loo sau se afā, ma e le o mafai ona lele le vaalele. Sa matou ualesi mai o le a matou o mai i se vaa. E ao ona i ai se tasi e faatalia i matou i Mulifanua.

A o matou o ese mai le uafu i Savaii, sa fesili atu le kapeteni o le vaa e 40 futu (12 m) i le peresitene o le misiona pe i ai sana moliuila. O le

mea e lelei ai, sa i ai ma na ia tuu atu ai i le kapeteni. Sa matou asaina le 13 maila (21 km) e agai atu i le motu o Upolu i le sou o le sami. E leai ma se tasi o i matou na iloina ua taia e le afā matamataita le motu, ma o loo matou agai tonu atu lava i le mea o loo agi mai ai.

Ina ia taunuu ai i le uafu i Mulifanua, sa i ai se alavaa vaiti se tasi sa ao ona matou ui ai i talaane o le ā'au. O se malamalama i luga o le mauga i luga ae o le matafaga ma se malamalama lona lua i lalo ifo sa faailoga ai le alavaa vaiti lea. Pe a uli se vaa ina ia mafai ai ona vaaia malamalama ia e lua o loo tu le tasi i luga ae o le isi, o le a gatusa lelei ai le vaa ma malamalama ai ina ia pasi ese ai ma papa matautia o loo i ai i le alavaa.

Ae o lena po sa na o le tasi le malamalama. E toalua toeaia sa i ai i luga o le uafu sa faatali maia i matou, ae sa umi tele atu le asaina o le sami nai lo le mea e masani ai. Ina ua maea ona vaavaai atu i le tele o itula mo ni faailoilo o le matou vaa, sa le lavava toeaia ma momoe loa, ma galo ai ona ki mai le moli lona lua, le malamalama lea e i lalo ifo. O se taunuuga, sa le iloa atu le alavaa e oso atu i le ā'au.

Sa uli e le kapeteni le vaa i le mea sili na te mafaia e agai atu i le



malamalama pito i luga o le matafaga a o uu e se alii o le vaa le moliuila sa nono atu mai le pito i luma o le vaa e tau saili po o i ai ni papa i luma atu. Sa mafai ona matou faalogoina ia galu o fesasaa'i i le ā'au. Ina ua matou latalata atu e autilo i ai i le moliuila, sa alaga mai le kapeteni ma le popole e toe liliu ma foi i tua ma toe taumafai e sue le alavaa.

I le maea ai o le tele o taumafaiga, sa ia iloaia ai o le a faigata ona maua le alavaa lea. Na pau le mea sa matou taumafai e fai o le oo atu lea i le uafu e 40 maila (64 km) mai Apia. Sa leai se fesoasoani na matou maua e tete ai i mana matamataita o le afa. Ou te le manatua le mea sa matou i ai ona sa matua pogisa lava.

Sa leai se mea na mafaia i le itula muamua, e ui lava sa matua saoasaoa le afi o le vaa. Sa tauivi le vaa ma se galu tele ona tu lea i le tumutumu o le galu ma toe pa'u ifo ai i lalo a o taa-vivili peapea i luga o le ea. O le gatete o peapea sa toetiiti lava a malepe ai le vaa pe a luluina a o lei se'e atu i le isi pito o le galu.

Sa matou taooto faō i luga o ufiufi o ana e teu ai uta, ma pipii atu o matou lima i le tasi pito faapea ai ma o matou tamatamai vae ua lokaina i le isi pito e taofiofi ai matou mai le lafoina i le sami. Sa le mau le uu a Uso Mark Littleford ma āto atu ai ma fetoi

ma se pa uamea. Sa lavea lona ulu, ae sa taofia o ia e le pa uamea mai le lafoina i le sami.

Mulimuli ane, sa matou agai pea i luma ma a o tatafa mai ata o le taeao na iu lava ina matou sao atu i le uafu i Apia. Sa tau fai nonoa le tasi vaa i le isi mo le saogalemu. Sa polokaina uma e nei vaa le uafu. Sa matou fetolofi mai ma pasia i latou, ma taumafai ina ia le faalavelave i e o momoe i luga o le uafu. Sa matou o atu i Pesega, faamamago o matou lavalava, ma agai atu loa i Vailuutai e faatulaga le siteki fou.

Ou te le iloa po o ai na faatalia i matou i Mulifanua. Sa ou musu latou te tauina mai ia te au. Ae e moni lava ana le seanoa ma lena malamalama pito i lalo, semanu matou te feoti uma.

O loo i ai i la tatou tusipese se viiga tuai lava e seasea usuina lea o loo i ai se uiga faapitoa ia te au.

*O le sulu o le alofa
O lo tatou nei tama,
Ua susulu mai le lagi
Mai maota i luga.
Faamumu pea nei le sulu;
Mo le uso vaivai.
Pe a i ai sē a le a'e
E te faasaoina mai.*

*Ua pogisa mea uma;
O le ola i lalo nei.*

*Ua faatali mo le sulu,
E iloa ai mea lelei.*

*Uso e ia saunia pea;
Lo oe sulu mo le po,
E iloa ai le taulaga,
E sao ai ma malolo.¹*

Ou te lauga atu i le asō ia i latou atonu o loo leiloloa ma o loo saili mo lena malamalama pito i lalo e fesoasoani ai e taiala i latou e toe foi mai.

Sa malamalama lava mai le amata e faapea i le olaga faaletino o le a tatou le ausia lava le atoatoa. Sa lei faamoemoeina lava o le a tatou ola e aunoa ma le solia o le tasi tulafono po o le isi.

"Ona o le tagata natura o se fili i le Atua, ma sa faapea lava mai le pau o Atamu, ma o le a faapea lava, e faavavau faavavau lava, vagana ai ua gauai atu o ia i uunaiga a le Agaga Paia, ma tuu ese le tagata natura ma avea ma tagata paia e ala i le togiola a Keriso le Alii."²

Mai le Penina Tau Tele, ua tatou malamalama ai "e leai se mea le mama e mafai ona mau [i le malo o le Atua],"³ ma o lea sa saunia ai se ala mo tagata uma e agasala e salamo ai ma toe agavaa ai mo le afioaga a lo tatou Tama i le Lagi.

Sa filifilia se Puluvaga, se Togiola, o se tasi o le a soifua atoatoa i Lona

olaga, e lei faia se agasala, ma ofo atu “e ia o ia lava o se taulaga mo agasala, e tali ai iuga o le tulafono, mo i latou uma o e ua i ai le loto momomo ma le agaga salamo; ma ua leai ni isi e ese mai ai e mafai ona tali ai iuga o le tulafono.”⁴

E faatatau i le taua o le Togiola, i le Alema ua tatou aoao ai, “Aua e tataua ona faia o se togiola; . . . a leai o le a le maalofia le fano o tagata uma.”⁵

Afai e leai ni au mea sese, o lona uiga e te le manaomiaina le Togiola. Afai o e faia ni mea sese, ma o tatou uma ua faia ni mea sese, pe iti pe ogaoga, o lona uiga e ao ona i ai sou manao tele e saili pe mafai faapefea ona faamama ese ina ia e le toe i ai i le pogisa.

“[O Iesu Keriso] o le malamalama ma le ola o le lalolagi.”⁶ Pe a mausali lo tatou taulai atu ia te Ia ma Ana aoaoga, o le a taitaiina i tatou i le uafu o le saogalemu faaleagaga.

O loo taua i le mataupu faavae o le faatuatua lona tolu, “Matou te talitonu e ala i le Togiola a Keriso, e mafai ai ona faaolaina tagata uma, e ala i le usiusitai i tulafono ma sauniga o le Talalelei.”⁷

Sa aoao mai Peresitene Iosefa F. Samita: “E le mafai e tagata ona faamagaloina a latou lava agasala; e le mafai ona latou faamamaina i latou lava mai taunuuga o a latou agasala. E mafai e tagata ona taofi le agasala ma mafai ona faia le mea sao i le lumanai, ma pe a tusa ai ma a latou amioga e taliaina i luma o le Alii [e oo ai ina] agavaa mo se iloilogaga. Ae o ai la e faaleleia mea sese ua latou faia ia i latou lava ma isi, ia e foliga mai e faigata mo i latou ona faaleleia mo i latou lava? E ala i le togiola a Iesu Keriso o le a mafai ai ona faamama ese ia agasala a i latou o e salamo; e ui ina mumu ae o le a sinasina e pei o le fulufulu mamoe [tagai Isaia 1:18]. O le folafolaga lenei ua tuuina atu ia te oe.”⁸

Tatou te le iloa tonu pe na faapefea ona faataunuu e le Alii le Togiola. Ae ua tatou iloa ina o le sauaina leaga i luga o le Satauro ua na o se vaega lena o le tiga matuia lea na amata i Ketesemane—lena nofoaga paia



o puapuaga—ma sa faamaea ai i Kolokota.

O loo faamaumauina e Luka:

“Ona malia ese lea o ia ia te i latou, e pei o le togi o le maa ona mamao, ona tootuli ai lea o ia ua tatalo,

“Ua faapea atu, Lo’u Tama e, a e finagalo i ai, ia e ave ese lenei ipu ia te au; a e aua le faia lo’u loto, a o lou finagalo.

“Ona faaali mai ai lea ia te ia o le agelu mai le lagi, ua faamalosi ia te ia.

“Ua puapuaga o ia, ua atili ai lana tatalo; o lona afu foi ua pei o alualu toto ua pau ifo i le eleele.”⁹

E pei ona mafai ai ona ou faamatalaina, e na o le tasi lava le tala e uiga i le fetalaiga tonu a le Faaola lava Ia o loo faamatala ai mea na Ia onosaia i le Faatoaga o Ketesemane. O loo faamaumauina i le faaaliga:

“Aua faauta, o Au, o le Atua, na mafatia i nei mea mo tagata uma, ina ia latou le mafatia pe afai latou te salamo;

“Ae afai latou te le salamo, o le a latou mafatia e pei lava o Au;

“O le mafatia lea na oo ai ia te au lava, o le Atua lava lea, o le ua silisili i tagata uma, le gatete ona o le tiga, ma tafe toto ai i pu afu uma.”¹⁰

I lou olaga atoa, atonu o le a i ai ni taimi e te alu ai i ni nofoaga e le tataua ona e alu i ai ma faia ni mea sa le tataua ona e faia. Afai o le a e liliu

ese mai le agasala, o le a mafai ona e iloa i se aso le filemu lea e sau mai le mulimuli i le ala o le salamo atoatoa.

Po o a lava a tatou soligatulafono, po o le a foi se tele e faamanualia ai e a tatou amioga isi tagata, o lona tau-salaina e mafai lava ona tafisea atoa. Ia te au, masalo o le fasifuitau aupito sili ona matagofie i tusitusiga paia o le mau lea ina ua fetalai le Alii, “Faauta, o ia o le ua salamo i ana agasala, o ia lava lea ua faamagaloina, ma o Au, o le Alii, e le toe manatuaina lava i latou.”¹¹

O le faamoemoega lena o le talalelei a Iesu Keriso ma le Togiola: ia ave soo se tasi e sau, soo se tasi o le a auai, ma tuu i latou i se aafiaga ina ia mafai ai i le faaiuga o lo latou olaga, o le a mafai ona latou o atu i le veli ua salamo i a latou agasala ma ua faamamaina e ala i le toto o Keriso.”¹²

O le mea lena o loo faia e le Au Paia o Aso e Gata Ai i le lalolagi atoa. O le Malamalama lena lea tatou te ofoina atu ia i latou o loo i ai i le pogisa ma ua leiloa lo latou ala. Po o fea lava le mea e ono o i ai o tatou tagata ma faifeautalai, e tasi lava le tatou savali o le faatuatua ma le faamoemoe i le Faaola o Iesu Keriso.

Sa tusia e Peresitene Iosefa Fili-tia Samita upu o le viiga “Does the Journey Seem Long (Pe ua Umi ea le

Malaga)?” lea o loo i ai se faamalosiauga ma se folafolaga ia i latou e saili atu e mulimuli i aoaoga a le Faaola:

*Pe ua umi ea le malaga,
Pe ua gaoā ma tifatō ea le ala?
Pe o i ai ea laau talatala ma laau
tuitui i luga o le ala?
Pe ua lavelavea ea ou vae i maa tui
A o e tauivi e tulai atu
I mea maua luga i le vevela o le aso?*

*Pe ua lofituina ea lou loto ma
faanoanoa,
Ua vaivai lou agaga o i totonu,
A o e galue malos i lalo ifo o au avega
o popolega?
Pe ua foliga mai ea i le mamafa
o le avega
Ua fai faamalosi oe e sii i luga?
Pe le o i ai ea se tasi e tausoina ma
oe lau avega?*


*Aua nei vaivai lou loto
O lea ua amatalia le malaga;
O loo i ai se Tasi o loo valaau mai pea
ia te oe.
O lea ia tepa ae i luga i le olioli
Ma uu lona lima;
O le a Ia taitai atu oe i mea maua luga
luga e fou—*

*O se nuu e paia ma mama,
Le nofoaga e muta ai faafitauli,
Ma o le a saoloto lou olaga mai
agasala uma,
Le nofoaga o le a le toe maligi ai ni
loimata,
Aua e le toe i ai se faanoanoa.
Uu lona lima ma ulufale faatasi atu
ma ia i totonu.¹³*

I le suafa o Iesu Keriso, amene. ■

FAAMATALAGA

1. “O Le Sulu o le Alofa,” *Viiga*, nu. 299 (tusipese tuai).
2. Mosaea 3:19.
3. Mose 6:57.
4. 2 Nifae 2:7.
5. Alema 34:9.
6. Mosaea 16:9.
7. Mataupu Faavae o le Faatuatua 1:3.
8. *Aoaoga a Peresitene o le Ekalesia: Iosefa F. Samita* (1998), 99–100.
9. Luka 22:41–44.
10. Mataupu Faavae ma Feagaiga 19:16–18.
11. Mataupu Faavae ma Feagaiga 58:42.
12. Tagai Faaaliga 1:5.
13. “Does the Journey Seem Long?” *Hymns*, no. 127.



Saunia e Linda K. Burton
Peresitene Aoao o le Aualofa

Muamua Matau, Ona Auauna Atu ai Lea

A faata’ita’i i ai, e mafai e i tatou taitoatasi ona avea atili e faapei o le Faaola pe a tatou auauna atu i fanau a le Atua.

O se tasi o a tatou molimau aupito sili o lo tatou perofeta pele, o Peresitene Thomas S. Monson, o ia o le auauna filifilia a le Alii o le, sa ia aoao e mulimuli i le faataitaiga a le Faaola—auauna atu i tagata taitoatasi, o le tasi ma le isi. O i tatou ua ulu ifo i le vai o le papatisoga, ua osifeagaiga foi e faia le mea lava lea e tasi. Ua tatou osifeagaiga “e manatua pea [le Faaola] ma tausi i ana poloaiga,”¹ ma sa Ia fetalai mai, “O la’u poloaiga lenei, ia outou fealofani, e faapei ona ou alofa atu ia te outou.”²

Matau upu nei a Peresitene Monson o loo aofia ai foi lena lava valaaulia: “Ua siomia i tatou e i latou o loo manaomia lo tatou gauai atu i ai, o la tatou faamalosiauga, o la tatou lago-lago, la tatou faamafanafanaga, ma lo tatou agalelei. . . . O i tatou o lima o le Alii i luga o le fogaeleele, ua i ai le tiutetauave e auauna atu ai ma siitia Ana fanau. O loo faalagolago mai o Ia ia te i tatou taitoatasi.”³

Pe na outou faafofoga atu i ai—i le valaaulia ia fealofani? Mo nisi, o le tautua po o le auauna atu o le tasi i le isi, e mulimuli i le faataitaiga a le Faaola, e le faigofie. Ae a faata’ita’i i ai, e mafai e i tatou taitoatasi ona avea atili

e faapei o le Faaola pe a tatou auauna atu i fanau a le Atua. Ina ia fesoasoani i le faaleleia atili o lo tatou fealofani, ou te fia fautuaina atu ni upu se fa ia manatua: “Muamua matau, auauna ai.”

Toeitiiti atoa le 40 tausaga talu ai, sa ma o ai ma lo’u toalua i le malumalu mo lo ma asotōgia [mo ma’ua lava] i le po o le Aso Faraile. E lei leva ona ma faaipoipo, ma sa ou popole aua o lo’u taimi lona lua lea talu ona ou faaipoipo. Masalo na matau mai e se uso sa i o’u tafatafa. Sa falo mai ma musumusu mai ma le migao, “Aua e te popole. O le a ou fesoasoani ia te oe.” Sa faatofilemuina lo’u fefe, ma sa mafai ona ou fafia i le vaega na totoe o le sauniga o le malumalu. Na ia matauina muamua, ona auauna ai lea.

Ua valaaulia i tatou uma e mulimuli i aoaoga a Iesu ma auauna atu i isi. E le o faatapulaaina lenei valaaulia i uso lelei o le Aualofa. A o ou faamatala atu ni nai faataitaiga i aso faisoo a tagata o le au paia sa aoao e matau muamua ona auauna atu ai lea, faafofoga mo aoaoga a Iesu ua latou faatinoina.

Fai mai se tamaitiiti e ono tausaga o le Peraimeri: “Ina ua filifilia au e fai ma fesoasoani i le vasega, sa mafai ona ou filifilia se uo ma te galulue. Sa



ou filifilia [se tamaitiiti o la'u vasega na soona faia au] aua e leai a se isi e filifilia o ia. Sa ou manao ia ona maua se lagona lelei.”⁴

O le a le mea sa matau e lenei tamaitiiti? Sa ia matauina e le filifilia lava le alii faafia malosi o le vasega. O le a le mea sa ia faia e auauna atu ai? Sa na ona ia filifilia lava o ia e avea ma ana uo ma se fesoasoani i le vasega. Sa aoao mai e Iesu, “Ia outou alolofa atu i e ua fetuu mai ia te outou, ia outou agalelei atu i e ua inoino mai ia te outou.”⁵

I se tasi uarota, na matauina ai e le au Perisitua Arona, ona latou auauna atu ai lea i se ala ‘anoa. O vaiaso taitasi e vave taunuu ai alii talavou ma tutu i fafo o le faletapu, i le timu, kiona, po o le mutigitigi o le la, e faatalitali le taunuu ane o toeaia ma olomatutua o la latou uarota. Latou te la'uese maia nofoa faataavalevale ma fatafaasavali mai taavale, tuu atu ni lima malosi e pipii i ai, ona latou faafeaoina atu lea ma le onosai le au matutua ua sinasina lauao, i totonu o le fale. Ua latou faia moni lava lo latou tiute i le Atua. A o latou matauina ona auauna atu ai lea, o i latou o ni faataitaiga ola o aoaoga a le Faaola: “Aua na faia e outou i le tasi o e aupito itiiti o o'u uso nei, o a'u lea na outou faia i ai.”⁶ A o faatinoina ia mataupu aoaoina fou a le autalavou, o

le a mautinoa lava le tatalaina o mata o nei alii talavou i le tele atu o isi avanoa e auauna atu ai i se ala faa-Keriso.

O le matau ma le auauna atu, o nisi taimi e manaomia ai se taumafaiga tele. E i ai se tamaitai talavou musuia e igoa ia Alesania na matauina lona tausoga, o Matisone, sa le mafai ona faamae'aina mea e manaomia mo lana lava Alualu i Luma o le Tagata lava Ia, ona e matuia le aafia o lona mafaufau i lona ma'i. Sa faapotopoto e Alesania ia tamaitai talavou o lana uarota, talanoa ma o latou taitai, ma fuafua ai e faia se mea e fesoasoani ai ia Mati i mea e le mafai ona faia e ia lava. Sa tofua le tamaitai talavou ma lana vaega sa fai o gaoioiga o le Alualu i Luma ma galuega faatino e fai ai ma sui ina ia mafai ai e Mati ona maua lana lava asoa.⁷

O nei tamaitai talavou o le a agaigai lelei i luma i matafaioi faatina ma le usoga a le Aualofa aua ua latou aoao e matau muamua ona auauna atu ai lea i ni ala o le alofa.

Ua faamanatu mai e Peresitene Monson ia i tatou e faapea o le alofa moni, “o le alofa mama lea o Keriso”⁸— pe i se isi faaupuga o le matau ma auauna atu— “e faamaonia ina ua manatuaina se olomatutua ua oti lana tane ma ave i gaoioiga a le uarota” ma “ina ua maua e se uso sa

nofo na o ia i le Aualofa le valaaulia, ‘Sau—tatou nonofo faatasi’”⁹ E talafeagai lelei lava le tulafono faaauaro i i: “O mea uma lava tou te loto i ai ia fai mai e tagata ia te outou, ia faapea lava ona outou faia ia te i latou.”¹⁰

Sa auauna atu se tane sa matau lelei, i ni ala taua se lua. Na ia faamatala:

“Sa ou fesoasoani i lo'u toalua i se tasi Aso Sa i lana vasega Peraimeri e tumu i tamaiti ulavavale ta'i fitu tausaga. Ina ua amata le taimi o fetufaaiga a le Peraimeri, sa ou vaaia se tasi o le vasega o faapupuu i luga o lona nofoa, ma na iloa lelei lava e le o malosi. Sa musumusu mai le Agaga ia te au o loo ia manaomia se faamafanafanaga, o lea na ou nofo lemu ifo ai i ona tafatafa ma fesili po o le a le mea ua tupu. E lei tali mai o ia . . . , o lea sa amata ai ona ou pesepese lemu atu i ai.

“Sa a'oina e le Peraimeri se pese fou, ma a oo la ina matou pepese, ‘A ou faalogo ma lo'u loto ou te lagona le leo o le Faaola,’ sa amata ona ou lagonaina le malamalama e sili ona uiga ese ma le mafanafana ua faatumulia ai lo'u agaga. . . . Sa ou maua se molimau patino i le alofa o lo tatou Faaola mo ia [le teineitiiti] . . . ma au foi. . . . Sa ou aoaoina o i tatou o lima [o le Faaola] pe a tatou auauna atu i le tasi.”¹¹

E le gata ina sa matau e lenei tua-gane ua faapei o Keriso le manaomia o lana fesoasoani i lona toalua ma se vasega ulavavale e ta'ifitu tausaga le matutua; ae sa ia tuuina atu foi se au-aunaga patino i se teineitiiti na manaomia. Sa ia mulimuli i le Faaola, o le sa aoao mai, "O galuega na outou vaai na ou faia o mea ia tou te faia foi."¹²

E lei leva atu, sa tatalaina ai e se lologa ni avanoa se tele mo soo o Iesu Keriso e matau ai muamua ona auauna atu ai lea. Sa vaaia e tamaloloa, o fafine, o talavou, ma tamaiti ni pisinisi ma fale o aiga ua faatamaia, ma sa latou tuua mea uma ae fesoasoani e faamama ma faaleleia fale sa faatamaia. O nisi sa matauina le manaomia o le fesoasoani i le galuega tele o le faia o tagamea. O isi sa faamamaina ma le faateete ata, o pepa o faamatalaga faaletulafono, tusi, ma isi pepa taua, ona latou faatautau ai lea i luga pepa e faamamago ma faasao mea uma sa latou mafaia. O le matau ona auauna atu ai lea, e le faigofie i taimi uma ma e le faapea foi e fetau i taimi uma ma a tatou mea e fai.

O le fea se isi nofoaga sili atu e matau muamua ai ona auauna atu ai lea nai lo totonu o le aiga? O se faataitaiga lea mai le soifuaga o Elder Richard G. Scott e faapupula ai:

"I se tasi po sa ala mai ai lo ma atalii laitiiti o Richard, sa i ai se faaletonu i lona fatu ma sa tagi. E masani lava o lo'u toalua e ala e vaai se pepe e tagi, ae o le taimi lea sa ou fai atu ai, 'Lea o le a ou alu e vaai.'

"Ona o le ma'i o lo'u atalii, a amata ona tagi, ona tatavale lea o lona fatu. E pua'i o ia ma leaga ai le ie o lona moega. O lona po na ou siiina ai ma opo mai o ia e taumafai e faato'ato'a le tata o lona fatu ma uma ai lana tagi a'o ou suiina ona lavalava ma ona ieafu mama. Sa ou siiina o ia seia iu ina moe. Sa ou le iloa i lona taimi, o le a malii o ia i ni nai masina mulimuli ane. O le a ou manatuaina pea lo'u siiina o ia i le tuneva o lona po."¹³

Na fetalai Iesu, "O se fia sili ia te outou, ia fai o ia ma a outou auauna."¹⁴

O nisi taimi e faaososoina ai i



tatou e auauna atu i se ala tatou te mananao e fai ai, ae e le o le ala tonu lea o loo manaomia i lona taimi. Ina ua aoao mai e Elder Robert D. Hales le mataupu faavae o le ola faasoasoa tatau, sa ia faamatalaina le faataitaiga o le faatauina o se meaalofo mo lona faletua. Sa fesili o ia [faletua], "O e faataua mo a'u po o oe?"¹⁵ Afai tatou te fetuunaia lona fesili a o tatou auauna atu ma fesili ifo ia i tatou lava, "Pe o o'u faia lenei mea mo le Faaola, pe o o'u faia mo a'u?" o le a atagia le auu-naga a le Faaola i la tatou auaunaga. Sa fesili le Faaola ma e tatau foi ia i tatou, "Se a se mea lua te mananao i ai ou te faia mo oulue?"¹⁶

I ni nai vaiaso ua tuanai atu, sa ou faanatinati ma atu i le anoanoai o mea sa i la'u lisi o mea e fai. Sa ou faamoe-moe ou te alu i le malumalu i le aso lona, ae sa ou manatu ua ou matua pisi tele. O le taimi lava na tau ai lo'u mafaufau i lona manatu faapea ua ou pisi tele mo le malumalu, sa fagua loa au i le mea e sili ona ou manaomia e fai. Sa ou tuua lo'u ofisa, ae savali atu i le Malumalu o Sate Lekia, ma tau mafaufau po o afea ou te toe maua ai le taimi ua ou misia. O le mea e faafetai ai, e onosai le Alii ma e alofa mutimutivale ma sa ia aoaoina a'u i se lesona matagofie i lona aso.

A o ou nofo ai i le potu mo le sauniga, sa musumusu mai ma le migao

se uso, "Ua ou matua gatete lava. O lo'u taimi lona lua lenei i le malumalu. E mafai ona e fesoasoani mai faamolemole?" Na mafai faapefea ona ia iloa o upu tonu lava na sa tatau ona ou faalogo i ai? Na te lei iloa, ae sa silafia e le Tama Faalelagi. Sa ia matauina le mea aupito sili ou te manaomia. Sa ia uunaia lenei uso lotomaulalo e auauna mai ia te au e ala i le valaaulia o a'u ou te auauna atu ia te ia. Ou te faamautinoa atu ia te outou, o a'u le tagata na sili ona faamanuiaina ai.

Ou te faailoa atu mai le ta'ele o lo'u loto le faafetai tele i le toatele o tagata e faapei o Keriso, sa auauna mai i lo matou aiga i le gasologa o tausaga. E momoli atu le agaga talisapaia i lo'u toalua pele ma lo'u aiga, o e o loo galulue ma le le faalogologo tiga, ma le alolofa tele.

Ia tatou faafai saili muamua e matau, ona auauna atu ai lea. A tatou faia lona mea, ua tatou tausia feagaiga ma o la tatou auaunaga, e faapei ona saunoa Peresitene Monson, e moli-mauina ai lo tatou avefa ma ni soo. Ou te iloa o loo soifua le Faaola. O Lana Togiola ua mafai ai ona tatou ola i Ana aoaoga. Ou te iloa o Peresitene Monson o lo tatou perofeta i ona po nei. I le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 20:77.
2. Ioane 15:12.
3. Thomas S. Monson, "O Le A Se Mea Ua Ou Faia Mo Se Tasi i le Aso?" *Liahona*, Nov. 2009, 86.
4. Canyon H., "A Good Choice," *Friend*, Jan. 2012, 31.
5. Mataio 5:44.
6. Mataio 25:40.
7. Tagai "For Madison," [lds.org/youth/video/for-madison](https://www.lds.org/youth/video/for-madison).
8. Moronae 7:47.
9. Thomas S. Monson, "E Le Uma le Alofa," *Liahona*, Nov. 2010, 125; tagai foi *O Afafine i Lo'u Malo: O Le Talafaasolopito ma le Galuega a le Aualofa* (2011), 101.
10. 3 Nifae 14:12.
11. Al VanLeeuwen, "Auauna atu i le Tasi," *Liahona*, Aok. 2012, 19; tagai foi Sally DeFord, "Afai Ou Te Faalogo i Lo'u Loto," *2011 Otootoga o Taimi mo Fetufaaiga*, 28.
12. 3 Nifae 27:21.
13. Richard G. Scott, "O Faamanuiaga e Faavavau o le Faaipoipoga," *Liahona*, Me 2011, 96.
14. Mataio 20:26.
15. Robert D. Hales, "Avea ma E Tuuina Atu Mea Faaletino ma Faaleagaga," *Liahona*, Me 2009, 9.
16. Mataio 20:32.



Saunia e Elder Walter F. González

○ Le Au Peresitene o Fitugafulu

Aoao Faatasi ma o Tatou Loto

O se tasi o auala e o mai ai ia Keriso o le saili lea e aoao ia upumoni taua mai o tatou loto.

“○ mai ia te au, ina ia outou tagotago ma vaai.”¹ O se poloaiga lea na tuuina mai e le Faaola i nei tagata sa nofoia ia Amerika anamua. Sa latou tagotago ma o latou lima ma vaai ma o latou mata i a Iesu o le Keriso. O lenei poloaiga e tutusa lava le taua mo i tatou i lenei vaitaimi e pei foi o lo latou vaitaimi. Ao tatou o mai ia Keriso o le a tatou tagotago ma “iloa mautinoa ai”²—e le o o latou lima ma mata—ae o o latou loto atoa ma le mafaufau o Iesu o le Keriso.

O se tasi o auala e o mai ai ia Keriso o le saili lea e aoao ia upumoni taua mai o tatou loto. A tatou faia lea mea, o le a aumaia e uunaiga mai le Atua se malamalama e le mafai ona tatou maua mai se isi lava mea. Na iloa ma le mautinoa e le Apose-tolo o Peteru, o Iesu o le Keriso, le Alo o le Atua soifua. Sa fetalai atu le Faaola faapea o le malamalama o Peteru e le mai se “tagata . . . a o [le] Tama o i le lagi.”³

Sa faamalamalama mai e le perofeta o Apinati le matafaioi o lagona e aumai e le Atua i o tatou loto. Na ia aoao mai e le mafai ona tatou malamalama atoatoa i tusitusiga paia sei vagana ua

tatou faaaogaina o tatou loto ia malamalama ai.⁴

O lenei upumoni sa matagofie le faamatalaina i se tusi a tamaiti, *The Little Prince* na tusia e Antoine de Saint-Exupéry. Sa ta’ua i le tala se faauoga a le perenise laitiiti ma se luko. A o faamavae i laua, sa tau atu e le luko se mealilo i le perenise laitiiti. Sa ia fai atu, “O lau mealilo lenei . . . : Ua na o le loto lava e mafai ona vaai sa’o ai se tasi; ae o le a le vaaia e le mata le mea e taua.”⁵

O Uso Thomas Coelho ua valusefulu valu tausaga, o se tasi o faataitaiga lelei o se na vaaia i lona loto ni mea taua. Sa avea o ia ma se tasi o a matou fautua maua luga faamaoni i Paysandú, Iurukuei. A o lei auai i le Ekalesia, sa lavea o ia a o tietie i lana uila afi. Sa taatiatia o ia i luga o le palapala ua le mafai ona tu, na fesoasoani atu a tatou faifeautalai e toalua e faatu o ia i luga ma toe avatu i lona fale. Fai mai o ia sa ia lagonaina se mea faapitoa ina ua o atu faifeautalai i lona laveai. Sa na ia toe mauaina foi se lagona malosi ao aoaoina o ia e faifeautalai. O le malosi o na lagona na ia faitauina ai le Tusi a Mamona mai le amataga seia oo i le faaiuga i ni nai aso. Na papatisoina o

ia ma auauna atu ma le maelega talu mai lava lena aso. Ou te manatuaina o ia ao tietie atu i lana uila afi i luga ma lalo o magaala o lo matou nuu, e oo lava i le malulu ma timuga o le tau-malulu, ina ia aumai isi i le lotu ina ia mafai ona latou lagona, vaai, ma iloa ma le mautinoa e pei o ia.

I lenei vaitaimi, i le siomia ai i le mau faamatalaga, atonu tatou te mafaufau ai o le sailiili i le faitau miliona o itulau uepi o le a aumaia ia ia i tatou mea uma e manaomia ona tatou iloa. E mafai ona tatou maua ni faamatalaga lelei ma leaga foi i luga o le uepi, ae afai ua na o faamatalaga e le lava lea. Ua tuuina mai ia i tatou e le Atua se isi punavai mo le malamalama sili atu,⁶ o le malamalama lea ua auina mai mai le lagi. E mafai ona aumai e lo tatou Tama Faalelagi lea ituaiga malamalama pe a tatou sailiili i le uepi ma o tatou loto ma mafaufau. Na saunoa mai le Perofeta o Iosefa Samita faapea o loo ia te ia “le tusi sili ona tuai i le lalolagi; ae o loo i [lona] loto, o le mea foaifua o le Agaga Paia lava lea.”⁷

Tatou te mauaina lenei punavai faaselesitila pe a tatou faia ni mea e pei o le faitauina o tusitusiga paia, faalogo i le perofeta soifua, ma le tatalo. E taua foi le faaaluina o se taimi e ffilemu ai⁸ ma lagona ma mulimuli i musumusuga faaselesitila. Afai tatou te faia lenei mea, o le a tatou “lagona ma vaai” i mea e le mafai ona aoaoina i tekinolosi faaonaponei. A tatou maua ni poto masani i le sailiili i lenei uepi faaselesitila, o le a tatou iloa le upumoni, e tusa lava pe o faitauina se talaaga faalelalolagi po o nisi autu. O le a iloa e tagata sailiili faamaoni o le upumoni le moni o nei mea uma e ala i le mana o le Agaga Paia.⁹

Ia, o se upu lapatai: Ua faaititia le faaaogaina o lenei uepi faaselesitila ona o le amioletonu ma le faagaloina o le Alii. Sa tau atu e Nifae i ona uso ua le mafai ona la “lagona ia fetalaiaga [a le Alii]” aua ua “vave [ona laua] fai o le amioletonu [ma] gese ona manatua o le Alii.”¹⁰ E punitia e le amioletonu lo tatou gafatia e vaai, lagona, ma alofa atu i isi. O le vave ona manatua o le Alii e ala i le tatalo “ma le malosi atoa o le loto”¹¹ ma le manatuaina o o



Paselona, Sepania

tatou aafiaga faaleagaga o le a faalau-tele ai o tatou gafatia e vaai ma lagona ia mea faa-Keriso. Ou te fia fesiligia outou i le taimi nei:

- Pe e te manatua le filemu na e lagonaina ina ua mavae le tele o faigata, sa e tagi atu ai i le Tama i le tatalo malosi?
- Pe e te manatua le suia o lau lisi o mea e fai ina ia mulimuli i se uuna-iga i totonu o lou loto?

Na faateleina e tagata maoae o i le Tusi a Mamona lo latou gafatia ina ia malamalama atili ma manatua ia aafiaga faaleagaga taua. Na faamalolosia e Alema lana fanau i le faamanatu atu ia i latou lona aafiaga i le liua.¹² Na aoao atu e Helamana ia Nifae ma Liae ia manatua—ia manatua o luga o le papa o Keriso e ao ona atinae ai lo laua faavae ina ia le oo atu le mana o le tiapolo i o laua luga.¹³ E tatou ona tatou faia foi faapea. Ia manatua e fesoasoani mai le Atua ia tatou lagona ma ola ai. O lenei mea ua tuuina mai ai se uiga loloto i upu a le Tupu a Peniamina, lea na fai mai, “Ma o lenei le tagata e, ia manatua, ma le fano ai.”¹⁴

O se tasi o manatuaga sili ona taua ou te faamemelo i ai o le lagona lea sa ou mauaina ina ua ou iloina o le Tusi a Mamona o le afioga a le Atua. Sa ou iloina e mafai ona tatou lagonaina ai le olioli lea e le mafai e

upu ona faamatalaina. Sa ou lagona ma iloina i lena lava aso, i lau tatalo, e uiga i le moni o mea e le mafai ona ou aoaoina i soo se isi lava ala. O lea ituaiga manatuaga o le mafuaaga lea o le tumau ai pea o le loto faafetai ma faamalositia ai lava au i taimi faigata.

O i latou o e ua maua le malamalama, e le mai le tagata ae mai lo tatou Tama Faalelagi, ua iloina e moni o Iesu o le Keriso ma o Lana Ekalesia lenei. Ua aumaia e lena lava malamalama le malosi e faia ai ni suiga talafeagai ina ia o mai ai ia Keriso. Mo lea mafuaaga, matou te valaaulia ai tagata uma ina ia papatisoina, salamo, ma liliu mai ia te Ia i le taimi nei.¹⁵

O le o mai ia Keriso, o le a mafai ai e tagata uma ona vaai, tagotago, ma iloa ai ma le mautinoa sa puapuagatia Keriso ma togiolaina a tatou agasala ina ia tatou maua le ola e faavavau. Afai tatou te salamo, tatou te le mafatia.¹⁶ Faafetai ia te Ia, o le a mafai ai ona faamalolo ia agaga ua manunua ma fonofono ia loto ua gausia. E leai se avega e le mafai ona Ia faamamaina pe aveesea. Na te silafia o tatou faaletonu ma ma'i. Ou te folafola atu ma molimau atu ia te outou afai ua e lagona ua leai sou faamoemoe, pe foliga mai ua toilalo mea uma lava, Na te le tuulafoaia outou. O le a fesoasoani mai Keriso ma o le auala lea e tusa lava pe o le tauiviga o se vaisu, faanoanoa, po o se isi lava mea. Na

te silafia le “ala e fesoasoani ai i lona nuu.”¹⁷ O ulugalii ma aiga o loo tauivi po o le a lava se mafuaaga—luitau o mea tautupe, faatosinaga o ala o faasalalauga le lelei, po o ni tulaga faaleaiga—o le a lagonaina se lagona toafilemu mai le lagi. E ese le mafanafana o le “lagona ma vaai atu” ua Ia toetu mai le oti “ma le faamalologa i ona apaau,”¹⁸ ona o Ia, o le a tatou toe feiloai ai ma opoina e pele ia i tatou ua maliliu. E moni o lo tatou liua ia te Ia o le a tauia i lo tatou faamalologa.¹⁹

Ou te iloa ma mautinoa e moni nei mea uma. Mo lenei mafuaaga ou te tuuina atu ai faatasi lou leo ma tagata anamua na nofoia ia Amerika ma alaga atu: “Osana! Ia faamanuiaina lava le suafa o le Atua Silisili Ese!”²⁰ Ua Ia tuuina mai ia i tatou le faaolataga. Ou te molimau atu o Iesu o le Keriso, o le Mesia paia. O Ia o le Alii Silisili, lo tatou Faaola ma le Togiola. I le suafa o Iesu Keriso, amene. ■

FAAMATALAGA

1. 3 Nifae 18:25.
2. 3 Nifae 11:15.
3. Tagai Mataio 16:16–17.
4. Tagai Mosaea 12:27.
5. Antoine de Saint-Exupéry, *The Little Prince*, trans. Katherine Woods (1971), 87.
6. Tagai Eteru 4:13.
7. *Aoaoga a Peresitene o le Ekalesia: Iosefa Samita* (2007), 132.
8. Tagai Mataupu Faavae ma Feagaiga 101:16.
9. Tagai Moronae 10:3–5.
10. 1 Nifae 17:45.
11. Moronae 7:48.
12. Tagai Alema 36:5–24; 38:6–9.
13. Tagai Helamana 5:12.
14. Mosaea 4:30.
15. Tagai 3 Nifae 9:13.
16. Tagai Mataupu Faavae ma Feagaiga 19:16.
17. Alema 7:12.
18. 2 Nifae 25:13; Tagai foi 3 Nifae 25:2.
19. Tagai 2 Nifae 16:10; 3 Nifae 9:13.
20. Tagai 3 Nifae 11:15–17.





Saunia e Elder Jeffrey R. Holland

○ Le Korama a Aposetolo e Toasefululua

○ Le Poloaiga Muamua ma le Sili

E tatau ona tatou ola e faapei o ni soo ua tuuto atu e faatino ai lo tatou alolofa i le Alii

E lei ni tagata na soifua i le talafaa-solopito e sili atu ona ou tigaalofa i ai nai lo Aposetolo e toasefulutasi na totoe ina ua malii le Faaola o le lalolagi. Ou te manatu o nisi taimi e galo ai ia i tatou le lei o so latou poto masani ma lo latou faalagolago atoa ia Iesu i mea sa latou manaomia. Ia i latou sa Ia fetalai atu ai, “Ua loa lava ona ou i ai ia te outou, a e tou te lei iloa ea a’u . . . ?”¹

Ae, e sa’o, ua latou manatu e le i lava tele so latou taimi ma Ia. E le o se taimi umi le tolu tausaga na valaau ai se Korama atoa o Aposetolo e Toasefululua mai ni nai tagata fou liliu mai, aveesea mai ia i latou ia mea sese o ala tuai, aoao i latou i mea ofoofogia o le talalelei a Iesu Keriso, ona tuua lea o i latou e faaauau le galuega seia oo ina fasiotia foi i latou. O le matua faigata lava i se vaega o toeaina ua faatoa faauuina ona taliaina se lumanai faapena.

Aemaise ai o le tuua ai na o i latou. Sa taumafai Iesu i le tele o taimi e ta’u atu ia i latou o le a Ia le faatasi ai pea ma i latou i la le tino, ae sa latou le mafai pe sa le malamalama foi i se manatu e mamafatu. O loo tusia e Mareko:

“Ua ia aoao atu i ona soo, ma fetalai atu ia te i latou, Ua tuuina atu le Atalii o le tagata i lima o tagata, latou te fasioti foi ia te ia; a uma ona fasia o ia, e toe tu mai o ia i le aso tolu.

“A o i latou ua le iloa lea upu, ua matatau foi e fesili ia te ia.”²

Ona sosoo lea, ina ua mavae sina taimi puupuu sa aoao ai, ma le itiiti o le taimi e sauniuni ai, sa tupu ai se mea latou te lei mafaufauina e mafai ona tupu. Ua faasatauroina lo latou Alii ma le Matai, lo latou Faipule ma lo latou Tupu. Ua maea Lana galuega faaletino, ma o le Ekalesia laitiiti ua feagai ma faigata lea na Ia faatuina ua foliga mai ua sauaina ma ua agai atu i le faaumatiaina. Sa molimauina foi o Ia e Ona Aposetolo i Lona tulaga toetu ae o lena foi mea sa faaopoopo atu i lo latou le mautonu. E mautinoa lava a o latou tuufesili, “O le a le tatou mea a fai nei?” sa latou liliu atu ia Peteru, le Aposetolo Sinia, mo se tali.

Ou te talosaga atu ia outou faataga mai a’u e faasoa atu o’u mafaufauga i upu atonu sa latou fetautalatalaa’i ai, e le o tusia i le tusi paia. E le taumate na fai atu Peteru i ona uso a aposetolo: “Uso e, o se tolu tausaga ofoofogia. E lei se tasi o i tatou na mafaufauina i

ni nai masina pupuu ua tea ni vavega ia na tatou vaai i ai ma aafiaga faalelagi na tatou olioli ai. Sa tatou talanoa faatasi, tatalo faatasi, ma galulue faatasi ma le Alo moni o le Atua lava Ia. Sa tatou savavali faatasi ma Ia ma fetagisi faatasi ma Ia, ma i le po o lena faaiuga matautia, e lei se tasi na sili atu ona tagitu’i nai lo au. Ae ua uma lena mea. Ua maea Lana galuega ma ua toetu mai o Ia i le tuugamau. Sa ia galueaiina Lona faaolataga ma lo tatou faaolataga. O lea la ua outou fesili, “O le a nei la tatou mea a fai?” Ou te le iloa se isi mea e ta’u atu ia te outou nai lo le toe foi i lou lava olaga sa e i ai muamua, ma le fiafia. Ua ou faamoemoe ‘Ou te alu ou te fagota.’” Ma e le itiiti ifo ma le toa ono o le toasefulu isi Aposetolo na totoe ai sa malilie uma i ai, “Tatou te o foi ma oe.” O loo tusia e Ioane o sē tasi o i latou, “Ua latou o atu, ona latou o ae loa lea i le vaa.”³

Ae, paga lea, e le i lelei le faiva. O le latou po muamua lava na toe foi atu ai i le vai, sa lei ma se i’a e tasi na maua. Ina ua tafa mai ata o le taeao, sa latou faliu atu ai ma le le fiafia i le matafaga lea na latou iloa atu ai i se mea mamao se tagata sa valaau mai ia i latou, “Le fanau e, ua tou maua ea se i’a?” Sa tali atu ma le le fiafia nei Aposetolo ua toe avefa ma faifaiva i se tali e le fia manao se faifaiva e tali atu ai, “Matou te lei maua lava se i’a,” sa latou le mautonu, ma sa faaopoopo atu le tiga i lo latou manu’a, ina ua faaigoaina i latou o le “fanau.”⁴

“Ina lafo ia le upega i le itu i matau o le vaa, ona outou maua ai lea,”⁵ sa valaau atu ai le tagata ese—ma i na upu faigofie, na vave ona saputu atu lo latou iloa o le leo. E na o le tolu tausaga talu ai sa fagogota ai nei lava alii i le sami lava lenei. I le taimi foi lena na “atoa le po ua tigaina ai i [latou], e lei ni mea [na] maua,”⁶ o loo fai mai ai tusitusiga paia. Ae valaau atu ia i latou se tagata Kalilaia sa i luga o le matafaga e tuu a latou upega i le loloto, ma na latou toso ae ai “le ‘au i’a tele,”⁷ na matua lava ma ua masaesae ai a latou upega, sa faatumulia ai vaa e lua, na matua mamafa ma sa amata ona gogoto.

O lea foi ua toe tupu. O nei “fanau” e pei ona valaau tonu ai i latou, na lafo ma le naunautai a latou upega, ma sa “le toe mafai e i latou ona toso ae, ona o taumafa o i’a.”⁸ Sa fai atu ma le manino Ioane, “O le Alii lea.”⁹ Ma i le pito o le vaa, sa oso mai ai Peteru ua le matāofofia.

Ina ua mavae se toefaatasiga fiafia ma Iesu ua toetu, sa faia ai se talanoaga a Peteru ma le Faaola lea ou te manatu i ai o le vaega taua lea na liua ai le galuega faaaposetolo i se tulaga aoao ma le musuia mo Peteru lava ia, lenei tagata ua mausali e pei o se papa, i se olaga mamalu o auunaga ma le taitaiga tuuto. I le vaavaai atu i ni vaa laiti ua tuai, o upega masaesae, ma se faaputuga tele o i’a e 153, sa fetalai atu ai Iesu i Lana Aposetolo sinia, “Peteru, pe sili mai lou alofa ia te au, i o latou nei?” sa fai atu Peteru, “Toe, le Alii e, ua e silafia ou te alofa ia te oe.”¹⁰

Sa tali atu le Faaola i lenei tali, ae na faaauau pea ona ia tepa taulai atu i fofoga o Lona soo ma toe faapea atu, “Peteru, pe e te alofa mai ea ia te au?” Sa fai si fememea’i o le faifaiva maoae i le toe fai atu o le fesili, ae na toe tali atu i le taimi lona lua, “Toe, le Alii e; ua e silafia, ou te alofa ia te oe.”¹¹

Na toe tuu atu foi e le Faaola se tali puupuu, ae i se suesuega tuusao ua Ia fesili atu ai mo le taimi lona tolu, “Peteru, pe e te alofa mai ea ia te au?” O le taimi lea ua mautinoa lava ua lagona moni lava le le toafimalie o Peteru. Masalo o loo i ai pea i lona loto le manatuaga o ni nai aso talu ai lea sa fesiligia faatolu ai foi o ia i se isi fesili ma sa ia faamamafa atu lea lava tali e tasi—ae i se tulaga le lelei. Pe atonu sa amata ona ia tuufesili pe e le o malamalama sese o ia i le fesili a le Faiaoga Sili. Pe atonu foi o loo ia sailiili i lona loto, sailia se faamautinoaga faamaoni o le tali sa ia tuuina atu ma le naunautai, toetoe lava a tuulafoai atu. Po o a lava ona lagona, sa fai atu Peteru i le taimi lona tolu, “Le Alii e, . . . ua e silafia lava ou te alofa ia te oe.”¹²

Lea na tali atu ai Iesu (ou te toe faailoa atu e le o tusia i le tusi paia a’u faamatalaga nei), atonu sa fai atu


se tala faapea, “Peteru, ae aisea la ua e i ai iinei? Aisea ua tatou toe foi mai ai i lenei lava matafaga e tasi, i nei lava upega e tasi, ma toe faia foi lenei lava talanoaga e tasi? Pe le i manino ea i lenei taimi ma pe lei manino ea foi i lenei taimi afai ou te manao i se i’a, e mafai lava ona ou maua se i’a? O le mea lea ou te manaomia Peteru, o ni soo—ma ou te manaomiaina e faavavau. Ou te manaomia se tagata e fafagaina au mamoe ma laveai au tamai mamoe. Ou te manaomia se tagata e talai atu la’u talalelei ma puipuia le faatuatua. Ou te manaomia se tagata e alofa ia te au, e alofa moni, moni lava ia te au, ma e alofa i le mea ua poloaia au e lo tatou Tama i le Lagi e fai. O la tatou savali e le vaivai. E le o se savali lē tumau. E le o se galuega foi e le faamanuiaina; e le o se galuega e leai se faamoemoe o i ai; e lē ina ia auina atu ai i faaputuga lefulefu o talafaasolopito. O le galuega a le Silisili Ese, ma ia suia ai le lalolagi. O lea la Peteru, mo le taimi lona lua ma atonu o le taimi mulimuli, ou te fai atu ia te oe ia tuua nei mea uma ma ia e alu atu e aoao atu ma molimau atu, galue ma auuna atu ma le faamaoni seia oo i le aso o le a latou faia ai ia te oe le mea tonu sa latou faia ia te au.”


Ona faliu atu lea i Aposetolo uma, atonu sa Ia fetalai atu se mea faapea, ‘Pe sa outou valelea foi e pei o le au tusiupu ma le au Faresaio? E pei o Herota ma Pilato foi? Pe sa outou

manatu, e pei o i latou, e mafai ona faaumatia lenei galuega e ala i le fasiotia o au? Pe sa outou manatu, e pei o i latou, o le satauro ma fao ma le tuugamau o le mutaaga lea o mea uma ma mafai ona toe foi atu tagata taitoatasi ma le fiafia i soo se mea sa outou i ai ma faia muamua? Le fanau e, pe lei pa’i atu ea lo’u ola ma lo’u alofa i o outou loto e sili atu le loloto nai lo lenei?”

Uso e ma tuafafine pele, ou te le o mautinoa pe o le a le mea o le a tatou oo i ai i le Aso Faamasino, ae o le a ou matuai ofo lava pe afai i lenei talanoaga, e le fesili mai le Atua ia i tatou i le mea tonu foi lea na fesili ai Keriso ia Peteru, “Pe na e alofa mai ea ia te au?” Ou te manatu Na te fia silafiaina pe na tatou usiusitai a o tatou i ai i le olaga nei, ma le le agavaa tele, ma i nisi taimi e pei e faatamaitiiti ai, i le poloaiga e *tasi*, le poloaiga muamua ma le sili o poloaiga uma—“Ia e alofa atu i le Alii lou Atua ma lou loto atoa, ma lou agaga atoa, ma lou malosi atoa, ma lou mafaufau atoa.”¹³ Ma afai i se taimi faapena e mafai ona tatou fai atu, “Toe, le Alii e, ua e silafia ou te alofa ia te oe,” ona mafai lea ona Ia faamanatu mai ia i tatou le uiga taualuga o le alofa, o le faamaoni.

“Afai tou te alolofa mai ia te au, ia outou tausi mai i au poloaiga,”¹⁴ sa fetalai mai ai Iesu. O lea o loo i ai o tatou tuaoi e ao ona faamanuia, o fanau ia puipuia, o e matitiva ina





ia siitia i luga, ma le upumoni ina ia puipuia. E i ai sese e ao ona faasa'o, o upumoni e faasoa atu, ma mea lelei ia faia. I se aotelega, e tatau ona tatou ola e faapei o ni soo ua tuuto atu e faatino ai lo tatou alofa i le Alii. E le mafai ona tatou faavaivai ma e le mafai ona tatou toe foi i tua. Ina ua uma ona fetai ai ma le Alo o le Atua soifua, e leai se isi lava mea na toe tumau e pei ona i ai muamua. O le Faasatauroga, Togiola, ma le Toetu o Iesu Keriso ua faailogaina ai le amataga o se olaga Faa-Kerisiano, ae le o le mutaaga lea. O le upumoni lava lenei, le mea moni lenei, na mafai ai e ni nai faifaiva Kalilaia ona toe avea ma Aposetolo o e na leai ma "se sunako

po o se pelu"¹⁵ e tuua ai na upega i le taimi lona lua ma mamauina le tala-faasolopito o le lalolagi lea ua tatou nonofo ai nei.

Ou te molimau atu mai le ta'ele o lo'u loto, faatasi ai ma le malosi atoa o lo'u agaga, ia i latou uma o mafai ona lagona mai lo'u leo, o na ki faaapose-tolo ua toefuatai mai i le lalolagi ma o loo i ai i Le Ekalesia a Iesu Keriso o le Au Paia o Aso e Gata Ai. Mo outou e lei auai mai lava faatasi ma i matou i lenei galuega tele mulimuli a Keriso, matou te faapea atu," Faamolemole o mai." Ia i latou sa i ai muamua ma i matou ae ua toe solomuli, ua mananao e auai mai i ni nai vaega faaleaganuu a le Ekalesia ae lē o maua faamanuiaga

atoatoa o le Toefuataiga ma ua tuua ai le taumafataga atoa, ou te faapea atu, ou te popole o loo e feagai ma ni po uumi faigata ma ni upega gaogao. O le valaau ia e foi mai, ia e tumau faamaoni, ia e alofa i le Atua, ma ia e fesoasoani i le fausiaina o le malo. Ou te valaau atu ina ia faamaoni a'ia'i tagata uma e aofia ai i latou ua mae'a misiona o e sa tutu i se vai papatiso ma lona lima i le sikuea ma fai atu, "Ona ua tofia au e Iesu Keriso."¹⁶ O lona pule sa tuu atu ina ia suia ai lona tagata fou ua liliu mai e faavavau, ae sa faamoemoe e suia ai foi oe e faavavau. Mo le autalavou o le Ekalesia o loo tutulai atu i misiona ma malumalu ma faaipogipoga, matou te faapea atu: "Alolofa i le Atua ma ia tumau le mama mai le toto ma le agasala o lenei tupulaga, ua faamamafaina e le folafolaga ofoofogia a Peresitene Thomas S. Monson lea sa faia i le taeao ananafi." Ua faamoemoe mai lou Tama i le Lagi i lou lotonuu faamaoni ma lou alofa i tulaga uma o lou tatou olaga."

Ou te fai atu ia te outou uma o loo faafofoga mai i la'u savali, o loo lagonaina pea le siufofoga o Keriso i taimi uma o fesili mai ia i tatou taitoatasi manū o i ai le taimi, "Pe e te alofa mai ea ia te au?" Ma mo i tatou uma taitoatasi, ou te tali atu ma lo'u faaaloalo ma mai lo'u agaga, "Ioe, le Alii e, matou te alolofa ia te oe." Ma talu ai ua uu i o tatou "lima le suotosina,"¹⁷ o le a tatou le toe tepa lava i tua seia maea lenei galuega ma puleaina ai e le alofa i le Atua ma tuaoi le lalolagi. I le suafa o Iesu Keriso, amene. ■

FAAMATALAGA

1. Ioane 14:9.
2. Mareko 9:31-32.
3. Ioane 21:3.
4. Tagai Ioane 21:5.
5. Ioane 21:6.
6. Luka 5:5.
7. Luka 5:6.
8. Ioane 21:6.
9. Ioane 21:7.
10. Ioane 21:15.
11. Ioane 21:16.
12. Ioane 21:17.
13. Luka 10:27; tagai foi Mataio 22:37-38.
14. Ioane 14:15.
15. Frederic W. Farrar, *The Life of Christ* (1994), 656; see chapter 62 for more on the plight of this newly founded Church.
16. Mataupu Faavae ma Feagaiga 20:73.
17. Luka 9:62.



Saunia e Peresitene Thomas S. Monson

Savali i le Taeao o le Aso Sa

E silafia e lo tatou Tama Faalelagi o tatou manaoga ma o le a fesoasoani mai pe a tatou valaau atu ia te Ia mo se fesoasoani.

O u uso e ma tuafafine pele, o le konafesi lenei ua atoa i ai le 49 tausaga talu ona lagolagoina au, i le aso 4 Oketopa, 1963, e avea o se tasi o le Korama a Aposetolo e Toasefululua. Fasefuluiva tausaga o se taimi umi. Peitai, i le tele o itu, e foliga mai e matua puupuu lava le taimi talu ona ou tu atu i le pulelala i le Tape-neko ma tuuina atu la'u uluai lauga o le konafesi aoao.

Ua tele naua mea ua suia talu mai le aso 4 o Oketopa, 1963. Ua tatou ola i se taimi uiga ese i le talafaasolopito o le lalolagi. Ua matua faamanuiaina lava i tatou. Peitai, o nisi taimi e faigata ai ona vaavaai atu i faafitauli ma le naunau e talia le agasala lea o loo sio-mia ai i tatou, ma tatou le lotovaivai ai. Ua ou iloa, nai lo le nopia'i ai i le itu e le lelei, afai tatou te toe tepa tasi i tua ma mafaufau i faamanuiaga i o tatou olaga, e aofia ai faamanuiaga iti, po o faamanuiaga tatou te le o iloa, ona mafai lea ona tatou maua se fiafiaga sili atu.

A o ou toe iloilo ina tausaga e 49 ua mavae atu, e i ai ni mea sa ou iloa. O se tasi o le mau aafiaga e tele sa ou oo i ai, e le faapea e faitauiia o se

mea e matua maoae. O le mea moni, o taimi na tutupu ai, e tele lava ina foliga mai e le ofoofogia pe o ni mea lava foi e masani ai. Ae, a toe tepa i ai, na faamauoaina ai ma faamanuiaina olaga—e aofia ai ma lo'u lava olaga. O le a ou fautuaina atu lea lava gaoioiga ia te oe—o lona uiga, ia e mafaufau toto'a i lou lava olaga ma vaavaai patino mo faamanuiaga, pe tele pe itiiti, na e mauaina.

O la'u lava iloiloiga o tausaga ua faamalositia ai e le aunoa lo'u iloa, e faafofogaina a tatou tatalo ma tali mai. Ua tatou masani ma le upumoni o loo maua i le 2 Nifae i le Tusi a Mamona: “Ua i ai le tagata, ina ia latou maua le olioli.”¹ Ou te molimau atu o le tele o lena olioli e maua pe a tatou iloa e mafai ona tatou fesooteai ma lo tatou Tama Faalelagi e ala i le tatalo ma o le a faafofogaina foi na tatalo ma tali mai—atonu e le o le auala ma le taimi tatou te faamoemoe e tali mai ai, ae o le a tali mai lava e se Tama Faalelagi e silafia ma alofa atoatoa mai ia te i tatou ma e finagalo ia tatou fiafia. Pe le'i folafola mai ea e Ia ia te i tatou, “Ia e lotomaulalo; ma o le a taitai ai oe e le Alii lou Atua i

le lima, ma tuu mai ia te oe tali i au tatalo?”²

I nai minute ia ua faataga mai ou te lauga atu ai, ou te fia faasoa atu ai ia te outou na o sina faataitaiga itiiti o aafiaga sa ou maua ia na faafofogaina ai tatalo ma tali mai, lea a ou toe mafaufau i ai, na aumaia ai faamanuiaga i lo'u olaga faapea foi ma olaga o isi. O la'u api talaaga mo aso taitasi, sa tausia i nei tausaga uma, ua fesoasoani ou te maua ai ni auiliiliga ia semanu ou te le toe manatuaina.

I le amataga o le 1965 sa tofia ai au ou te auai atu i konafesi faalesiteki ma faia isi fonotaga i le eria o le Vasa Pasefika i Saute. O la'u asiasiga muamua lea i lena itu o le lalolagi, ma o se taimi e le mafai ona galo. E tele mea faaleagaga na tutupu i lea taimi a o ou feiloai atu i taitai, tagata o le au paia, ma faifeautalai.

I le faaiuga o le vaiaso i le Aso Toonai ma le Aso Sa, aso 20 ma le 21 o Fepuari, sa matou i ai i Brisbane, i Ausetalia, e faia ia sauniga masani o le konafesi o le Siteki a Brisbane. I le taimi o sauniga i le Aso Toonai, sa faafeiloai atu ai au i le peresitene o le itu mai le eria tuaoi. A o ma faatalofa, sa ou maua se uunaiga malosi e tatau ona ou talanoa atu ia te ia ma tuu atu i ai se fautuaga, o lea sa ou fai atu ai ia te ia pe manao ma te o i le sauniga i le taeao o le Aso Sa e sosoo ai, ina ia mafai ai ona fai le mea lea.

Ina ua maea le sauniga i le Aso Sa sa maua le avanoa ma te talanoa ai. Sa ma talanoa i le tele o ona tiutetauave o se peresitene o le itu. A o ma talanoa, sa uunaia au e tuu atu ia te ia ni fautuaga patino e faatatau i le galuega faifeautalai ma le ala e mafai ai e ia ma ana au paia ona fesoasoani i faifeautalai faamisiona i la latou galuega i lana eria. Sa ou iloa mulimuli ane, sa tatalo lenei alii mo se taitaiga e tusa ai. O lana tala, o le ma talanoaga o se molimau faapitoa lea na faafofogaina ana tatalo ma tali mai. E le o se fonotaga na matua maoae lenei, ae na faamautinoaina au na taialaina e le Agaga ma sa faia ai se eseese i le olaga o lena peresitene o le itu ma lana taitaiga, o olaga o le au paia, ma le manuia



o le galuega a faifeautalai iina.

Ou uso e ma tuafafine, o faamoe-moega o le Alii e tele lava ina faatau-nuuina pe a tatou ususitai i le taitaiga a le Agaga. Ou te talitonu o le tele ona tatou faatino i luga o musumusuga ma uunaiga e oo mai ia i tatou, o le tele foi lea o le faatuatuaina o i tatou e le Alii e faataunuu Ana feau.

Ua ou aoaoina, e pei ona ou ta'ua i savali muamua, ia aua lava nei

tolopoina se musumusuga. I se tasi taimi i tausaga e tele ua mavae, a o ou aau i le Faleaau Tuai o le Tesareta i le Aai o Sate Lekia, sa ou lagonaina ai se musumusuga ou te alu i le Falemai o le Iunivesite e asiasi i sa'u uo lelei, sa le toe mafai ona faaoga ona vae ona o se kanesa ma lona taotoga sa faia. Sa ou tuua loa lava le vaita'ele, fai o'u lavalava, ma ou alu loa lava e vaai le alii lelei lea.

Ina ua ou taunuu atu i lona potu, sa leai se tasi na i ai. Ina ua ou fesili, sa fai mai atonu o i ai o ia i le itu o loo i ai le vaita'ele o le falemai, o le vaega lea e fai ai togafitiga faamalositino. Na sa'o lava. Sa ia faatonutonuina lana alu iina i lana nofoafaataavalevale ma sa na o ia i le potu. Sa i ai i le faatau-siusiuga o le vaita'ele, i autafa o le pito loloto. Sa ou valaau atu ia te ia, ma sa ia sau i lona nofoafaataavalevale ia te au. Sa ma talanoa fiafia, ma sa ou toe aveina atu o ia i lona potu i le falemai ma ou tuuina atu ai ia te ia se faamanuiaga.

Sa ou aoaoina mulimuli ane mai la'u uo, sa matuai atu lava o ia i lona aso, ma sa mafaufau ai e pule i lona ola. Sa tatalo o ia mo se mapusaga, ma sa amata ona lagona ua le o tali maia ana tatalo. O lea na alu ai o ia i le vaita'ele ma le mafaufau o le ala lea o le a faamuta ai lona faanoanoa—o le faaoso o lona nofoafaataavalevale i le pito loloto o le vaita'ele. Na ou taunuu atu i se taimi taua tele, o le tali i le mea sa ou iloa o se musumusuga mai le Atua.

Na mafai ona ola la'u uo mo le tele o tausaga—o ni tausaga na tumu i le fiafia ma le lotofaafetai. E maeu lo'u fiafia i le aveai ai o se meafaigaluega i aao o le Alii i lona aso taua i le vaita'ele.

I se tasi taimi, a'o ma tietie atu ma Sister Monson i le fale ina ua uma se ma asiasiga i ni uo, sa ou lagonaina se uunaiga e tataua ona ma o i le tau-laga—o se tietiega e tele maila—ma te asiasi i se tina matua ua oti lana tane, sa nofo i se taimi i le matou uarota. O lona igoa o Zella Thomas. O le taimi lena, ua nofo i se fale e tausi ai tagata matutua. Na ma maua atu o ia i lona aoauli ua matua vaivai lava, ae o loo taotooto filemu lava i luga o lona moega.

Ua leva ona po le vaai a Zella, ae vave lava ona ia iloa o ma leo. Sa fesili mai pe mafai ona ou tuuina atu sona faamanuiaga, ma faaopoopo mai ai ua saunia o ia e oti pe afai ua finagalo ai le Alii e toe foi atu. Sa i ai se agaga manaia lava ma le toafilemu i totonu o le potu, ma sa matou iloa ina uma lava e le o toe umi

sona taimi i le olaga nei. Sa tago mai Zella i lo'u lima ma fai mai, sa tatalo faatauana lava o ia, ia ou sau e vaai o ia ma avatu sona faamanuiaga. Sa ou fai atu i ai, na ma o mai ona o se musumusuga tuusao mai lo tatou Tama Faalelagi. Sa ou sogi atu ia te ia i lona muaulu, ma le iloa atonu ou te le toe vaai ia te ia i le tino nei. O le mea lava lena na i ai, aua na maluu o ia i le aso na sosoo ai. O le mafai ona tuuina atu o sina faamafanafanaga ma le filemu i si a ma pele o Zella, o se faamanuiaga ia te ia ma a'u foi.

O le avanoa e avea ai o se faamanuiaga i le olaga o se tasi, e tele lava ina oo mai e aunoa ma se iloa. I se tasi po malulu naua o se Aso Toonai i le taumalulu o le 1983–84, na ma tietie atu ai ma Sister Monson i le tele o maila i le vanu maugā o Midway, Iuta, i le mea e i ai so matou fale. O le maua luga o le fua o le ea i lena po o le 24 tikeri Faranaite i lalo o le selo, (–31°C), ma sa ma mananao ia mautinoa o loo lelei mea uma i lo matou fale iina. Sa siaki ma iloa ai o loo lelei, o lea na ma tuua ai loa ae toe foi mai i le Aai o Sate Leki. E lei leva ona ma sopoia le alatanu ae pe loa le ma taavale. Sa matuai o ma pa'ulia lava. Ou te le iloa pe na i ai se isi taimi na ou matua maalili ai muamua e pei o lena po.

Na amata ona ma savavali ma le musuā agai atu i le taulaga aupito lata ane, a o pasi saosaoa ane taavale. Mulimuli ane sa tu mai se taavale e tasi, ma sa ofo mai e se alii talavou lana fesoasoani. Na ma iloa mulimuli ane ua mafafia le suauu o le tane o le ma taavale ona o le malulu, ma ua le mafai ai ona aveina le ma taavale. Na toe aveina i ma'ua e lenei tau-lealea agalelei i lo ma fale i Midway. Sa ou taumafai e toe totogi atu ia te ia e tusa ma lana auaunaga, ae sa ia teena ma le faaloalo. Fai mai o ia o se Tama Sikauti, ma sa manao e fai se galuega lelei. Sa ou faailoa atu a'u lava ia te ia, ma sa ia faaalua foi lona agaga talisapaia mo le avanoa e fesoasoani mai ai. I le manatu ai pe tusa o le vaitausaga o se faifeautalai lona matua, sa ou fesili atu ai ia te ia pe o fuafua e faamisiona. Sa ia fai mai

na te le o mautinoa po o le a tonu le mea e manao e fai.

I le taeao o le Aso Gafua na sosoo ai, sa ou tusia ai se tusi i le taulealea ma faafetai atu ia te ia mo lona agalelei. I le tusi sa ou fautuaina ai o ia e alu e faamisiona talai. Sa ou auina atu ai ma se kopi o a'u tusi ma faailoga ai mataupu e faatatau i le galuega faafaifeautalai.

Pe tusa ma se vaiaso mulimuli ane ai, sa telefoni mai ai le tina o le taulealea ma ta'u mai ai o lana tama o se alii talavou lelei tele, ae ona o ni uunaiga patino i lona olaga, o lea ua faaitiitia ai lona manaoga ua leva ona momoo i ai o le auauna atu i se misiona. Sa ia fai mai, na anapopogi ma tatalo o ia ma lona toalua ia suia le loto o le la tama. Sa la tuuina lona igoa i lisi o talosaga a le Malumalu i Provo Iuta. Sa la faamoemoe ia i ai se ala, o le a ootia ai lona loto mo le lelei, ma toe foi ai i lona manao e faataunuu se misiona ma auauna atu ma le faamaoni i le Alii. Na manao le tina ia ou iloa, o loo vaavaai atu i le mea na tupu i lena afiafi malulu ia avea o se tali i a la'ua tatalo mo ia. Sa ou fai atu, “Ou te ioe i lou manatu.”

Ina ua mavae ni masina ma ni mau fesootaiga ma lenei taulealea, sa ma matua fiafia ma Sister Monson e auai i le faamavaega ma lenei faifeautalai a o lei tuua mo le Misiona a Kanata Vancouver.

Pe o se mea faafuaveta ea na matou fetai ai i lena po malulu o Tesema? Ou te le talitonu o se mea faapena. Ae, ou te talitonu o la matou feiloaiga, o se tali i tatalo faatauana a se tama ma se tina mo le atalii sa pele ia i la'ua.

Ou te toe fai atu, o'u uso e ma tuafafine, e silafia e lo tatou Tama Faalelagi o tatou manaoga ma o le a fesoasoani mai pe a tatou valaau atu ia te ia mo se fesoasoani. Ou te talitonu, e leai se popolega o i tatou e itiiti tele naua pe faatauvaa. E popole le Alii i auiliiliga o o tatou olaga.

Ou te fia faaii atu i le faamatala atu o se tasi o aafiaga aupito lata mai, ua i ai sona aafiaga i le fiaselau. Na tupu i faafiagiaga faaleaganuu mo le Malumalu o Kansas City, i le lima masina talu ai. E pei lava o le mau mea ua

tutupu, o le taimi lena na foliga mai ua na o se tasi foi o aafiaga na te'i lava ua sologa lelei mea uma. Peitai, ina ua ou aoao e uiga i tulaga o mea na fesootai ma le faafiagiaga faaleaganuu i le afiafi a o lumanai le faapaiaina o le malumalu, sa ou iloa ai o le faatinoga i lena po, sa le o se mea e masani ai. Ae, o se mea ofoofogia.

E faapei o isi faafiagiaga faaleaganuu uma sa faia i taimi o faapaiaiga o malumalu, o autalavou o le Itulagi o le Malumalu o Kansas City Missouri, sa eseese vaega na aoao ai a latou taga i o latou lava eria. O le fuafuaga sa fai, latou te feiloai faatasi uma i le faletele o le malo i le taeao o le Aso Toonai lea e faatino ai, ina ia mafai ai ona latou aoaoina le taimi ma le itu e ulufale mai ai i totonu, po o fea e tutu ai, ma le va ma le isi tagata, ma pe faapefea ona ulufafo atu mai le fogafale autu ma isi mea faapena—e anoanoai faatonuga e tataua ona latou pu'eina i le aso, a o tuufaatasia e i latou na taiulu le mau vaaiga eseese ina ia polesi lelei ai ma faaatoatoaina le faatinoga faaii.

Sa na o le tasi le faafitauli ogaoga o lena aso. O le faatinoga atoa, na faalagolago i vaega na mua'i pu'eina lea o le a faaali i luga o le lau tele sa faaigoaina o se Jumbotron. Na matua taua nei vaega na mua'i pu'eina i le faafiagiaga atoa. E le gata ina tuufaatasia ai le faafiagiaga atoa, ae o vaega taitasi na pueina o le a folasia mai ai le faafiagiaga e sosoo ai. Na matua taua vaega faavitio nei, e tuufaatasia ai vaega ma avea ai o se faatinoga e tasi. Ae e lei ola le Jumbotron.

Sa galulue ma le naunautai enisinia e foia le faafitauli a o faatalitali le autalavou, fiaselau o i latou, ua maimau taimi taua na a'o ai. Na amata ona foliga mai ua le mafai.

Na faamatala mulimuli ane e le tusitala ma le faatonu o le faafiagiaga, o Susan Cooper, “A o matou agai atu mai le fuafuaga A i le E i le V, sa matou iloa ua le o lelei. . . . A o matou vaavaai atu i le faasologa, sa matou iloa o le a le oo i ai lo matou malosia, ae sa matou iloa ina sa i ai se malosia maoae se tasi i le fogafale i lalo—autalavou e 3,000. Sa tataua ona



matou o i lalo e ta'u atu [ia te i latou] le mea ua tupu ma faalagolago atu i lo latou faatuatua.”³

Toe itula amata ona ulufale mai le au maimoa i le maota autu, na tootutuli ifo ai le autalavou e 3,000 i le fola ma tatalo faatasi ai. Sa latou tatalo ina ia musuia i latou o loo

galulue i le Jumbotron ia iloa le mea e fai e faalelei ai; sa latou ole atu i lo latou Tama Faalelagi, na te faia le mea, e le mafai ona latou faia i lena taimi puupuu.

Fai mai se tasi na tusia mulimuli ane e uiga i lena mea, “O se tatalo o le a le galo i le autalavou, e le ona o le

malo o le fola, ae ona sa faaliusuavaia e le Agaga o latou ponaivi.”⁴

E lei leva ae sau se tasi o enisinia ma ta'u atu ia te i latou ua maua le faafitauli ma ua uma ona fai. Fai mai a ia ua laki lo latou mauaina o le faafitauli, peitai na iloa lelei e na talavou uma.

Ina ua matou ulufale atu i le maota autu i lena afiafi, matou te lei iloina na latou feagai ma ni faigata i lena aso. Na faatoa matou iloina mulimuli ane. Peitai, o le mea na matou moli-mauina, o se faatinoga matagofie, ma maoae—o se tasi o faafiafiaga aupito sili ua ou vaai i ai. Sa faasusulu mai e le autalavou se agaga mamalu, ma le mamana lea na lagonaina e tagata uma sa i ai. Sa foliga mai sa latou iloa lelei lava le mea e ulufale mai ai, o mea e tutu ai, ma le ala e fegalegaleai ai ma le au faafiafia uma sa i o latou autafa. Ina ua ou iloina sa faapuu-puu la latou faata'ita'iga, ma o le tele o pese e lei faata'ita'ia e le au faafiafia atoa, sa ou ofo. E leai lava se tasi na iloina lena mea. E moni lava na faia e le Alii mea na le oo i ai a latou faata'ita'iga.

E le uma lo'u maofa i le ala e mafai ai e le Alii ona faaosofia ma faatonutonu vaega uma o Lona malo ae o la foi e i ai le taimi e tuuina mai ai musumusuga e faata'itau i le tagata e toatasi—po o le faafiafiaga faaleaganuu po o le Jumbotron e tasi. O le mea moni Na te mafaia, ma Na te faia, o se molimau lea ia te au.

Ou uso e ma tuafafine, o loo i ai le Alii i o tatou olaga uma. E alofa o Ia ia te i tatou. E finagalo o Ia tatou te saili atu i Lana fesoasoani. A o Ia taialaina i tatou ma faatonutonuina, ma a o Ia faafofoga ma tali mai i a tatou tatalo, o le a tatou maua le fiafia iinei ma le taimi nei o loo finagalo ai o Ia mo i tatou. Ia tatou iloa Ana faamanuiaga i o tatou olaga, ou te tatalo ai i le suafa o Iesu Keriso lo tatou Faaola, amene. ■

FAAMATALAGA

1. 2 Nifae 2:25.
2. Mataupu Faavae ma Feagaiga 112:10.
3. Susan Cooper, in Maurine Proctor, “Nothing's Too Hard for the Lord: The Kansas City Cultural Celebration,” *Meridian Magazine*, May 9, 2012, ldsmag.com.
4. Proctor, *Meridian Magazine*, May 9, 2012.



Saunia e Elder Robert D. Hales

○ Le Korama a Aposetolo e Toasefululua

Avea o se Kerisiano Moni e Faapei o Keriso

*O le valaau lenei a Keriso i Kerisiano uma i ona po nei:
“Fafaga a’u tamai mamoe. . . Fafaga a’u mamoe.”*

○ le a le uiga o le avea o se Kerisiano?

O se Kerisiano e faatuatua i le Alii o Iesu Keriso, o Ia o le Atalii moni o le Atua, na auina mai e Lona Tama e puapugatia mo a tatou agasala i le faatinoga aupito maua luga o le alofa ua tatou iloa ina o le Togiola.

O se Kerisiano e talitonu faapea o le alofa tunoa o le Atua le Tama ma Lona Alo, o Iesu Keriso, e mafai ai ona tatou salamo, faamagalo atu i isi, tausia poloaiga, ma maua ai le ola e faavavau.

O le upu *Kerisiano* o lona uiga o le tauaveina i o tatou luga o le suafa o Keriso. Tatou te faia lenei mea e ala i le papatisoina ma le mauaina o le mea alofa o le Agaga Paia e ala i le faaee o lima, o i latou o umia Lana pule paia o le perisitua.

O se Kerisiano na te iloa o augatupulaga uma lava, e molimau atu ai perofeta e le aunoa e uiga ia Iesu Keriso. O le Iesu lava lena, na affio mai ma le Tama Faalelagi ma faaali atu i le Perofeta o Iosefa Samita i le tausaga e 1820 ma toefuatai mai le

talalelei ma le faatulagaga o Lana uluai Ekalesia.

Ua auala mai i tusitusiga paia ma le molimau a Iosefa Samita, ua tatou iloa ai o le Atua, lo tatou Tama Faavavau e i ai se tino mamalu ma le atoatoa o aano ma ivi. O Iesu Keriso o Lona Alo Pele e Toatasi na fanaua i la le tino. O le Agaga Paia o se peresona o agaga, o lana galuega o le molimau mai i le Tama ma le Alo. O le Aiga Atua o ni tagata mavaevae e toatolu, e tasi i lo latou faamoemoe.

Faatasi ai ma nei aoaoga faavae ua fai ma faavae o lo tatou faatuatua, pe mafai ea ona i ai se masalosalo po o se finauga o i tatou, i le avea ai ma tagata o Le Ekalesia a Iesu Keriso o le Au Paia o Aso e Gata Ai, o ni Kerisiano? Ae mo Kerisiano uma, e i ai lava se fesili faigofie: o a ituaiga o Kerisiano e i ai i tatou? I se isi faaupuga, o faapefea mai la tatou malaga e mulimuli ia Keriso?

Tatou mafaufau i aafiaga o ni soo Kerisiano se toalua:

“Ua savali ane Iesu e latalata ane i le vai o Kalilaia, ona silafia lea e ia o le uso e toalua, o Simona ua igoa ia

Peteru, ma Aneterea lona uso ua la lafo le upega i le vai: aua o tagata fai faiva i laua.

“Ona fetalai atu lea o ia ia te i laua, Ina mulimuli mai ia ia te au, ou te faia oulua ma fai faiva i tagata.

“Ona la tuua loa lea o laua upega, a e mulimuli atu ia te ia.”¹

I le avea ai ma Kerisiano i nei ona po, ua tatou maua le avanoa e galulue ai loa lava, i le taimi nei, ma le nautai, pei lava ona sa faia e Peteru ma Aneterea: “na la tuua o la upega, ae mulimuli atu ia te ia.”² Ua valaauina foi i tatou e tuua o tatou upega, ia lafoai mausa faalelalogi, o tu ma agaifanua, ma uputuu. Ua valaauina foi i tatou e lafoai a tatou agasala. “Ina ua valaau atu [Iesu] i le motu o tagata e o mai ia te ia . . . , na ia fetalai atu ia te i latou, Ai se fia mulimuli mai ia te au, aua ne’i usiusitai o ia ia te ia, a ia ave e ia lona satauro, i le mulimuli mai ai ia te au.”³ O le faafitia o outou lava mai amioga le mama, o le amataga lea o le salamo, lea e aumaia ai se suiga tele o le loto seia oo ina “le toe i ai se manao e faia mea leaga.”⁴

O lenei suiga, ua faaigoaina o le liua, e na o le Faaola lava e mafai ai. Ua folafola mai e Iesu: “Afai e o mai tagata ia te au o le a ou faaali atu ia te i latou o latou vaivaiga. . . . Ma ua lava lou alofa tunoa mo tagata uma o e e latou te faalotomauualaloina i latou lava i ou luma, ma faatuatua mai ia te au, ona *Ou faia lea o mea vaivai ia avea ma mea malolosi ia te i latou.*”⁵ A tatou faafouina i tatou ia Keriso, o le a suia o tatou natura ma tatou le toe mananao ai e toe foi i o tatou uiga tuai.

E ui i lea, o Kerisiano faamaoni o le a faamanuiaina pea e le aunoa e oo i faigata ma mea e le fiafia ai. A oo mai nei luitau e faaleleia ai, e mafai ona tofotofoina i tatou e toe foi i o tatou uiga masani. Ina ua mavae le Faasatauroga o le Faaola, sa faaali atu o Ia i tamaitai ma ta’u atu i ai o le a maua o Ia e ona uso i Kalilaia. Ina ua toe foi Peteru, le Aposetolo sinia i Kalilaia, sa toe foi o ia i le mea sa ia iloa—le mea sa fiafia o ia e fai. “Ou te alu ou te fagota,”⁶ sa ia fai atu ai, ma sa ia aveina nisi o soo faatasi ma Ia.

Ioe, na fagogota Peteru ma isi i le



po atoa e aunoa ma se i'a na maua. O le taeao na sosoo ai, sa oo atu ai Iesu i le apitaogalu ma valaau atu ia te i latou i le sami, "Ina lafo ia le upega i le itu matau." Sa mulimuli soo sa i totonu o le vaa i le faatonuga a le Faaola ma na vave ona iloina o se vavega lea ua faatumulia ai o latou upega i i'a. Na iloa e Ioane le siufofoga o le Faaola, ma sa oso ifo loa lava Peteru i le vai ma aa'u atu i le apitaogalu.⁷

I Kerisiano ua toe foi i o latou uiga tuai, uiga e le lelei, mafaufau i le faataitaiga faamaoni a Peteru. Aua nei faatuai. O mai e faalogo ma iloa le leo o le Matai ua valaau mai. Ona toe foi vave mai lea ia te ia ma toe maua ai Ana faamanuiaga sautualasi.

Ina ua toe talia mai le au soo i le apitaogalu, sa latou maua mai se taumafataga o i'a ma areto. "O mai ina aai,"⁸ o le valaaulia lea a le Faaola. A o Ia fafagaina i latou, sa Ia fesili faatolu ia Peteru, "Simona e, le atalii o Iona, pe sili mai lou alofa ia te au?" Ina ua ta'u atu e Peteru lona alofa, sa talosaga atu le Faaola ia te ia, "Fafaga i a'u tamai mamoe. . . . Fafaga i a'u mamoe."⁹

O le valaau lena i Keriso i Kerisiano uma i ona po nei: "Fafaga a'u tamai mamoe. . . . Fafaga a'u mamoe"—faasoa atu la'u talalelei i tagata uma tusa lava po o le a le

matua, ia sii a'e, faamanuia, faamafanafana, faamalosiua, ma galueaiina i latou, aemaise i latou o e eseese o latou manatu ma talitonuga nai lo tatou. Tatou te fafaga Ana tamai mamoe i o tatou aiga e ala i le ala tatou te ola ai i le talalelei: tausia o poloaiga, tatalo, suesue i tusitusiga paia, ma faaa'oa'o i Lona alofa. Tatou te fafaga Ana mamoe i le Ekalesia pe a tatou galulue i korama o le perisitua ma faalapotopotoga a ausilali. Tatou te fafagaina foi Ana mamoe i le lalolagi atoa i le avea ai ma tuaoi Kerisiano lelei, faatino le tapuaiga mama a'ia'i o le asiasi ma auauna atu i fafine ua oti a latou tane, o fanau matuaoti, o e matitiva, ma i latou uma e manaomia le fesoasoani.

Mo le toatele, o le valaau e avea o se Kerisiano e mafai ona foliga faigata, ma lofituina. Ae e le tataua ona tatou fefefe pe manatu ua le agavaa. Ua folafola mai le Faaola o le a Ia faia ia tatou agavaa ma gafatia Lana galuega. "Mulimuli mai ia te au," na Ia fetalai mai ai, "o le a *Ou* faia outou ma faifaiva i tagata."¹⁰ A tatou mulimuli ia te Ia, Na te faamanuiaina i tatou i meaalofo, taleni, ma le malosi e faia ai Lona finagalo, ma mafai ai ona tatou faia ni mea e sili atu ma o tatou tulaga ua masani ai e fai ai ni mea sa tatou

lei mafaufauina muamua e mafai ona fai. O lona uiga, o le faasoa atu o le talalelei i tuaoi, lavea'iina o i latou ua leiloloa faaleagaga, auauna atu i se misiona tala'i, faigaluega i le malumalu, tausaiaina o se tamaitiiti e i ai ni manaoga faapitoa, alofa i le tagata agasala ua toe fia foi mai, tautuaina o se soa ua gasegase, onosa'ia o le le femalamalamaa'i, po o le mafatia i ni puapuaga. O lona uiga o le sauniuni o i tatou lava e tali atu i Lana valaau e ala i le fai atu, "Ou te alu i mea e te tofia; Au afioga ou te alagaina; Ou te faia le mea e te finagalo ai; Avea a'u e pei ona e tofia."¹¹

Ina ia avea ma ē e finagalo le Tama Faalelagi e avea ai i tatou, ia tatou mulimuli ia Iesu Keriso. Ou te moli-mau atu o loo valaau mai pea lava pea o Ia tatou te mulimuli atu ia te Ia. Afai o lea faatoa e aoao nei i le tautinoga faa-Kerisiano a le Au Paia o Aso e Gata Ai, pe e te lei auai atoatoa foi i le Ekalesia ma ua e manao e toe mulimuli ia te Ia—aua e te fefe! O uluai soo o le Alii, o ni tagata fou uma lava o le Ekalesia, faatoa liua i Lana talalelei. Sa aoaoina ma le onosai e Iesu i latou taitoatasi. Sa fesoasoani o Ia ia i latou e faataunuu o latou tiutetauave. Sa Ia valaauina i latou o Ana uo ma sa Ia ofoina atu Lona soifua mo i latou.



Ma ua uma foi ona Ia faia le mea lava lena e tasi mo oe ma au.

Ou te molimau atu o Lona alofa e le i'u ma Lona alofa tunoa, e mafai ai ona tatou avea ma Kerisiano e faapei o Keriso. Mafaufau i uiga auaumama nei faa-Keriso. O faapefea ona tatou faamalolosa i tatou lava?

Alofa faa-Kerisiano. E taua i le Faaola tagata uma. E agalelei ma agaaloa i tagata uma, na Ia tuua le ivasefulu ma le iva ae saili le tasi,¹² aua “o lauulu o [o tatou] ulu ua . . . faitaulia uma”¹³ ia te Ia.

Faatuatuua faa-Kerisiano. E ui i tofotofoga, faigata, ma sauaga, ae sa faatuatuaina lava e le Faaola lo tatou Tama Faalelagi ma sa filifili ai e faatuatuua ma usiusitai i Ana poloaiga.

Ositaulaga faa-Kerisiano. I Lona soifuaga atoa, sa tuuina atu ai e le Faaola Lona taimi, Lona malosi, ma i'u ai e ala i le Togiola, na Ia ofoina atu ai Ia lava ina ia mafai ona toetutu fanau uma a le Atua ma maua le avanoa e fai ai mo latou tofi le ola e faavavau.

Tausiga faa-Kerisiano. Faapei o

le Samaria agalelei, sa faapena foi ona aapa atu e le aunoa le Faaola e laveai, alofa, ma faafaiile tagata sa vagaia o Ia, tusa lava po o a a latou aganuu, talitonuga, po o tulaga na i ai.

Auaunaga faa-Kerisiano. Pe o le asuvai mai i se vaieli, kukaina o i'a mo se tausamiga, po o le mulumuluina o vae pefufulu, sa faaalu lava e le Faaola Ona aso e auuina atu ai i isi—si'i a'e e ua le lavavā ma faamalolosa e ua vaivai.

Onosai faa-Kerisiano. I Ona lava faanoanoaga ma mafatiaga, sa faatalitali atu le Faaola i Lona Tama. Faatasi ai ma le onosai mo i tatou, o loo faatalitali mai ma le onosai o Ia ia tatou iloa le mea tonu, ma tatou toe foi atu ia te Ia i le aiga.

Filemu faa-Kerisiano. I Lana auuunaga atoa, sa Ia uunaia ai le malamalama ma faalauiloa le filemu. Aemaise lava i Ona soo, sa Ia aoao atu ai e le mafai e Kerisiano ona femisaa'i ma isi Kerisiano, tusa lava po o a o latou eseese.

Faamagaloga faa-Kerisiano. Sa Ia aoao mai i tatou e faamanuia atu ia i latou e fetuu mai ia i tatou. Sa Ia faaali mai ia i tatou le auala e ala i le tatolo atu ia faamagalo i latou sa faasatauroina o Ia.

Liua faa-Kerisiano. E faapei foi o Peteru ma Aneterea, e toatele sa iloa le moni o le talalelei i le taimi lava na latou faalogo ai i ai. Na liua ai lava i lena taimi. O isi, e umi atu se taimi. I se faaaliga na tuuina mai ia Iosefa Samita, sa aoao mai ai e le Faaola, “O le mea e mai i le Atua o le malamalama lea; ma o ia o le e mauaina le malamalama, ma tumau pea i le Atua, e mauaina le malamalama atili; ma o lena malamalama o le a tupu susulu ma malamalama tele pea lava pea seia oo i le aso e atoatoa ai,”¹⁴ le aso atoatoa o lo tatou liua. O Iesu Keriso o “le malamalama ma le Togiola o le lalolagi; o le Agaga o le upumoni.”¹⁵

Tumau faa-Kerisiano e oo i le iuga. I Lona soifuaga atoa lava, e lei fiu lava le Faaola i le faia o le finagalo o Lona Tama, ae sa faaauau pea i le amiotonu, agalelei, alofa mutimutivale, ma le upumoni e oo i le iuga o Lona soifua i la le tino.

O nisi nei o uiga o i latou o ē faalogo ma gauai atu i le siufofoga o le Faaola. I le avea ai o se tasi o Ana molimau faapitoa i le lalolagi, ou te tuuina atu ai la'u molimau faa-Kerisiano o loo valaau mai o Ia ia te oe i le aso, “Sau, ma mulimuli mai ia te au.”¹⁶ Sau e savali i le ala e tau atu i le fiafia e faavavau, olioli, ma le ola e faavavau i le malo o lo tatou Tama Faalelagi. I le suafa o Iesu Keriso, lo tatou Faaola ma le Togiola, amene. ■

FAAMATALAGA

1. Mataio 4:18–20.
2. Mareko 1:18.
3. Mareko 8:34.
4. Mosaea 5:2.
5. Eteru 12:27; faaopoopo le faamamafa.
6. Ioane 21:3.
7. Tagai Ioane 21:3–8.
8. Ioane 21:12.
9. Tagai Ioane 21:15–17.
10. Mataio 4:19; faaopoopo le faamamafa.
11. Tagai “Ou te Alu i Mea e te Tofia,” *Viiga*, nu. 169.
12. Tagai Mataio 18:12–14.
13. Luka 12:7.
14. Mataupu Faavae ma Feagaiga 50:24.
15. Mataupu Faavae ma Feagaiga 93:9.
16. Luka 18:22.



Saunia e Elder Richard G. Scott

○ Le Korama a Aposeitolo e Toasefululua

○ Le Olioli i le Faaolaina o E Ua Maliliu

“O le a toto e ia i loto o fanau folafolaga na faia i tama, ma o le a liliu atu loto o fanau i o latou tama.”

Sa faaali mai e le Alii i le Perofeta o Iosefa Samita ia aoaoga faavae musuia e faatatau i le sauniga paia o le papatisoga. Sa oo mai le malamalama ina ua aoaoina ekalesia Kerisiano o le oti e le masuia, faavavau, ma e iloa ai le taunuuga o le agaga. Sa latou aoaoina o le papatisoina e tauia i le olioli e le gata, ae o isi e feagai ma faasalaga e faavavau, e auinoa ma le faamoemoe o le togiolaina.

O le faaaliga a le Alii e faapea, e ala mai i le pule e tatau ai o le perisitua, e mafai ai ona faia papatisoga e sui ai mo e ua maliliu e faasaoina ai le amio-tonu o Lana fetalaiga: “Afai e le fanau se tasi i le vai ma le Agaga, e le mafai ona sao o ia i le malo o le Atua.”¹ O papatisoga e fai ai ma sui [mo e ua maliliu] e mafai ona tuuina atu ma le alofa mutimutivale lenei sauniga taua mo tagata agavaa uma ua maliliu o e le'i mauaina i le olaga nei.

O lenei aoaoga faavae mamalu o le isi lea molimau o le natura maoae o le Togiola a Iesu Keriso. Ua Ia aumaia ai le faaolataga i tagata uma ua salamo. O

Lana Togiola ua faatoilaloina ai le oti, ma ua Ia faatagaina le tagata agavaa ua maliu e maua uma ia sauniga o le faaolataga e ala atu i se tagata e fai ma sui.

I se tusi, sa tusia i le silia ma le 150 tausaga ua mavae, sa ta'ua ai e Iosefa Samita: “Ua maua e le Au Paia le avanoa e papatisoina ai mo o . . . latou aiga ua maliliu . . . o e ua mauaina le Talalelei i le agaga, e ala . . . ia i latou o e ua tofiaina e talai atu ia i latou.”² Mulimuli ane sa ia faaopoopo mai, “O na Au Paia o e e teenaina le avea ai ma sui o o latou aiga ua maliliu, latou te faia i le lamatiaina o lo latou lava faaolataga.”³

Sa tuuina mai e le perofeta o Elia ia ki o galuega sui ia Iosefa Samita i le Malumalu o Katelani⁴ e faataunuu ai le folafolaga a le Alii e faapea “o le a toto e ia i loto o fanau folafolaga na faia i tama, ma o le a liliu atu loto o fanau i o latou tama.”⁵

E ala mai i ni isi faaaliga ia Iosefa Samita ma perofeta na sosoo mai ai, ua faapea ona oo mai ai se malamalamaa i le ma le faataunuuga o

galuega o le malumalu ma le taumafaiga o talafaasolopito o aiga lea na te lagolagoina. O perofeta uma talu mai Iosefa Samita ua faamamafaina le manaomia tele o le faataunuaina o sauniga uma mo i tatou lava ma o tatou tuua ua maliliu.

O galuega o le malumalu ma talaasolopito o aiga o le galuega e tasi e vaevaeina i ni vaega se lua. E soo faatasi e pei o sauniga o le papatisoga ma le meaalofo o le Agaga Paia. O nisi o le au paia atonu e le mafai ona latou faia uma ia galuega ona o tulaga i le soifua maloloina po o le taumamao foi ma malumalu.

Sa aoa mai Peresitene Howard W. Hunter:

“E ao ona tatou faataunuaina galuega o sauniga perisitua i le malumalu e alagata mo lo tatou lava faaeaga; ona tataua lea ona tatou faia galuega mo i latou o e le'i maua le avanoa e talia ai le talalelei i le olaga nei. O le faia o galuega mo isi e mafai ona ausia i ni laasaga se lua: muamua, e ala i le sailia o talafaasolopito o aiga e iloa ai o tatou tuua; ma lona lua, o le faia lea o sauniga o le malumalu e tuu atu ai ia i latou ia lava avanoa e maua e tagata o soifua pea.

“Ae e toatele tagata o le Ekalesia e faatapulaa le mafai ona o atu i malumalu. Latou te faia le mea sili latou te mafaia. Latou te faia le sailiga o talaasolopito o aiga ae fai e isi galuega o sauniga o le malumalu. Ae peitai, e i ai ni isi o le au paia o e auai i le faiga o galuega faalemalumalu ae latou te le faia le sailiga o talafaasolopito o aiga o o latou lava laina faaleaiga. E ui o loo latou faia se auaunaga paia i le fesoasoani i isi, latou te le maua se faamanuiaga e ala i lo latou le sailia o o latou lava aiga ua maliliu e pei ona aumai ai le taitaiga faalelagi e perofeta o aso e gata ai. . . .

“Ua ou iloaia o i latou o e auai i le sailiga o talafaasolopito faaleaiga ona faatino lea o sauniga faalemalumalu mo i latou ua latou maua igoa, o le a latou iloa le olioli faaopoopo o le mauaina o afa uma e lua o le faamanuiaga.”⁶

E finagalo le Tama oi le Lagi ia maua uma e i tatou taitoatasi ia vaega

uma e lua o faamanuiaga o lenei galuega taua e fai ai ma sui [o e ua maliliu]. Ua Ia taitaiina isi e faasino mai ia i tatou le ala e agavaa ai. O oe ma a'u lava e pa'ū i ai le mauaina o na faamanuiaga.

Soo se galuega e te faia i le malumu o le taimi faaaluina tataua lea, ae o le mauaina o sauniga sui mo ou lava tuua o le a sili atu ai ona paia le taimi i le malumu ma o le a faapea ona [e] maua ai faamanuiaga sili atu. Ua folafola mai e le Au Peresitene Sili e faapea, “O lo tatou tiutetauave tupito o le sailia lea ma faailoa o o tatou lava tuua.”⁷

Outou tupulaga talavou, pe tou te mananao i se auala mautinoa e tuutiitia ai faatosinaga a le fili i lou olaga? Ia faatofu oe lava i le sailia o ou tuua, saunia igoa mo sauniga sui paia o loo maua i le malumu, ona e alu atu lea i le malumu e fai ma sui mo i latou ia maua sauniga o le papatisoga ma le meaalofo o le Agaga Paia. A o e faasolosolo matua, o le a mafai foi ona e auai i le mauaina o isi sauniga. E lei se isi puipuiga sili atu mai faatosinaga a le fili i lou olaga e mafai ona ou mafaufau i ai.

I le Misiona a Rusia Rostov sa valaaulia ai le autalavou ina ia faavasega [e talavou taitoatasi] ni igoa se 2,000 ona saunia lea ia le itiiti ifo ma le tasi se igoa mai o latou lava aiga mo sauniga o le malumu. O i latou na ausia lenei sini sa valaaulia e o atu i se malaga umi i le Malumu fou o Kyiv Iukureini. Sa faasoa mai e se tasi o alii talavou lona aafiaga: “Sa tele o'u taimi sa faaaluina i taaloga komepiuta. Ina ua amata ona ou faavasegaina igoa, sa le toe i ai so'u taimi e taalo ai i taaloga. O le taimi muamua sa ou mafaufau ai, ‘Oi auoi! E mafai faapefea lena mea!’ Ina ua uma le galuega faatino lenei, sa iu ina ou le toe fiafia e taalo. . . . O galuega o gafa o se mea e mafai ona tatou faia iinei i le lalolagi, ma o le a tumau ai i le lagi.”

E toatele ni Au Paia faamaoni ua latou faia galuega o le sailia o o latou laina faaleaiga ma ua faaogaina le polokalama o le FamilySearch e fai ai sauniga mo tagata o o latou lava aiga e fai ai i latou ma e sui ai. O le faamoemoega o le faasaosaoina o igoa ia mafai ai e tagata taitasi ona faataunuu

sauniga mo tuua ma e e tupuga mai i se laina e ese mai, e tuuina atu ai ia te oe se taimi talafeagai e fai ai. O le taimi nei e 12 miliona igoa ma e faitau miliona sauniga mo na igoa o loo faatalitali. O lenei mea ua faatusaina i se faitauga aofai e sili atu nai lo le faitau aofai tuufaatasi o Nouei ma Tenimaka. E tele ni igoa ua faasaosaoina mo le tele o tausaga. O tuua ua maua e le masalomia lava le naunau ma le fiafia ina ua faamaonia o latou igoa mo le faia o sauniga. Peitai, atonu e le o fiafia tele i latou pe afai e faaauau pea ona latou faatalitali mo le faataunuuina o o latou sauniga.

Matou te uunaia outou o e ua tele ni igoa o loo faasaosaoina ina ia faasoa atu na igoa ina ia mafai ona fesoasoani atu tagata o lou aiga lautele po o le uarota ma le siteki i le faataunuuina o lena galuega. E mafai ona faia lenei mea e ala i le tufatufaina o kata o le malumu i tagata o le uarota ma le siteki o loo naunau e fesoasoani pe faaoga foi le polokalama komepiuta o le FamilySearch e auina sa'o atu ai igoa i le malumu. O le vaega muli o se mea lea ua fia tausaga o fai e Cindy Blevins o Casper, Wyoming.

Sa papatiso Sister Blevins a o talavou ma ua na o ia lava le tagata o lona aiga ua auai i le Ekalesia. Ua ia faamaeaina se vaega tele o galuega o gafa. Ae ua tele naua ia igoa mo ia ma lona aiga patino mo le faia o sauniga. Ona o lenei mea, ua auina atu ai e Sister Blevins ia igoa i le malumu, lea, sa ia ta'ua, e masani ona faamaeaina i ni nai vaiaso, e masani lava [ona faia] i se tasi o malumu e lua lea e latalata atu i lona aiga. Fai mai o ia, e fiafia i le mafaufau atu atonu o nisi o ana uo ma tuaoi i lana lava uarota ma le siteki o i latou ia o loo fesoasoani e faataunuu le galuega mo ona tuua. Na te talisa-paia lo latou faia o lena mea.

Sa fiafia tele lo'u toalua faapelepele o Jeanene, e fai le sailiga o talafaasolopito o aiga. A o laiti le ma fanau, na te fesuaia ai le taimi e nofo ai i tamaiti ni ana uo ina ia mafai ona ia maua ni nai itula i nai vaiaso e galue ai i le sailiga o o matou laina faaleaiga. Ina ua tuua e le ma tamaitiitii uii le fale, sa ia tusia i lana api talaaga patino: “Na faatoa uma nei lava ona ou faia se faaiuga ma ua ou fia tu i luga e alaga e faatatau i ai. Ua avea le potumoe tuai o Mike ma potu ou te galue ai i mea




tau gafa. Ua saunia lelei e faatulaga ai faamaumaga ma galue ai i totonu. O le a taulai atu nei lo'u olaga i sailiga taua o le aiga ma le auina atu o igoa i le malumalu. Ua matuai ou fafia lava ma naunau e fai loa.”⁸

Fai mai le isi tusiga i le api talaaga: “O le . . . vavega mo a'u sa tupu i le ofisa o Mel Olsen mo Talafaasolopito o Aiga, o le sa tuuina mai ia te au se kopi na lolomi mai o le faasologa o le gafa na maua o o'u augatama, sa aumai mai le faafouga o faamaumaga faakomepiuta o le Faila o Augatama na auina atu i le sosaiete o mea tau gafa. O le tele lava sa aumai mai faamau-mauga o le polokalama o tupulaga e faa le Ekalesia lea sa ta'ua ai mo le tele o tausaga ua mavae. Sa lofituina lava a'u i le mafaufau i le galuega tele sa i o'u luma atu o le aoina mai o faamau-mauga o le sailiga o o'u augatama mai faalapotopotoga a le aiga ina ia tuu uma i le komepiuta mo le tufatufaga faakomepiuta muamua ma le tele o Faila o Augatama. Ae o lele ua faatulagaina lelei ma matagofie ma lolomi i le leisa ma taatia ai i luga o le kesi i o'u luma. Sa matuai o'u fafia lava ma lofituina, o lea sa na ona ou saofai ai lava iina ma le maofa ona amata ai lea ona ou tagi, sa matuai ou fafia lava. . . . Mo se tagata o le ua tolusefulu tausaga o sailia ma le naunautai ma le totoa, o le tuuina i le komepiuta o nei faamaumaga uma o se matuai fiafiaga sili lava. Ma a ou mafaufau i le faitau selau afe o tagata o e o le taimi nei pe o le a le toe umi foi ona tuuina lea i le komepiuta o ni lisi uumi o tisiketi o tusigaigoa ma sailiga patino . . . Ua matuai o'u fafia ai lava. O le galuega moni lava a le Alii, ma o loo Ia taitaia.”⁹

Ua lava fua o lenei galuega musuia ua ou tofo i ai e iloa ai o ki na toe-fuataiina mai e Elia ia Iosefa Samita e mafai ai e o tatou loto ona fusia ma fesoatai ai i tatou taitoatasi ia i latou o o tatou tuua o e o loo faatalitali mai mo la tatou fesoasoani. E ala atu i a tatou taumafaiga i malumalu paia iinei i le lalolagi e faaoga ai le pule ua faasafua mai e le Faaola, ua maua ai e o tatou tuua sauniga faaola e mafai ai ona latou olioli i le fiafia e faavavau.

I aso ua mavae, i le faaosofia ai i se



tautinoga loloto o le paia o le galuega, na feagai ai ma le totoa tagata taitoatasi ma se luitau lea na foliga mai sa taumafai toatasi lava e selesale saito uma i Nebraska. O le taimi nei, ua toatele tagata malolosi ua aufaataasi i le faiga o le galuega. A tatou auai faatasi e mafai ma o le a tatou ausia ai le galuega faatulagaina.

Ou te molimau atu ua pai atu le Agaga o Elia i loto o le toatele o le fanau a le Tama i le lalolagi atoa, ua mafua ai ona faateleavaveina le galuega mo e ua maliliu i se saosaoa tulaga ese.

Ae faapefea oe? Pe ua e tatalo mo galuega a ou lava augatama? Ia faataatiaese na mea o lou olaga e le taua tele. Ia filifili nei e fai se mea o le a i ai ni taunuuga e faavavau. Atonu na musuia oe e sue ou augatama ae ua e faapea e le o oe o se tagata sue gafa. O e iloina e le faapea seiloga o oe o se tagata sue gafa? E amata uma lava i le alofa ma se naunautai faamaoni e fesoasoani ia i latou ua i ai i lena itu o le veli o e ua le mafai ona fesoasoani ia i latou lava. Tilotilo solo. O le a i ai se

tasi i lo outou eria e mafai ona fesoasoani atu ia manuia au taumafaiga.

O le galuega lenei o se galuega faaleagaga, o se taumafaiga tele o le galulue faatasi o itu uma e lua o le veli lea e tuuina atu ai le fesoasoani i itu uma e lua. Soo se mea lava o e i ai i le lalolagi, o le tatalo, faatuatua, naunautai, maelega, ma se ositaulaga, e mafai ai ona e faia se saofaga mamana. Ia amata nei. Ou te folafola atu ia te oe o le a fesoasoani atu le Alii ia e maua se auala. Ma o le a e lagona ai le fiafia tele. I le suafa o Iesu Keriso, amene. ■

FAAMATALAGA

1. Ioane 3:5.
2. *History of the Church*, 4:231.
3. *Aoaoga a Peresitene o le Ekalesia: Iosefa Samita* (2007), 471–72.
4. Tagai Mataupu Faavae ma Feagaiga 110:13–16.
5. Mataupu Faavae ma Feagaiga 2:2; faaopoopo le faamamafa.
6. Howard W. Hunter, “O Tagata Naunau i le Malumalu,” *Liahona*, Me 1995, 5–6.
7. Tusi a le Au Peresitene Sili, Fep. 29, 2012; faaopoopo le faamamafa.
8. Jeanene Watkins Scott, personal journal, Apr. 1988.
9. Jeanene Watkins Scott, personal journal, Sept. 23, 1989.



Saunia e Russell T. Osguthorpe
Peresitene Aoao o le Aoga Sa

Tasi le Laa e Faalatalata Atili atu ai i le Faaola

O le liua o le sini faamoemoeina lea o le aoaoina ma le aoao atu o le talalelei. O le liua e le tasi se taimi e tupu ai. O se sailiiliga ia avea atili ai faapei o le Faaola.

O le taumafanafana na tea nei sa faalauiloa atu i le *Liahona* ma le *Ensign* se tusiga puupuu sa ou tusiaina. Sa imeli mai lou atalii ia te au ma fai mai, “Tama, atonu e lelei lou tau maia ia i matou pe afai e i ai sau tusiga o le a faalauiloa mai.” Sa ou tali atu, “Na ou manao lava e vaai pe tou te faitauina ia mekasini a le Ekalesia.” Sa ia toe tusi mai ma faamatala mai sa “pasia le suega [a lona afafine e 10 tausaga le matua]. Sa ia aumaia le *Ensign* mai le pusameli, sau i le fale, ma faitau i ai. Ona ia sau lea i lo ma potu ma faaali mai ia i maua le tusiga.”

E faitau e le afafine o lou atalii le *Ensign* aua e fia aoao. Sa ia faatino lona lava faitalia. Talu ai nei na faamaonia ai e le Au Peresitene Sili ni punaoa faaleaoaoga mo talavou lea o le a lagolagoina ai se naunautaiga masani a tupulaga talavou e aoao, ola ai, ma faasoa atu le talalelei. O le a maua nei punaoa mo le iloilo ina i le initoneti. O Ianuari o le a amata ai ona tatou faaogaina i totonu o potuaoga.

Ao aoao mai le Faaola, e taua le faitalia a le tagata suesue. Na Ia faailoa mai ia i tatou e le gata i mea e aoao atu ae faapea foi le auala e aoao atu ai. Na Ia taulai atu i manaoga o le tagata suesue. Na Ia fesoasoani atu i tagata taitoatasi ia iloaina e i latou lava le upumoni.¹ Na te faafofoga e le aunoa i a latou fesili.²

O nei punaoa faaleaoaoga o le a fesoasoani ia i tatou uma ia aoaoina ai ma aoao atu i le ala a le Faaola i totonu o tatou aiga faapea ma o tatou potuaoga.³ Pe a tatou faia lenei mea, o le a tatou tali atu i Lana valaaulia ia “sau, mulimuli mai ia te au.”⁴ faapei lava ona aoao mai ma le matagofie ia Elder Robert D. Hales. Ao fatuina nei punaoa fou, sa ou vaaia taitai ma faiaoga i ausilali ma le seminare o fefautuaai faatasi ma matua ina ia latou taulimaina manaoga o a latou tagata suesue. Ua ou vaai i tamaitai talavou i totonu o a latou vasega, alii talavou i a latou korama o le Perisitua Arona, ma talavou i le Aoga Sa o faaitaia o latou

lava faitalia ma fai mo i latou lava.

Sa mafaufau se tasi o faiaoga o le autalavou i le Aoga Sa pe faapefea ona fesoasoani i ni alii talavou se toalua e vaivai o laua mafaufau ina ia galulue mo i laua lava. Ina ua ia valaauliaina tagata o le vasega e faasoa mai ni mea sa latou aoaoina, sa popole o ia nei teena e nei alii e toalua lana valaau. Ae leai. Sa tu i luga le toatasi e aoao atu mea sa ia aoaoina ona valaau atu lea i lana uo a’oga e tutusa o laua vaivaiga e fesoasoani ia te ia. A amata ona faavaivai lea na muamua, ona faalatalata atu lea o lana uo ma musumusu atu i lona taliga ina ia ona lagonaina le tulaga faamanuiaina. Sa faia’oga uma i laua i lona aso. Na la aoao atu *mea* na aoao mai e le Faaola, ma sa la aoao atu foi i le *auala* na aoao mai ai le Faaola. Pe a aoao mai le Faaola, Na te faatino ina i le alofa atu mo le tagata o loo Ia aoaoina, faapei lava ona faia e lenei uo aoga mo lana uo.⁵

A tatou aoao mai ma aoao atu Lana upu i Lana ala, ua tatou taliaina Lana valaaulia ia “sau, mulimuli mai ia te au.” Tatou te mulimuli ia te Ia i le tasi le laa i le taimi. O laa taitasi, tatou te faalatalata atili atu ai i le Faaola. O le a tatou suia. Na silafia e le Alii e lei tupu le tuputupu ae faaleagaga i le taimi e tasi. Na oo lemu mai. O taimi uma lava tatou te talia ai Lana valaau ma filifili e mulimuli ia te Ia, ua tatou agaigai i luma i le ala o le liua atoatoa.


O le liua o le sini faamoemoeina lea o le aoao mai ma le aoao atu o le talalelei. O le liua e le tasi se taimi e tupu ai. O se sailiiliga i le avea atili ai faapei o le Faaola. Na faamanatu mai e Elder Dallin H. Oaks ia i tatou “o le *iloa*” e le na o le pau lea. “O le ‘liua’ . . . e manaomia ai lo tatou *faia* ma le *avea ai*.”⁶ O lea o le aoaoina ia liua o se faagasologa faifaipea o le iloa, faia, ma avea ai. Faapei foi, o le aoao atu mo le liua e manaomia ai ia aoaoga faavae autu, valaaulia e faatino, ma faamanuiaga folafolaina.⁷ Afai tatou te aoao atu le aoaoga faavae moni, ua tatou fesoasoani i le tagata suesue ia iloa. Afai tatou valaaulia isi e faatino, ua tatou fesoasoani ia i latou i le faia pe ola ai i le aoaoga faavae. Ma pe a oo mai faamanuiaga na folafola mai e

le Alii, ua tatou suia. Faapei o Alema, e mafai ona avea i tatou ma tagata fou.⁸

O le punaoa fou faaleaoaoga mo talavou e tasi se sini taua: o le fesoasoani lea i talavou ia liua i le talalelei a Iesu Keriso. Sa ou vaai talu ai nei i se alii talavou i se vasega a le autalavou o le Aoga Sa o ia iloaina mo ia lava le upumoni. Ina ua ou iloaina o loo faafaigata ia te ia le fesootai atu i le Togiola i lona olaga, sa ou fesili atu ia te ia pe na te lei lagonaina i se taimi le agaga faamagalo. Sa ia tali mai: “Toe, e pei o le taimi lea sa gau ai ia te au le isu o se alii ao matou taaalo soka. Sa ou lagona le faanoanoa. Sa ou mafau po o le a se mea e tatau ona ou faia e maua ai se lagona lelei. O lea sa ou alu ai i lona fale ma talosagaina lana faamagaloga o au, peitai sa ou iloaina e tatau ona ou faia nisi mea, o lea sa ou tatalo ai, ma o lea sa ou lagona ai ua faamagaloina foi au e le Tama Faalelagi. O le uiga lena o le Togiola ia te au.”

Ao ia faasoa maia i le vasega i lena aso leni aafiaga, sa ia faitauina le Ioane 3:16—“Aua ua faapea lava ona alofa mai o le Atua i le lalolagi, ua ia au mai ai lona Atalii e toatasi”—ona molimau mai lea i le mana o le Togiola. Sa lei toe avea leni aoaoga faavae o se matupu ua toesea mai leni alii talavou. A ua avea ma se vaega o lona olaga aua na ia fesiligia o ia lava ona ia faatinoina lea o lona faitalia e faia ai.⁹

Sa atili ona liua leni alii talavou, ma sa faapea foi ma ana uo aoga. Sa latou taulai atu i se aoaoga faavae autu e ala i le susesueina o tusitusiga paia. Sa latou faatatauina na upu paia i o latou lava olaga ona molimau mai lea i faamanuiaga na oo mai ia i latou o se taunuuga o le ola ai i le aoaoga faavae. Afai tatou te aoao atua le talalelei a Iesu Keriso, ua tatou taulai atu i tusitusiga paia ma upu a perofeta o ona po nei. Ua tatou faalagolago atu i tusiga paia ina ia faamallosia le faatua-tua, fausia ni molimau, ma fesoasoani i tagata uma ia liua atoatoa. O le a fesoasoani ia punaoa fou faaleaoaoga mo talavou ia i latou uma o le a faaagaina ina ia malamalama ma ola ai i le afioga a le Atua.



Ao ou faiaoga ai i le Au Paia i Costa Rica, sa ou uuina i luga se kopi o le *O Le Aoao Atua, E Lei Se Isi Valaauga E Sili Ai* ma fesili atu, “E toafia outou o i ai se kopi o leni tusi lesona?” Na toeitiiti lava o tagata uma na sii le lima. Faatasi ai ma se ataata, sa ou fai atu, “Ou te matea o loo outou faitauina i aso uma.” Sa ou tei i le siiina o le lima o se tuafafine sa nofo i le laina i luma, ma faailoa mai o loo ia faitauina i aso uma. Sa ou fai atu ia te ia e sau i le pulelala ma faamatala mai. Na ia tali mai, “Ou te faitauina le Tusi a Mamona i taeao uma. Ona ou faitaua lea o se mea i le *O Le Aoao Atua, E Lei Se Isi Valaauga E Sili Ai* ina ia mafai ona ou aoao atua lau fanau i le auala sili lava e uiga i mea faatoa ou aoaoina.”

Sa ia manao ia aoaoina ma aoao atu Ana upu i Lana ala, o lea sa ia aoao ai i Ana upu i totonu o tusitusiga paia ona susesue lea i le auala e aoao atu ai Ana upu ina ia mafai ai ona liua atoatoa lana fanau. Ou te talitonu, e lei tupu faafuasei lana mamanu o le aoaoina ma le aoao atu o le talalelei.

Sa ia faia se filifiliga e faia se mea. Ma o le tele o lona faia o mea sa ia iloa e tatau ona ia faia, sa faamallosia ai o ia e le Alii ina ia savali i Lona ala.

O nisi taimi o le ala i le liua e mafai ona umi ma faigata. Sa le toe toaga i le lotu mo le 50 tausaga le tuagane o lou toalua. Pe ana le oo lava i lona vaitausaga o le 60 e le amata ona ia taliaina le valaau a le Faaola e toe foi mai. E toatele na fesoasoani ia te ia i luga o le ala. Na auina atu ia te ia e se tasi o faiaoga o aiga se kata e lafo atu i le meli i masina uma mo le 22 tausaga. Peitai o ia e tatau ona filifili pe fia toe foi mai. E tatau ona ia faatinoa lona faitalia. E tatau ona fai le laasaga muamua—sosoo ai ma le isi.” O le taimi nei ua faamauina faatasi i laua ma lona toalua ma o loo i ai o ia i le au epikopo.

Na matou faaalua ia te ia talu ai nei ni vitio ua mamauina e fesoasoani i taitai ma faiaoga i le faaagaina o punaoa fou faaleaoaoga. Ina ua uma ona ia matamata i vitio, sa ia faalagolago i tua o lona nofoa ma fai mai, ma le faagaetia, “Masalo pe ana



Atenai, Eleni

ou mauaina na mea ao ou talavou, semanu ou te le faavaivai.”

Sa ou feiloai atu i se alii talavou i ni nai vaiaso ua tea o loo faia se tauiviga. Sa ou fesili i ai po o ia o se tagata o le Ekalesia. Na ia tau mai ia te au o ia e le talitonu i le Atua, peitai sa i ai se taimi i lona olaga sa ia faamasani ai i le Ekalesia. Ina ua ou tau atua ia te ia lo’u valaauga i le Aoga Sa ma o le a ou lauga i le konafesi aoao, sa fai mai o ia, “Afai e te lauga, o le a ou matamata i lona sauniga.” Ou te faamoemoe o loo ia matamata mai i lenei aso. Ou te iloa afai o matamata o ia, ua ia aoaoina se mea. O le Maota Autu mo Konafesi o se nofoaga tulaga ese lea o le aoaoina ma le aoao atu mo le liua.

Afai tatou te ola i mataupu faavae o loo aoaoina mai e i latou ua tatou lagolagoina o ni perofeta, tagatavaai, ma talifaaaliga, ua tatou aoao i le ala a le Faaola.¹⁰ Ua tatou faia se laa se

tasi e faalatalata atili atu ai ia te Ia. Ao lata ina faaiuina lenei konafesi, ou te valaauliaina outou uma o faalologo logo mai i lou leo ina ia faia lona laa. Faapei o sa Nifae anamua, ia tatou o atu i o tatou “fale, ma mafaufau i mea ia na . . . fai atu ai, ma ole atu i le Tama i le suafa o [Keriso], ina ia [tatou] malamalama.”¹¹

Matou te mananao ia malamalama tagata talavou uma. Matou te mananao ia i latou ia aoaoina, aoao atu, ma ola ai i le talalelei a Iesu Keriso i aso uma. O le finagalo lea o le Alii mo Ana fanau uma. Pe o oe o se tamaitiiti, o se talavou, po o se tagata matua, ou te valaaulia outou e o mai ma mulimuli i Ona tulagavae. Ou te molimau atu, o laa taitasi tatou te faia o le a faamalolosia ai i tatou e le Alii. O le a Ia fesoasoani ia i tatou ina ia tatou o mai i le atoaga o le ala. Ma afai o le a oo mai faafitauli, o le a

tatou faaauau pea. Pe a oo mai masalosalog, o le a tatou faaauau pea. O le a tatou le toe liliu lava i tua. O le a tatou le pauu ese lava.

Ou te molimau atu o loo soifua le Atua le Tama ma Lona Alo o, Iesu Keriso. Ou te molimau atu o loo faaauau pea ona valaau mai le Faaola ia i tatou e pei lava foi ona Ia faia i taimi ua mavae e o mai ia te Ia. E mafai e i tatou uma ona taliaina Lana valaaulia. E mafai e i tatou uma ona aoao mai, aoao atu, ma ola ai i Ana upu i Ona ala e ala i le faia o se laa se tasi e faalatalata atili atu ai i le Faaola. Pe a tatou faia lenei mea, o le a liua moni i tatou. I le suafa o Iesu Keriso, amene. ■

FAAMATALAGA

1. Tagai Ioane 3:1–7. O lenei fuaitau o loo taliaina ai e le Faaola le fesili na fesiligia ai e Nikotemo. Na Ia aoao atu e faatatau i manaoga o Nikotemo. Na Ia faatagaina Nikotemo e faatino lona faitalia e aoao ai. Na Ia fesoasoani ia Nikotemo ia iloaia le tali mo ia lava.
2. Tagai Ioane 3:4; Iosefa Samita—Talafaasolopito 1:18.
3. Tagai “Aoa Atua o le Talalelei i le Ala a le Faaola,” [lds.org/youth/learn/guidebook/teaching](https://www.lds.org/youth/learn/guidebook/teaching).
4. Tagai Luka 18:18–22.
5. Tagai 1 Ioane 4:19.
6. Dallin H. Oaks, “O Le Luitau i le Avea ma se Tasi,” *Liahona*, Ian. 2001, 41: “O le molimau atu o le iloa lea ma tautino atu. Ua luitauina i tatou e le talalelei ina ia “liua” ma e manaomia ai i tatou e faia ma ave o se tasi. Afai e i ai se tasi o i tatou e faalagolago na o lo tatou lava malamalama ma le molimau i le talalelei, o lona uiga o loo tatou i ai i le tulaga lava e tasi e pei o Aposetolo sa faamanuia i ai ae le’i atoatoa lea na luitauina ai e Iesu e ao ina “liua”. Tatou te tau faia iloaia se tagata e i ai sana molimau malosai ae le ola ai ina ia mafai ai ona liua.”
7. Tagai Aperaamo 2:11 .
8. Tagai Mosaea 27:24–26; 2 Korinito 5:17.
9. Tagai ia David A. Bednar, “Watching with All Perseverance,” *Liahona*, Me 2010, 43: “Pe o tatou fesoasoani atu ea i a tatou fanau ina ia ave ma ni tagata o loo galulue ma saili le aoaoina e ala i le suesue ma le faatuatua, pe ua tatou faamasania a tatou fanau e faatalitali sei aoaoina ma faatino mo i latou? Pe i le ave ai o i tatou ma matua ua tatou tuuina atu i a tatou fanau le mea talitutusa ma le i’a e ‘ai ai, pe o tatou faaauau pea ona fesoasoani atu ia i latou e galulue, ma aoao mo i latou lava, ma ia tumau mausali ma le faagaetia? O tatou fesoasoani atu ea ia tatou fanau ina ia galulue punouai e ai ai atu, saili, ma tuitui atu?”
10. Tagai Dennis B. Neuenschwander, “O Perofeta Soifua, Tagatavaai, ma Talifaaaliga,” *Liahona*, Ian. 2001, 49–51.
11. 3 Nifae 17:3.



Saunia e Elder Marcus B. Nash

○ Le Fitugafulu

○ Le Faatuatua e Faataunuu ai Mea Uma

O le a fesoasoani le faatuatua ia i tatou ina ia feaei saogalemu i le ala o le talalelei, manumalo i luitau uma o le olaga faaletino, ma toe foi atu i le afioaga mamalu o lo tatou Tama Faalelagi.

E lei mamao atu ona sopo le toatele o i matou mai le auaiga o Nash i le tumutumu o Huayna Picchu, o se mauga maua luga e latalata i nofoaga na faaleagaina o tagata Inca o Machu Picchu i atumauga o Peru. E matuai maua luga lava le a'ega ma e i ai ni vaaiga mata'ina ma e tifato. O le mea e faanoanoa ai, o nisi o tagata sopo na maumau o latou soifua ina ua pauu mai lena auala vaiti ma tifato. O le aloese mai ai i lena mala, ua fausia ai ni maea malolosi e faapipii i papa i autafa o le mauga o Huayna Picchu. Sa matou pipiimau i na maea ao matou feaei, ma sa taitaiina atu saogalemu i matou ina ia taunuu i le tumutumu, lea e ofoofogia ai le vaaiga!

Faapei o le auala i Huayna Picchu, o la tatou malaga faaletino o se feaeiga tifato ma faigata, lea e manaomia ai le fesoasoani a lo tatou Tama Faalelagi ina ia taunuu atu ai ma le manuia. O lenei mafuaaga, ua Ia faatulagaina ai ni mataupu faavae ma ni sauniga o le

talalelei e aumaia ai i tatou i le Faaola faapea ma Lona mana faaola.¹ O le vaega muamua o na mataupu faavae, o le faatuatua i le Alii o Iesu Keriso,² faapei foi o na maea i Huayna Picchu: afai e malolosi ma mau le faapipiina i “papa o lo tatou Faaola,”³ o le a fesoasoani le faatuatua ia i tatou ina ia feaei saogalemu i le ala o le talalelei, manumalo i luitau uma o le olaga faaletino,⁴ ma toe foi atu i le afioaga mamalu o lo tatou Tama Faalelagi. O le faatuatua e faataunuu ai mea uma.⁵

O le faatuatua o se mataupu faavae o le faatinoga ma le malosi.⁶ E le “o le le maua lea o se malamalama atoatoa i mea; o lea afai ua ia [i tatou] le faatuatua ua [tatou] faamoemoe mo mea e le vaaia, a e moni.”⁷ O se faamautinoaga⁸ o le Agaga e maua i lo tatou aoaoina lea e tuleia i tatou e faatino⁹ e mulimuli ai i le faataitaga a le Faaola ma tausia ma le agaga tatalo Ana poloaiga, e oo lava i taimi o le ositaulaga ma tofotofoga.¹⁰ O le

faatuatua e aumaia i tatou i le mana o le Alii, lea—faatasi ai ma isi mea—ua faaalua e ala i le faamoemoe o le a oo mai mea lelei,¹¹ o vavega ia na faamaonia lo tatou faatuatua,¹² ma le puipuiga faalelagi i mea tau faaleagaga ma faaletino.¹³

O le olaga o Ann Rowley, se tamaitai paionia i le vaitaimi o le popofou o le Ekalesia, o loo faaalua ai le auala na faatino ai le faatuatua e aafia ai o tatou olaga mo le lelei. O Tuafafine Rowley, o se tina ua oti lana tane mai Egelani, sa faatinoina lona faatuatua e tali atu i le valaau a le perofeta e faapotopoto i Siona. O ia o se tasi o le vaega o le aumalaga a taavaletosolima a Willie lea na pagatia i poloka aisa mafiafia i le auala i le tautoulu o le 1856. I le taimi o le faigamalaga sa latou oo ai i se tulaga ua matuai fiaai lava lana fanau e toafitu. Sa ia tusia: “Na ou mafatia lava i lou vaai atu i lau fanau ua matelaina i le fiaai. . . . Ua lata mai le po ma ua leai ma se meaai mo le po. Sa ou talosagaina le fesoasoani a le Atua e pei o lau mea masani. Sa ou tootuli i ou tulivae, ma manatuaina ia masi malo e lua lea . . . na totoe mai le malaga mai le vasa. E le lapopoa, ma e matuai malo lava e le mafai ona gagau. E mautinoa lava, e le lava lea e fafaga ai ni tagata se toa 8, peitai o falaoa e 5 ma ia e 2 e lei lava foi e fafaga ai ni tagata se toa 5,000, ae o se vavega, na mafai ai e Iesu. O le mea lea, o le fesoasoani a le Atua, e mafai ai soo se mea. Sa ou mauaina ia masi ma tuu i totonu o se ulu Uamea ma tuu i ai vai ma talosagaina le faamanuiaga a le Atua. Ona tapuni lea o le ulu ma tuu i luga o le afi. Ina ua ou aveesea le tapuni i sina taimi mulimuli ane, sa ou vaaia ai ua faatumulia le ulu i meaai. Sa matou tootutuli faatasi ma lou aiga ma faafetai i le Atua mo lona agalelei. Na lava meaai mo lou aiga i lena po.”¹⁴

Na ola Ann Rowley i le talalelei i se osigataulaga patino maoae, sa ia manaomia le fesoasoani, ma na ia talosagaina e ala atu i le tatalo. Ona o lona faatuatua, sa faatumulia ai o ia i le faamoemoe ma sa saunia faavavega meaai mo lona aiga. Na faamanuiaina o ia e le Alii i se tomai taua e faavavau



e onosaia ai “i le faatuatua e oo i le iuga.”¹⁵ E ui i se lumanai le mautinoa, ae na te lei fia iloa pe faapefea ona ia fagaina lana fanau i le aso e sosoo ai; nai lo lona, sa ia “faatalitali ma le onosai i le Alii”¹⁶ ma fetaomi atu i luma ma le faamoemoe—e pei lava foi ona faaalua mai e le viiga matagofie:

*Sulu alofa ta’i mai ua po ala;
Taitai mai!*

*Ua pogisa le po ma ou mamao;
Taitai mai!*

*Sulu o’u vae, ou te le fia vaai mamao
Tau lava o le—laa e tasi mo a’u.”¹⁷*

E mafai foi ona tatou faatinoina lona ituaiga faatuatua i le Alii, talitonu ma faalagolago atu ma o le a faamanu-iaina i tatou e lo tatou Atua¹⁸ agalelei ma faamaoni i Lona mana faavavega ua talafeagai ma o tatou tulaga, e tusa ai ma Lona taimi. Pe a tatou faia faapea, o le a tatou vaaia le faaali mai o le aao o le Atua i o tatou olaga.

Ua poloaia i tatou e le Alii ina ia “[ave] le talita o le faatuatua lea o le a mafai ai ona outou tineia o ufana-fana mu *uma* a le ua amioleaga.”¹⁹ O le a faaoga e Satani ni mea e pei o le masalosalo, fefe, po o le agasala e faaososo ai i tatou ina ia tuuese le faatuatua ma aveesea ai le puipuiga lea o loo ofoina mai. Sei o tatou sailiilia faapuupu taitasi nei luitau o le faatuatua ina ia mafai ai ona tatou iloa ma aua ai nei o tatou gauai atu i faaososoga a le tiapolo.²⁰

Muamua, o le le talitonu i le Alii po o Lana talalelei o le a mafua ai ona tatou tetee i le Agaga o le Atua.²¹ O le tali a le Alii mo le masalosalo e faigofie lava. E pei ona folafola mai e le Tupu o Peniamina, “Ia talitonu i le Atua; ia talitonu o loo soifua o ia, ma o ia na foafoaina mea uma, i le lagi ma le lalolagi; ia talitonu ua ia te ia le poto uma, ma le mana uma, i le lagi ma le lalolagi; ia talitonu e le mafai e le tagata ona malamalama i mea uma e mafai ona malamalama i ai le Alii.”²²

Afai ua e iloa ua maluelue lou faatuatua, ona o le le talitonu po o le masalosalo, ia manatua na oo lava i Aposetolo anamua na latou ai ai atu i le Alii ina ia “faatuputeleina lo latou faatuatua”.²³ Tuu i lou mafaufau o le faatuatua ma le mautinoa o ni soa e manaomia, mafaufau i ni mea faatusa-tusa nei: o le faatuatua ma le mautinoa e pei o apaau e lua o se vaalele. E manaomia uma le lua e faaauai ai le faigamalaga. Afai, o lau vaaiga, e foliga mai e feteenai le mautinoa ma le faatuatua, taofi ma ia manatua o la tatou vaaiga e matua tapulaa lava pe a faatusa i le Alii.²⁴ Au nei faaleaogaina le faatuatua aua e pei lava foi o le toese mai o se apaau mai le vaalele i se faigamalaga. Nai lo lona, faafaiilele sina vaega o le faatuatua ma tuu atu i le faamoemoe lea e sau mai ai e fai ma taula i lou agaga—faapea ma lou mautinoa.²⁵ O le mafuaaga lea ua poloaia ai i tatou ina ia “saili i le aoaoina . . . e ala i le suesue *ma le faatuatua foi.*”²⁶ Ia

manatua, o le faatuatua e muai oo mai ai vavega ma e le maua ai ni o tatou faamatalaga faavavega e uiga i o tatou aafiaga, e pei o le mauaina o se ulu ua tumu i meaai mai nai masi laiti e lua po o le tumau ai pea i le faatuatua i soo se tulaga faigata e oo i ai.²⁷

Lua, o le fefe e aveesea ma faavai-vaia le faatuatua i le Faaola. Sa vaai atu le Aposetolo o Peteru i le Alii i se tasi po matagia ao savali i luga o le vai—pe ana ia le tepa ma ia “vaai i le matagi ua tetele [ma ua] fefe ai”—ma afua ai ona goto i le sami sousou.²⁸ Na mafai lava ona faaauai pea lana savali pe ana ia le fefe! Peitai nai lo le tatou taula atu i ai ma fefefe i le tetele o le matagi ma galu i o tatou olaga, ua valaau mai le Alii ia i tatou ina ia “vaai mai ia te a’u i mafaufauga uma; aua le masalosalo, aua le fefefe.”²⁹

Tolu, o le agasala e faaititia le i ai o le Agaga i o tatou olaga, ma pe a au- noa ma le Agaga Paia, o le a tatou le maua le malosi faaleagaga e taofimau ai ma faatino le faatuatua. E sili lava le faatino o lo tatou faatuatua ina ia “aua le pai atu i le meaalofo leaga, po o le mea ua le mama”³⁰ ma ia “outou filiga [i le] tausiga o a’u poloaiga uma, ne’i . . . vaivai ai lo outou faatuatua, ma manumalo ai o outou faatuatua ai o outou fili ia te outou.”³¹ Afai o le agasala ua pispisia ai lou olaga ou te valaaulia oe ina ia faaoga le “faatu- tua e salamo ai,”³² ma o le a faama- maina ma faamaloloina lou olaga e le Faaola e ala i le Togiola.

Uso e ma Tuafafine, o le a faatau- nuuina e le Alii, e tusa ai ma lo tatou faatuatua, Ana folafolaga ma galue faatasi ma i tatou e foia soo se luitau e feagai ma i tatou.³³ Na Ia faia mo Ann Rowley ma na faia foi mo Lona nuu i atunuu uma ma i soo se vaitausaga ma augatupulaga. Ona o Ia o se “Atua o vavega” ma e “le feliiui o ia,” Na te faamanuia i tatou taitoatasi ma le faamoemoe, puipuiga, ma le malosi e tusa ai ma lo tatou faatuatua ia te Ia.³⁴ O le mausali o le faatuatua i le Alii o Iesu Keriso o le a—faapei o maea i le ala i Huayna Picchu—e taulaina oe ma e pele ia te oe i le “papa o lo tatou Faaola”³⁵ ma Lona mana e lemafaatu- salia e faaolaina ai.

Na saunoa mai Peresitene Thomas S. Monson, “E susulu le lumanai e pei lava o lou faatua-tua.”³⁶ Ou te molimau atu e uiga i lena upumoni musuia ma valaaulia outou taitoatasi ina ia fetaomi atu i luma ma le faatua-tua i le Alii, “aua le masalosalo.”³⁷ Ou te iloa o loo soifua le Faaola, o le “pogai ma le iuga o lo tatou faatua-tua,”³⁸ ma e “tauia o i latou o e matua saili ia te ia.”³⁹ Ou te molimau atu ai i le suafa o Iesu Keriso, amene. ■

FAAMATALAGA

1. Tagai Mataupu Faavae ma Feagaiga 84:19–21.
2. Tagai Mataupu Faavae o le Faatua-tua 1:4.
3. Helamana 5:12.
4. Tagai Mataupu Faavae ma Feagaiga 76:53.
5. Tagai Eteru 12:3.
6. Tagai *Lectures on Faith* (1985), 3; Tagai foi Iakopo 4:6; Eteru 12:7–22; Eperu 11:4–40.
7. Alema 32:21.
8. Tagai Faaliliuga a Iosefa Samita, Eperu 11:1 (i le Eperu 11:1, vaefaamatalaga b).
9. Tagai 2 Nifae 25:23; Alema 34:15–17; Eteru 12:6; Iakopo 2:17–26.
10. Tagai Eteru 12:4–6; *Lectures on Faith*, 69.
11. Tagai Moronae 7:40–42.
12. Tagai Taiala i Tusitusiga Paia, “Faatua-tua”; Tagai foi Mamona 9:8–21; Moronae 7:33–37.
13. Tagai Mataupu Faavae ma Feagaiga 27:17; Alema 57:19–27; 58:10–13.
14. Ann Rowley, in Andrew D. Olsen, *The Price We Paid: The Extraordinary Story of the Willie and Martin Handcart Pioneers* (2006), 113.
15. Mataupu Faavae ma Feagaiga 20:25.
16. Isaia 40:31.
17. “Sulu e Alofa, Ta’i Mai,” *Viiga*, nu. 56.
18. Tagai Iakopo 4:10; Mamona 9:9.
19. Mataupu Faavae ma Feagaiga 27:17; faaopopo le faamamafa.
20. Tagai 1 Nifae 8:33–34; Alema 37:33; Mataupu Faavae ma Feagaiga 20:22.
21. Tagai Alema 32:28.
22. Mosaea 4:9.
23. Luka 17:5.
24. Tagai Mosaea 4:9–10; Faataoto 3:5–7; Isaia 55:8–9.
25. Tagai Eteru 12:4.
26. Mataupu Faavae ma Feagaiga 88:118; faaopopo le faamamafa.
27. Tagai Moronae 7:33–38; Eteru 12:19.
28. Tagai Mataio 14:25–31.
29. Mataupu Faavae ma Feagaiga 6:36.
30. Moronae 10:30.
31. Mataupu Faavae ma Feagaiga 136:42.
32. Tagai Alema 34:15–17; Tagai foi Eteru 12:3.
33. Tagai Eteru 12:29; Alema 7:27.
34. Tagai Mamona 9:18–21; Tagai foi Moronae 7:33–38; Alema 37:16–17.
35. Helamana 5:12.
36. Thomas S. Monson, “Be of Good Cheer,” *Liahona*, Me 2009, 92.
37. Tagai Iakopo 1:6–8.
38. Moronae 6:4; Tagai foi Eperu 12:2.
39. Eperu 11:6; Tagai foi Eteru 12:41.



Saunia e Elder Daniel L. Johnson

○ Le Fitugafulu

Avea ma Soo Moni

A tatou usiusitai i Ana poloaiga ma auauna atu i o tatou uso a tagata, ona ave lea o i tatou ma soo ua sili atu o Iesu Keriso.

O i tatou ua ulu ifo i le vai o le papatisoga ma mauaina le meaalofo o le Agaga Paia, ua osifeagaiga ua tatou naunau e tauave i o tatou lava luga le suafa o Iesu Keriso, pe i se isi faaupuga, ua tatou tautino atu i tatou lava o ni soo o le Alii. Tatou te faafouina lena feagaiga i vaiaso taitasi, a o tatou aai ma feinu i le faamanatuga, ma tatou te faatinoina lena tulaga o ni soo i le ala tatou te ola ai. O lena tulaga o ni soo, sa matagofie ona faatino i mea na faia talu ai nei i Mekisiko.

O se tautotogo matagofie mo nuu e toto ai laau aina suamalie i Mekisiko i matu. Sa matua fua tele laau ‘aina, ma sa maua foia le faamoe-moe mo se seleselega faamanuiaina. Ua uma ona i ai fuafuaga o le a totogi uma nonogatupe, faafou masini ua elea, ma laau ua autausagā, ma taulima matafaioi a le tagata lava ia e pei o pili a’oga mo tagata o le aiga. Na faia foi ni fuafuaga mo tafaoga faaleaiga. Sa i ai se uiga masani o le faamoemoe maua. Ona oo lea i se afiafi o se Aso Gafua i le tafaafuiuga o Mati, sa agi mai se matagi o le taumalulu, ma sa amata ona toululua le kiona. Sa toululua pea le kiona seia aulia le tolu i le vavea. Ona oo lea, a o gasolosolo ese atu ao, sa pau

faafuasei le fua o le tau. O le po atoa ma le taeao po, sa faia ai taumafaiga uma e faasao ai sina vaega o fua o laau. Ae na le faamanuiaina. Ua malulu tele, ma sa ‘aisā uma le fuata. O le a leai se seleselega e faatau atu i lena tausaga. Na fotuai mai le Aso Lua ma le le fiafia ma le lotovaivai i le galoma atu o fuafuaga matagofie, faamoemoe, ma miti o le aso ananafi.

Sa ou mauaina se imeli e uiga i le taeao o le Aso Lua mai ia Sandra Hatch, le faletua o John Hatch, a o fesoasoani muamua i le au peresitene o le Malumalu o Colonia Juárez Chihuahua. Ou te lau atu ni vaega o lena imeli: “Na vave ala a’e John pe tusa o le 6:30 e alu i le malumalu e vaai pe tatau ona le faataunuuina le sauniga i le taeao nei. Na toe sau ma fai mai, e leai se kiona o to’a i le mea e paka ai taavale, o lea na fai ai le tonu o le a ma o. Sa ma manatu atonu e i ai ni tagata faigaluega e leai ni faatoaga laau aina o le a o mai, ma o le a mafai ai ona tuu uma le au fai galuega i le sauniga. . . . E ese le faagaetia i le vaai atu ua o mai alii, sau lea ma lea. Na o mai, ae leai se moe i le po atoa, i le tau mafaufau i le fuata ua mou atu. . . . Sa ou matauina i latou i le taimi o la matou fonotaga sauniuni, sa faigata

ona pupula mata. Ae nai lo le faapea sa i ai se ‘alofaga lelei e le o mai ai, sa latou o mai. Ma e 38 tagata sa i ai i le sauniga (na tumu)! O se taeao faagaeetia mo i ma’ua, ma sa ma faafetai atu i le Tama Faalelagi mo tagata lelei o loo faia o latou tiute, tusa lava po o le a le mea e tupu. Sa faapitoa lo’u mauaina o le agaga iina i lena taeao. Ou te talitonu na fialia o Ia i le silafia matou te alolofa i Lona maota ma o se nofoaga lelei e i ai i se taeao faigata faapena.”

E le muta ai iina le tala ma o le mea moni, e faifai pea.

O le toatele lava o i latou na le aoga a latou faatoaga laau aina, sa i ai ni o latou fasifanua e toto ai nisi laau mo le vaitau, e pei o polo feu po o pi. E mafai ona maua se tupe i nei laau, e lava e ola ai seia aulia le isi fuata o togalaau ‘aina. Peitai, sa i ai se isi uso lelei ma sona aiga laiti, sa lei i ai se isi fasi fanua ma sa leai se tupe maua i le tausaga. Sa vaai atu isi tagata o le nuu i le tulaga pagatia o lenei uso, ma sa latou galulue lava latou ma faaalu a latou tupe, e faatulaga se fasi fanua, faaaoga a latou lava masini e tapena ai le fanua, ma tuu atu mo ia ni polo feu e toto.

Ou te iloa tagata ia sa faatoa ou ta’ua. O le iloaina o i latou, sa ou le

te’i ai i le mea sa latou faia. Ae mo i latou e le silafiaina i latou na, atonu o le a faia fesili nei e lua, e amata uma i le upu *pe aisea*. Aisea o le a o mai ai i le malumalu e fai o latou tiute ma galulue, ae e lei momoe i le po atoa, ae ua iloa ua leiloloa uma le vaega tele o la latou tupe maua mo le tausaga atoa? Aisea o le a latou faaaogaina ai mea ua ‘uti’uti nei, ma punaoa ua matuai taua i le taimi nei e fesoasoani ai i se tasi ua matuai manaomia le fesoasoani, ae o la foi e feagai i latou ma tulaga faigata tautupe?

Afai e te malamalama i le uiga o le avea o se soo o Iesu Keriso, ona e silafia lea o le tali i nei fesili e lua.

O le osia o le feagaiga ia avea o se soo o Keriso, o le amataga lea o se faagasologa i le olaga atoa, ma e le faigofie i taimi uma le ala. A tatou salamo i a tatou agasala ma taumafai e fai le mea e finagalo o Ia tatou te faia, ma auauna atu i o tatou uso a tagata e faapei ona Ia finagalo ai, o le a mautinoa lava lo tatou avea ai e faapei o Ia. O le avea e faapei o Ia, ma tasi ma Ia o le sini maua luga lea ma le faamoemoega—ma o le faauigaga moni lea o le soo moni.

E faapei ona fesili le Faaola i Ona soo ina ua asiasi atu o Ia i le konetineti o Amerika, “O lea, o a ituaiga o

tagata e tatau ona outou i ai?” Ona tali lea o Ia i Lana fesili, sa Ia fetalai, “E moni ou te fai atu ia te outou, e pei lava o au nei” (3 Nifae 27:27).

O le avea e faapei o le Faaola e le o se galuega faigofie, aemaise i le lalolagi o loo tatou ola ai. Tatou te feagai ma faalavefau ma faigata i aso uma o o tatou olaga. E i ai le mafuaaga o lena mea, ma o se tasi o faamoemoega autu o le olaga nei. A tatou faitau i le Aperaaamo 3:25, “Ma o le a tatou tofotofoina ai i latou, e vaai pe latou te faia mea uma o soo se mea e poloaia ai i latou e le Alii lo latou Atua.”

O nei suega po o tofotofoga e eseese i natura ma le tele. Ae e leai se tasi o le a tuua lenei olaga e aunoa ma le ui atu ai. O le tele lava, tatou te vaai i tofotofoga e pei o le le aoga o se fuata po o le leai o se galuega, o le oti o se pele, ma’i, faaletonu i le tino, mafaufau po o lagona, mativa, po o le leai o ni uo. Peitai, e oo lava i le mauaina o faamoemoega aoga, e mafai lava ona aumai ai ma ona tulaga matautia o le faamaualuga e le matineia, lea tatou te faananau atili ai i mamalu o le lalolagi nai lo le faaneetaga o le lagi. E mafai ona aofia ai le lauiloa faalelalolagi, aloaia i tulaga lautele, gafatia tele faaletino, taleni faafaatufugaga po o taaloga, manuia, ma le tamaoaga. E faatatau i nei tofotofoga, atonu e i ai nisi o i tatou e i ai ni lagona e pei o ia na faaalua e Tevye i le *Ili Fagufagu i luga o le Taua luga*: “Afai e fetuuina ‘oa, talosia ia fasimate faatasi ai ma au e le Atua ma ia ou le toe ola mai lava!”¹

Ae o tofotofoga ia na ta’ua mulimuli, e ono sili atu ona taufaamata’u ma matautia ma sili atu ona faigata ona faatoilalo nai lo isi na ta’ua mua. O le a atiina ae lo tatou avea ai ma soo, ma e le faamaonia i ituaiga o tofotofoga tatou te feagai ae o le ala na tatou onosaia ai. Pei ona sa aoaoina ai i tatou e Peresitene Eyring: “O lea, o le tofotofoga aupito sili o le olaga o le vaai lea pe o le a tatou faalogo ma usitai i poloaiga a le Atua i le lotolotoi o afā o le olaga. E le o le onosaia o afā, ae o le filifili o le mea tonu a o tulai mai tofotofoga. Ma



o le mala o le olaga o le toilalo lea i lene tofotofoga, ma toilalo ai e toe foi atu ma le mamalu i lo tatou aiga faalelagi” (“Saunia Faaleagaga: Vave Amata ma Ia Mausali,” *Liahona*, Nov. 2005, 38).

O au o se tamamatua mitamita o fanau a fanau e 23. E le uma lava lo latou faaofoina o a’u i lo latou mala-malama i upumoni o le faavavau, e ui lava i le laiti o o latou tausaga. A o ou sauniuni mo lenei lauga, sa ou fesili atu ia i latou taitoatasi e auina mai ia te au se faauigaga puupuu po o le a le uiga ia i latou o le avea ma soo po o sē mulimuli ia Iesu Keriso. Sa ou mauaina uma ni tali matagofie mai ia i latou uma, ae ou te fia faasoa atu na o le tali lenei mai ia Peniamina e valu tausaga le matua: “O le avea ma soo o Iesu Keriso o lona uiga o le avea o se faataitaiga. O lona uiga, o le avea o se faifeautalai ma sauniuni e avea o se faifeautalai. O lona uiga o le au-auna atu i isi. O lona uiga e te faitauina tusitusiga paia ma fai au tatalo. O lona uiga, e te tausia ia paia le Sapati. O lona uiga, e te faalogo i uunaiga a le Agaga Paia. O lona uiga, e te alu i le lotu ma alu i le malumalu.”

Ou te ioe i le tali a Peniamina. O le avea ma soo o lona uiga o le faia ma le avea ai. A tatou usiusitai i Ana poloaiga ma auauna atu i o tatou uso a tagata, ona avea lea o i tatou ma soo ua sili atu o Iesu Keriso. O le usiusitai ma le gauai atu i Lona finagalo, e aumaia ai le mafutaga ma le Agaga Paia, faatasi ai ma na faamanuiaga o le filemu, olioli, ma le saogalemu lea e i ai pea lava i le sui lona tolu o le Aiga Atua. Ma e leai lava se isi auala e mafai ai ona maua. O le tulaga aoao, o le gauai atoatoa atu i Lona finagalo e fesoasoani ia i tatou e avea ai faapei o lo tatou Faaola. Ou te toe fai atu, o le avea e faapei o Ia ma tasi ma Ia, o le sini maualuga lea ma le faamoemoega—ma o le mea moni, o le faauigaga lea o le avea ai ma soo.

O le avea ma soo o le mea lea na ou vaai o faatino i le Malumalu o Colonia Juárez ma ona laueleele taulalata ane, a o toe faamautu e uso ma tuafafine i le faatuatua a latou tautinoga i



le Atua ma i le tasi ma le isi, e ui lava i mafatiaga faamomoiloto.

Ou te molimau atu a tatou usiusitai i Ana poloaiga, auauna atu i isi, ma gauai atu o tatou manao i Lona finagalo, e moni lava, o le a avea i

tatou ma Ona soo moni. Ou te moli-mau atu ai i le suafa o Iesu Keriso, amene. ■

NOTE

1. Tagai Joseph Stein, Jerry Bock, Sheldon Harnick, *Fiddler on the Roof* (1964), 61.



Saunia e Elder Don R. Clarke

○ Le Fitugafulu

Faamanuiaga o le Faamanatuga

O le a faamanuiaina i tatou a o tatou lagonaina le agaga faafetai mo le Togiola a Iesu Keriso, faafou a tatou feagaiga o le papatisoga, lagona le faamagaloga, ma maua musumusuga mai le Agaga Paia.

Sa ou ola ae i Rexburg, Idaho, lea sa uunaia ai a'u ma aoaoina e se aiga, uo, faiaoga ma ni taitai lelei lava. E i ai aafiaga faapitoa i olaga o i tatou uma ia e pai mai i o tatou agaga ma suia ai e faavavau ni mea. O se tasi o ia aafiaga sa tupu a o o'u talavou. O lenei aafiaga sa suia ai lo'u olaga.

Sa ou malosi lava i le Ekalesia ma faasolosolo atu ai i le Perisitua Arona. A o o'u talavou, sa fai mai lo'u faiaoga o Uso Iakopo, e tusi i luga o se kata ni mea sa ou mafaufau i ai i le taimi o le faamanatuga. Sa ave la'u kata ma amata loa ona ou tusitusi. O le mea muamua i luga o le lisi o se taaloga pasiketipolo sa matou manumalo ai i le po na muamua atu. Ona sosoo ai lea ma se tafaoga faamasani ina ua uma le taaloga, ma alu ai lava faapena le lisi. Sa matuai mamao lava ma mautinoa foi sa le'i matamata tetele ai le suafa o Iesu Keriso.

O Aso Sa taitasi uma e faatumu ai le kata. Mo se talavou ua umia le Perisitua Arona, sa faapea ona [ou] iloa ai se uiga fou, lautele ma faale-agaga o le faamanatuga ma le sauniga

faamanatuga. Sa ou tulimatai atu ma le naunautai i Aso Sa ma i le avanoa e ai ma inu ai i le faamanatuga, ona o le malamalama i le Togiola a le Faaola sa suia ai a'u. O Aso Sa uma lava seia oo mai i le taimi nei, pe a ou tago atu i le faamanatuga, e mafai ona ou vaaia ai la'u kata ma toe iloilo ai la'u lisi. O le taimi nei i la'u lisi ua i ai lava, ma e muamua i taimi uma le Faaola o tagata.

I le Feagaiga Fou tatou te faitau ai i le taimi sa faapotopoto ai le Faaola ma Ana Aposetolo i se afeafe aupito a luga mo le Tausamaaga o le Paseka.

“Ona tago ai lea o ia i le areto, ua faafetai, ua tofitofi ma avatu ia te i latou, ua faapea atu, O lo'u tino lenei, ua foaiina atu mo outou: *tou te faia le mea nei e fai ma faamanatuga ia te a'u.*”

“Sa faapea foi ona tago i le ipu, ina ua uma ona talisua, ua faapea atu, O lenei ipu o le feagaiga fou lea i lo'u toto, *ua faamaligiina mo outou.*”¹

Sa faia foi e Iesu le sauniga o le faamanatuga i le taimi o Lana asiasiga i sa Nifae.² Ua ou iloa le taua o nei mea e lua na tutupu.

Na saunoa Peresitene Tavita O. MaKei, “Ua ou lagonaina le uunaia o a'u e faamamafa atu le mea ua mama-nuina e le Alii e avea ma sauniga aupito sili ona taua i le Ekalesia, ma o le sauniga faamanatuga lea.”³ Afai tatou te saunia faalelei mo le faamanatuga, e mafai ona tatou suia o tatou olaga. Ou te fia fautuaina atu ni mataupu faavae se lima e mafai ona faamanuiaina ai o tatou olaga a o tatou taumamafa ma le agavaa i le faamanatuga.

I. Ia I Ai se Lagona o le Faafetai mo le Togiola a Iesu Keriso

O le mataupu faavae muamua o le i ai lea o se lagona o le faafetai i le Tama Faalelagi i le taimi o le faamanatuga o le Togiola a Lona Alo. O le tala lenei na faamatalaina e uiga i le tufaina o le faamanatuga:

“O le faamanatuga sa leai tele sona uiga moni ia te a'u seia oo i le Aso Sa sa faauuina ai a'u o se tiakono. O le aoauli lena sa ou tufaina ai le faamanatuga mo le uluai taimi lava. A o le'i oo i le sauniga, sa lapatai a'u e se tasi o tiakono, ‘Vaavaai mo Uso Schmidt. Atonu e ao ona e fafaguina o ia!’

Mulimuli ane na oo mai le taimi ou te auai ai i le tufaina o le faamanatuga. Sa lelei lava lo'u taulimaina o laina muamua e ono. Sa taumamafa tamaiti ma tagata matutua i le falaoa e aunoa ma se mafaufau tele i ai po o se faafitauli. Ona ou oo atu lea i le laina lona fitu, lea e saofai ai i taimi uma ia Uso Schmidt. Ae sa o'u tei. Nai lo le moe sa ala lelei o ia. E le pei o le toatele o isi sa ou auaina atu i ai, sa ia tago i le falaoa ma se agaga sa foliga mai sa manatunatu loloto ma le migao i ai.

“O ni nai minute mulimuli ane, sa ou toe oo atu ai foi ma le vai i le laina lona fitu. O le taimi la lenei sa sa'o lava la'u uo. Sa saofai Uso Schmidt ma lona ulu sa punou ma ona mata Siamani lapopoa sa moeiini. Sa mautinoa lava ua moegapepe. O le a la'u mea a fai pe tautala atu ai? Sa ou tilotilo atu mo sina taimi i ona fulufulumata, ua maanuminumi ma matua mai le tele o tausaga o galuega ma faigata. Sa auai o ia i le Ekalesia a o talavou ma sa oo o ia i le tele o sauaga i lona nuu laititi i Siamani. Sa faatele ona ou faalogo

i le tala i sauniga molimau. Mulimuli ane, sa ou filifili loa e eueu lemu lona tauau ma le faamoemoe e ala ae ai o ia. A o o'u aapa atu e fafagu, sa ea malie a'e lona ulu. Sa tafe ifo ona loimata i ona alafau ma a o o'u vaai atu i ona foliga, sa ou vaaia ai le alofa ma le olioli. Sa tago ae o ia ma uu le ipuvai. E ui lava sa na o le sefululua o'u tausaga i le taimi lena, ae o loo mafai lava ona ou manatuaina lelei le lagona sa ou maua a o ou tilotilo atu i lenei toaina malosi o ai ma inu i le faamanatuga. Sa ou iloaina e aunoa ma se masalosalo sa ia lagonaina se mea e uiga i le faamanatuga ou te le'i lagonaina lava. O iina sa ou naunau ai ou te fia manao foi ia ou lagonaina na lava lagona e tasi.”⁴

Sa talanoa Uso Schmidt ma le lagi, ma sa talanoa mai le lagi ia te ia.



II. Ia Manatua O Loo Tatou Faafouina Feagaiga o le Papatisoga

O le mataupu faavae lona lua o le manatua lea o loo tatou faafouina a tatou feagaiga o le papatisoga a o tatou taumamafa i le faamanatuga. O nisi o folafolaga tatou te faia, e pei ona tusia i tusitusiga paia, e aofia ai le:

“O mai i le lafu a le Atua, ma ta'ua o ona tagata, . . . e tauave avega a le tasi, . . . e faanoanoa faatasi ma e e faanoanoa . . . , ma tutu o ni molimau a le Atua.”⁵

“O mai i luma ma loto momomo ma agaga salamo, . . . ua loto e ave i o latou luga le suafa o Iesu Keriso, ua i ai se naunautai e auauna atu ia te ia e oo i le iuga,”⁶ ma manatua pea o Ia ma tausi i Ana poloaiga.⁷

O tatalo o le faamanatuga o se faamanatu o nei feagaiga. A tatou fetagofi atu i le faamanatuga, tatou te faafouina a tatou tautinoga ia ola i nei feagaiga. Ou te talitonu o se mea talafeagai le taulotoina o tatalo o le faamanatuga i o tatou mafaufau ma i o tatou loto. O le a fesoasoani lea ia i tatou e tulaui atu ai i le faafouina o a tatou feagaiga o le papatisoga. E tusa lava po o le 8 pe 80 tausaga lo tatou matutua i le taimi na tatou papatiso ai, ou te faamoemoe o le a le galo lava ia i tatou lena aso atoa ai ma feagaiga na tatou osia.

III. E Mafai Ona Tatou Lagonaina i le Taimi o le Faamanatuga le Faamagaloina o a Tatou Agasala

Lona tolu, i le taimi o le faamanatuga, e mafai ona tatou lagonaina ai le faamagaloina o a tatou agasala. Afai na tatou faaaluina se taimi a o le'i oo i le sauniga faamanatuga e salamo ai i a tatou agasala, e mafai ona tatou o ese mai le sauniga faamanatuga ma se lagona mama ma atoatoa. Na saunoa Peresitene Boyd K. Packer: “O le faamanatuga e faafou ai le faagasologa o le faamagaloga. O Aso Sa uma pe a tufaina le faamanatuga, o se sauniga lena e faafou ai le faagasologa o le faamagaloina. . . . O Aso Sa uma e te faamamaina ai oe lava ina ia, i le taimi e tatau ai, pe a e oti o le a mama lou agaga.”⁸ O le tago atu ma le agavaa i le faamanatuga e mafai ona fesoasoani tatou te lagona ai e pei o tagata o le nuu o le Tupu o Peniamina, o e, “sa faatumuina i le olioli, ina ua latou maua se faamagaloga o a latou agasala, ma latou maua le filemu o le mafaufau.”⁹

IV. E Mafai Ona Tatou Maua Musumusuga mo Tali i o Tatou Faafitauli

O le mataupu faavae lona fa e faapea e mafai ona tatou maua musumusuga mo tali i o tatou faafitauli i le taimi o le sauniga faamanatuga. A o

avea au ma se peresitene o le misiona i Polivia, sa ma maua ai ma lou toalu o, Mary Anne le faamanuiaga o le auai atu i le semina a peresitene o misi-ona faatasi ai ma Peresitene Henry B. Eyring. I lena fonotaga sa ia aoao mai ai e tolu ni auala o i ai e saunia ai ia faamanuiaina mai se fonotaga. E tatau ona tatou o mai ma o tatou faafitauli, ia faamaualalo e pei o tamaiti ua saunia e aoao, ma faatasi ai ma se manao e fesoasoani i fanau a le Atua.

A o tatou o mai ma le faamaualalo i le sauniga faamanatuga, e mafai ona faamanuiaina i tatou ia lagona musumusuga mo tali i o tatou faafitauli o aso taitasi. E ao ona tatou o mai saunia, ia naunau e faalogo, ma ia le faalavelaveina. I tusitusiga paia tatou te faitau ai, “Ae, faauta, ou te fai atu ia te oe, e ao ina e *suesue i ai* i lou mafaufau; ona ao lea ona e *ole mai ia te a'u pe ua sa'o*, ma afai ua sa'o o le a Ou faia *ia mu lou loto* i totonu ia te oe; o lea, o le a e lagona ai ua sa'o.”¹⁰ E mafai ona tatou iloa le mea e tatau ona tatou faia e fofo ai o tatou faafitauli.

V. O Le Taumamafa ma le Agavaa i le Faamanatuga O Le A Fesoasoani Ia i Tatou ia Faatumulia i le Agaga Paia

O le mataupu faavae lona lima, o le taumamafa ma le agavaa i le faamanatuga, o le a fesoasoani ia i

tatou ia faatumulia i le Agaga Paia. I le faatinoina o le faamanatuga i le taimi o Lana asiasiga i sa Nifae, sa fetalai atu ai Iesu, “O ia o le e ai i lenei areto ua ai o ia i lo’u tino mo lona agaga; o ia o le e inu i lenei uaina ua inu o ia i lo’u toto mo lona agaga; ma o le a le fia ai lava pe fia inu lona agaga, ae o le a faatumuina.”¹¹ Sa folafola atu ia i latou afai latou te fia aai ma fia feinu i le amiotonu, o le a faatumulia i latou i le Agaga Paia. O loo folafola mai foi i le tatalo o le faamanatuga afai tatou te ola e tusa ai ma a tatou feagaiga, o le a tatou maua pea Lona Agaga e faatasi ma i tatou.¹²

Na saunoa Elder Melvin J. Ballard: “O a’u o se molimau o loo i ai se agaga e auai i le faataunuaina o le faamanatuga lea e aumaia le mafanafana i le loto mai le ulu seia oo i vae; e te lagonaina le faamaloloina o manu’a o le agaga, ma le aveesea o le avega. O le mafanafana ma le fafia e oo mai i le loto e mama ma manao moni e taumafa i lenei taumafataga faaleagaga.”¹³

O le a faamanuaina i tatou a o tatou lagonaina le agaga faafetai mo le Togiola a Iesu Keriso, faafou a tatou feagaiga o le papatisoga, lagona le faamagaloga, ma maua musumusuga mai le Agaga Paia a o tatou taumafa i le faamanatuga i vaiaso taitasi. O le a avea i taimi uma ma se sauniga faamanatuga maoae pe afai o le faamanatuga o le totonugalemu lea o a tatou tapuaiga. E faailoa atu lo’u agaga faafetai mo le Togiola a Iesu Keriso. Ou te iloa o loo soifua o Ia. I le suafa o Iesu Keriso, amene. ■

FAAMATALAGA

1. Luka 22:19–20; faapoopo le faamamafa.
2. Tagai 3 Nifae 18.
3. David O. McKay, i le Conference Report, Oke. 1929, 11.
4. *Book of Mormon Student Manual* (Church Educational System manual, 1979), 417.
5. Mosaea 18:8–9.
6. Mataupu Faavae ma Feagaiga 20:37.
7. Tagai Mataupu Faavae ma Feagaiga 20:77.
8. Boyd K. Packer, *Mine Errand from the Lord* (2008), 196.
9. Mosaea 4:3; faapoopo le faamamafa.
10. Mataupu Faavae ma Feagaiga 9:8; faapoopo le faamamafa.
11. 3 Nifae 20:8.
12. Tagai Mataupu Faavae ma Feagaiga 20:77.
13. Melvin J. Ballard, in Bryant S. Hinckley, *Sermons and Missionary Services of Melvin Joseph Ballard* (1949), 149.



Saunia e Elder David A. Bednar

○ Le Korama a Aposetolo e Toasefululua

Faaliliuina i le Alii

O le iloaia e moni le talalelei, o le fatu lea o se molimau. O le faamaoni e le aunoa foi i le talalelei, o le fatu lea o le liuaina.

Etaulai atu la’u savali i sootaga i le va o le mauaina o se molimau e faapea o Iesu o le Keriso ma le faaliliuina ia te Ia ma Lana talalelei. E masani lava, e eseese ma patino lo tatou taulimaina o autu o le molimau ma le faaliliuina. Peitai, tatou te maua se manatu taua ma se talitonuga maumaututu faaleagaga e sili atu, pe a tatou mafaufau faatasi i mataupu taua nei e lua.

Ou te tatalo ia aoao ma faamalamalamaina i tatou taitoatasi e le Agaga Paia.

Pe Se a La Outou Upu ia te Au Po o Ai?

E tele mea e mafai ona tatou aoaoina e uiga i le molimau ma le liua mai le misiona a le Aposetolo o Peteru.

Ina ua malie mai Iesu i le talafatai o Kaisareia Filipi, sa Ia tuuina atu le fesili sutesue lenei i Ona soo: “Pe se a la outou upu ia te au po o ai?”

Sa tali sa’o atu Peteru:

“O oe o le Keriso, o le Alo o le Atua soifua.

“Ona tali atu ai lea o Iesu, ua faapea atu ia te ia, Amuia oe Simona Paiona; aua e le se tagata na faaali atu ai ia te oe, a o lo’u Tama o i le lagi” (Mataio 16:15–17).

E pei ona molimauina i le tali a Peteru, o se molimau o le silafia patino o le upumoni faaleagaga e maua e ala i faaaliga. O le molimau o se meaalofo

mai le Atua ma o loo avanoa mo Ana fanau uma. Soo se tagata lava e sailia ma le faamaoni le upumoni, e mafai ona maua se molimau e ala i le faaaogaina o “sina vaega itiiti o le faatuatua” ia Iesu Keriso e “tofotofo ai” (Alema 32:27) ma “faataitai ai le mana o le upu” (Alema 31:5), e gauai atu ai “i uunaiga a le Agaga Paia” (Mosaea 3:19), ma fagua ai i le Atua (tagai Alema 5:7). E aumaia e le molimau le tiutetauave patino faateleina e tali atu ai, ma o se faapogai o le faamoemoe, mautinoa, ma le olioli.

O le sailia ma le mauaina o se molimau o le upumoni faaleagaga e manaomia ai le fesili, saili, ma le tu’itu’i (tagai Mataio 7:7; 3 Nifae 14:7) ma se loto faamaoni, manatu moni, ma le faatuatua i le Faaola (tagai Moronae 10:4). O elemene faavae o se molimau o le iloa lea o loo soifua le Tama Faalelagi ma e alofa ia i tatou, o Iesu Keriso o lo tatou Faaola, ma ua toefuatai mai le atoaga o le talalelei i le lalolagi i nei aso e gata ai.

Pe A Liua Mai Oe

A o aoao atu e le Faaola Ona soo i le Talisuaga Mulimuli, na Ia fetalai atu ia Peteru:

“Simona, Simona e, faauta, ua manao tele Satani . . . ia lulu ia te outou pei o le saito:



“A ua ou faatoga mo oe, ina ne’i mavae lou faatuatua; a o oe foi, pe a liua mai oe, ona e faamalosi ai lea i ou uso” (Luka 22:31–32).

O le mea mata’ina, o lenei Apose-tolo maoae sa talanoa ma savavali faatasi ma le Matai, sa molimauina le tele o vavega, ma e i ai se molimau malosi i le paia o le Faaola. Ae na oo lava ia Peteru sa moomia se aoaoga faaopopo mai ia Iesu e uiga i le mana o le Agaga Paia e faaliliuina ai ma faamamaina, ma lana matafaioi e auauna atu ai ma le faamaoni.

O le natura lava o le talalelei a Iesu Keriso e manaomia ai se suiga faavae ma le mausali i a tatou amioga lea e mafai e ala i le Togiola a le Faaola. O le liua moni e aumaia ai se suiga i lou talitonuga, o lou loto, ma le olaga e talia ai ma usitai atu i le finagalo o le Atua (tagai Galuega 3:19; 3 Nifae 9:20) ma e aofia ai se tautinoga maua’i e avefa ma soo o Keriso.

O le faaliliuina o se fausaga faavae faateleina, loloto, ma lautele o le molimau. O le taunuuga o faaaliga mai le Atua, e o faatasi ma le salamo o le tagata lava ia, usitai, ma le maelega. Soo se tasi e saili ma le faamaoni i le upumoni, e mafai ona liua i le iloa o le suiga tele o le loto ma fanauina faaleagaga i le Atua (tagai Alema 5:12–14). A tatou faamamaluina sauniga ma

feagaiga o le faaolataga ma le faaeaga (tagai MF&F 20:25), “fetaomi atu i luma ma le tumau ia Keriso” (2 Nifae 31:20), ma tumau i le faatuatua e oo i le iuga (tagai MF&F 14:7), e avefa i tatou o tagata fou ia Keriso (tagai 2 Korinito 5:17). O le liua o le ofoina atu lea o i tatou lava, le alofa, ma le lotonuu, tatou te tuu atu i le Atua i le lotofaafetai mo le meaalofo o le molimau.

Faataitaiga o le Liua o loo i le Tusi a Mamona

E tumu le Tusi a Mamona i tala musuia o tagata ua liua. Na tautino mai e Amaleki, o se suli o Iakopo: “Ou te manao ia outou o mai ia Keriso, o lē o le Paia e Toatasi o Isaraelu, ma taumamafa i lana olataga, ma le mana o lana togiola. Ioe, o mai ia te ia, ma tuu atu o outou agaga atoa e fai ma taulaga ia te ia” (Ominae 1:26).

O le iloina e ala i le mana o le Agaga Paia o Iesu o le Keriso, e taua ma e tata ai. Ae o le o mai faamaoni ia te Ia, ma tuuina atu o tatou agaga atoa e fai ma taulaga, e manaomia ai le tele o isi mea nai lo le na o le iloa. O le liua e manaomia ai o tatou loto atoa, o lo tatou malosi atoa, ma o tatou mafaufau ma le malosi atoa (tagai MF&F 4:2).

Na tali atu le nuu o le Tupu o Peniamina i ana aoaoga i lo latou alalaga atu, “Ioe, ua matou talitonu i upu uma na e saunoa mai ai ia te i matou; o lenei foi, ua matou iloa lo latou mautinoa ma le moni, ona o le Agaga o le Alii Mamana Aoao, lea ua ia faia se liuga tele i totonu o i matou, po o i totonu o o matou loto, ua le toe i ai so matou manao e fai mea leaga, ae ia faia mea lelei e le aunoa” (Mosaea 5:2). O le taliaina o upu na tautalaga, maua se molimau o le moni, ma faaaga le faatuatua ia Keriso na maua ai le suiga tele o le loto ma se naunautaiga mautu e faaleleia atili.

O sa Lamana na liua i le tusi a Helamana, o loo faamatalaina ua i ai “i le ala o lo latou tiute, ma ua latou savavali ma le migao i luma o le Atua, ma ua latou tausii ana poloaiga ma ana tulafono ma ana faamasinoga. . . .

“ . . . Ua latou taumafai ma le filiga e le faavaivai ina ia mafai ona latou aumai o e o totoe o o latou uso i le malamalama o le upumoni” (Helamana 15:5–6).

E faapei ona faamamafa mai e nei faataitaiga, o uiga taua lava e o faatasi ma le liua o le i ai lea o se suiga tele o o tatou loto, i ai se uiga e faia pea le lelei, ma faataunu o tatou tiute,



savavali ma le migao i luma o le Atua, tausia o poloaiga, ma auauna atu ma le maelega atoatoa. Ua manino, o nei agaga faamaoni ua matua tuuto loloto atu i le Alii ma Ana aoaoga.

Avea ma Se ua Liua

E tele taimi o le liuaina o se faagasologa e faifai pea, ae le o se mea e tupu i se taimi e tasi e mafua mai i se aafiaga mamana pe ofoofogia foi. O lea upu ma lea upu, e faasolosolo malie toetoe lava ina le matauina, o o tatou faamoemoega, o o tatou mafau-fauga, o a tatou upu, ma a tatou mea e fai e ogatusa ma le finagalo o le Atua. O le liua i le Alii e manaomia ai le naunautai ma le onosai.

Na faailoa mai e Samuelu le sa Lamana ni elemene autu se lima o le avea ma se ua liua i le Alii: (1) talitonu i aoaoga ma valoaga a perofeta paia e pei ona tusia i tusitusiga paia, (2) faaaoga o le faatua-tua i le Alii o Iesu Keriso, (3) salamo, (4) lagonaina

o se suiga tele o le loto, ma le (5) tutumau ma mausali i le faatua-tua” (tagai Helamana 15:7–8). O le mamanu lenei e tau atu i le liuaina.

Molimau ma le Liuaina

O le molimau o le amataga lea ma o se mea e muai moomia e faaaauai ai le liuaina. O le molimau o se vaega lea e amata ai; e le o le taunuuga muli-muli lea. O le molimau malosi o le faavae lea e atiae ai le liuaina.

O le molimau lava ia e le lava lea e puipuia ai i tatou mai afa o le pogisa ma mea leaga o aso e gata ai, lea o loo tatou ola ai. O le molimau e taua ma e tata ai ae e le lava e maua ai le malosiaga faaleagaga ma le puipuiga tatou te manaomia. O nisi o tagata o le Ekalesia e i ai molimau, ua vaivai faaleagaga ma ua pauu ese atu ai. E lei gafatia e lo latou iloa faaleagaga ma tautinoga ia luitau sa latou feagai.

O se lesone taua e uiga i le sootaga

i le va o le molimau ma le liuaina, ua vaaia i le galuega faafaifeautalai a atalii o Mosaea.

“Ma e pei ona mautinoa o loo soifua le Alii, mautinoa tele lava e pei o le toatele o e na talitonu, pe e pei le toatele o e na aumai i le malamalama o le upumoni, e ala i le talaiga a Amona ma ona uso, e tusa ma le agaga o faaaliga ma valoaga, ma le faia e le mana o le Atua o vavega e ala atu ia te i latou—ioe . . . e pei ona soifua le Alii, o le toatele o sa Lamana o e na talitonu i la latou talaiga, ma faaliliuina i le Alii, sa lei pauu ese lava.

“Ona sa avea i latou ma tagata amiotonu; sa latou tuu i lalo auupega o lo latou fouvale, sa latou le toe tau faasaga i le Atua. . . .

“O lenei, o i latou nei o e na faaliliuina i le Atua” (Alema 23:6–8).

O elemene taua o loo faamatalaina i nei fuaiupu: (1) *o le malamalama o le upumoni*, lea e mafai

ona faamatalaina o se molimau, ma le (2) *faaliliuina i le Alii*, lea ua ou malamalama i ai o le liua lea i le Faaola ma Lana talalelei. O lea, o le tuufaatasiga mamana o le molimau ma le liuaina i le Alii e fua mai ai le tumau ma le mausali ma maua mai ai le puipuiga faaleagaga.

Sa lei pauu ese lava i latou ma ua lafoai “auupega o lo latou fouvale, sa latou le toe tau faasaga i le Atua.” O le faataatia ese o “auupega o le fouvale” e pei o le manatu faapito, faamaua-luga, ma le le usiusitai e tele atu mea e manaomia ai nai lo le na o le talitonu ma le iloa. O le talitonuga maumau-tutu, lotomauualalo, salamo, ma le usiusitai e ta’imua i le lafoaiina o a tatou auupega o le fouvale. Pe o tatou umiaina pea ni auupega o le fouvale lea e taofia ai i tatou mai le liua i le Alii? Afai o lea, ua tataui nei loa ona tatou salamo.

Matau sa lei liua sa Lamana i faifeautalai sa aoaoina i latou, pe o polokalama maoae a le Ekalesia. E lei faaliliuina i latou i uiga o o latou taitai, po o le faasaoina o le talatuu faaleaganuu po o uputuu a o latou tama. Sa faaliliuina i latou i le Alii—ia te Ia o le Faaola ma Lona paia ma le aoaoga faavae—ma sa latou lei pauu ese lava.

O le molimau o se malamalama faaleagaga o le upumoni e maua mai le mana o le Agaga Paia. O le liua faifai pea o se tuuto lea e le aunoa i le upumoni faaalua tatou te mauaina—ma se loto e naunau mo mafuaaga amiotonu. O le iloa e moni le talalelei, o le fatu lea o se molimau. O le

faamaoni e le aunoa foi i le talalelei, o le fatu lea o le liuaina. E tatau ona tatou iloa e moni le talalelei ma ia faamaoni foi i le talalelei.

Molimau, Liuaina, ma le Faataoto i Taupou e Toasefulu

Ua ou manao nei e faaoga se tasi o le mau faamatalaga talafeagai o taupou e toasefulu e faamalamalamaina ai le sootaga i le va o le molimau ma le liuaina. O taupou e toasefulu, o e sa popoto ma le tolima sa valelea, na ave a latou lamepa ma o e faafetaiai i le faatoafaiava. Faamolemole ia mafau-fau i lamepa na faaoga e taupou, o ni lamepa o le molimau. Na ave e taupou valelea a latou lamepa o molimau ae leai se suauu na aveina. Mafau-fau i le suauu, o le suauu o le liuaina.

“A o e popoto ua ave ni suauu [o le liuaina] i a latou fagu faatasi ma a latou lamepa [o molimau].

“Ua tuai mai le faatoafaiava, ona taufaitulemomoe ai lea o i latou uma, ua momoe lava.

“A ua oo i le tulua o po, ona sau ai lea o le alaga, Faaui, ua sau le faatoafaiava; ina o ia outou e faafetaiai ia te ia.

“Ona tutu ai lea o ia taupou uma lava, ma teuteu a latou lamepa [o molimau].

“Ona fai atu ai lea o e valea i e popoto, Au mai ni a outou suauu [le suauu o le faaliliuina]; ma matou; aua o le a mamate a matou lamepa [o molimau].

“A ua tali mai o e popoto, ua faapea mai, Ne’i le lava ia i matou ma outou; a e lelei ona outou o i e faatau

ma faatau mai ai ni a outou” (Mataio 25:4–9).

Pe na manatu faapito ea taupou popoto ma le mananao e faasoa atu, pe na latou ta’u sa’o atua e le mafai ona nonoina le suauu o le liuaina? Pe mafai ea ona e tuuina atu i se isi tagata le malosiaga faaleagaga lea e te maua mai i le usiusitai e le aunoa i poloaiga? Pe mafai es ona pasi atu i se tasi o manaomiaina, le malamalama e maua mai i le sutesue o tusitusiga ma le maelega ma le mafau-fau loloto? Pe mafai ona sii atu i se tagata o loo feagai ma mafatiaga po o se luitau tele, le filemu e aumaia e le talalelei i se tagata faamaoni o le Au Paia o Aso e Gata Ai? O le tali manino lava i nei fesili o le leai.

E pei ona faamamafa lelei mai e taupou popoto, e tatau ia i tatou taitoatasi ona “faatauina mo i tatou lava.” Sa le’i faamatalaina e nei tamaitai musuia se faiga faapisinisi; ae, sa latou faamamafaina lo tatou tiutetau-ave faaletagata lava ia, e faamumu a tatou lamepa o molimau ma ia lava se sapalai o le suauu o le liuaina. O lena suauu taua, e maua i le tasi le mataua i le taimi—“o lea upu ma lea upu [ma] lea mataupu ma lea mataupu” (2 Nifae 28:30), i le onosai ma faifai pea. E leai ni auala ‘alo o i ai; leai ni taimi faafua-sei e tapena ai.

“O le mea lea, ia faamaoni, ma tatalo i taimi uma, ma teuteu ma faamumu a outou lamepa, ma ia i ai le suauu ia te outou, ina ia mafai ona outou saunia ai i le afio mai o le Faatoafaiava” (MF&F 33:17).

Molimau

Ou te folafola atu a tatou malamalama i le upumoni, ma ua faaliliuina i le Alii, o le a mautu lo tatou tutumau ma le mausali ma o le a le pauu ese lava. O le a tatou faataatia ese ma le naunautai a tatou auupega o le fouvale. O le a faamanuiaina i tatou i le malamalama susulu o a tatou lamepa o molimau, ma lava le sapalai o le suauu o le liuaina. Ma a oo ina liua atoatoa i tatou taitoatasi, o le a tatou faamalolosia o tatou aiga, a tatou uo, ma a tatou paaga. Ou te molimau atu ai i nei upumoni, i le suafa paia o le Alii o Iesu Keriso, amene. ■





Saunia e Peresitene Thomas S. Monson

Ia Mafuta le Atua ma Outou Seia Tatou Toe Feiloai

*A tatou teuina i o tatou loto ma faaaoga i o tatou olaga
ia savali o nei aso e lua, o le a faamanuiaina i tatou.*

O u uso e ma tuafafine, ua tatou oo mai i le faaiuga o se tasi konafesi aoao musuia. Ua fafagaina a'u lava faaleagaga ma ua siitia ma ua ou iloa foi, sa outou lagonaina le agaga faapitoo o lenei konafesi.

E momoli atu la matou faafetai mai le taele o o matou loto ia i latou uma sa auai i soo se itu i le faatinoina. Sa matagofie ona aoaoina ma toe faamafaina upumoni o le talalelei. A tatou teuina i o tatou loto ma faaaoga i o tatou olaga ia savali o nei aso e lua, o le a faamanuiaina i tatou.

E pei ona masani ai, o le a maua taualumaga o lenei konafesi i lomiga a sau o mekasini o le *Ensign* ma le *Liahona*. Ou te fautuaina outou e toe faitau i lauga ma mafaufau loloto ai i savali o loo i ai. Ua ou iloa i lo'u lava olaga, e tele atu isi mea ou te mauaina mai nei lauga musuia pe a ou suesue i ai i se tulaga e loloto atu.

Ua i ai a tatou faasalalauga e le mafaatusalia o le konafesi, ua oo atu ai i le salafa o konetineti ma atuvasa i tagata i soo se atunuu. E ui ina matou

mamao mai ma outou, ae ua matou lagonaina o outou agaga ma e momoli atu o matou alofaaga ma le agaga talisapaia mo outou.

I o tatou Uso ua faamalolo i lenei konafesi, e momoli atu le agaga faafetai mai le taele o loto o i matou uma mo tausaga e tele o la outou tautua tuuto. E le mafaitaulia i latou ua faamanuiaina i la outou sao i le galuega a le Alii.

Uso e ma tuafafine, talu ai nei sa faamanatuina ai lo'u aso fanau lona 85, ma e tumu lo'u loto i le faafetai mo tausaga taitasi ua tuuina mai e le Alii ia te au. Pe a ou toe manatunatu i aafiaga o lo'u olaga, ou te faafetai ia te Ia mo Ana faamanuiaga e tele mo au. E pei ona sa ou ta'ua ai i la'u savali i le taeao nei, ua ou lagonaina lava Lona aao o taitaia a'u taumafaiga a o ou taumafai ma le naunautai e auuna atu ia te Ia ma tautuaina outou uma.

O le tofi o le Peresitene o le Ekalesia o se tofi e matuai manaomia le gauai atoatoa i ai. E maeu lo'u

faafetai mo o'u fesoasoani faamaoni e toalua, o ē galulue feoeoea'i ma e naunau i taimi uma ma le tomai e le mafaatusalia e fesoasoani i le galuega e oo mai i le Au Peresitene Sili. E momoli atu foi la'u faafetai tele i tamalii o le Korama a Apisetolo e Toasefululua. Latou te galulue ma le le faalogologo tiga i le galuega a le Matai, faatasi ai ma uso o Korama a Fitugafulu e tuuina atu ai le fesoasoani musuia ia i latou.

Ou te fia faamalo atu ia te outou, o'u uso e ma tuafafine, po o fea lava o outou i ai i le salafa o le lalolagi, mo mea uma o loo outou faia i a outou uarota ma paranesi, o a outou siteki ma itu. A outou faataunuuna o outou valaauga ma le naunautai pe a talosagaina ai outou, ua outou fesoasoani i le fausiaina o le malo o le Atua i le lalolagi.

Ia tatou fetausia'i, fesoasoani le tasi i le isi i taimi e manaomia ai le fesoasoani. Aua nei o tatou faitio pe faamasinosino, ae ia tatou lavapapale, ma mulimuli i le faataitaiga a le Faaola



o le agalelei ma le agaalofo. Faatasi ai ma lona lagona, ia tatou naunau e auauna atu i le tasi ma le isi. Ia tatou tatalo mo musumusuga ia iloa manaoga o i latou o loo siomia ai i tatou, ona tatou o atu lea ma tuuina atu le fesoasoani.

Ia tatou olioli a o tatou ola i o tatou olaga. E ui o loo tatou ola i taimi ua matua faateleina le matautia, e alofa le Alii ia i tatou ma o loo silafia i tatou. E i ai pea lava o Ia i la tatou itu pe a tatou faia le mea sa'o. O le a fesoasoani o Ia ia i tatou i taimi tatou te manaomia ai. E oo mai faigata i o tatou olaga, o faafitauli tatou te le faamoemoeina ma o le a tatou le filifilia lava. E leai se tasi o i tatou e le oo i ai. O le faamoemoea o le olaga nei, o le aoao ma ola ai ina ia avea atili e faapei o lo tatou Tama, ma o le tele lava, o taimi faigata e tele atu mea tatou te aoaoina ai, tusa lava po o le a le tiga o lesonea. E mafai foi ona faatumulia o tatou olaga i le olioli pe a tatou mulimuli i aoaoga o le talalelei a Iesu Keriso.

Ua apoapoai mai le Alii, "Ia outou loto tetele; ua ou manumalo i le lalolagi."¹ Se fiafia ina a tele ua aumaia e lenei malamalama ia i tatou. Sa soifua o Ia mo i tatou ma sa maliu o Ia mo i tatou. Na Ia totogiina le tau mo a tatou agasala. Ina tatou mulimuli ia i Lana faataitaiga. Ina tatou faaali atu ia o lo tatou agaga faafetai tele ia te Ia e ala i le taliaina o Lana taulaga ma ola ai i ni olaga o le a faaagavaaina ai i tatou e toe foi atu i se aso ma nonofo faatasi ai ma Ia.

E pei ona sa ou ta'ua i konafesi ua mavae, ou te faafetai atu mo a outou tatalo mo au. Ou te manaomia lava na tatalo; ou te lagonaina lava. O i matou o le Au Pulega Aoao, matou te manatuaina foi outou uma ma tatalo mo faamanuiaga silisili a lo tatou Tama Faalelagi mo outou.

O lenei, ou uso e ma tuafafine pele, tatou tolopo mo le ono masina. Ia mafuta le Atua ma outou seia tatou toe feiloai foi i lona taimi. I le suafa o lo tatou Faaloa ma le Togiola, o Iesu Keriso le Alii, amene. ■

FAAMATALAGA

1. Ioane 16:33.



Saunia e Linda K. Burton

Peresitene Aoao o le Aualofo

Pe Ua Tusia ea i o Tatou Loto le Faatuatua i le Togiola a Iesu Keriso?

O le osia, tausia, ma olioli i a tatou feagaiga o le a avea ma faamaoniga ua tusia moni le Togiola a Iesu Keriso i o tatou loto.

Ou uso pele, ua tele masina o avatu lo'u mafaufau ma lo'u loto ia te outou a o ou manatunatu loloto i lenei tiutetauave faigata. E ui ou te lagonaina lo'u le agavaa i le tiutetauave ua tuu mai ia te au, ae ou te iloa o le valaauga na sau mai i le Alii e ala mai i Lana perofeta filifilia, ma mo le taimi nei, ma ua lava foi lea. Ua aoao mai e tusitusiga paia "pe mai le leo [o le Alii] po o le leo o [Ana] auauna, ua tutusa lava ia."¹

O se tasi o meaalofo e o faatasi ma lenei valaauga o le faamautinoaga lea e alofa le Tama Faalelagi i Ona afafine uma. Ua ou lagonaina Lona alofa mo i tatou taitoatasi!

Faapei o outou, ou te fiafia lava i tusitusiga paia! I le tusi a Ieremia, tatou te maua ai se mau e pele i lo'u loto. Sa soifua Ieremia i se taimi ma se nuu faigata, ae sa faatagaina e le Alii e "muai vaai i se taimi o le faamoemoe i le taimi o le toe faapopotoina o Isaraelu"²—i o tatou taimi.

Sa valoia e Ieremia:

"Pe a mavae ia aso, o loo fetalai mai ai Ieova, ou te tuuina la'u tulafono i totonu ia te i latou, ma ou *tusi ai i o latou loto*; e fai foi a'u mo latou Atua, o i latou foi e fai mo'u nuu. . . .

". . . E iloa a'u e i latou uma lava, o tagatanuu atoa ma alii, o loo fetalai mai ai Ieova; aua ou te faamagalaga i a latou amio leaga, ma ou le toe manatua a latou agasala."³

O i tatou o tagata na vaai i ai Ieremia. Pe ua tatou valaaulia ea le Alii e tusia le tulafono, po o le mataupu i o tatou loto? Pe tatou te talitonu o le faamagalaga o loo maua i le Togiola lea na faasino i ai Ieremia, e faatatau ia i tatou?

I nai tausaga talu ai, sa faasoa mai ai e Elder Jeffrey R. Holland ona lagona e uiga i le faatuatua ua maua o paionia o e sa tauasa atu i le Vanu o Sate Leki, e oo lava i le taimi ua mavae le maliliu o a latou fanau. Na ia saunoa, "Latou te lei faia lona mea mo



Mataupu Faavae 1: “O mea uma lava e le talafeauga e uiga i le olaga, e mafai ona faasa’o i le Togiola a Iesu Keriso.”⁵

Tatou te molimau faatasi atu i le Togiola a lo tatou Faaola, o Iesu Keriso. O a matou molimau, faapei foi o outou, ua tusia i o matou loto a o matou feagai ai ma luitau ma faigata eseese ogaoga. A aunoa ma se malamalama i le fuafuaga atoatoa a le Tama Faalelagi o le fiafia, ma le Togiola a le Faaola e avea ma elemene tutotonu o lena fuafuaga, ma e mafai ona foliga ua le talafeauga nei luitau. Tatou te taufai oo uma i tofotofoga o le olaga. Peitai, o loto faamaoni ua tusia ai, “O mea uma lava e le talafeagai e uiga i le olaga, e mafai ona faasa’o i le Togiola a Iesu Keriso.

Aisea e faatagaina ai e le Alii mafatiaga ma puapuaga e oo mai ia i tatou i lenei olaga? I se faaupuga faigofie, o se vaega o le fuafuaga mo lo tatou tuputupu ae ma lo tatou alualu i luma! Sa tatou “alalaga fiafia”⁶ ina ua tatou iloina o le a tatou maua le avanoa e o mai ai i le lalolagi ia iloa le olaga faitino. Na aoao mai e Elder Dallin H. Oaks, “O lo tatou liua o loo manaomia, e tele lava ina ausia lelei e ala i le mafatia ma le puapuagatia nai lo le taugamalie ma le toafimalie lelei.”⁷

Na faapupula mai lenei upumoni i se faataitaiga a se uso paionia faatuatua. Sa faaipoipo Mary Lois Walker ina ua 17 ona tausaga ia T. Morris i St. Louis i, Misuri. Sa latou laasia laufanua valevalenoa ma le Au Paia i le 1853, ma ulu atu ai i le Vanu o Sate Leki ae faatoa atoa le tausaga talu ona la faaipoipo. I la latou malaga, sa mafatia i la’ua i puapuaga sa masani ai foi isi Au Paia. Peitai, e lei uma ai iina o la’ua mafatiaga ma puapuaga ina ua latou taunuu i le Vanu o Sate Leki. O le tausaga na sosoo ai, ina ua 19 ona tausaga, sa tusia ai e Mary: “Sa fanau le ma tama tama. . . . I se tasi afiafi, ina ua lua pe tolu ona masina . . . sa musumusu mai se mea ia te au, ‘O le a oti lau tama.’”

I le taimi o le taumalulu, na faiffo le malosi o le pepe. “Sa ma faia mea uma ma te mafaia, . . . ae na faasolo ina matua tigaina le pepe. . . . O le aso lua o Fepuari na maliu ai o ia . . . ma sa

se polokalama, latou te lei faia mo se gaoioiga faaagafesootai, sa latou faia ona sa i ai le faatuatua i le talalelei a Iesu Keriso i o latou agaga, sa i ai i le su o o latou ivi.”

Sa ia faamatalaina, ma le loto nutimomoia:

“E na o le pau lena o le ala na mafai ona tanuina ai e na tina [a latou pepe] i totonu o ni atigipusa falaoa ma fai mai, ‘O loo i se mea i o le nuu o le folafolaga. O le a tatou oo atu i le vanu.’

Na mafai ona latou faia lena tala ona o feagaiga ma aoaga faavae ma le faatuatua ma faaaliga ma le agaga.”

Na ia faaii i upu faatupu manatu nei: “Afai e mafai ona tatou taofiofia na uiga faaaliga i totonu o o tatou aiga ma le Ekalesia, atonu e tele isi mea o le a faataunuaina. Atonu e tele ni mea e le manaomia o le a toulua ese mai le taavaletoso po o o tatou olaga. Na ta’u mai ia te au faapea o na taavaletoso e le tele ni mea e ofi ai. E pei lava ona filifilia e o tatou tuua mea sa latou aveina, atonu o le seneturi 21 o le a faamallosia tatou e filifili. ‘O a mea e mafai ona tatou aveina i lenei taavaletoso?’ O le mea e taua o le aano o o tatou loto; o le mea lea e oo atu i le su o o tatou ivi.”⁴ Pe, i se isi faaupuga, o mea ia e *tusia i o tatou loto!*

I le avea ai o se au peresitene fou o le Aualofa, ua matou sailia ma le naunau le Alii ina ia iloa ai mea taua e finagalo o Ia matou te tuuina i le taavaletosolima a le Aualofa, e faaauau ai ona tulei i luma Lana galuega. Ua

matou lagonaina e finagalo le Tama Faalelagi ia muamua ona matou fesoasoani i Ona afafine faapelepele ia malamalama i le aoaga faavae o le Togiola a Iesu Keriso. A o tatou faia, matou te iloa o le a faateleina lo tatou faatuatua, ma faapena foi lo tatou manao ia ola amiotonu. Lona lua, a o matou mafaufau i le taua o le manaomia ona faamalolosia aiga ma auaga, ua matou lagonaina e finagalo le Alii ina ia matou faamallosia atu i Ona afafine faapelepele ia pipiimau ma le lotofiafia i a latou feagaiga. A tausisia feagaiga, ua faamalolosia foi aiga. Ma le mea mulimuli, ua matou lagonaina e finagalo o Ia tatou te galulue i le lotogatasi ma isi ausilali ma o tatou taitai perisitua, ma taumafai e sailia ma fesoasoani i e o manaomia ina ia agaigai i luma i le ala. O la matou tatalo faatauanau, ia taitasi i tatou ma tatala o tatou loto ma tuu atu i le Alii e tusia ai aoaga faavae o le Togiola, feagaiga, ma le lotogatasi.

E mafai faapefea ona faamoemoe tatou te faamalolosia aiga pe fesoasoani i isi sei vagana ai ua tatou tusia i o tatou lava loto se faatuatua mausali loloto ia Iesu Keriso ma Lana Togiola e le i’u? O le po nei ou te fia faasoa atu ai ni mataupu faavae o le Togiola afai e tusia i o tatou loto, o le a faateleina ai lo tatou faatuatua ia Iesu Keriso. Ou te faamoemoe o le malamalama i nei mataupu faavae o le a faamanuaina ai i tatou taitoatasi, pe o tatou o ni tagata e fou mai i le Ekalesia pe o ni ē foi ua leva ona auai.

ou inuina le ipu oona o le faamavae atu i lo'u lava toto ma aano." Ae e lei uma ai ona tofotofoga. Sa ma'i le toalua o Mary, ma e tolu vaiaso talu ona maliu le pepe, ae maliu foi o ia.

Na tusia e Mary: "O lea, a o sefulu-iva lava o'u tausaga, ma faavauvau i se vaitau puupuu e 20 aso, i lo'u toalua ma si a'u tama e toatasi, i se nuu ese e fiaselau maila le mamao mai lo'u aiga, ma se mauga o faigata ua tu mai i o'u luma . . . ma sa ou moomoo maimau e, pe ana ou oti faatasi ai ma nai a'u pele."

Sa faaauau le tala a Mary: "I se afiafi o se tasi Aso Sa, sa ma savalivali ai ma la'u uo. . . . na ou manatua ai le toesea o lo'u toalua ma lo'u matua tuulafoai-ina lava ma a'o ou tagi masusu, sa mafai ona ou vaai, e faapei o se faa-aliga faalemafaufau, i le mauga tifato o le olaga e tataua ona ou a'ea ma sa ou lagonaina le moni o lena mea faatasi ai ma se malosia tele. Sa lofituina au i le le fiafia, aua ua iloa e le fili le taimi e osofaia ai i matou, *peitai [o lo tatou Faaola o Iesu Keriso] e sili atu le malosi e laveai*. O le . . . fesoasoani na tuuina mai e le Tama, na mafai ai ona ou tau ma le autau uma, lea na foliga mai sa faasagatau mai ia te au i lena taimi."⁸

Sa aoaoina e Mary i vaitausaga mu'amu'a o le 19, e aumai e le Togiola le faamautinoaga, o mea uma e le o talafeauga i lena olaga, e mafai lava ona faasa'o—e oo lava i faanoanoaga e aupito loloto.

Mataupu Faavae 2: E i ai le mana i le Togiola e mafai ai ona tatou faaitoilaloina le tagata o le lalolagi ma aveai ai ma soo moni o Iesu Keriso.⁹

E i ai le ala e iloa ai ua tatou aoaoina se aoaoga faavae po o se mataupu faavae o le talalelei. O le taimi pe a mafai ona tatou aoaoina le aoaoga faavae po o le mataupu faavae i se ala e mafai ai e se tamaitiiti ona malamalama. O se punaoa taua e aoaoina ai le fanau ia malamalama i le Togiola, o se talafaatusa o loo maua i se lesonea a le Peraimeri. Atonu e mafai ona fesoasoani lena ia i tatou a o tatou aoaoina a tatou lava fanau, fanau a fanau, po o uo o isi tapuaiga e mananao ia malamalama i lena aoaoga faavae taua.



"Sa i ai se [fafine] sa savali i le auala ma pau ai i se lua loloto ma sa le mafai [e ia] ona sao mai i fafo. Po o le a lava le mea sa [ia] faia, sa le mafai a ona sau [ia] lava i fafo. Sa taufono mai le [fafine] mo se fesoasoani ma sa fiafia ina ua lagona atu e se tagata na pasi ane ai [o ia] ma sa ia tuutuu ifo ai i lalo se afeai i le lua. O lea na mafai ai e [ia] ona a'e mai i luga o le lua ma toe maua ai [lona] saolotoga.

"E faapei i tatou o le [fafine] i le lua. O le faia o le agasala, e pei o le pau i totonu o le lua, ma e le mafai ona tatou sao mai i fafo ia i tatou lava. E faapei lava ona lagona e le tagata na

savali ane le taufono a le [fafine] mo se fesoasoani, na auina mai e le Tama Faalelagi Lona Alo Pele e Toatasi e saunia le auala tatou te sao ai. O le Togiola a Iesu Keriso e mafai ona faatusa i le tuutuu ifo i lalo o le afeai i le lua; ua tatou maua ai le auala e fe'a'ei mai ai i fafo."¹⁰ Peitai, e tele atu mea ua faia e le Faaola nai lo le tuutuu ifo i lalo o le afeai. Na "afio mai o ia i lalo i totonu o le lua ma fai ai ina ia mafai ona tatou faaaogaina le afeai e sao mai ai."¹¹ "E faapei lava ona tatou i le [fafine] i le lua ona a'e mai i luga i le afeai, e tataua foi ona tatou salamo i a tatou agasala ma usitai i mataupu



faavae ma sauniga o le talalelei ina ia fe'a'ei mai ai i fafo o le lua ma aoga ai le Togiola i o tatou olaga. O lea, a uma mea uma e mafai ona tatou fai, ona mafai lea e le Togiola ona faagavaa-ina i tatou e toe foi atu i le afioaga o le Tama Faalelagi.”¹²

Talu ai nei sa ou maua ai le avanoa e feiloai ai i se paionia o ona po nei, o se afafine faapelepele o le Atua ma o se tagata faatoa liliu mai i le Ekalesia i Chile. O ia o se tina nofo toatasi ma sana fanau tama laiti e toalua. O le mana o le Togiola, na mafai ai e ia ona faagalo le taimi ua tuanai ae ua taumafai ma le faamaoni nei e avea o se soo moni o Iesu Keriso. A ou mafaufau ia te ia, ou te manatua ai se mataupu faavae sa aoao mai e Elder David A. Bednar: “E ese le iloa o Iesu Keriso na afio mai i le lalolagi e *maliu* mo i tatou—o se itu taua faalefaavae i le aoaoga faavae a Keriso. Peitai, e tatau foi ona tatou iloa talisapaia le finagalo o le Alii, e ala i Lana Togiola ma le mana o le Agaga Paia, ia *ola* i totonu ia i tatou—e le gata ia taitaiina ai i tatou ae ia faamanaina ai foi i tatou.”¹³

A o ma talanoaina ma lenei uso mai Chile se auala e tumau ai i le ala e tau atu i le ola e faavavau, sa ia faamauti-noa mai ma le sagisagi fiafia ia te au, ua

naunau o ia e faaauau ai i le ala. Sa alu ese o ia mai le ala i le tele o lona olaga, ma sa ia tautino mai e leai se mea “o i ai iina” i tua o le ala na toe manao e faafoi mai i lona olaga. Ua ola nei i totonu ia te ia le mana o le Togiola e mafai ai. Ua tusia ai i lona loto.

O lona mana e le gata ina mafai ai e i tatou ona fe'a'ei ese mai i lona lua, ae tatou te maua ai foi le mana e faaauau ai i le ala sa'o ma le vaaapiapi e toe foi atu ai i le afioaga o lo tatou Tama Faalelagi.

Mataupu Faavae 3: O le Togiola o le faamaoniga silisili lea ua tatou maua, i le alofa o le Tama mo Lana fanau.

Manaia pe a tatou manatunatu loloto i le saunoaga musuia lea a Elder Oaks: “Manatu i se tulaga mamafatu atonu na i ai i lo tatou Tama Faalelagi i le auina mai o Lona Alo e onosa'ia mafatiaga e le mafaamatalaina mo a tatou agasala. O le faamaoniga aupito silisili lea o Lona alofa mo i tatou taitoatasi!”¹⁴

O le faatinoga maua lava o le alofa e tatau ai ona tatou o ifo i o tatou tulivae i le tatalo ma le lotomaulalo e faafetai atu i lo tatou Tama Faalelagi i le tele o lona alofa mo i tatou na Ia auina mai ai Lona Alo Pele e Toatasi

ma atoatoa, e puapuagatia mo a tatou agasala, o tatou lototiga, ma mea uma e foliga e le talafeagai i o tatou lava olaga taitoatasi.

Manatua le fafine lea na saunoa talu ai nei Peresitene Dieter F. Uchtdorf? Na ia saunoa: “Na fai mai ma loimata se tasi tamaitai o le na aafia i ni tausaga i tofotofoga ma faanoanoaga faapea, “Ua ou iloa nei ua pei lava a'u o se 20-tala-pepa tuai—ua maanuminumi, masaesae, palapala, matafi, ma mafugafuga. Ae o a'u lava o se 20-tala-pepa. O loo i ai lo'u aoga. Atonu e ui lava ua le lelei o'u foliga, ma e ui ua ou palapala ma ua tuai, ae o loo atoa pea lo'u aoga, o se 20-tala'”¹⁵

Ua iloa e lenei fafine o ia o se afafine faapelepele o lona Tama Faalelagi, ma ua lava lona taua ia te Ia, ua auina mai ai Lona Alo e togiola mo ia lava. E ao i uso taitasi i le Ekalesia ona iloa le mea ua iloa e lenei fafine—o ia o se afafine faapelepele o le Atua. E faapefea i le iloa o lo tatou taua ia te Ia ona suia ai le ala tatou te tausia ai a tatou feagaiga? E faapefea i le iloa o lo tatou taua ia te Ia ona aafia ai lo tatou naunau e auaina atu i isi? E faapefea i le iloa o lo tatou taua ia te Ia ona faateleina lo tatou manao e fesoasoani atu ia i latou e manaomia ona malamalama i le Togiola e pei ona tatou i ai—ia matua loloto ifo i lalo? A oo ina tusia i le ta'ele o o tatou loto taitoatasi le aoaoga faavae o le Togiola, ona amata lea ona avea i tatou ma ituaiga o tagata e finagalo ai le Alii, pe a toe afio mai o Ia. O le a Ia silafia i tatou o ni Ona soo faamaoni.

Talosia ia matua'ia e le Togiola a Iesu Keriso se “suiga tele” i o tatou loto.¹⁶ A fagua i tatou i lenei aoaoga faavae, na folafola mai e se agelu a le Atua e avea ma “tala fiafia e olioli tele ai,”¹⁷ ou te folafola atu, o le a tatou lagonaina e faapei ona lagona ai e le nuu o le Tupu o Peniamina. Ina ua uma ona latou tatalo ma le malosilotele ia aoga le Togiola i o latou olaga, “sa faatumulia i latou i le olioli”¹⁸ ma sa latou “naunau e ulu atu i se feagaiga ma le . . . Atua e faia lona finagalo ma usiusitai i ana poloaiga i mea uma.”¹⁹ O le osia, tausia, ma

olioli i a tatou feagaiga o le a avea ma faamaoniga ua tusia moni le Togiola a Iesu Keriso i o tatou loto. Faamole-mole ia manatua, uso e nei mataupu faavae e tolu:

1. “O mea uma lava e le talafeauga e uiga i le olaga, e mafai ona faasa’o e ala i le Togiola a Iesu Keriso.”²⁰
2. E i ai le mana i le Togiola e mafai ai e i tatou ona faatoilalo le tagata o le lalolagi ma avea ai o ni soo moni o Iesu Keriso.²¹
3. O le Togiola o le faamaoniga silisili lea ua tatou maua o le alofa o le Tama mo Lana fanau.²²

“Pe a mavae ia aso, ua fetalai mai ai Ieova, ou te tuuina la’u tulafono i totonu ia te i latou, ma ou *tusi ai i o latou loto*; e fai foi a’u mo latou Atua, oi latou foi e fai mo’u nuu.”²³ Ou te valaaulia i tatou ina ia ole atu i le Alii e tusia nei mataupu faavae o le Togiola i o tatou loto. Ou te molimau atu e moni ia. I le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 1:38.
2. *Feagaiga Tuai: Tusi Lesona a le Faiaoga Aoaoga Faavae o le Talalelei* (2001), 198.
3. Ieremia 31:33–34; faaopoopo le faamamafa.
4. Jeffrey R. Holland, “Felafolefoaiga,” *Fonotaga Faaleaoga a le Au Taitai i le Lalolagi Atoa*, Sep. 9, 2008, 28.
5. *Talai La’u Talalelei: O Se Taitai i le Galuega Faafaijeautalai* (2004), 52.
6. Iopu 38:7.
7. Dallin H. Oaks, “O Le Lui ia Avea Ai,” *Liahona*, Ian. 2001, 42.
8. Autobiography of Mary Lois Walker Morris (copy in possession of Linda Kjar Burton).
9. Tagai David A. Bednar, “O Le Togiola ma le Malaga i le Olaga Nei,” *Liahona*, Ape. 2012, 12–19.
10. *Peraimeri 7: Feagaiga Fou* (1997), 104.
11. Joseph Fielding Smith, *Doctrines of Salvation*, comp. Bruce R. McConkie, 3 vols. (1954–56), 1:123.
12. *Peraimeri 7*, 104.
13. David A. Bednar, *Liahona*, Ape. 2012, 14.
14. Dallin H. Oaks, “Alofa ma le Tulafono,” *Liahona*, Nov. 2009, 26.
15. Dieter F. Uchtdorf, “O Outou o O’u Lima,” *Liahona*, May 2010, 69.
16. Tagai Alema 5:12–14.
17. Mosaea 3:3.
18. Tagai Mosaea 4:1–3.
19. Tagai Mosaea 5:2–5.
20. *Talai La’u Talalelei*, 52.
21. Tagai David A. Bednar, *Liahona*, Ape. 2012, 12–19.
22. Tagai Dallin H. Oaks, *Liahona*, Nov. 2009, 26.
23. Ieremia 31:33; faaopoopo le faamamafa.



Saunia e Carole M. Stephens

Fesoasoani Muamua i le Au Peresitene Aoa o le Aualofa

Ala Mai Ia i o Tatou Tiute

E tatau ona tatou ala mai i lo tatou tiute ma faaauau ai ma le faatuatua a o tatou utuvai mai le mana e mafai ai, faamafanafana, faamalosi, ma faamalolo ai o le Togiola.

I na ua maea ona valaauina au i le au peresitene aoao o le Aualofa, sa ou lagonaina se manao ia iloa atili e uiga i tamaitai sa muamua atu ia te au. Sa faagaetia au i aoaoga a Sister Zina D. Young, fesoasoani muamua i le au peresitene aoao lona lua o le Aualofa. Fai mai a ia, “Uso e, ua tatau ona tatou ala mai i o tatou tiute.”¹ Sa ou manatunatu loloto i upu *ala mai* ma le *tiute* ma faia ai se sailiiliga faaopoopo i tusitusiga paia.

I le Feagaiga Fou, na aoao atu ai e Paulo le Au Paia i na ona po:

“Ua oo i le itu po e ala ai e na momoe: aua ua latalata nei ia te i tatou le ola. . . .

“Ua leva le po, ua lata mai le ao: . . . ia tatou oofu i ofutau o le malamalama.”²

I le Tusi a Mamona, na aoao atu ai e Alema lona nuu i tiute paia o i latou e ulu atu i se feagaiga ma le Atua:

“Ma o lenei, ona ua outou mananao e o mai i le lafu a le Atua, ma ta’ua o ona tagata, ma ua outou loto e tauave avega a le tasi, ina ia mama;

“Ioe, ma outou loto e faanoanoa faatasi ma e faanoanoa; ioe, ma faamafanafana atu ia te i latou o e e

manaomia le faamafanafana, ma tutu o ni molimau a le Atua i taimi uma ma i mea uma, ma i nofoaga uma. . . .

“O lenei ou te fai atu ia te outou, afai o le manao lea o o outou loto, se a se mea tou te tetee ai i le papatisoina i le suafa o le Alii, o se molimau i ona luma ua outou ulu atu i se feagaiga faatasi ma ia, o le a outou auauna atu ia te ia ma tasi ana poloaiga, ina ia mafai ona liligi atili tele mai e ia lona agaga i luga o outou?”

“Ma o lenei ina ua faalogo mai tagata i nei upu, sa pati o latou lima i le olioli, ma alalaga mai: O le manao lea o o matou loto.”³

O le saunoaga a Sister Young ma nei mau ua matua’ia ai ona ou manatu i “tiute” ia e tatau ona tatou ala mai i ai i o tatou aso.

A papatisoina i tatou, ua tatou ulu atu i se feagaiga. Na aoao mai Elder Robert D. Hales, “A tatou osia ma tausia feagaiga, ua tatou o ese mai le lalolagi ma ulu atu i le malo o le Atua.”⁴

Ua suia i tatou. Ua ese o tatou foliga ma a tatou taga. Ua ese mea tatou te faalogologo i ai ma faitau i ai ma tautala i ai, ua ese foi mea tatou te

ofuina aua ua avea i tatou ma afafine o le Atua, ua noatia ia te Ia e ala i se feagaiga.

A faamauina i tatou, ua tatou maua le meaalofo o le Agaga Paia, o le aia tatau e maua ai e le aunoa le uunaiga a se tasi o le Aigaatua e taialaina i tatou, e faamafanafanaina i tatou, ma puipuia i tatou. Na te lapataia i tatou pe a tofotofoina e savavali ese mai a tatou feagaiga ma foi atu i le lalolagi. Ua aoaoina i tatou e Peresitene Boyd K. Packer e faapea, e leai se tasi o i tatou “o le a faia se mea sese matuia e aunoa ma le muai lapataia e ala i uunaiga a le Agaga Paia.”⁵

Ina ia maua lenei meaalofo o le i ai pea o le Agaga, e tatau ona tatou agavaa ma mataala e uiga i le siakiina o le tulaga o o tatou loto. Pe o malū o tatou loto? Pe o ia i tatou se loto e maualalo, se loto e talia gofie aoaga, se loto e agamalu? Po o ni loto e faasolo ina maa ona ua tatou faatagaina ia leo e tele naua o le lalolagi e tata'i esea i tatou mai uunaiga lemu mai le Agaga?

Ina ua papatisoina i tatou, sa suia o tatou loto ma ua fagua i le Atua. A o tatou i ai i la tatou malaga i le olaga nei, e manaomia ona tatou fesili ifo e le aunoa ia i tatou lava, “Afai sa [ou] iloa se suiga o le loto, . . . pe mafai ona [ou] lagonaina i le taimi nei?”⁶ Ma afai, e leai, aisea?

E toatele le Au Paia anamua “sa oo i lenei liuga tele i [o latou] loto.”⁷ Na fagua ai i latou e maua faamanuiaga o le malumalu e faamalolosia ai i latou i o latou tiute. Sa ō le Au Paia anamua i Navu “i le malumalu i le aso atoa ma le po”⁸ ia maua sauniga ma osia feagaiga a o lei amataina la latou malaga i sisifo.

O le tala lea a Sarah Rich, o se uso o le Aualofo i Navu: “E tele faamanuiaga sa matou mauaina i le maota o le Alii, na mafua ai ona matou olioli ma mafanafana i le lotolotoi o o matou faanoanoaga ma mafai ai ona matou maua le faatuatua i le Atua, aua ua iloa o le a Ia taialaina i matou ma tausua i matou i le malaga e le mailoa o loo faamalumalu mai i o matou luma.”⁹

Faatasi ai ma loto ua suia e ala i le faatuatua i le Faaola, sa latou faalagolago i le mana o Lana Togiola. Sa fagua i latou e galulue. Sa latou iloa i le ta'ele o o latou loto o loo i ai se tasi—o le Faaola—ua malamalama i o latou mafatiaga patino aua na puapua-gatia o Ia mo i latou i le Faatoaga o Ketesemane ma luga o le satauro. Sa Ia lagonaina lo latou atuatuvaale, o lo latou le mautonu, o o latou tiga, ma lo latou tuulafoaiina. Na Ia mafatia i o latou faanoanoaga, o o latou sauaga, o lo latou matelaina, o lo latou vaivai, ma ola na maimau. Ma talu ai na

mafatia o Ia i nei mea uma, sa mafai ona Ia fetalai atu ia te i latou, “Ia outou o mai ia te au, o outou uma [o e] tigaina ma mafatia i avega, o a'u foi e malolo ai outou.”¹⁰

Ma sa latou o mai. Sa latou talitonu ma mulimuli i le perofeta. Sa latou iloa o le a umi le malaga, e faigata foi lo latou tiute. Sa latou iloa o le a manaomia le ositaulaga, ae sa lago-lagoina e lo latou faatuatua ma latou pipiimau i a latou feagaiga, ma sa latou saunia faaleagaga.

A o lei tuua Navu, sa tusia e se vaega o le Au Paia se savali i le falefetafai e potopoto ai i totonu o le malumalu lea na faamalolosia i latou e lafoai. E faitauina, “Ua silasila mai le Alii i la matou osigataulaga: mulimuli mai ia i matou.”¹¹

Talu ai nei sa ou auai i se savaliga sopo faapaionia ma alii talavou ma tamaitai talavou o la matou uarota. O taeao taitasi lava ou te fesili ifo ai ia te au lava, “O le a la'u osigataulaga? E faapefea ona ou mulimuli atu ia i latou?”

I le aso lona lua o le savaliga sopo, sa matou tosoina a matou taavaletoso i le valu maila (13 km) ina ua matou taunuu i se nofoaga o le ala e ta'ua “o le tosoga a tamaitai.” Sa tuueseese alii ma tamaitai ma sa faamuamua alii i le tumutumu. Ina ua amata ona matou tosoina taavaletoso, sa ou ea a'e i luga ma iloa atu ai o matou tuagane o le perisitua, o e talavou ma e matutua, o laina faaituala lua i le alasopo, ua to ese o latou pulou i la latou faaaloalo i tamaitai.

Sa faigofie le ala i le taimi mua-mua, ae e lei leva ae o matou laasia le oneone mafiafia, ma ua amata foi ona tifato le mauga. Sa punou lo'u ulu ma toso i lo'u malosi atoa, ae ou faalogoina ua toso faatātā atu le taavaletoso ma sa ou ea a'e ai i luga ma iloa atu Lexi, o se tasi o o matou tamaitai talavou ma lo'u tuaoi. Ua oo le tosoina o lana taavaletoso i luga, ma ina ua vaaia lo matou manaomia o se fesoasoani, o lea na toe taufetuli mai ai. Ina ua matou taunuu i luga, sa ou matuai manao lava e toe tamoe ifo i lalo e fesoasoani ia i latou na mulimuli mai ia te au, ae sa ou tau





manava, ma sa tatavale lo'u fatu ma faafia ai ona oo mai upu *pe le fatu* i lo'u mafaufau. Sa ou matauina ma le lotofaafetai a o faapalasi e isi tamaitai talavou a latou taavaletoso ae toe taufetuli e fesoasoani.

Ina ua taunuu tagata uma i le tumutumu, sa matou faaaogaina ni nai minute e tusia ai lagona i a matou api talaaga. Sa ou tusia: "E lei lava la'u tapenaga faaletino, o lea sa lei ai so'u malosi e fesoasoani ai ia i latou na mulimuli mai ia te au. Atonu o le a ou le toe tosoina lava se taavaletoso, ae ou te le manao lava e toilalo faaleagaga o'u uso, e lei lava!"

Sa o se aafiaga paia na mafua ai ona ou ala mai faaleagaga i o'u tiute i lo'u aiga ma isi. A o faaauau pea la tatou malaga, sa ou manatunatu i mea sa ou aoaoina ma vaavaai mo le faaaogaina.

Muamua, sa ou mafaufau i o'u uso, i latou o e *sa* tosoina ma i latou o e o loo *faaauau pea i le taimi nei* ona toso na o i latou a latou taavaletoso. Toetiiti 23 pasene o na tamaitai i lena vaega o taavaletosolima, sa na o i latou i se vaega o lena malaga. O nisi o i latou e lei faaipoipo, o isi ua tete'a

ma taitoalua, po ua oti foi a latou tane.¹² Sa latou tosoina faatasi—o afafine o le feagaiga, talavou ma matutua, i ituaiga olaga eseese, i le ala lava e tasi, ma le faamoemoe e tasi.

O i latou na taufetuli e fesoasoani i o latou uso na manaomia le fesoasoani, na faamanatu mai ai ia te au le au lavea'i, o ē o loo vaaia, ma e lē o vaaia, o e e vave tele la latou matau, vaaia se tulaga manaomia, ma faatino.

Sa ou mafaufau i upu a le Alii: "O le a Ou alu muamua atu i o outou luma. O le a Ou i ai i lo outou lima taumatau ma lo outou agavale, ma o le a i ai lo'u Agaga i o outou loto, ma si'o faataamilo outou e a'u agelu, e sapaapapai outou i luga."¹³

Sa faaituala lua o le alasopo ni alii faatuatua, ususitai, ma tausi feagaiga. O lo latou mana o le perisitua—le mana e faaaogaina e le Atua e faamanuia ai Lana fanau—ua siitia, faamalolosia, ma lagolagoina i matou. O i latou o se faamanatu e le tuulafoaiina lava i tatou. E mafai ona tatou maua lena mana e le aunoa, pe a tatou tauisia a tatou feagaiga.

Sa ou mafaufau i alii o e sa aveesea i le malaga mai aiga, ma tuua ai na o i

latou e tosoina ia taavaletoso. E toatele tamaloloa na maliliu i le malaga. O nisi atalii na faamisiona i o latou nuu. O nisi na muamua i e tapenapena mo le taunuu atu o o latou aiga i le Vanu o Sate Leki. O nisi na lei i ai ona o a latou lava filifiliga, e le tausia a latou feagaiga.

E faapei o i latou na muamua atu, e toatele foi i latou o loo ola i le taimi nei i tulaga e le lelei. Tatou te faaauau pea ona aoao atu ma taumafai mo mea silisili aua ua tatou iloa, o le taumafai pea lava pea tatou te agaigai ai pea lava i luga i le ala ma saunia avanoa ia maua ai faamanuiaga folafolaina uma a o tatou "faatalitali atu i le Alii."¹⁴

Ua tofua i tatou ma mafatiaga ma o le a faaauau pea lava i o tatou olaga. O lena olaga faitino, o se taimi o tofo-tofoga, ma o le a tatou maua pea lava pea avanoa e faaoga ai lo tatou faitalia e filifili ai mea o le a tatou aoaoina mai mafatiaga o le a oo mai.

I le avea ai o ni afafine o le Atua, tatou te faaauau ai pea i luga o le ala i le faatuatua, aua ua tatou iloa e faapei ona aoao mai Peresitene Thomas S. Monson: "O sauniga faaola

na mauaina i le malumalu lea e faa-
taga ai ona tatou toe foi atu i se aso i
lo tatou Tama Faalelagi i se mafutaga
e faavavau faaleaiga, ma faaeeina ai i
faamanuiaga ma le mana mai luga e
matuai aoga ai lava osigataulaga uma
ma taumafaiga uma.”¹⁵

E le lava le na ona i ai i se malaga;
e tatau ona tatou ala mai i lo tatou
tiute ma faaauau ai ma le faatuatua
a o tatou utuvai mai le mana e mafai
ai, faamafanafana, faamalosiua, ma
faamalolo ai o le Togiola.

Uso e, ou te alofa ia te outou. Ou te
le masani i le toatele o outou, ae ou te
iloa *pe o ai* outou! O i tatou o ni afafine
tausi feagaiga i Lona malo, ma ua faa-
eeina i le mana e ala i a tatou feagaiga,
ma ua tatou saunia e faia o tatou tiute.

E tapenaina e le Aualofa ia tamaitai
mo faamanuiaga o le ola e faavavau
e ala i le fagua faaleagaga o i tatou e
faateleina i le faatuatua ma le amio-
tonu patino. Tatou amata ia i tatou
lava. Tatou amata i le mea o loo tatou
i ai nei. Tatou amata i le aso. A oo ina
tatou ala mai faaleagaga, o le a sili atu
ona lelei ona tatou faamalolosia aiga
ma auaga ma fesoasoani i isi.

O se galuega lenei o le faaolataga,
ma o le mana e mafai ai ma faama-
lolosia ai o le Togiola e mafai ai mea
uma. Ala mai i lo tatou faasinomaga.
Ala mai i lo tatou tiute. O i tatou o
afafine o lo tatou Tama Faalelagi, o le
e alofa ia i tatou. Ou te molimau atu ai
i le suafa o Iesu Keriso, amene. ■

FAAMATALAGA

1. Zina D. Young, in *Woman's Exponent*,
Oct. 15, 1877, 74.
2. Roma 13:11–12.
3. Mosaea 18:8–11.
4. Robert D. Hales, “Tauagafau: Migao mo
le Alii,” *Liahona*, Aok. 2008, 21.
5. Boyd K. Packer, “Pe Faapefea ona Ola i le
Teritori a le Fili,” *Liahona*, Oke. 2012, 35.
6. Alema 5:26.
7. Alema 5:14.
8. *O Afafine i Lo'u Malo: O Le Talafaasolopito
ma le Galuega a le Aualofa* (2011), 29.
9. Sarah Rich, i le *O Afafine i Lo'u Malo*, 30.
10. Mataio 11:28.
11. I le *O Afafine i Lo'u Malo*, 30.
12. Sailiiliga na faatautaia e Jolene S. Allphin
mai tala ma lisi a kamupani; tagai *Tell My
Story, Too*, 8th ed. (2012).
13. Mataupu Faavae ma Feagaiga 84:88.
14. Isaia 40:31.
15. Thomas S. Monson, “O Le Malumalu
Paia—o se Faailoilo i le Lalolagi,” *Liahona*,
May 2011, 92.



Saunia e Linda S. Reeves

Fesoasoani Lua i le Au Peresitene Aogao o le Aualofa

E Le Faagaloina Lava Oe e le Alii

*E silafia lelei i tatou e lo tatou Tama Faalelagi ma lo tatou Faaola
o Iesu Keriso ma e alolofa ia i tatou. . . . E mafai ona tatou
lagonaina lo La'ua alolofa ma le tigmaalofa i o tatou mafatiaga.*

A o matou feiloai atu i uso i le
salafa o le lalolagi, ua matou
maofa lava i le malolosi o a
outou molimau. E toatele naua outou
o ni augatupulaga muamua po o le lua
o tagata o le Ekalesia. Ua matou vaai
i le toatele o uso e ta'i fia valaauga e
galulue ai, e feoai i mea mamao ina
ia auai i le lotu, ma faia osigataulaga
ia osia ma tausia feagaiga paia i le
malumalu. Matou te faamamaluina
outou. O outou o paionia a le Alii i
ona po nei!

E lei leva atu ona ma feiloai ma
lo'u toalua o Mel, i se taiala volenitia
e igoa ia Mollie Lenthal a o ma asiasi
i se falemataaga i Ausetalia. Na ma
iloa ai o Mollie o se tamaitai lelei
ua 70 ona tausaga, ma e leai sana
fanau ma e lei faaipoipo foi. E na o
ia le tama a ona matua, ma ua tele
tausaga talu ona maliliu ona matua.
O tagata aupito felata'i o lona aiga,
o ona tausoga e toalua e nonofo i
se isi konetineti. Na faafuasei ona
lofituina au i le Agaga o molimau mai
ia te au, e toetoe lava o saunoa mai
le Tama Faalelagi: “E le o tuulafoaiina
Mollie! O Mollie o lo'u afafine! O au
o lona Tama! O ia o se afafine taua

tele i lo'u aiga, ma e le o tuulafoaiina
lava!” o ia!”

O se tasi o tala ou te fiafia lava i ai
mai le soifuaga o le Faaola o le tala ia
Lasalo. Ua ta'u mai i le tusi paia e faa-
pea “ua alofa lava Iesu ia Mareta, . . . o
lona uso o [Maria], ma [lo la tuagane] o
Lasalo.”¹ Na auina atu le tala ia Iesu ua
ma'i tele Lasalo, ae e lei sau loa lava
Iesu; Sa toe nofo o ia mo ni aso se lua,
ma sa ta'ua e faapea “o lenei ma'i e
. . . mo le viiga o le Atua, ina ia viia ai
o le Atalii o le Atua.”²

Ina ua faalogo Mareta ua sau Iesu,
ona ia “alu ane lea ma faafetaiai ia
te ia,”³ ma ta'u atu ia te Ia le mea ua
tupu. Ua “aso fa [Lasalo] i le tuuga-
mau.”⁴ Na toe tamoe Mareta i le fale
ma ta'u atu ia Maria ua maliu mai le
Alii.⁵ Ma le faanoanoa tele, sa tamoe
atu Maria ia Iesu, ma faapau i Ona
vae, ma tagi ai.⁶

Ua ta'u mai ia i tatou e faapea “ina
ua silasila atu Iesu ia [Maria] o tagi . . . ,
ona tiga tele ai lea o lona finagalo, ma
ua atu lava o ia,” ma fesili pe o fea ua
latou tuuina ai o ia.

“Ua latou fai mai ia te ia, le Alii e,
maliu mai ia e te silasila ia te ia.”⁷

Ona tatou faitau ai lea i nisi o upu e



aupito sili ona faamomoiloto, ma agalofa i tusitusiga paia: “Ua tagi Iesu.”⁸

Na tusia ai e le Aposetolo o James E. Talemage: “O le vaaiga i tamaitai e toalua ua matua lofituina i le faanoanoa, . . . na afua ai ona faanoanoa Iesu [faatasi ma i latou], o lea na tiga ai Lona agaga ma ua matua ātu lava.”⁹ O lenei aafiaga ua molimauina ai le agaalofa, faavavau, ma le alofa o lo tatou Faaola, ma e manatu mai lo tatou Tama Faalelagi ia i tatou taitoatasi i taimi uma tatou te mafatia ai i mafatiaga, agasala, puapuaga, ma tiga o le olaga.

Uso pele, e silafia lelei i tatou e lo tatou Tama Faalelagi ma lo tatou Faaola o Iesu Keriso ma e alolofa ia i tatou. La te silafia pe a tatou tiga pe mafatia i soo se itu. La te le faapea, “E le afaina o lena e te tiga i le taimi nei, aua e le umi foi ona toe lelei lea o mea uma. O le a e malolo, pe o le a maua se galuega a lou toalua, pe o le a toe foi mai lau tama la e faasevasevaloa.” La te lagonaina le loloto o o tatou mafatiaga, ma e mafai foi ona tatou lagonaina lo La’ua alolofa ma le tigoalofa i o tatou mafatiaga.

Na molimau mai Alema:

“Ma o le a afio atu o ia, ma mafatia i tiga ma puapuaga ma faasoosoga o ituaiga eseese uma; ma o le a oo ia te ia nei mea, ina ia mafai ona faataunuuna o le upu ua fai mai, o le a ia ave i ona luga tiga ma ma’i o ona tagata.

“Ma o le a ia ave i ona luga . . . o latou vaivaiga, ina ia mafai ona faatumuina lona loto i le alofa mutimutivale, . . . ina ia mafai ona ia silafia . . . le ala e fesoasoani ai i ona tagata, e tusa ma o latou vaivaiga.”¹⁰

A tatou taumanatunatu *pe* silafia i tatou e lo tatou Faaola ma lo tatou Tama i le Lagi pe *o le a foi le tele* La te silafia ai i tatou taitoatasi, e mafai ona tatou manatuaina upu a le Faaola ia Oliva Kaotui:

“Afai e te manao i se isi molimau, liliu ane lou mafaufau i le po lea na e tagi mai ai ia te au i lou loto, ina ia mafai ona e iloa e uiga i le moni o nei mea.”¹¹

Muamua atu na ta’u atu ai e le Faaola ia te ia, “E leai lava se tasi ua na o le Atua ua ia silafia ou mafaufauga

ma faamoemoega o lou loto.”¹²

Na faamanatu atu e le Faaola ia Oliva sa Ia silafia auiliiliga uma o lena tatalo faatauana—ma manatuaina—le taimi tonu, le po tonu lava.

I le tele o tausaga talu ai sa matua ma’i ai lo’u toalua i se ma’i uiga ese. A o gasolo vaiaso ma ua tigaina tele lo’u toalua, o le tele foi lena o lo’u talitonu o le a maliu o ia. Ou te lei ta’uina lava i se tasi o’u atuatuvalega. E toatele lo matou aiga laiti, ma se faaipoipoga pele ma le faavavau, ma o le mafaufau pe a maliu lo’u toalua ae ou tausia na o a’u la’u fanau na faatumuia ai au i le tuulafoaiina, ātu, ma le ita. Ou te maasiasi e fai atu sa ou faamaamulu ese mai lo’u Tama Faalelagi. Na tele aso na ou le toe tatalo ai; sa ou le toe faia ni fuafuaga; sa ou tagi. Na iu ina tonu ia te au e le mafai ona ou faia na o a’u lenei mea.

Mo le uluai taimi mo le tele o aso, sa ou tootuli ai ma sasaa atu lo’u loto i lo’u Tama i le Lagi, ma aoi atu mo se faamagaloga i lo’u fulitua atu ia te Ia, ma ta’u atu ia te Ia o’u lagona o’oo’o uma, ma i’u ina ou tagi leotele atu afai



o le mea moni lea e finagalo o Ia ou te faia, o le a ou faia lava. Sa ou iloina e tatau lava ona i ai Sana fuafuaga mo o matou ola.

A o ou tootuli pea ma sasaa atu lo'u loto, sa oo mai i o'u luga se lagona aupito matagofie, sili ona toafimalie, ma le alofa. Sa faapei o se palanikete o le alofa ua ufitia ai au. Sa toetoe ina a mafai ona ou lagonaina le Tama Faalelagi o fetalai mai, "Na pau lava lena o le mea sa ou fia iloa." Sa ou taumafai ia ou le toe fultua lava ia te Ia. Na faasolosolo malie i se tulaga ofoofogia ona toe malosai mai lo'u toalua seia oo ina manuia atoatoa.

I ni tausaga mulimuli ane, sa ma tootutuli ai ma lo'u toalua i autafa o la ma tama teine e 17 tausaga le matua ma aioi atu mo lona ola. O le taimi la lenei, o le tali o le leai, ae o lena lagona o le alofa ma le filemu lea na folafola mai e lo tatou Faaola na matua mamana lava, ma sa ma iloina e ui ina toe valaauina o ia e le Tama Faalelagi e toe foi atu, o le a lelei pea mea uma. Na ma iloina le uiga o le lafo o a tatou avega i le Alii, iloa e alofa o Ia ia i tatou, ma lagonaina le tigaalofa mo i tatou i o tatou faanoa-noaga ma tiga.

O se tasi o taimi aupito matagofie

o le tamā-i le- atalii i le Tusi a Mamona o le molimau a Alema le Itiiti i lona atalii o Helamana. Na faamatala e Alema le "lagā o ia i le atuatuvalet" na ia lagonaina a o ia mafaufau i lona oo atu i luma o le Atua e faamasinoina i ana agasala e tele. Ina ua mavae le lagonaina o le mamafa o ana agasala uma mo aso e tolu ma po e tolu, sa ia salamo ma aioi atu i le Faaola ina ia alofa mutimutivale mai ia te ia. Sa ia faamatalaina ia Helamana o le "silisili ona logolelei ma suamalie" o le olioli o le "le toe manatuaina" o ona tiga." Nai lo lagona "lagā o le atuatuvalet" i le mafaufau atu i le tu ai i luma o le nofoalii o le Atua, sa vaai Alema i se faaaliga o le "Atua o loo afio i luga o lona nofoalii" ma tautino atu, "Sa moomoo lo'u agaga i le fia i ai iina."¹³

Pe le o o tatou lagona ea na, o'u uso pele, pe a tatou salamo ma mafau-fau i le alofa, le alofa mutimutivale, ma le lotofaafetai tatou te lagonaina mo lo tatou Tama Faalelagi ma lo tatou Faaola—o tatou foi "ua moomoo e fia i ai iina," ina ia toe opoina ai e o La'ua aao alofa?

Pei lava ona molimau mai le Alii ia te au Na te lei faagaloina lava Lona afafine pele o Mollie Lenthal, e faapena

foi ona ou molimau atu Na te le faagaloina lava oe! Po o le a lava lau agasala po o ou vaivaiga po o tiga o i ai, po o tauviga po o tofotofoga o loo e feagai ai, Na te silafia ma malamalama i na lava taimi. E alofa o Ia ia te oe! Ma o le a Ia tauaveina oe i na taimi, pei lava ona sa Ia faia ia Maria ma Mareta. Ua uma ona Ia totogiina le tau ina ia Ona silafia ai le ala e fesoasoani atu ai ia te oe. Lafo au avega ia te Ia. Ta'u atu i lou Tama Faalelagi ou lagona. Ta'u atu ia te Ia ou tiga ma mafatiaga, ona tuu atu lea ia te Ia. Suesue i tusitusiga paia i *aso taitasi*. O iina o le a e maua ai le mapusaga ma le fesoasoani.

Na fesili lo tatou Faaola:

"Aua pe mafai ea ona galo i se fafine lana tama o susu, ina ia le alofa o ia i le tama a lona manava? Ioe, atonu e galo ia te i latou; ae o le a le galo ia te a'u oe. . . .

". . . Ua ou togitogia oe i luga o alofilima o 'u lima."¹⁴

"Sa ou poloaiina ia *aua nei i ai se tasi* o outou e alu ese atu; ae sa ou poloai atu ia outou o mai ia te au, ina ia outou tagotago ma vaai; ia faapea lava ona outou fai i le lalolagi."¹⁵

O la tatou matafaioi lea. E tatau ona tatou lagonaina ma vaai i ai mo i tatou lava ma fesoasoani ai i fanau uma a le Tama Faalelagi ina ia latou lagonaina ma vaai ma iloa na tauaveina e lo tatou Faaola i Ona lava luga e le gata i a tatou agasala uma, ae e faapena foi i o tatou tiga ma o tatou mafatiaga ina ia mafai ai ona Ia silafia mea tatou te lagonaina ma le ala e faamafanafanaina ai i tatou. Ou te molimau atu ia te Ia i le suafa o Iesu Keriso, amene. ■

FAAMATALAGA

1. Ioane 11:5.
2. Ioane 11:4.
3. Ioane 11:20.
4. Ioane 11:17.
5. Tagai Ioane 11:28.
6. Tagai Ioane 11:32.
7. Ioane 11:33–34.
8. Ioane 11:35.
9. James E. Talmage, *Jesus the Christ*, 3rd ed. (1916), 493.
10. Alema 7:11–12.
11. Mataupu Faavae ma Feagaiga 6:22.
12. Mataupu Faavae ma Feagaiga 6:16.
13. Tagai Alema 36:14–22; faaopoopo le faamamafa.
14. 1 Nifae 21:15–16.
15. 3 Nifae 18:25; faaopoopo le faamamafa.



Saunia e Peresitene Henry B. Eyring
Fesoasoani Muamua i le Au Peresitene Sili

O Lē Tuuina Atu le Tausiga

O le a faamalosia oe ma musuia oe ia iloa tuaoi ma le tele o lou gafatia e auauna atu ai.

O u te faafetai i le faatasi ai ma outou i le po nei. O tamaitai o le Ekalesia a Iesu Keriso o loo agai i luma i le avea ai ma sosaiete o tuafafine lea sa faamatalaina e le tina o le Perofeta o Iosefa Samita, o Lusi Maki Samita, i upu nei: “E tatau ona tatou faatauaina le tasi ma le isi, leoleo i le tasi ma le isi, faamafanafana i le tasi ma le isi ma ia aoaoina, ina ia mafai ai ona tatou nonofo uma i lalo faatasi i le lagi.”¹

E tolu vaega o loo i ai i lene faamatalaga ofoofogia o agavaa e feoeoeai ai i se tulaga o le fiafia faatasi ma le Atua. O le tasi o le fetausia i o le tasi ma le isi. O le isi o le aoao atu lea o le tasi ma le isi ma ia aoaoina. Ma le lona tolu o le nonofo faatasi i lalo ma le Atua.

O lo’u faamoemoega i le po nei o le fesoasoani atu lea ia te oe ia e lagonaina le viia ma le talisapaia e le Atua o mea ua uma ona e faia e fesoasoani ai i le tasi ma le isi ia ausia lene sini silisili. Ma le lona lua, o le faamatala atu lea o nisi o mea o le a oo mai i la outou auaunaga tuufaatasi.

E pei o tuafafine o se taimi anamua, ua outou tali atu foi i le valaau a le Alii ia o atu e fai ma toomaga o isi. I

le 1856, sa talosagaina ai e le perofeta o Polika Iaga le Au Paia ina ia o atu e fesoasoani i paionia o taavaleto solima sa pagatia i atumauga kiona. Sa ia fai atu i lene taimi o puapuaga i tagata o le au paia i le konafesi aoao: “O lo outou faatuatua, tapuaiga, ma tautinoga o talitonuga faalelotu, o le a le mafai lava ona faaolaina ai se tasi o o outou agaga i le malo selesitila o lo tatou Atua, sei vagana ua outou faatinoina na mataupu faavae e pei ona ou aoaoina atu ai nei outou. O atu ia ma aumai na tagata i laufanua valevalenoa, ma taulimaina ma le totoa mea na ua tatou ta’ua o mea faaletino, . . . a leai, o le a leai lava se aoga o lo outou faatuatua.”²

Sa tali mai le faitau selau o tamaitai i Iuta. E ui i lo latou matitiva ae sa latou faatumuina taavaleto solima i mea uma sa mafai ona latou faaagaga ma mea uma na mafai ona latou aoina mai i isi e faamafanafana ai i latou na mafatia. Sa tusia e se tasi o na tuafafine lototoa e faapea, “E mafai ona ou faapea atu, ou te lei lagonaina lava se faamalieina sili atu ma le fiafia i soo se galuega sa faatinoina i lo’u olaga, e pei o sea lotogatasi o lagona sa i ai.”³

Ina ua maea le laveaiga ma liusua vaia foi le kiona, sa tusia e lene lava

tuafafine le fesili o lona loto faamaoni: “O le a le isi mea e sosoo ai mo i latou e naunau e galulue e fai?”⁴

I o tatou aso, o vaega o tuafafine lotototoa i le salafa o le lalolagi ua liliu atu lo latou faatuatua i faatinoga i le faitau selau o nofoaga. Ma latou te fesili i o latou loto ma tatolo i le fesili lava lea e tasi e uiga i le lumanai o o latou olaga auauna.

O outou taitoatasi o loo i ai se nofoaga tulaga ese i lau malaga i le ola e faavavau. O nisi ua tele ni tausaga o aafiaga, ma isi o loo fou i le avea ai o i latou ma soo i le olaga nei. E tulaga ese tagata taitoatasi i lona talafaasolopito patino ma ona luitau. Ae o outou uma o tuafafine ma afafine faapelepele o lo tatou Tama Faalelagi, lē o silafia ma leoleo ia te outou taitoatasi.

O le mea o loo lelei ona outou faia faatasi ma le ofoofogia o le faatauaina, leoleo, ma faamafanafana atu i le tasi ma le isi. Sa ou molimauina lene vavega tafatolu i le tasi masina talu ai i la outou auaunaga mo se tuafafine. I le avea ai o au ma ona tamā, ou te faafetai atu ia te outou ma ou te tuuina atu foi la’u faafetai i le Atua sa taialaina se faiaoga asiasi se toatasi.

O lo ma afafine o Elizabeth, e nofo i se isi setete ma le taimi e ese mai ia i tatou, sa i ai i le fale faatasi ma lana tama teine e tolu tausaga. O le isi ana tama faatoa tasi lona vaiaso i le aoga amata. Ua ono masina le maitaga o Elizabeth, ma sa tulimatai atu i le fanau mai o lana tama lona tolu, lea sa fai mai fomai o le isi foi teine. O lona toalua o Joshua, sa faigaluega.

Ina ua ia iloa ua alu le palapala [tulou] ma ua malosi tele, sa ia valaau atu i lona toalua i le telefoni. Sa ta’u mai e valaau le taavale a le falemai ma o le a la feiloai ai i le falemai, lea e 20 minute mai lona fale. A o lei viliina le telefoni, sa ia faalogoina se tuitui mai i le faitotoa i luma.

I le faitotoa, sa faateia o ia i le vaai atu i lana soa faiaoga asiasi o le Aualofa. E leai se la asiasiga i lene taeao. Sa lagonaina lava e lana soa e tatau ona ia sau e asi ia Elizabeth.

Sa fesoasoani o ia e taitai atu o ia i le taavale. Sa la taunuu i le falemai i ni nai minute a o lei taunuu atu



Manatua pe a tuu mai e le Alii ia tatou fetaiai ma se tasi o puapua-gatia, tatou te faamamaluina le Samaria agalelei mo le mea na ia le faia e tusa ma le mea na ia faia. Sa ia le laaloa i le isi itu e ui o le tagata malaga na fasia i luga o le ala o se tagata ese ma atonu o se fili. Sa ia faia le mea na ia mafaia mo le tagata na fasia ona ia faatulaga lea o se fuafuaga patino mo isi e faia ai nisi mea sili atu. Sa ia faia lena mea ona sa ia malamalama e faapea o le fesoasoani atu e mafai ai ona manaomia nisi mea sili atu nai lo mea e mafai ona faia e se tagata se toatasi.

O lesonea i lena tala e mafai ona taialaina ai oe i soo se mea o loo faapolopolo e lou lumanai mo oe. O na lesonea lava e tasi o loo i ai i ou lava aafiaga a o e tamaitiiti po o aafiaga lata mai nei.

E le itiiti ifo ma le faatasi, pe atonu foi e faatele, sa faateia ai oe i taimi e te fetaiai ai ma se tasi o loo manaomia ona tausaiaina. Atonu o se matua, se matua matua, se uso, po o se tamaitiiti ua taia i se faamai po o ni tulaga le atoatoa o le malosi. O ou lagona o le agaalofa e sili atu i ou manaoga faaletagata. O lea e amata ai ona e fesoasoani atu.

E pei o le tagata malaga i le tala faatusipaia o le Samaria agalelei, e foliga mai o le fesoasoani na manaomia sa liua i se tausiga mo se taimi umi atu nai lo le mea e mafai ona e tuuina atu na o oe. Sa manaomia ona tuu atu e le Samaria le tagata malaga i le tausiga a le pule o le faletalimalo. O le fuafuaga a le Alii mo le auauna atu i isi o manaomia le fesoasoani e faia faavaega.

E valaaulia e le aunoa e epikopo ma peresitene o Aualofa ia tagata o le aiga e fesoasoani i le tasi ma le isi pe a i ai se manaoga faaleulefele. E tele ni mafuaaga mo lena mataupu faavae. Mafuaaga muamua lava o le tuuina atu lea i le tele o tagata o faamanuiaga o le alofa faateleina lea e sau mai le auauna atu o le tasi i le isi.

Ua e matauina ma lagonaina lena faamanuiaga. Soo se taimi lava e te tausai ai se tasi e tusa lava po o sina taimi puupuu ua e lagonaina lava le alofa mo le tagata sa e auauna i ai. Pe

Joshua mai lana galuega. Sa filifili fomial i totonu o le 20 minute ina ia fai le taotoga e faasaoia ai Elizabeth ma lana pepe. O lea sa fanau mai ai se teine itiiti lava i le lalolagi, ma tagi leotele, 15 vaiaso ua vave mai ai nai lo le taimi faatulagaina. E tasi le pauna lona mamafa, sefulutasi aunese (765g). Ae sa ola o ia, faapena foi ma Elizabeth.

Sa faataunuaina se vaega o upu a Lusi Maki Samita i lena aso. O se uso faamaoni o le Aualofa, sa uunaia e le Agaga Paia, sa leoleo, faatauaina, ma faamafanafana i lona uso i le malo o le Atua. O ia faatasi ma le faitau sefulu afe o isi sa tuuina atu ia auaunaga musuia i le gasologa o tupulaga e le gata e faafetaia e i latou na latou fesoasoani i ai ma e pele ia i latou ae o le faafetai foi a le Atua.

E te manatuaina Ana upu o le talisapaia ia i latou e mauaina sina faamamaluga mo lo latou agalelei: “Ona tali atu ai lea o le Tupu, e faapea atu ia te i latou, E moni, ou te fai atu ia te outou, aua na faia e outou i le tasi o e aupito itiiti o ou uso nei, o au lea na outou faia i ai.”⁵

Ae o le vavega o le tasi uso o le Aualofa sa taunu atu e fesoasoani i le taimi tonu lea, ua faateleina e ala i le mana o le sosaiete tuufaatasi a tuafafine. E na o se vaega lena o le savali sa auina atu e le epikopo a Elizabeth ia Elizabeth ma Joshua i le falemai i nai itula ina ua mavae le fanau mai o le pepe:

Sa faaauau le saunoaga a le epikopo e uiga ia te ia lava faapea foi le uarota: “Sa matou o mai foi i le falemai ma nonofo faatasi ma tamaiti i le potu taalo pe a le mananao ia tina e tuua i latou i se isi nofoaga.”

Ona fai mai lea: “Ioe, o le a matou le faatinoa lava le matou fuafuaga e aunoa ma se faamaopoopoga ma se faatagaga mai ia te oe. E na ona fia faailoa atu lava ia te oe ina ia e le popole i mea e mafai [ma o le a] matou faia.”

O le mea sa latou faia mo lo’u afafine na mafai ai ona ia maua se taimi taua ma lana pepe itiiti lava ina ua ia sapaia o ia, mo le taimi muamua.

Ona faaiaina lea e le epikopo lana savali ia Joshua ma Elizabeth i le savali lea e auina atu e tuafafine e uiga i lo latou tuuto i le lalolagi atoa e auauna atu i isi mo le Matai: “Taofimau le faatuatua.”

Faatasi ai ma o outou eseesea uma i tulaga faaletagata lava ia ma aafiaga ua tuanai, e mafai ona ou ta’u atu ia te outou se mea o loo i ai i lo outou lumanai. A o outou taofimau i le faatuatua, o le a outou maua outou lava o loo valaauliaina e le Alii i le tele o taimi e auauna atu i se tasi o puapua-gatia i taimi o le a foliga mai e le talafeagai. Atonu o le a foliga mai e avea o se mea le fiafia ma atonu o se galuega faigata. Pe a oo mai le valaau, atonu o le a foliga mai e le o manaomia oe pe faapea foi e faigofie e se tasi ona tuuina atu le fesoasoani.

a faaumiumi tele atu taimi e tuu atu ai le tausiga manaomia, o le a faateleina foi lagona o le alofa.

Talu ai o tatou o tagata, o lena faateleina o le alofa e mafai ona faalavelaveina e lagona o le le fiafia ma le lelava. O le isi mafuaaga lena ua tuu mai ai e le Alii ia i tatou le fesoasoaniga a isi i la tatou auaunaga ia i latou o manaomia le fesoasoani. O le mafuaaga lena ua faatuina ai e le Alii ia sosaiete e fetausia'i ai tagata.

I ni nai vaiaso talu ai sa ou i ai i se sauniga faamanatuga a o tulai ane se tamaitai talavou ina ia lagolagoina o le taitai faamaopoopo fesoasoani o fai-aoga asiasi, o se tofiga ou te lei iloa e i ai. Sa ou manatunatu pe o ia iloina le faamamaluina o ia e le Alii. Ona o se tamaitiiti lē lavā, o lea sa ia tuua ai le sauniga a o lei mafai ona ou ta'u atu ia te ia le tele o le alofa ma le talisapaia e le Alii o lana fesoasoani e faamaopoopo ia taumafaiga a Ona soo.

O le tausia o i latou e manaomia le fesoasoani e manaomia ai se au, se sosaiete alolofa ma lotogatasi. O le mea lena o loo fausia e le Alii ia te outou. E alofa o Ia mo soo se vaega o loo outou faia.

O se tasi faamaoniga o Lana faafetai e faapea e faatagaina e le Atua oe e lagonaina le alofa faateleina mo i latou e te auauna i ai. O le mafuaaga lena e te tagi ai i le maliu o se tasi sa e auauna i ai mo se taimi umi. O le le toe maua o se avanoa e tasi ai i latou e mafai ona pei lava e te lagonaina se lagona mafatia tele atu nai lo le tuueseeseina le tumau. Na ou faalogo i se tamaitai—ua leva ona ou masani ai—talu ai nei, i le vaiaso na maliu ai lana tane, o molimau i le agaga faafetai mo le avanoa sa ia auauna ai ia te ia e oo i le iuga o lona soifua. Sa lei vaaia ni loimata, ae sa vaaia lana ataata fiafia.

E ui e matua tauia lava se auaunaga faaumiumi ma le alofa i tagata, ae e te aoaoina e faapea o loo i ai faatapulaa faaletino, faalelagona, ma faaletupe i mea e mafai ai. O le tagata e lava le umi e tuu atu ai se tausiga e mafai ona avefa ma se tasi e manaomia le tausiga.

Sa tuuina mai e le Alii, le Matai Sili e Tausia tagata puapugatia, le apoapoaga musuia i tagata vaivai e

tausia isi i upu nei na tuuina atu e le Tupu o Peniamina ma o loo tusia i le Tusi a Mamona: “Mo le taofia pea o le faamagaloina o a outou agasala . . . ou te manao ia outou faasoa atu a outou mea i e matitiva, ia taitasi le tagata ma faia e tusa ma mea ua ia te ia, e pei o le fafagaina o e ua fia aai, faaofuina o e ua le lavalava, asiasi atu i e mamai ma auauna atu mo lo latou mapusaga, faaleagaga ma faaletino, e tusa ma o latou manaoga.”⁶

Ae ina ua ia faaauau ai le lapatai mai i nisi o outou e ono le mafai ona tali atu i le faamaoniga o loo faaauau pea ona agai mamao atu ma umi atu i a outou auaunaga: “Ma ia vaai ia faia nei mea uma i le poto ma le faatula-gaga lelei; ona e le tatau i se tagata ona momoe e televave atu nai lo le malosua ia ia te ia. O lenei foi, e tatau ia te ia ona filiga, ina ia mafai ona manumalo o ia i le tau; o lea, e tatau ona faia mea uma i le faatulagaga tatau ai.”⁷

E mafai ona faigata ona faaoga lena fautuaga pe a foliga mai o tau filifili pe faapefea ona faapaleniina se manao e fai mea uma e te mafaia

e fesoasoani ai i isi ma le poto e taulimaina ai ou lava manaoga ina ia faatumauiina ai lou mana e auauna atu ai. Atonu ua e vaaia isi o tauivi ma ia filifiliga faigata. O le tasi faataitaiga o le filifiliga e tasi se tagata ua pulapula lagoto le soifua i le fale po o se nofoaga mo tagata matutua i le taimi ua e matua vaivai ai foi.

O mea ua e iloa e uiga i le ata o le faaolataga e mafai ona avefa ma ou taiala i ia filifiliga faavaivailoto. O le isi mafuaaga lena sa saunoa ai ma le atamai ia Lusi Maki Samita e faapea o tuafafine e ao ona “aoaoina.”

E fesoasoani le i ai o se talitonuga maumaututu o le faamoemoega o le Alii mo fanau uma a le Atua i taimi faigata o le olaga faaletino. Sa Ia aoaoina le ute o le ata o le faaolataga i le Perofeta o Iosefa i le ala lenei a o ia tauivi ina ia malamalama i ona tofotofoga sa foliga mai e le muta: “Ma ona oo lea, afai e te talitalia lelei, o le a faaeaina oe e le Atua i lugā.”⁸

Ona avefa lea o le tatou filifiliga sili e fesoasoani atu ai i se tasi i taimi o tofotofoga faigata ma lenei, “O le a le ala e tatau ona ou mulimuli ai





o le a sili ona fesoasoani ai i le tagata ou te alofa i ai ia ‘talitalia lelei ai’? O le faamoemoega e mo tatou ina ia latou lagona tele ai e mafai ona latou faatinoina le faatuatua ia Keriso, faatumauiina se faamoemoe ola o le ola e faavavau, ma faatino le alofa mama, le alofa le pona o Keriso, e oo i le iuga o lona soifua.

Ua ou vaai i tuafafine i le malo o loo tuu atu lena taulai i le Faaola ma Lona faamoemoega. Mafau fau i taimi sa e alu ai i totonu o le potu sa fono ai le Aualofa po o le Peraimeri po o Tamaitai Talavou.

O se ata o le Faaola po o Ana upu atonu ua le manino mai, ae e te iloa sa lagonaina se molimau o le moni ma le taua o Lana Togiola i lena itula e faapei ona i ai i lenei afiafi. Atonu e lei i ai se ata o se malumalu paia po o upu “E Mafai Ona Faavavau Aiga,” ae e mafai ona e vaaia le faamoemoe i o latou lafofoga fiafia.

Ma ua outou vaai i ai, e pei foi o au, i se faiaoga asiasi atamai o loo fausiaina le talitonuga i se uso o loo tauivi ona o lana auaunaga i se isi

tagata, tusa lava pe ua le aoga, ae e manaomiaina pea lava ma e taua. E saili e peresitene maoae o Aualofa ni auala e tuu atu ai ia i latou e manaomiaina le tausiga, le fesoasoani e ala i le tausiga a isi. Latou te fatuina ni avanoa mo uso e onosaia lelei ai tofotofoga a o latou tausia le tasi ma le isi i le alofa le pona o Keriso. E mafai ona aofia ai le faatauana atu ma le agamalu i le tagata ua vaivai o loo tuuina atu se tausiga ina ia malolo ma taliaina le fesoasoani a isi.

E mafai ona faia e tuafafine lena mea e ala i le faatelegese ona faamasino atu ia i latou o loo feagai ma tofotofoga. O le tele o tagata o loo tauaveina ni avega mamafa e amata ona masalosalo ia i latou lava ma lo latou lava taua. Tatou te faamamaina a latou avega pe a tatou onosai i o latou vaivaiga ma patipatia soo se lelei e mafai ona tatou vaaia ia i latou. O loo faia e le Alii lena mea. Ma e mafai ona tatou mulimuli i Lana faaitaiga—o Ia le silisili lana faafai-lelega i lo tagata uma.

Tatou te talanoa soo lava i le li’o o

tuafafine i le Ekalesia a Iesu Keriso. O le a tatou aoao ia iloa e i ai pea le Faaola i taimi uma i le li’o pe a tatou valaauliaina o Ia.

O le a faateleina pea lo tatou vaaia o afafine o le Atua e valaauliaina tuafafine i totonu i le li’o faatasi ma i latou. Pe a o mai tuafafine i se fonotaga ma tau vaavaai mo se nofoa, o le a latou faalogoina ni upu mālū o tautalagia, “Faamolemole sau ta nonofo i i.”

O le a tatou faalogoina na upu i lena aso o lumanai na muai vaaia e Lusi Maki Samita lea o le a “nonofo faatasi ai i lalo tuafafine i le lagi.” Tatou te le saunia mo lena aso i sina taimi itiiti. O le a oo mai i aso ma tausaga o le tausaina o le tasi ma le isi ma le aveina ifo o upu o le ola e faavavau i le taele o o tatou loto.

O la’u tatalo ia toatele i tatou o le a faatasi i le lumanai mamalu o loo i o tatou luma atu. Ou te molimau atu ia te outou o lo outou faamoemoe mo na aso o le a faamaoniaina. Ua mafai lena mea ona o Iesu Keriso e ala i Lana Togiola e le gata mo outou taitoatasi. E faafofoga ma tali mai le Tama Faalelagi i au tatalo o le faatuatua mo le taitaiga ma mo le fesoasoani e onosai ai i lau auaunaga mo Ia.

Ua auina atu le Agaga Paia ia te oe ma i latou o loo e tausia. O le a faamalosi oe ma musuia oe ia iloa tuaai ma le tele o lou gafatia e auauna atu ai. O le a faamafanafanaina oe e le Agaga pe a e tuufesili, “Sa lava ea mea na ou faia?”

Ou te molimau atu o le a faatasi le Alii ma oe ma o le a saunia lou ala, ma Ia faailogaina mo oe i lau auaunaga ia i latou e alofa i ai o Ia i o latou manaoga ma tofotofoga. I le suafa paia o Iesu Keriso, amene. ■

FAAMATALAGA

1. Lucy Mack Smith, i le *O Afafine i Lo’u Malo: O Le Talafaasolopito ma le Galuega a le Aualofa* (2011), 25.
2. Brigham Young, i le *O Afafine i Lo’u Malo*, 36.
3. Lucy Meserve Smith, i le *O Afafine i Lo’u Malo*, 37.
4. Lucy Meserve Smith, i le *O Afafine i Lo’u Malo*, 37.
5. Mataio 25:40.
6. Mosaea 4:26.
7. Mosaea 4:27.
8. Mataupu Faavae ma Feagaiga 121:8.

Faasino Upu o Tala o le Konafesi

O le lisi lea o aafiaga na filifilia mai saunoaga o le konafesi aoao, e mafai ona faaaoga i suesuega a le tagata lava ia, afiafi faaleaiga, ma isi aoaoga. O loo lisi atu le au failauga i le faasologa faaalafapeta, ma o numera e faasino i le itulau muamua o le lauga.

FAILAUGA	TALA
Neil L. Andersen	(39) E lei faavaivaia le faatuatua o se aiga ina ua mavae le maliu o lo la'ua afafine.
Shayne M. Bowen	(15) Na aoao e Shayne M. Bowen ma lana soa faifeautalai se aiga, e le manaomia ona papatisoina tamaiti laiti.
Linda K. Burton	(78) Na fesoasoani se tamaiti ia Linda K. Burton i lana malaga lona lua ina ua faatoa faaipoipo i le malumalu. (111) Na maliu le toalua ma se tama a Paionia Lois Walker a o latou laasia laufanua valevalenoa.
Craig C. Christensen	(12) Na lagonaina e Ben Christensen ina ua faatoa ono ona tausaga le Agaga Paia a o ia asiasi atu i se malumalu na tatala mo maimoaga.
D. Todd Christofferson	(47) Sa galue malosi se alii talavou i Initia e fesoasoani i lona aiga ma alu i le a'oga.
Quentin L. Cook	(6) Sa le taliaina e Eric Liddell o se tagata taalo Olimipeka i Peretania ona tamoe i se tuuga i le Aso Sa.
Ann M. Dibb	(10) Sa ofuina ma le mautinoa e se tamaitai talavou se mitiafu na folafola atu ai le avea o ia ma se tasi o le Ekalesia.
Larry Echo Hawk	(32) Na maua e le faiaoga faamalositino o Larry Echo Hawk lana kopi o le Tusi a Mamona.
Henry B. Eyring	(60) Na vaneina e Henry B. Eyring se laupapa mo ona atalii taitoatasi e avea o se meaalofa faapitoa. (72) Na sue e le afafine o se tasi o le fanau a Henry B. Eyring ia lesu i se taimi na tatala ai le malumalu mo maimoaga. (72) Na tuua e Henry B. Eyring le lunivesite o Stanford e faigaluega i Ricks College. (72) Na tatalo le toalua o le atalii o Henry B. Eyring i le matafaga ma tuuto atu lona taimi i le Alii.
Robert C. Gay	(34) Na fesili le tamā o Robert C. Gay ia te ia, pe na te faatuaina atu lona agaga mo se limasene. (34) Na mulimuli Robert C. Gay i se uunaiga e fesoasoani i se tamaitiiti na tagi masusu i autafa o le auala.
Daniel L. Johnson	(101) Na auai atu ni Au Paia o Aso e Gata Ai i le malumalu ina ua uma ona faatamaiaina e se afa fua o a latou togalaau aina.
Thomas S. Monson	(68) Na ofo ia N. Eldon Tanner i le vaai atu i ni alii se toafa ua siitia o latou perisitua. (68) Na maua e Thomas S. Monson se musumusuga e valaau peresitene o paranesi. (68) Na tuuina atu e John H. Groberg lana molimau i le tupu o Tonga. (86) Na mulimuli Thomas S. Monson i se uunaiga e ofo atu ni fautuaga e uiga i le galuega faafaifeautalai. (86) Na mulimuli Thomas S. Monson i se uunaiga e asiasi i se uo i le falemai. (86) Na uunaia e Thomas S. Monson se alii talavou e alu e faamisiona. (86) Na tali mai se tatalo a le autalavou i se faafiafiaga faaleaganuu.
Russell M. Nelson	(18) Na tali atu se tamaloa i se uunaiga e "taofi tama la e o mai i uila."
Russell T. Ogusthorpe	(96) Na fesoasoani ni talavou o le Aoga Sa i ni alii se toalua e vaivai o la'ua mafaufau e faasoa mea sa la aoaoina.
Boyd K. Packer	(75) Na taia le vaa na malaga ai Boyd K. Packer e se afa matautia i le vasa i Samoa i Sisifo.
Linda S. Reeves	(118) Na liliu atu Linda S. Reeves i le Atua ina ua ma'i lona toalua.
Richard G. Scott	(93) Na faavasega e le autalavou i Rusia ni igoa e 2,000 a le tagata ma auina atu se igoa o se tuua mo galuega faalemalumalu.
Carole M. Stephens	(115) Na fesoasoani tamaitai talavou i le tasi ma le isi i le taimi o la latou malaga sopo faapaionia.
Gary E. Stevenson	(51) Na tuua e se tama a'oga i le kolisi se pati i lapani ina ua uma ona ia teena ni sikareti maruana.
Scott D. Whiting	(37) Na toe faalelei e konekarate o le malumalu ni nai faaletonu iti i le Malumalu o Laie Hawaii.

Ua Tuu i Lalo le Tulaga Manaomia o le Matutua o Faafeautalai Faamisiona

Saunia e Heather Whittle Wrigley

Talafou o le Ekalesia ma Mea Na Tutupu

I le tatalaga o le Konafesi Aoao Lona 182 Faaleafatausaga, sa faia ai e Peresitene Thomas S. Monson se faasalalau faapea, o le a amata i le taimi lava lenei, ona mafai ona auuna atu faafeautalai faamisiona ia alii i le 18 tausaga ao tamaitai o le 19 tausaga.

Mulimuli ane, i se fonotaga ma le au faasalalau, sa faamamafaina atu ai e Elder Russell M. Nelson o le Korama a Aposetolo e Toasefululua faapea o lea suiga e faia i ai se filifiliga: “E le tatau i alii talavou ma tamaitai talavou ona amataina la latou auunaga sei vagana ai ua latou saunia faaleagaga ma le faaletino,” na ia saunoa ai. O mea nei e pei o le aoga, tulaga

faaleaiga, ma le soifua maloloina o loo tumau pea ona avea ma mea taua e mafaufau i ai mo le taimi e auuna atu ai faamisiona.

Sa faamatalaina e Elder Jeffrey R. Holland o le Korama a Aposetolo e Toasefululua faapea, o i latou ua faaolioli e avea ma faifeautalai e mafai ona fautuaina mai e o latou epikopo ma peresitene o le siteki mo le galuega faafeautalai i le 120 aso ao lei atoa lo latou 18 tausaga po o le aso latou te avanoa ai. E mafai ona ulufale ia alii talavou i le nofoaga autu mo le aoaoina o faifeautalai (NAF) pe a uma ona faauu mai le aoga maua luga po o se tulaga talitutusa atoa ai ma le ausia o lona 18 tausaga. E mafai ona ulufale ia tamaitai pe a atoa lo latou ta’i 19 tausaga.

Ua mafai nei e alii ma tamaitai talavou ona amata galulue o ni faifeautalai i le 18 ma le 19 tausaga, i lona faasologa, e fuafua i tulaga o tagata taitoatasi ma se naunautaga o taitai perisitua i le lotoifale.

Ua talosagaina ia faifeautalai faaolioli ina ia tapena lelei mo le misiona ao lei oo i le taimi latou te o atu ai i le NAF.

“Ua faatele’a’i e le Atua Lana galuega,” o le saunoaga lea a Elder Holland. “Ma ua ia manaomia nisi faifeautalai naunautai e toatele ma le agavaa e faasusulu atu le malamalama ma le upumoni ma le faamoemoe ma le faaolataga o le talalelei a Iesu Keriso i se lalolagi ua matele ina pogisa ma tauaafefe.”

Na saunoa Elder Holland atonu o le a i ai nisi misiona e faatuina.

Ina ia fesoasoani i le faatinoina o le faateleina o faifeautalai lea ua faamoemoe i ai i misiona i le salafa o le lalolagi, o le a faaititia ai le taimi e faaalu i le NAF i le tasi vaetolu mo faifeautalai uma. O le a fesoasoani atili i le tapenaina o faifeautalai se kosi faaleaoaoga e 12 vaiaso lea na faatoa faatulagaina e faaaoaga i le misiona. ■

Faitau atili i ai e ala i le sailiili i le “tulaga manaomia o le matutua o faifeautalai” i le news.lds.org.

O Aoaga Mo O Tatou Taimi

Mai ia Oketopa 2012 e oo atu ia Mati 2013, Aso Sa lona fa, o lesone a le au Perisitua Mekisateko ma le Aualofa e tatau ona saunia mai se lauga se tasi pe sili atu foi na tuuina mai i le konafesi aoao ia Oketopa 2012. Ia Aperila 2013, e mafai ona filifili mai lauga mai le konafesi ia Oketopa 2012 po o Aperila 2013. E tatau i peresitene o Siteki ma itu ona filifilia lauga e faaaoaga i o latou eria.

Aoao atili e ala i le sutesue i le vaega “O Aoaga mo o Tatou Taimi” i le *Liahona*, Me 2012 (lds.org/liahona). ■





O le Sau, Mulimuli Mai ia te Au o se mataupu aoaoina fou o le a fesoasoani i faiaoga e aoao atu i le ala a le Faaola ma fesoasoani ai i le autalavou ina ia liua atoatoa i le talalelei.

Ua Faalauiloa Mai e le Ekalesia le Mataupu Aoaoina Fou mo le Autalavou mo le 2013

Ua faalauiloa mai e le Ekalesia se mataupu aoaoina fou—*Sau, Mulimuli Mai ia te Au: O Punaoa e Aoao Ai mo le Autalavou*—e mo Korama a le au Perisitua Arona, Tamaitai Talavou, ma vasega a le autalavou i le Aoga Sa mo le 2013.

O se tasi o sini autu o le *Sau, Mulimuli Mai ia te Au* o le fesoasoani lea i faiaoga—i le lotu atoa ai ma le aiga—ina ia aoao atu faapei o le Faaola, ma ia avea atili lesone o ni talanoaga e totonugalemu i le talalelei. O le a valaauliaina le autalavou ia avea ma a latou mafaiaioi sili atu le aoao atu ma le aoao mai.

“O le taulaiga autu o le faamalolo-sia lea ma le fausiaina o le faatuatua, liua, ma molimau, e faaoga ai aoaoga sili ona lata mai mai le Au Pulega Aoao ma au peresitene aoao o ausilali,” o se tusi lea mai le tusi a le Au Peresitene Sili i le aso 12 Setema, 2012.

Sau, Mulimuli Mai ia te Au ua mamauina i ni iunite lea e taulai atu i se autu faaleaoaoga faavae se tasi i masina taitasi ma e faaogaina uma i vasega o le Aoga Sa, Tamaitai Talavou, ma le au Perisitua Arona.

E tofu le iunite ma ni lesone e sili atu nai lo le mea e mafai ona aoao atu

i se masina se tasi, ma ua talosagaina ai faiaoga ma taitai ina ia sailia musumusuga ma ia feutagai e filifili po o fea o oototoga o lesone e faaoga.

O le a fesoasoani se tusitaiala fou, *Aoao Atu le Talalelei i le Ala a le Faaola*, i taitai ma faiaoga ina ia malamalama atili i le auala e fetuunai ai lesone e tusa ai ma manaoga uiga ese o a latou talavou ma pe faapefea ona fesoasoani i le autalavou e aoao le talalelei.

E mafai ona lolomiina uma lesone mai le Initoneti. O le a maua ni lomiga ua lolomiina o le *Sau, Mulimuli Mai ia te Au* i se taimi mulimuli ane. E oo atu i le faaiuga o le 2012 o le a maua ia oototoga o lesone i luga o le initoneti i gagana e 23.

E mafai e tagata o le ekalesia, taitai, ma faiaoga ona sailiili i le mataupu aoaoina fou i luga o le initoneti i le **lds.org/youth/learn**.

O le a saunia e taitai o le eria ma le lotoifale ni fonotaga faaleaoaoga mo taitai ma faiaoga a o lei oo i le faaiuga o le 2012. ■

Aoao atili i ai i le news.lds.org. Tagai foi i le itulau e 96 o le lomiga lenei.

Ua Fesoasoani ni Punaoa Fou i Tagata o le Ekalesia e Saunia ia Igoa Faaleaiga

I se tusi na tusia i le aso 8 Oketopa, 2012, na valaaulia ai e le Au Peresitene Sili ia tagata o le ekalesia—e faapitoa lava i le autalavou ma le autalavou nofofua matutua—ina ia maua ni faamanuiaga atoatoa o le malumalu e ala i le sauniaina o igoa o o latou lava aiga e ave i le malumalu.

Ma le isi, [ua talosagaina] i latou e “tele igoa o o latou aiga o loo teuina, ia faamatuu mai nei igoa i se taimi faatulagaina lelei ina ia mafai ai ona faatino ia sauniga talafeagai.”

Ina ia fesoasoani i tagata e tali atu i le valaau a le Au Peresitene Sili, o lea ua mamauina ai e le Ekalesia ni punaoa fou ma ni tomiai fou, e mafai ai ona maua i gagana e 10 i le familysearch.org.

O se faafouga lata mai o le new.familysearch.org ua taua o le Family Tree, mo se faataitaiga, ua maua ai se metotia sili atu i a tatou talafaasolopito o aiga e ala i le faataagaina o tagata faaoga e (1) fesootai ma galulue faatasi ma e tutusa gafa, (2) faafou ma tape ese ni faamatalaga e le sao, ma le (3) ua faigofie ona auina atu ia igoa o tuua mo sauniga o le malumalu. Ua mafai foi e tagata faaoga ona maua vitio i le “Assigning Names to the Temple” ma isi aoaoga i le familysearch.org/treetraining. ■



Elder Craig C. Christensen

*O Le Au Peresitene
o Fitugafulu*

Na amata ona galue Elder Craig C. Christensen o se sui o le Au Peresitene o Fitugafulu i le aso 1 Aokuso, 2012, ina ua mavae le valaauina o ia i lena tofiga ia Aperila 2012.

O ona matua o Sheron ma Colleen Christensen ma sa soifua mai o ia i le Aai o Sate Leki, Iuta, ISA, ia Mati 1956, o Elder Christensen na ola ae i Kalefonia matu i “se aiga AAG toaaga ma malolosi.” Na ia faamamafa mai sa ia talitonu lava e moni le talalelei, peitai na faamalosia atili lana molimau i le taimi na ia galue ai faafaifeautalai faamisiona i Chile.

“I le avea ai ma se faifeautalai, sa avea ma se mea tumau lou naunautaiga ina ia lagonaina le Agaga Paia, ma sa faateleina lau molimau ma na avea atili ai ma se mea moni ia te au,” na ia saunoa ai. I lana misiona sa ia maua le fiafia i le Tusi a Mamona, lea o loo faaauau ai pea i ana aoaoga i le aso.

Sa avea Elder Christensen ma se sui o le Korama Muamua ma le Lona Lua o Fitugafulu talu mai le 2002. O lona tofiga sili ona lata mai lea na ia galue ai o se Pule Faatonusili o le Matagaluega o le Perisitua. O ona tofiga na galue ai muamua e aofia ai le avea ma peresitene o le Eria a Mexico i Saute, peresitene o le Misiona a Mexico City East, epikopo, fautua maua luga, ma peresitene o le misiona a le siteki.

O Elder Christensen e i ai sona faailoga o le tagata malaga i le suetusi mai le Iunivesite o Polika Iaga ma se faailoga o le matuaofaiva i pulega o mea tau faapisinisi mai le Iunivesite o Uosigitone. Na te umiaina ma faatautaia ni ana lava pisinisi o mea tautaaavale e faatau atu ma pisinisi o fanua faatau atu, ma o se faiaoga e feasisiaai i le tele o iunivesite.

Na faaipoipo Elder Christensen ma Debora Jones i le aso 28 Mati, 1978. O loo alala nei i laua i Holladay, Iuta, ma le la fanau e toafa ma fanau a fanau e toalima. ■

Au Peresitene Aoao o Ausilali


AUALOFA



Carole M. Stephens
Fesoasoani Muamua



Linda K. Burton
Peresitene



Linda S. Reeves
Fesoasoani Lua


TAMAITAI TALAVOU



Mary N. Cook
Fesoasoani Muamua




Elaine S. Dalton
Peresitene



Ann M. Dibb
Fesoasoani Lua


PERAIMERI



Jean A. Stevens
Fesoasoani Muamua



Rosemary M. Wixom
Peresitene



Cheryl A. Esplin
Fesoasoani Lua

ALII TALAVOU



Larry M. Gibson
Fesoasoani Muamua



David L. Beck
Peresitene



Adrián Ochoa
Fesoasoani Lua

AOGA SA



David M. McConkie
Fesoasoani Muamua



Russell T. Osguthorpe
Peresitene



Matthew O. Richardson
Fesoasoani Lua



**O Se Laa
o le Faatuatua,
saunia e
Michael T. Malm**

*“Ua iloa mai e le au
soo [Iesu] ua savali i
luga o le vai, ona latou
atuatuva ai lea. . .*

*“Ona fetalai atu loa
lea o Iesu ia te i latou,
ua faapea atu, Ia outou
loto tetele; o a’u lava;
aua tou te matatau.*

*“Ua tali mai Peteru
ia te ia, ua faapea mai,
Le Alii e, afai o oe, ia
e fetalai mai ia te au,
ou te alu atu ia te oe
i luga o le vai.*

*“Ona fetalai atu
ai lea o ia, Ina sau
ia. “Ona alu ifo ai
lea o Peteru nai le
vaa, ua savali i luga
o le vai, e alu ia Iesu”
(Mataio 14:26–29).*



“Ou te fiafia e faasilasila atu ua amata nei loa lava, o alii talavou uma e agavaa ma gafatia, o e ua faauu mai aoga maualuga pe o isi aoga e tutusa ma le maualuga lena, tusa lava po o fea e nonofo ai, o le a maua le avanoa lena e fautuaina atu ai mo le galuega faafaifeautalai e amata i le 18 tausaga, ae le o le 19,” na fofogaina mai e Peresitene Thomas S. Monson i le sauniga amata o le Konafesi Aoao Lona 182 Faaleafatausaga. Na ia saunoa foi, “O le asō, ua ou fiafia e faasilasila atu, o tamaitai talavou e gafatia, ma agavaa ma ua i ai le manao e faamisiona, e mafai ona fautuaina atu mo le galuega faafaifeautalai e amata i le 19 tausaga, nai lo le 21.”